

PHILOSOPHIA
PER ARGVMENTA
BREVITER EXPLICATA,

AD VSVM, ET EXEMPLVM
huius scientiæ studio vacantium.

Auctore P. GVILLELMO CHABRONO,
è Societate IESV.

TOMVS QVARTVS
MORALIS.



PARISIIS,

Apud GASPARVM METVRAS, patrem &
filium, viâ Iacobæâ sub signo SS. Tri-
nitatis, prope Mathurinenses.

M. DC. LXIV.

CVM PRIVILEGIO REGIS.

INDEX
DISPUTATIONVM,
ET SECTIONVM,
Quæ in hoc quarto tomo conti-
nentur.

TRACTATUS VNICVS
MORALIS.

DISPUTATIO I.

<i>De Bono, Fine, & Fœlicitate.</i>	2
SECTIO I. <i>De Bono, quid sit, & quotuplex.</i>	3
SECTIO II. <i>De Malo.</i>	7
SECTIO III. <i>An malum quæd malum amari pos-</i> <i>sit, & bonum odio haberi.</i>	24
SECTIO IV. <i>De Fine.</i>	35
SECTIO V. <i>In quo consistat beatitudo hominis</i> <i>obiectiua.</i>	51
SECTIO VI. <i>In quo consistat beatitudo hominis</i> <i>formalis.</i>	55
SECTIO VII. <i>An status puræ nature sit possi-</i> <i>bilis.</i>	72
SECTIO VIII. <i>De Appetitu beatitudinis.</i>	90

DISPUTATIO II.

De actibus humanis, & affectionibus eo-
rum.

SECTIO I. <i>De actibus voluntatis in comuni-</i> <i>ibidem.</i>	106
---	-----

INDEX DISPUTATIONVM,

SECTIO II. *Quid sit actus humanus, & moralis.*
110

SECTIO III. *Quid sit voluntarium.* 114

SECTIO IV. *Quibus, & quomodo conveniat ratio voluntarij.* 116

SECTIO V. *An dari possit pura emissio libera.*
123.

SECTIO VI. *An violentia, & metus causent involuntarium simpliciter.* 133

SECTIO VII. *An concupiscentia causet involuntarium.* 143

SECTIO VIII. *An ignorantia causet involuntarium.* 150

SECTIO IX. *De Libero.* 157

SECTIO X. *De Bonitate & malitia, & quam sit regula humanorum actuum.* 269

SECTIO XI. *An dentur actus indifferentes in individuo.* 278

DISPUTATIO III.

De Passionibus. 288

SECTIO VNICA. *Quid sit Passio, & quatuorplex.* ibidem

DISPUTATIO VLTIMA.

De Virtutibus. 293

SECTIO VNICA. *Quid sit virtus, & quatuorplex.* ibidem



TRACTATUS

VNICVS

MORALIS.

DEMONSTRATIONES, quas habet Moralis Philosophia de Felicitate, bono, & ultimo fine, certum faciunt eam esse scientiam, & quidem practicam, cum in eo versetur ut præscribat modum, quo fieri debent actus nostræ voluntatis, ut honesti sint, & laudabiles, in quo differt à Physica, quæ eosdem considerat, ut sunt actus vitales.

Præcipua eius diuisio est in Monasticam, Oeconomicam, & Politicam. Prima docet quomodo se gerere debeat natura intellectualis in ordine ad se, seu extra societatem: secunda in ordine ad familiam, seu minimam societatem: & tertia in ordine ad ciuitatem, sub qua cōprehenduntur regna, & respublicæ, vocaturque societas artificialis, ad differentiam primæ, quæ dicitur naturalis propterea quod facta sit à natura virum, & uxorem coniungente in procreationem, & educationem liberorum.

2 TRACT. VNIC. MORAL. DISP. I.

Cæterum duo obseruanda sunt ex Philosopho in huius scientiæ tractatione. Primum est, iuuenes esse minùs idoneos facultatis istius auditores ex duobus capitibus: vnum est, quia non habent experientiam, & vsum rerum necessarium ad percipienda principia moralia, quæ ex iis desumuntur: Aliud est, quia rapti violentia passionum exequuntur difficiliùs, quæ præscribit Moralis.

Secundum quod vult obseruari Aristoteles, est cum sæpè principia istius scientiæ sint tantùm ea, quæ vt plurimùm vera sunt, sæpè etiam eius conclusiones esse tantùm de iis, quæ vt plurimùm vera sunt, & absolutè aliter se habere possunt.



DISPUTATIO I.

De Bono, Fine, & Fœlicitate.



Vt bonum sit finis, & aliquis finis fœlicitas, & beatitudo, trium horum tractationem eidem disputationi tribuimus.

SECTIO PRIMA.

De Bono, quid sit, & quod simplex.

DI X I M V S in Metaphysica bonum esse vnum ex tribus attributis entis, statuímusque idem esse ac perfectum in suo genere, seu, id cui ad eam rationem, quam habet, nihil deest, propterea quod in bono nihil aliud sit prius eo, quod est esse perfectum, & alia quæ dicuntur de bono orientur ab eo, quod est esse perfectum. Præcipuum ex huiusmodi consequentibus est esse conueniens, per quod formari potest descriptio boni, vt sequitur.

PRIMA CONCLUSIO:

Bonum idem est, ac conueniens.

N O M I N E boni nihil aliud intelligunt homines, quàm id, quod est conueniens: ergo bonum idem est, ac conueniens.

Antecedens pr. Nomine boni intelligunt homines id, quod potest allicere nostrum appetitum; atqui id, quod est conueniens allicere potest nostrum appetitum: ergo nomine boni intelligunt id, quod est conueniens.

4 TRACT. VNIC. MORAL. DISP. I.
SECUNDA CONCLUSIO:

Non est aliud bonum ab honesto, iucundo, & utili.

QVIdQVId est conueniens est honestum, iucundum, aut utile: ergo non est aliud bonum ab honesto, iucundo, aut utili.

Antecedens pr. Quidquid est conueniens, vel hoc habet, quod deceat naturam rationalem, vel quod afferat delectationem, vel quod conferat ad obtinenda duo illa; atqui quod decet naturam rationalem est honestum, quod affert delectationem iucundum, & quod conducit ad illa duo obtinenda utile: ergo quidquid est conueniens est honestum, iucundum, aut utile.

Obiicies. Illud non est bonum quod non habet veram, & propriam bonitatem; atqui utile non habet veram, & propriam bonitatem: ergo utile non est bonum.

Minor pr. Quod habet tantum bonitatem alienam non habet veram, & propriam bonitatem; atqui utile habet tantum bonitatem alienam: ergo non habet veram, & propriam bonitatem.

Minor probatur. Illud habet tantum bonitatem alienam, quod non amatur propter se; atqui utile non amatur propter se: ergo habet tantum bonitatem alienam.

Solutio: Illud habet tantum bonitatem alienam quod non amatur propter se de facto, neque potest amari, Concedo. quod licet non ametur de facto propter se potest tamen amari, Nego. atqui utile non amatur propter se de facto, Concedo. & non

de Bons , Fine , & Fælicitate. 5

põteſt amari , Nego. Ratio eſt, quia cùm omnis perfectio ſit amabilis , & conducibilitas ad aliud , quæ eſt in utili , ſit perfectio , negari non poteſt quin poſſit amari propter ſe , quamvis quatenus comparatur cum eo alio bono , ad quod conducit, ametur propter illud.

Contrà. Ex conceſſis quod de facto non amatur propter ſe , neque poteſt amari , non habet de facto veram , & propriam bonitatem ; atqui utile , quâ utile non amatur de facto propter ſe , neque poteſt amari : ergo non habet veram , & propriam bonitatem.

Solutio : Quod de facto non amatur propter ſe , neque poteſt amari , non habet de facto veram , & propriam bonitatem , primò motiuam voluntatis , Concedo. non primò motiuam , motiuam tamen , Nego. & conceſſa minori : ergo utile , quâ utile non habet veram , & propriam bonitatem primò motiuam voluntatis, Concedo. non primò motiuam, motiuam tamen, Nego. Verum quidem eſt utile, & conducibile ad aliud ſub ea ratione non mouere primo & allicere ad ſe voluntatem , ſed tantùm illud aliud , ad quod eſt conducibilitas ipſius. Hoc tamen non impedit , quin hæc ipſius conducibilitas verè , & propriè ametur. Cùm enim ſit obiectum actus proſecutiui , non poteſt dici non amari , & deinde cùm ſæpè præferatur alteri conducibilitati , & hæc prelatio ſit propriiſſimè affectus erga ipſam , tum maximè cùm oritur ex maiortate , & exceſſu conducibilitatis ſupra aliam , clarum eſt vere amari , amore ſcilicet propter aliud , qui cùm ſit verus & proprius amor , non minus quàm amor propter ſe denominat etiam pari-

6 TRACT. VNIC. MORAL. DISP. I.

ter suum obiectum amatam, & supponit in eo veram bonitatem, & propriam amabilitatem.

TERTIA CONCLUSIO:

Alia diuisio boni in summum, & non summum est etiam adæquata.

NULLUM potest assignari bonum, quod non sit summum, aut non summum: ergo diuisio boni in summum, & non summum est adæquata.

Antecedens pr. Summum bonum est illud, quod potest satiare appetitum, & non summum, quod non potest illud satiare; atqui nullum est bonum, in quo non sit quo satiari possit appetitus, aut non possit satiari: ergo nullum potest assignari bonum, quod non sit summum, aut non summum.

Minor pr. Nullum est bonum, in cuius possessione non quiescat appetitus, & nihil ultra appetat, vel non quiescat, & aliquid aliud præterea appetat; atqui appetitus satiari potest eo, in quo quiescit, & non satiari eo, in quo non quiescit: ergo nullum est bonum, in quo non sit, quo satiari possit appetitus, aut non possit satiari.

Existimant aliqui neminem planè esse, cuius animo non obuersetur continuò summum bonum verum, vel apparens, & ab eius voluntate non tantùm ametur semper, sed etiam ex eius amore agat quidquid facit. Id an verum sit suo loco examinabimus.

SECTIO II.

De Malo.

MALUM aliud est in se, & aliud alteri: de utroque dicemus quid sint.

PRIMA CONCLUSIO:

Malum absolutè sumptum, & in se est minus bonum, seu ens defectuosum, & imperfectum.

MALUM absolutè, & in se est vel minus bonum, vel non bonum; atqui non est non bonum: ergo est minus bonum.

Minor pr. Non bonum est non ens; atqui malum non est non ens: ergo malum non est non bonum.

Maiores probatur primò.

Non bonum non est ens: ergo est non ens.

Antecedens pr. Quod est ens est bonum; atqui non bonum non est bonum: ergo non bonum non est ens.

Minor pr. Bonum est attributum entis, & cum eo conuertitur: ergo quod est ens est bonum.

Minor superioris argumenti, malum non esse non ens, probatur.

Odiū Dei, error, & dolor sunt mala in se; atqui non sunt non ens: ergo malum in se non est non ens.

Minor pr. Priuationes amoris Dei, scientiæ, & voluptatis sunt mala in se: ergo & odiū Dei, error, & dolor.

8 TRACT. VNIC. MORAL. DISP. I.

Consequentia pr. Quod est peius eo, quod est malum in se, est verè malum in se, & in sua entitate; atqui odium Dei, error, & dolor sunt quid peius priuationibus amoris Dei, scientiæ, & voluptatis: ergo odium Dei, error, & dolor sunt malum in se, & in sua entitate.

Minor pr. Peius est odisse Deum, habere errorem, & dolere, quàm non habere amorem Dei, scientiam, & voluptatem: ergo odium Dei, error, & dolor sunt quid peius priuationibus amoris Dei, scientiæ, & voluptatis.

Obiicies. Malum in se, & absolutè, est non ens: ergo non est ens minùs perfectum, defectuosum, aut imperfectum.

Ancecedens pr. Malum in se & absolutè non est ens: ergo est non ens.

Antecedens pr. Omne ens est bonum; atqui malum non est bonum: ergo malum non est ens.

Solutio: Ens est bonum bonitate transcendentali, Concedo. bonitate naturali, aut morali, Nego. atqui malum non est bonum bonitate transcendentali, cui non opponitur, Nego. bonitate naturali, aut morali, Concedo.

Contrà. Quod est bonum bonitate etiam transcendentali, non potest esse malum: ergo quod est malum non potest esse bonum bonitate transcendentali.

Solutio: Quod est bonum bonitate etiam transcendentali non potest esse malum malitia transcendentali illi opposita, Concedo. Nulla enim huiusmodi datur, siquidem nihil aliud ei opponitur, quàm non bonitas, & negatio entis. Malitia naturali, aut morali, Nego.

de Bono , Fine , & Fœlicitate. 9

Contrà. Quod est bonum bonitate transcendentali est perfectum in suo genere ; atqui quod est perfectum in suo genere non est malum malitia naturali, aut morali : ergo quod est bonum bonitate transcendentali non est malum malitia naturali, aut morali.

Minor pr. Quod est perfectum non est non perfectum ; atqui malum malitia naturali, aut morali est non perfectum : ergo quod est perfectum in suo genere non est malum malitia naturali, aut morali.

Solutio : Quod est perfectum perfectione transcendentali non est non perfectum perfectione naturali, aut morali, Nego perfectione transcendentali, & eiusdem generis, Concedo. atqui malum malitia naturali, aut morali est non perfectum perfectione naturali, aut morali, Concedo. perfectione transcendentali, Nego.

Contrà. Malum quod est perfectum perfectione transcendentali, est etiam perfectum perfectione naturali, aut morali : ergo nulla solutio.

Antecedens pr. Quod est perfectum, & est in genere naturæ, aut moris est perfectum perfectione naturali, aut morali ; atqui malum ex concessis est perfectum, & illa eius perfectio est in genere moris aut naturæ : ergo est etiam perfectum perfectione naturali, aut morali.

Solutio : Neganda est maior. Ratio est, quia non quævis perfectio entis naturalis, aut moralis est perfectio, quæ appellatur naturalis, aut moralis. Ad istas enim perfectiones non sufficit quod aliquid quocunque modo sit perfectio ; & sub quacunque ratione. Primo enim cum perfectio & bonitas nat-

IO TRAC. VNIC. MORAL. DISP. I.

turalis absolute, & simpliciter dicta sit summa perfectio & bonitas, quæ reperiuntur in solo Deo, ut testatur Christus, cum ait, Nemo bonus nisi solus Deus: clarum est entia alia creata carere bonitate illa naturali, & eamens esse mala, seu entitates ipsorum esse defectuosas, & imperfectas, atque ita bonitatem illorum transcendentalem esse imperfectionem, & malitiam naturalem, seu entitatem, quæ non habet tantum perfectionis quantum alia.

Contrà. Non perfectio seu minor perfectio siue naturalis, siue moralis non potest esse perfectio transcendentalis: ergo nulla solutio.

Antecedens pr. Deus est causa omnis perfectionis transcendentalis; atqui non est causa imperfectionis naturalis, & multo minus moralis: ergo imperfectio naturalis, aut moralis, non est perfectio transcendentalis.

Solutio: Deus est causa omnis perfectionis transcendentalis per se, vel per accidens, Concedo. per se tantum, Nego. atqui Deus non est causa imperfectionis naturalis, & multo minus moralis per se, Concedo. per accidens, & permissiue, Nego. Deus non est causa per se imperfectionis moralis, quia ut diximus in Physica disp. de causa efficiente sect. secunda, conelusione prima, non concurrat ad illam, neque determinatus in actu primo, neque se determinans in actu secundo, quorum alterum requiritur necessariò ad veram causam per se, ut declarari potest exemplis physicis, & moralibus: Exemplum physicum esse potest claudicatio, & inuentio thesauri, ad quas licet concurrant, ad istam quidem potentia progressiua, ad istam verò fo-

diens terram in loco ubi latet thesaurus, non dicuntur tamen causa per se claudicationis, & inventionis thesauri, quia prima non est ordinata à natura ad claudicationem, sed ad motum uniformem, & secundus inuenit præter intentionem thesaurum.

Exemplum morale est in eo, qui petit mutuum ab usurario quem certo scit non daturum sine usura, cuius tamen petitio non censetur causa moralis dationis usuraria, quia mallet ipse mutuum sine usura, & inuitus valde illud recipit reddendum cum usura. Ex quibus patet Deum concurrere ad actum malum indifferenter non modo, quia ad illum applicat suam omnipotentiam per decretum indifferens, & ad illum concurrit determinatus à voluntate creata, quæ agit immediatè ex cognitione indifferenti, & tribuente potestatem agendi, & non agendi; sed etiam, quia diuina omnipotentia per se ordinatur, & naturâ suâ, & ex ordinatione diuine voluntatis ad bonum, non ad malum: quo fit præterea, ut licet habitus (quantumuis determinetur ad operandum à voluntate) dicatur, & sit verè causa naturalis actus etiam mali, quia eius virtus per se ordinatur ad illum, Deus tamen non possit dici causa actus mali, possit verò, & verè sit causa actus boni, tum moralis, quia ad illum concurrit suadendo, precipiendo, mouendo, tum physica, quia illum intendit, eiusque virtus ad illum per se ordinatur; & dedit nobis facultatem arbitrii, eamque conseruat, ut ait S. Augustinus l. 2. de libero arbitrio cap. ult. & lib. 3. cap. 1. & 6. ut bonè, & conformiter rectæ rationi operemur.

12 TRACT. VNIC. MORAL. DISP. I.

Contrà. Deus quantumvis concurrens indifferenter ad actum illum, qui est imperfectio moralis, non potest negari esse causa moralis illius: ergo non concurrit indifferenter, & non debet dici tantum causa per accidens illius.

Antecedens pr. Qui potest facile impedire imperfectionem moralem alterius, & eam non impedit, est causa moralis illius; atqui Deus potest facile impedire imperfectionem moralem creaturarum liberarum, & tamen eam non impedit: ergo est causa moralis illius.

Solutio: Qui potest facile impedire imperfectionem moralem alterius, & eam non impedit, est causa moralis illius, si teneatur illam impedire, & non habeat ius illam non impediendi, Concedo. si non teneatur illam impedire, & habeat ius illam non impediendi, Nego. atqui Deus potest facile impedire imperfectionem moralem creaturarum, & tamen eam non impedit, quia non tenetur eam impedire, & habet ius eam non impediendi, Concedo. & tenetur eam impedire, & non habet ius eam non impediendi, Nego. Ratio quare Deus non teneatur impedire aliter quam proposition: pœnarum, & premiorum imperfectiones nostras morales, & ruinam spiritalem suarum creaturarum, est, quia hæc obligatio nasci non potest in ipso, neque ex parte creature, quæ nullum acquirere potest ius contra ipsum, cum quidquid habet ab ipso habeat, & dederit ipsi auxilia sufficientia ad vitandam ruinam illam spiritalem: neque etiam ex parte ipsius Dei, qui potest non sibi velle omnem gloriam extrinsecam, quam accipere posset à creaturis. Nihil enim sibi amat necessario, quam bona sua intrin-

Rea, quæ sola digna sunt amore ipsius necessario, & infinito.

SECUNDA CONCLUSIO :

Malum alteri seu illi disconueniens non est necessario non ens.

QVOD potest esse ens non est necessario non ens; atqui malum alteri potest esse ens: ergo non est necessario non ens.

Minor pr. Multa sunt entia quæ sunt mala aliis: ergo malum alteri potest esse ens.

Antecedens pr. Calor dicitur, & est malus aquæ, frigus igni: error intellectui, & dolor animalis: ergo multa entia dicuntur, & sunt mala aliis.

Respondent: Calor dicitur, & est malus aqua (& par est ratio de aliis allatis) secundum se, & in sua entitate, Nego. propterea quod priuet illam suo frigore, Concedo. ergo multa entia dicuntur, & sunt mala secundum se, & in sua entitate, Nego. quatenus priuant subiectum suum forma illi conaturali, Concedo.

Vt impugnetur distinctio, Suppono, frigus conservari cum calore in aqua, & sic argumentor:

Calor in suppositione facta non priuat aquam suo frigore; atqui nihilominus est illi malus: ergo non est tantum illi malus, quia priuat illam suo frigore.

Respondent: Calor in suppositione facta non priuat aquam suo frigore, neque potest eam eo priuare, Nego. & potest eam eo priuare, Concedo. atqui nihilominus est illi malus, & non potest illam priuare suo frigore, Nego. & potest, licet id non faciat, Concedo.

14 TRACT. VNIC. MORAL. DISP. I.

Contrà. Calor ex concessis est malus aquæ per id, per quod potest illam priuare suo frigore; atqui id, per quod potest priuare illam suo frigore est ipse secundum se, & in sua entitate: ergo ipse secundum se, & in sua entitate, & non tantum quatenus priuat, aut potest illam priuare suo frigore est ei malus.

TERTIA CONCLUSIO:

Deus non est causa mali moralis.

MALVM morale est actio libera contra rectam rationem; atqui Deus non est causa actionis liberæ contra rectam rationem: ergo Deus non est causa mali moralis.

Minor pr. Deus non est neque causa physica, neque moralis actionis liberæ contra rectam rationem: ergo non est causa illius.

Secunda pars antecedentis probatur primò.

Illud non est causa moralis actionis liberæ contra rectam rationem, quod deterret ab illa hortationibus, minis, & pœnis; atqui Deus deterret hortationibus, minis & pœnis ab actione libera contra rectam rationem: ergo non est causa moralis actionis liberæ contra rectam rationem.

Minor pr. Plenæ sunt sacræ paginæ hortationum Dei ad virtutem, minarum si labamur in vitia, & punitionum, quas sumit de actionibus liberis contra rectam rationem: ergo Deus deterret ab actionibus liberis contra rectam rationem hortationibus, minis, & pœnis.

Prima pars antecedentis superioris argumenti probatur secundò.

Illud non est causa physica actionis liberæ contra rationem, cuius virtus non est ordinata ad illam, neque naturâ suâ, neque ex propria determinatione; atqui Deus non ordinatur naturâ suâ, neque ex propria determinatione ad actionem liberam contra rationem: ergo Deus non est causa physica actionis liberæ contra rationem.

Minor pr. Quod est summa sanctitas non ordinatur naturâ suâ, neque ex propria determinatione ad actionem liberam contra rationem; atqui Deus est summa sanctitas: ergo non ordinatur naturâ suâ, neque ex propria determinatione ad actionem liberam contra rationem.

Major pr. Nihil ordinatur ad id, cum quo habet summam repugnantiam, & impossibilitatem; atqui summa sanctitas habet summam repugnantiam, & impossibilitatem cum actione libera contra rationem: ergo quod est summa sanctitas non ordinatur naturâ suâ, neque ex propria determinatione ad actionem liberam contra rationem.

Minor pr. Summa sanctitas habet summam repugnantiam cum improbitate, & malitia actuali; atqui actio libera contra rationem est malitia actualis: ergo quod est summa sanctitas habet summam repugnantiam cum actione libera contra rationem.

Major superioris argumenti, illud non esse causam actionis liberæ contra rationem, quod non ordinatur naturâ suâ, aut ex propria determinatione ad illam, probatur.

Monstra, claudicatio, & inuentio thesauri re-

16 TRACT. VNIC. MORAL. DISP. I.

consentur ab Aristotele, & Philosophis inter effectus per accidens potentiae generativae, potentiae progressivae, & fossilionis, quod haec non sint naturam suam ordinata ad illa: ergo illud etiam non debet dici causa actionis liberae contra rectam rationem, quod non ordinatur naturam suam, aut ex propria determinatione ad illam.

Quomodo autem cum omnipotentia non sit ordinata ad actionem liberam contra rectam rationem, determinetur tamen a causa secunda ad concurrendum ad illam, sic explicandum videtur ut dicamus causam primam, & causam secundam liberam esse ambas ad illam indifferentes in actu primo, cum diversitate tamen in eo posita, quod causa secunda sit formaliter indifferens, prima vero sit tantum denominative indifferens ab indifferentia secundae formaliter indifferentis, quemadmodum habitus concurrens ad actum liberum est tantum denominative indifferens a formali indifferentia voluntatis. Ratio huius rei est, quia cum ut agens agat voluntarie, necessarium sit, ut operetur immediate ex cognitione proponente sibi obiectum, & ut operetur libere ut agat immediate ex cognitione indifferenti, concausae utriusque huius causae voluntariae, & liberae, si non moveantur immediate a cognitione ad agendum, non concurrunt voluntarie, nec libere formaliter, nec sunt in actu primo indifferentes, sed tantum denominative a libertate aliena, & indifferentia causae operantis immediate ex cognitione indifferenti, ac proinde cum ad actum liberum creatum sola voluntas creata illi recipiens concurrat ex immediata directione co-

gnitionis indifferentis, causa verò prima non concurrat immediatè ex illa cognitione, non potest dici nisi denominatiuè à libertate formali voluntatis agere liberè formaliter, saltè proximè: dico, proximè, quia remotè concursus ille diuinæ omnipotentia est liber, & indifferens. Procedit siquidem à volitione illa indifferenti, per quam Deus statuens concurrere in his circumstantiis, vel ad hunc actum bonum, vel ad hunc malum ponit omnipotentia suam in potestate voluntatis, ut ea utatur, ea ratione, qua utitur habitu, & aliis suis concausis. Vnde fit ut sequentes propositiones, Deus concurrat ad actum liberum creatum determinatus à voluntate creata; subordinatur voluntari creatæ in operationibus liberis, concurrat ad actum liberum, quia voluntas concurrat, & alia similes habeant verum sensum. Nihil enim aliud significant, quàm diuersum illum modum, quo se habent in actu primo causa prima, & secunda. Quoties enim duæ, aut multæ causæ concurrunt in actu primo, & ponunt in actu secundo, eandem actionem illa, quæ est in actu primo proximo formaliter libera, & indifferens habet in sua potestate actionem, dicitur hoc ipso determinare alias, & alia concurrere ab ea determinatæ, censenturque ei subordinari in operando, & concurrere, quia illa concurrat tandem illa sola dicitur hoc ipso quasi incipere actionem, & trahere alias omnes. Ex quo patet solam causam secundam esse immediatè liberam, & indifferentem in actu primo in ordine ad actum liberum, ipsamque ad illum determinare causam primam, & habitum, istumque ei subordi-

18 TRACT. VNIC. MORAL. DISP. I.
nari naturâ suâ; illam verò voluntariè vi sci-
licet decreti illius suprà explicati, quod remotè
est formaliter liberum, & indifferens.

QUARTA CONCLUSIO:

*Deus potest esse causa habituum vitij, &
erroris.*

DEVS potest esse causa omnis eius, quod non
est malum moraliter; atqui habitus vitij, & er-
roris non sunt mali moraliter: ergo Deus potest
esse causa illorum.

Maior probatur primò.

Deus potest esse causa omnis eius, cuius produ-
ctionem potest intendere; atqui Deus potest in-
tendere productionem omnis eius, quod non est
malum moraliter: ergo Deus potest esse causa
omnis eius, quod non est malum moraliter.

Minor pr. Deus potest intendere productionem
omnis eius, quod potest ordinare in honestum fi-
nem; atqui Deus potest ordinare productionem
omnis eius, quod non est malum moraliter in ho-
nestum finem: ergo Deus potest intendere pro-
ductionem omnis eius, quod non est malum mo-
raliter.

Minor pr. Deus potest ordinare productionem
eius, quod non est malum moraliter in omnem
illum finem cum quo non est impossibile; at-
qui quod non est malum moraliter non est in-
compossibile cum fine honesto: ergo Deus po-
test ordinare productionem omnis eius, quod
non est malum moraliter in honestum finem.

de Bono , Fine , & Felicitate. 19

Respondent : Atqui quod moraliter non est malum neque formaliter , neque causaliter , non est impossibile cum fine honesto , Concedo. quod moraliter non est malum tantum formaliter , si sit causaliter malum , Nego. & eandem distinctionem applicant consequenti.

Contrà. Causaliter malum, in distinctione positum, est illud quod cum causa libera , & indifferenti concurrit ad actum malum determinatum per illam ; atqui Deus potest ordinare illud in finem honestum ; ergo & quod est tantum causaliter malum.

Minor pr. Deus potest ordinare in finem honestum id omne , quod non est formaliter malum ; atqui quod eum causa libera & indifferenti concurrit ad actum malum determinatum per illam , non est formaliter malum : ergo Deus potest ordinare illud in finem honestum.

Minor probatur primò.

Omnipotentia diuina concurrit ad actum malum cum causa libera , & indifferenti , & determinatur per illam ; atqui diuina omnipotentia non est formaliter mala : ergo quod concurrit cum causa libera, & indifferenti determinatū per illam ad actum malū non est formaliter malum.

Maior probatur s. cundò.

Deus potest ordinare in finem honestum illud omne , quod potest esse vtile laudabiliter ad illud obtinendum ; atqui illud omne , quod non est formaliter malum potest esse vtile laudabiliter ad finem honestum obtinendum : ergo Deus potest illud ordinare in huiusmodi finem.

Minor pr. Quod maxime potest dici non pos.

20 TRACT. VNIC. MORAL. DISP. I.

se esse vtile laudabiliter ad finem honestum obtinendum, est v. g. habitus ad intemperantiam; atqui ille potest esse vtilis ad finem honestum obtinendum: ergo & illud omne, quod non est formaliter malum.

Minor pr. Victoria nobilior de intemperantia est finis honestus; atqui habitus intemperantiæ est vtilis ad nobiliorem victoriam de intemperantia: ergo habitus ad intemperantiam potest esse vtilis ad finem honestum.

Minor pr. Nobilior est victoria de intemperantia, cum magna ad ipsam propensio vincitur; atqui habitus ad intemperantiam est illa magna propensio: ergo vtilis est vt nobilior sit victoria de intemperantia.

Maior pr. Nobilior est victoria cæteris paribus cum maior superatur resistantia; atqui cum est magna propensio ad intemperantiam, & vincitur, superatur fortior resistantia: ergo nobilior est victoria de intemperantia cum magna ad ipsam propensio vincitur.

Obiicies. Deus non est causa eius, quod dedecet primam veritatem, & summam ipsius sanctitatem; atqui dedecet primam veritatem, & summam ipsius sanctitatem esse causam habitus erroris, & vitij: ergo Deus non potest esse causa habitus erroris, & vitij.

Minor pr. Dedecet primam veritatem, & summam sanctitatem esse causam propensionis ad falsitatem, & malitiã; atqui habitus erroris est propensio ad falsitatem, & habitus vitij ad malitiam: ergo dedecet primam veritatem, & summam sanctitatem esse causam habitus erroris, & vitij.

Solutio:

Solutio: Dedecet primam veritatem, & summam sanctitatem esse causam propensionis ad falsitatem, & ad malitiam eo fine ut ponantur falsitas, & malitia, Concedo. eo fine ut non ponantur, sed ipsis incassum repugnantibus actus contrarij maiori cum laude exerceantur, Nego. & concessa minori: ergo dedecet primam veritatem, & summam sanctitatem esse causam habitus erroris, & utiq; eo fine ut ponantur eorum actus, Concedo. eo fine ut non ponantur, sed ipsis incassum repugnantibus ponantur maiori cum laude actus ipsi contrarij, Nego.

Contrà. Dedecet primam veritatem, & summam sanctitatem ex vilo fine extrinseco esse causam propensionis ad falsitatem, & malitiam: ergo nulla solutio.

Antecedens pr. Dedecet primam veritatem, & summam sanctitatem esse causam ex fine vilo extrinseco eius, quod naturâ suâ, & ab intrinseco non tendit nisi in falsitatem, & malitiam; atqui propensio in falsitatem, & malitiam, de qua est quæstio, non tendit ab intrinseco, & ex natura sua nisi in falsitatem, & malitiam: ergo dedecet primam veritatem, & summam sanctitatem ex vilo fine extrinseco esse illius causam.

Solutio: Dedecet primam veritatem, & summam sanctitatem esse causam ex fine vilo extrinseco eius, quod naturâ suâ, & ab intrinseco non tendit nisi in falsitatem, & malitiam, si non possit esse sine iis, & quin eas causet de facto, Concedo. si possit esse sine iis, & absque eo, quod illas causet de facto, & præterea potest obiectivè servire ad maiorem humilitatem, & esse utilis ad no-

22 TRACT. VNIC. MORAL. DISP. I.

biliorem, victoriam obtinendam de errore, & vicio; Nego. Ratio responsionis est, quia cum illa propensio non sit mala in se, Deus enim solus ut facit, non posset illam conservare. Conservatio siquidem esset aequè mala, ac prima productio: neque in suo effectus, quippe qui nullus supponatur esse alius, quam utilitas ad honestum finem extrinsecum, non videtur ex quo capite possit dici dedecere primam veritatem, & summam sanctitatem illas causare, maximè cum concupiscentia, quæ non potest negari fieri à Deo sit vera, & propria inclinatio in multa obiecta contra rectam rationem. Iam ad consequens, dedecet primam veritatem & summam sanctitatem esse causam propensionis ad falsitatem, & malitiam, si propensio illa non possit esse quin eas causet, Concedo. si possit esse absque eo, quod illas causet, sicut est concupiscentia sine affectionibus illis inordinatis ad quas inclinat, & possit servire obiectivè ad maiorem humilitatem, & esse utilis ad nobiliorem victoriam obtinendam, Nego. Cum enim laudabile sit permittere, atque etiam intendere pugnam amore victorie, & ad concedendum triumphum, maximè cum subministrantur vires ad superandam resistantiam, quæ opponitur devincenda: turpe iudicari non potest ponere ea media, cum hæc in se non sunt mala, nec habent necessariò aliquid mali annexum, quibus fines illi honesti recensiti, & intenti obtinentur.

Contrà. Dedecet summam Dei sanctitatem ponere impedimenta ad virtutem, & perfectionem Christianam; atqui causans propensionem ad falsitatem, & malitiam, quantumvis hæc non

eliciant suos actus, ponit impedimenta ad virtutem, & perfectionem Christianam : ergo dedecet summam Dei sanctitatem causare propensionem ad falsitatem, & malitiam.

Solutio : Decedet summam sanctitatem ponere impedimenta materialiter sumpta ad virtutem, & perfectionem Christianam, seu ex intentione non impediendi exercitium virtutis, sed potius promouendi, & augendi, Nego. formaliter sumpta, seu ex affectu impediendi huiusmodi exercitium, Concedo. atqui causans propensionem ad falsitatem, & malitiam, quantumvis hæc non eliciant suos actus, ponit impedimenta ad virtutem, & perfectionem Christianam materialiter sumpta, seu ex intentione non impediendi exercitium, virtutis, sed potius illud promouendi, & augendi, Concedo. formaliter sumpta, seu ex affectu impediendi huiusmodi exercitium, Nego. Certè concupiscentia magis obest, pertinacius, & diutius exercitio virtutis, quàm habitus vitii, quippe quæ semper maneat, nec possit expelli, aut destrui, sicut expellitur, aut destruitur iste habitus, & tamen nemo dixerit concupiscentiam, seu propensionem in bonum delectabile non causari à Deo, qui ut habet ius probandi nos, & experiundi num verè illum amemus : ita potest ponere, & intendere difficultates illas in exercitio illius amoris, ex quarum victoria dubius illi non sit noster amor. Cum autem ponit, aut permittit huiusmodi difficultates, concedit nobis semper vires ad illas superandas, & ponit illas ex affectu ut victores simus, & maiorem assequamur perfectionem moralem. Quod secundum motum nostræ utilitatis est ipsi aliis

24 TRACT. V. PHYS. DISP. I.

intendendi finis, quod diximus esse impedimentum non formale, sed tantum materiale ad sanctitatem.

SECTIO III.

An malum quà malum amari possit, & bonum odio haberi.

PRIMA CONCLUSIO:

Malum, quà malum non potest amari.

ILLUD non potest amari, quod non potest esse obiectum primò motuum actus prosecutiui voluntatis; atqui malum quà malum non potest esse obiectum primò motuum actus prosecutiui voluntatis: ergo malum quà malum non potest amari.

Maior probatur primo.

Amor est prosecutio sui obiecti: ergo illud non potest amari, quod non potest esse obiectum primò motuum actus prosecutiui voluntatis.

Minor precedentis argumenti probatur secundo.

Actus prosecutiui voluntatis sunt amor, desiderium, & gaudium; atqui malum quà malum non potest esse obiectum primò motuum, neque amoris, neque desiderij, neque gaudij: ergo malum quà malum non potest esse obiectum primò motuum actus prosecutiui voluntatis.

Minor probatur. Amor, desiderium, & gaudium sunt affectus, propensiones, & inclinationes in bonum præsens, absens, vel præscindendo ab eius absentia, vel præsencia; atqui malum quà

malum non est bonum : ergo malum quàm malum non est obiectum primò motuum amoris, desiderij, aut gaudij.

Maiores probatur. Amor, desiderium, & gaudium sunt affectus, propensiones, & inclinationes in id, quo perfici potest eorum subiectum; atqui illud quo perfici potest eorum subiectum debet esse bonum : ergo amor, desiderium, & gaudium sunt affectus, propensiones, & inclinationes in bonum absolute, vel in bonum præsens, aut absens.

Minor probatur. Subiectum non perficitur nisi per id, quod est perfectum; atqui illud, quod est perfectum est bonum : ergo illud, quo perfici potest subiectum amoris, desiderij, aut gaudij debet esse bonum.

Obiicies. Illud potest amari ad quod potest esse inclinatio appetitus, aut voluntatis; atqui potest esse inclinatio appetitus, & voluntatis ad malum quàm malum : ergo malum quàm malum potest amari.

Minor probatur. Ad illud potest esse inclinatio appetitus, & voluntatis, ad quod appetitus dicitur à prima veritate pronus; atqui sensus hominis, seu appetitus eius Genes. 8. dicitur pronus in malum ab adolescentia sua : ergo potest esse inclinatio appetitus, & voluntatis ad malum quàm malum.

Solutio : Atqui Genes. 8. sensus seu appetitus hominis, dicitur pronus esse in malum, hoc est, ad eliciendas appetitiones, quæ sint mala moraliter. Concedo. quarum obiectum primò motuum sit ratio mali, Nego. ergo potest esse inclinatio appe-

26 TRACT. VNIC. MORAL. DISP. I.

titus, & voluntatis ad malum, hoc est, ad eliciendas appetitiones, quarum obiectum primò motiuum sit ratio mali, Nego. quæ sint mala moraliter, Concedo.

Contrà. Appetitus ex concessis est pronus ad eliciendas appetitiones malas moraliter; atqui obiectum primò motiuum multarum huiusmodi appetitionum est ratio mali, & malum, quàm malum: ergo appetitus est pronus ad eliciendas appetitiones, quarum obiectum primò motiuum est ratio mali, & malum, quàm malum.

Minor pr. Obiectum primò motiuum appetitionum eorum, qui peccant ex malitia, & quos ideo Aristoteles septimo Moralium vocat malignos, est ratio mali, & malum, quàm malum; atqui multi peccant ex malitia, seu feruntur in peccatum, quia peccatum est: ergo obiectum multarum appetitionum est ratio mali, & malum, quàm malum.

Maior pr. Debet esse aliqua ratio, quare appetitiones illæ dicantur esse ex malitia potius, quàm aliæ; atqui illa non potest esse alia, quàm quod earum obiectum primò motiuum sit ratio mali, & malum, quàm malum, seu peccatum, quàm peccatum, aliarum verò non sit: ergo obiectum primò motiuum appetitionum eorum, qui peccant ex malitia, est ratio mali, & malum, quàm malum.

Solutio: Neganda est minor, & dicendum illam aliam rationem esse, quia licet plerè aduertant, quod amant esse contra rectam rationem, afficiuntur nihilominus erga illud.

Contrà. Omnes, qui peccant aduertunt id, quod

agunt esse contra rectam rationem; atqui omnes non peccant ex malitia: ergo peccare ex malitia non est advertere id, quod amatur esse contra rectam rationem.

Solutio: Omnes, qui peccant aduertunt id, quod agunt esse contra rectam rationem, & feruntur in illud, quia est contra rectam rationem, Nego. & non feruntur in illud, quia est contra rectam rationem, Concedo. & concessa minori: ergo peccare ex malitia non est advertere id, quod amatur esse contra rectam rationem, si non feratur in illud, quia est contra rectam rationem, Concedo. si feratur in illud, quia est contra rectam rationem, & Deum, ut dicitur de demonibus, & peruersis quibusdam hominibus, Nego.

Contrà. Qui amat, quod amat, quia est contra rectam rationem, amat malum, quia malum; atqui ex concessis qui peccant ex malitia, amant quod amant, quia est contra rectam rationem: ergo qui peccant ex malitia, amant malum quia malum.

Solutio: Qui amat quod amat, quia est contra rectam rationem sistendo in eo, & non conuestiando illud aliqua alia ratione boni, quod ipsum primò moueat ad istud, Concedo. non sistendo in eo, & conuestiando illud alia ratione boni ipsum primò mouente, Nego. atqui ex concessis, qui peccant ex malitia, amant quod amant, quia est contra rectam rationem, sistendo in eo, & non conuestiando illud alia ratione boni, Nego. non sistendo in eo, & conuestiando illud alia ratione boni ipsos primò mouente, Concedo.

Contrà. Qui volens mentitur amat inhonestam

28 TRACT. VNIC. MORAL. DISP. I.

tem mendacij sistendo in ea, & non conuestiend-
do eam alia ratione boni : ergo qui amant, quod
amant, quia est contra rectam rationem, possunt
sistere in eo, & non conuestire illud alia ratione
boni ipsos primò mouente.

Antecedens pr. Inhonestas mendacij non potest
esse bona, neque in se, neque repræsentari bo-
naei, qui sciens, & volens mentitur : ergo qui
sciens, & volens mentitur, amat inhonestatem
mendacij sistendo in ea, & non conuestiendo
illam alia ratione boni.

Solutio : *Inhonestas mendacij non potest esse bo-
na neque in se, neque ei, qui sciens, & volens men-
titur, repræsentari bona bonitate morali, & qua di-
citur honestas, Concedo. alia bonitate, conducibili-
tate v. g. ad aliud obtinendum, Nego.*

Contrà. Vt inhonestas mendacii ametur non
debet repræsentari bona vlla bonitate: ergo nul-
la solutio.

Antecedens pr. Mors amatur ab iis, qui illam
sibi volentes inferunt nulla repræsentata in ea
bonitate : ergo vt inhonestas mendacii ametur,
non debet repræsentari bona vlla bonitate.

Solutio : *Mors amatur ab iis, qui illam sibi infe-
runt nulla repræsentata in ea bonitate vera, Concedo.
apparenti, Nego. Existimant enim per illam finem
imponendum miseriis illis, & doloribus animi, vel
corporis, quibus premuntur.*

Contrà. Multi amant mortem suorum hostium,
non vt per illam finis imponatur inimicorum
malis, sed vt augeantur, & quia apparet illis illa
augere, & esse magnum eorum augmentum: ergo
mors amatur nulla in ea repræsentata ratione
boni vera, vel apparenti.

Solutio : Multi amant mortem suorum hostium, non ut per illam finis imponatur inimicorum malis, sed ut augeantur, & quia representatur ipsis illa augere, & esse magnum eorum augmentum, & accessio illa mali inimicis, & eorum destructio non representatur bona, & iuvans ad conservationem eorum, qui illam amant, & non movet ipsos ad illum amorem, Nego. & representatur illis bona, iuvans ad ipsorum conservationem, & eatenus movens ipsos ad illum amorem, Concedo.

Contrà. Occisio hostis amatur à multis, licet videant causaturam ipsis suspendium, & mortem duriores, quàm sit illa quam illi inferunt: ergo mors inimici non representatur ipsis ut bona, & iuvans ad ipsorum conservationem, sed præcisè quia est mala amatur.

Solutio : Occisio hostis amatur à multis, licet videant causaturam ipsis suspendium, & mortem duriores eà, quam ipsi inferunt, & exsatiatio appetitus vindictæ non apparet illis bona, & non movet ipsos ad non timendam propriam mortem, Nego. & representatur illis bona, & movet illos ad non timendum suspendium, & mortem illam duriores, Concedo.

Contrà. Quod tendit liberè in occisionem illam, potest illam amare etiamsi non representetur bona vlla bonitate, & appareat purè mala: ergo occisio hostis amatur non representata in ea vlla bonitate.

Antecedens pr. Quod potest tendere, vel non tendere in occisionem illam quàm malam, potest illam amare etiamsi non representetur bona vlla bonitate, & appareat purè mala, atqui quod ten-

30 TRACT. VNIC. MORAL. DISP. I.

dit liberè in occisionem illam, potest tendere, vel non tendere in illam : ergo quod fertur liberè in illam potest illam amare, etiamsi non repræsentetur bona vlla bonitate, & appareat purè mala.

Solutio : Illud potest amare occisionem illam, etiamsi non repræsentetur bona vlla bonitate, & appareat purè mala, quod potest tendere, vel non tendere in occisionem illam quà malam actu persecutiuo, Concedo. actu auersatiuo. Nego, atqui quod tendit liberè in occisionem illam potest in illam tendere, vel non tendere actu persecutiuo, Nego. actu auersatiuo, Concedo. Non est dubium, quin voluntas elicere possit aliquem actum circa illam occisionem quà malam, vel non elicere, sed is quem eliciet debet necessariò esse auersatiuus, & fuga illius, & non potest esse persecutiuus.

Contrà. Voluntas potest tendere in non bonum actu persecutiuo : ergo etiam in malum, quà malum.

Antecedens pr. Non ens, & impossibile est non bonum; atqui voluntas tendit in non ens, & impossibile actu persecutiuo : ergo & in non bonum.

Minor pr. Aristoteles ait voluntatem esse impossibilem, & experientia docet sapè nos affici multum erga impossibilia : ergo voluntas nostra tendit in non ens, & impossibile actu persecutiuo.

: Solutio : Aristoteles ait voluntatem esse impossibilem, & experientia docet nos affici multum erga impossibilia, repræsentata ut possibilia, Concedo. non repræsentata ut possibilia, Nego. Sic enim cum nullam habeant bonitatem, non possunt etiam mouere voluntatem ad eam sibi coniungendam per actus

suos persecutivos, quibus ad hoc utitur, & qui ei in eum finem sunt concessi. Quare cum in obiecto nulla apparet ipsi bonitas, deest in ipsa vis ad tendendum in illud per huiusmodi actus, & si quem exercet circa ipsum is non potest esse alius quam auersatus.

Contra. Voluntas afficitur, & tendit actu persecutiuo, in non productionem sui, & sui subiecti, & utriusque annihilationem, cum vellemus non fuisse, aut optamus non esse. Aiebat Christus de Iuda, melius erat ei si natus non fuisset; atqui non productio illa, & annihilatio sunt, & repræsentantur ut non ens, & non bonum: ergo voluntas afficitur, & tendit actu persecutiuo in id, quod est non ens, & non bonum, & repræsentatur illi ut non ens, & non bonum.

Solutio: Voluntas afficitur, & tendit actu persecutiuo in non productionem sui, & sui subiecti, & utriusque annihilationem secundum se sumpta, Nego. ut impeditiva alicuius mali, aut ei finem imponentia, Concedo. atqui non productio illa, & annihilatio illa sunt, & repræsentantur ut non ens, & non bonum secundum se sumpta, Concedo. ut impeditiva, aut finem imponentia malo, quo premitur voluntas, Nego. Apprehenduntur enim ab illa ad instar magni boni: ergo voluntas tendit in id, quod est non bonum, & non repræsentatur ut bonum, s. d. ut non bonum cognitione vera, perfecta, & representante rem ut est, Nego. cognitione imperfecta non representante rem ut est, & non penetrante quid sit summa miseria, & quantum malorum longè grauiorum eo, quod timeatur sit complexio, Concedo. Ad hoc enim, ut

32 TRACT. VNIC. MORAL. DISP. I.

voluntas excitetur ad actum persecutiuum, sufficit quaecunque cognitio aequè falsa ac vera, modo repræsentet obiectum suum conuëstitum ratione aliqua boni, quam examinare uanane sit an falsa, non est voluntatis, sed intellectus, cuius est comparare unum cum alio, & aduertere num vera, & realis habitudo, & connexio sit inter illa.

Contrà. Summa miseria, & damnatio non est, & non repræsentatur ut bona etiam ut impeditiua maioris, aut minoris mali; atqui voluntas tendit in illam actu persecutiuo: ergo & in id, quod est non bonum, & non repræsentatur ut bonum, sed ut non bonum.

Minor pr. Multi imprecantur, & sibi optant æternam miseriam: ergo eorum voluntas tendit in illam actu persecutiuo.

Solutio: *Præcedentis argumenti summa miseria, & damnatio non est, & non repræsentatur ut bona, & impeditiua maioris mali, aut etiam minoris cognitione vera, & perfecta representante rem, ut est; ipsa enim est complexio, & illorum malorum, & multorum aliorum, Concedo. cognitione imperfecta non representante rem ut est, & non penetrante quid sit summa miseria, & quantum malorum longè grauiorum eo, quod impendet sit complexio. Nego.*



SECUNDA CONCLUSIO:

Bonum quia bonum non potest odio haberi.

Quod non potest esse obiectum fugæ, timoris, aut tristitiæ, non potest odio haberi; atqui bonum quia bonum non potest esse obiectum fugæ, timoris, aut tristitiæ: ergo bonum quia bonum non potest odio haberi.

Minor pr. Illud non est obiectum fugæ, timoris, aut tristitiæ, ad quod sibi coniungendum est tota inclinatio voluntatis; atqui inclinatio voluntatis est tota ad coniungendum sibi bonum quia bonum: ergo bonum quia bonum non potest esse obiectum fugæ, timoris, aut tristitiæ.

Minor pr. Bonum quia bonum est perfectum quia perfectum; atqui tota inclinatio voluntatis est ad coniungendum sibi perfectum quia perfectum: ergo tota inclinatio voluntatis est ad coniungendum sibi bonum quia bonum.

Minor pr. Tota inclinatio voluntatis est ad suam perfectionem, & ad faciendam se quam perfectissimam; atqui assequitur suam perfectionem, & facit se quam perfectissimam coniungendo sibi perfectum quia perfectum: ergo tota inclinatio voluntatis est ad coniungendum sibi perfectum quia perfectum.

Minor pr. Assecutio perfectionis, qua quis caret, non fit aliter quam per unionem illius cum ipso: ergo voluntas assequitur suam perfectionem, & facit se quam perfectissimam coniungen-

34 TRACT. VNIC. MORAL. DISP. I.

do sibi perfectum quàm perfectum.

Obiicies. Virtus odio haberi potest, & habetur de facto ab improbis: ergo & bonum quàm bonum.

Consequentia pr. Virtus est bonum quàm bonum; atqui virtus ex concessis odio haberi potest: ergo & bonum quàm bonum.

Solutio: Atqui *virtus ex concessis odio haberi potest representata ut bona præcisè*, Nego. *representata ut mala*, Concedo. ergo odio haberi potest bonum quàm bonum, hoc est, cum representatur ut bonum præcisè, Nego. cum representatur cum admixtione mali, Concedo.

Contrà. Peccator odio habet virtutem; atqui virtus non repræsentatur ei ut mala: ergo virtus non repræsentatur ut mala ei, qui illam odio habet.

Solutio: Atqui *virtus non repræsentatur ei qui illam odio habet, ut mala malitia morali*, Concedo. *alia malitia*, Nego. ergo *virtus ei, qui illam odio habet, non repræsentatur ut mala malitia morali*, Concedo. *alia malitia*, Nego.

Contrà. Deus odio habetur à peccatoribus; atqui non repræsentatur eis ut malus vlla malitia: ergo quod non repræsentatur ut malum vlla malitia potest odio haberi.

Minor pr. Quod est summè bonum non repræsentatur peccatoribus ut malum vlla malitia; atqui Deus est summè bonus: ergo non repræsentatur eis ut malus vlla malitia.

Solutio: Quod est summè bonum, & ut tale cognoscitur non repræsentatur peccatoribus ut malum vlla malitia, Concedo. quod licet sit summè bo-

num, ut tale tamen non cognoscitur, Nego. atqui Deus est summè bonus, & ut talis cognoscitur à peccatoribus, Nego. & non cognoscitur ab illis ut summè bonus. Concedo.

Contrà. Dæmones, & damnati non possunt non cognoscere euidenter Deum ut summè bonum; atqui sunt peccatores, & illum odio habentes: ergo Deus repræsentatur ut summè bonus peccatoribus, & illum odio habentibus.

Solutio: Dæmones, & damnati non possunt non cognoscere euidenter Deum, ut summè bonum in se, Concedo. sibi, Nego. & concessa minori: ergo Deus peccatoribus, & illum odio habentibus repræsentatur ut summè bonus in se, Concedo. respectu ipsorum in quos exercet suam iustitiam, Nego. verum quidem est dæmones, & damnatos non ignorare Deo conuenire summam bonitatem, quia tamen maiores longe experiuntur effectus iustitiæ ipsis, dolor, qui excitatur in ipsis ex tolerantia tormentorum, excitat in ipsis primò representationem Dei ut vindicis suorum criminum, & secundò odium illarum peccatorum, & infligit illas tanquam sibi maxime mali.

SECTIO IV.

De Fine.

OMISSIS iis, quæ diximus de fine in Physica, disputatione de causa finali, hîc breuiter cætera perstringemus.

PRIMA CONCLUSIO:

Homo in suis operationibus habet semper finem aliquem ultimum.

QUOD habet finem suarum operationum habet in illis finem aliquem ultimum; atqui homo habet finem suarum operationum: ergo homo in suis operationibus habet semper finem aliquem ultimum.

Maior pr. Quod habet in suis operationibus aliquid quod appetitur propter se, & alia propter ipsum, habet finem aliquem ultimum in illis; atqui qui habet finem suarum operationum habet aliquid quod appetitur propter se, & cætera propter ipsum: ergo & finem ultimum.

Maior pr. Finis ultimus est id, quod appetitur propter se, & cætera propter ipsum: ergo quod habet in suis operationibus aliquid, quod appetitur propter se, & cætera propter ipsum habet finem aliquem ultimum.

SECUNDA CONCLUSIO:

Vnus est finis simpliciter ultimus omnium rerum creatarum.

FINIS ultimus simpliciter hominis, & rerum creatarum est illud propter quod ultimò factæ sunt; atqui illud propter quod ultimò factæ sunt unicum est: ergo & vnus finis simpliciter ultimus illarum.

Minor pr. Illud propter quod vltimò factus est homo, & aliæ res creatæ, est illud, propter quod Deus illas produxit; atqui illud propter quod Deus produxit homines, & res alias creatas est vnicum: ergo & illud propter quod vltimò factæ sunt.

Minor pr. Deus fecit hominem, & alias res creatas propter suam bonitatem; atqui illa vnica est: ergo & id, propter quod illæ factæ sunt.

Maïor pr. Bonitas Dei est ipsemet Deus; atqui omnia propter semetipsum operatus est Dominus, ait Sapiens: ergo Deus fecit hominem, & alias res creatas propter suam bonitatem.

Atque hic modus astruendi conclusionem efficacior est tum illo, qui desumitur ex eo, quod agens perfectissimum, quale est Deus, agere debeat propter finem omnium præstantissimum, qui non est alius à diuina gloria. Licet enim Deus teneatur agere propter finem, aliter enim agere, est imperfectum; non tamen propter hunc potius, quàm illum, neque enim volitio, quæ intendit hunc minùs perfectum, est minùs perfecta perfectione, & bonitate formali alia, quæ intendit perfectiorem. Ambæ siquidem sunt infinitè perfectæ, quippe Deus. Bonitas autem obiectiua in qua secunda primam superat, nihil officit infinitati illi perfectionis. Tum alio deprompto ex amore infinito, quo Deus se amat, facit enim ille tantùm, vt necessariò sibi velit bonum necessarium, & intrinsecum, non autem extrinsecum, quale est gloria extrinseca.

Obiicies. Illud propter quod factæ sunt creaturæ, est multiplex: ergo non est vnus tantùm fi-

38 TRACT. VNIC. MORAL. DISP. I.
nis simpliciter ultimus illarum.

Antecedens pr. Illud propter quod res insensibiles, & sensibiles factæ sunt est multiplex : ergo etiam & illud propter quod factæ sunt creaturæ.

Antecedens probatur. Illud propter quod factæ sunt creaturæ insensibiles sunt animalia, & illud propter quod facta sunt ipsa animalia est homo : atqui animalia, & homo sunt verè quid multiplex : ergo & illud propter quod res sensibiles & insensibiles factæ sunt.

Solutio : Illud propter quod ultimò factæ sunt creaturæ insensibiles sunt animalia, Nego. non ultimò, Concedo. & concessa minori : ergo illud propter quod res sensibiles, & insensibiles factæ sunt ultimo est multiplex, Nego. non ultimò, Concedo. Propter illud facta sunt animalia ultimò, & res insensibiles similiter, in quo quieuit intentio causæ productivæ ipsorum. Intentio autem Dei, qui illis dedit esse, non quieuit in ullo alio, quam in sua bonitate, licet in illorum productione eam voluerit esse subordinationem, ut insensibiles deservirent sensibilibus, & sensibiles intellectualibus.

TERTIA CONCLUSIO:

Homo intendere non potest simul plures fines simpliciter ultimos.

FINIS simpliciter ultimus est bonum maximè necessarium, & sufficiens ad satiandum appetitum; atqui homo intendere non potest simul duo bona maximè necessaria, & quorum quodlibet

sit omninò sufficiens ad satiandum suum appetitum : ergo homo intendere non potest simul plures fines simpliciter ultimos.

Maior pr. Vt homo intendere possit duo bona simul, quorum quodlibet sit necessarium, & omnino sufficiens ad satiandum ipsius appetitum, debet intellectus repræsentare eius voluntati posse esse simul duo bona, quorum quodlibet sit necessarium, & omnino sufficiens ad satiandum ipsius appetitum ; atqui intellectus repræsentare non potest eius voluntati posse esse simul duo bona, quorum quodlibet sit necessarium, & omninò sufficiens ad satiandum eius appetitum : ergo intendere non potest simul duo bona maximè necessaria, & quorum quodlibet sit omninò sufficiens ad satiandum ipsius appetitum.

Minor. pr. Quod repræsentat posse esse simul duo bona, quorum quodlibet sit necessarium, & ad satiandum eius appetitum omnino sufficiens, repræsentat quodlibet ex illis esse sufficiens, & non esse sufficiens ; atqui intellectus non potest repræsentare simul quodlibet ex illis esse sufficiens, & non esse sufficiens : ergo intellectus non potest repræsentare voluntati posse esse simul duo bona, quorum quodlibet sit necessarium, & omnino sufficiens ad satiandum ipsius appetitum.

Respondent repræsentari sufficiens.

Contrà. Illud non repræsentatur sufficiens ad quod repræsentatur aliud esse necessarium ; atqui intellectus repræsentat ad quodlibet ex illis aliud esse necessarium : ergo nullum repræsentat esse sufficiens.

Maior probatur. Intellectus repræsentat aliud

40 TRACT. VNIC. MORAL. DISP. I.

esse finem simpliciter vltimum; atqui finis simpliciter vltimus est necessarius ad satiandum appetitum: ergo intellectus repræsentat ad quodlibet ex illis aliud esse necessarium.

Obiicitur. Non minùs homo potest intendere simul plures fines simpliciter vltimos, quàm successiuè; atqui potest successiuè: ergo & simul.

Maior pr. Non est maior repugnantia, vt homo appetat plures fines simpliciter vltimos simul, quàm successiuè: ergo non minùs potest illos intendere simul, quàm successiuè.

Antecedens pr. Homo de facto appetit simul plures fines simpliciter vltimos: ergo non est maior repugnantia vt eos appetat simul, quàm successiuè.

Antecedens pr. Qui committit simul plura peccata mortalia appetit simul plures fines simpliciter vltimos; atqui multi committunt simul plura peccata mortalia: ergo & appetunt simul plures fines simpliciter vltimos.

Maior pr. Ille appetit plures fines simpliciter vltimos, qui constituit in pluribus creaturis simul suum finem simpliciter vltimum; atqui qui committit simul plura peccata mortalia constituit suum finem simpliciter vltimum simul in pluribus creaturis: ergo appetit simul plures fines simpliciter vltimos.

Solutio: Ille appetit plures fines simpliciter vltimos simul, qui in pluribus creaturis constituit simul suum finem simpliciter vltimum expressè, & formaliter, Concedo. interpretatiuè tantùm, seu imputatiuè, Nego. atqui qui committit simul plura peccata mortalia constituit suum finem simpli-

citer ultimum simul in pluribus creaturis expresse, & formaliter , Nego. tantum interpretatiue, seu imputatiue. Concedo.

Contrà. Ille constituit expresse, & formaliter finem suum ultimum simpliciter in creaturis, qui illas præfert summo bono; atqui qui committit plura peccata mortalia præfert creaturas summo bono: ergo constituit in illis expresse, & formaliter suum finem simpliciter ultimum.

Solutio : Ille constituit expresse, & formaliter finem suum ultimum simpliciter in creaturis, qui illas præfert summo bono intentione expressa, & formali, Concedo. interpretatiua tantum, & imputatiua, Nego. atqui qui committit plura peccata mortalia præfert creaturas summo bono intentione expressa, & formali, Nego. interpretatiua, seu imputatiua, Concedo. Intentio expressa, & formalis est illa, per quam facta comparatione duorum pluris sit unum, quàm aliud quod non censetur habere tantum perfectionis, & bonitatis quantum aliud. Interpretatiua verò est illa, per quam non censetur unum habere plus perfectionis, aut bonitatis, quàm aliud; ita tamen se gerit ille, qui eam habet, at si reuera hoc ita existimaret.

QVARTA CONCLUSIO:

Intentio finis simpliciter ultimi non præcedit necessario intentiones finium particularium.

FENIS, simpliciter ultimus est summum bonum,

42 TRACT. VNIC. MORAL. DISP. I.

& fines particulares bona inferiora ; atqui intentio summi boni non præcedit necessario intentiones bonorum aliorum inferiorum : ergo neque finium particularium.

Minor probatur. Summum bonum est Deus , & alia bona inferiora sunt creaturæ ; atqui intentio Dei non præcedit necessario intentiones creaturarum ; ergo neque bonorum aliorum inferiorum.

Minor pr. Intentio Dei est amor Dei, & intentio creaturarum est amor earundem; atqui amor Dei non præcedit necessario amorem creaturarum : ergo neque intentiones creaturarum.

Minor pr. Ut amor Dei præcedat necessario amorem creaturarum , debet cognitio Dei , non tantum præcedere cognitionem creaturarum , sed etiam inferre eius amorem necessario ; atqui cognitio Dei non debet præcedere cognitionem creaturarum , & licet præcederet non inferret necessario eius amorem : ergo amor Dei non præcedit necessario amorem creaturarum.

Prima pars minoris probatur.

Illius cognitio non præcedit cognitiones creaturarum , cuius difficilius habemus species quam creaturarum ; atqui difficilius habemus species Dei quam creaturarum ; ergo cognitio Dei non præcedit necessario cognitionem creaturarum.

Minor pr. Difficilius habemus speciem eius , quod cognoscimus tantum per alias ; atqui cognoscimus Deum tantum per alias species : ergo difficilius habemus eius species , quam creaturarum.

Minor pr. Cognoscimus tantum res spiritales

per alienas species; atqui Deus est res spiritalis: ergo cognoscimus eū tantum per alienas species.

Maior pr. Cognoscimus tantum per alienas species id, quod sensus non cognoscit; atqui sensus non cognoscit res spirituales: ergo eas cognoscimus tantum per alienas species.

Minor pr. Sensus cognoscit tantum accidentia materialia: ergo non cognoscit res spirituales.

Secunda pars minoris superioris argumenti, cognitionem Dei non inferre necessario eius amorem, probatur.

Cognitio Dei in hac vita est obscura, & valde imperfecta: ergo non infert necessario eius amorem.

Consequentia pr. Illa cognitio non infert necessario amorem Dei, cum qua sapissimè stat eius odium; atqui cum cognitione obscura Dei stat sapissimè eius odium: ergo non infert necessario eius amorem.

Minor pr. Odium Dei stat cum cognitione clara abstractiua de ipso: ergo & cum cognitione obscura.

Antecedens pr. In peccatoribus siue Angelis, siue hominibus doctis est cognitio Dei clara abstractiua; atqui cum illa stat odium Dei: ergo cum cognitione clara abstractiua Dei stat sapissimè eius odium.

Antecedens pr. Peccatores siue Angeli, siue homines docti de facto odio habent Deum: ergo odium Dei stat cum cognitione clara abstractiua, quam habent de ipso.

QVINTA CONCLUSIO:

Nulla est obligatio cùm primum est vsus rationis præmittendi intentionem finis simpliciter vltimi intentionibus finium particularium.

ILLIVS nulla est obligatio, cuius non est præceptum neque naturale, neque positium; atqui non est præceptum, neque naturale, neque positium præmittendi intentionem finis simpliciter vltimi intentionibus finium particularium cùm primum est vsus rationis: ergo nulla est obligatio in primo instanti rationis præmittendi intentionem finis simpliciter vltimi intentionibus finium particularium.

Secunda pars minoris clara est, nullibi enim extat illud præceptum, & prima pr.

Illud præceptum naturale est fictitium, quod nec ipsum, nec eius materia innotescit, neque innotescere potest moraliter; atqui præceptum præmittendi intentionem finis simpliciter vltimi intentionibus finium particularium, in primo instanti rationis nemini innotescit, neque innotescere potest moraliter, sicut nec eius materia: ergo nullum est.

Minor pr. Vsus rationis incipit esse cùm primum est notitia boni, & mali moralis; atqui cùm primum est notitia boni, & mali moralis vix innotescit, aut innotescere potest moraliter præceptum præmittendi intentionem finis simpliciter vltimi intentionibus

intentionibus finium particularium, aut eius materia: ergo in primo instanti rationis non innotescit illud præceptum, neque eius materia.

Secunda pars minoris præcedentis argumenti, non innotescere materiam, & quod inde sequitur, & quæ est prima, neque etiam præceptum, probatur.

Materia huius præcepti est infinita Dei amabilitas; atqui in primo instanti rationis innotescere non potest moraliter infinita Dei amabilitas: ergo neque materia huius præcepti.

Minor pr. Illud innotescere non potest moraliter quod non patet per se, & nulla eius præcessit instructio; atqui infinita Dei amabilitas non patet per se, & nulla eius præcessit instructio: ergo non potest moraliter innotescere.

Minoris prima pars per se clara est, & secundam dubiam esse non finit experientia in rusticis, barbaris, & similibus, quos nullus planè eam docet.

SEXTA CONCLUSIO:

Quidquid homo appetit cum ratione, non appetit propter beatitudinem.

ILLUD homo appetit cum ratione quod appetit liberè; atqui quidquid homo appetit liberè, non appetit propter beatitudinem: ergo quidquid homo appetit cum ratione, non appetit propter beatitudinem.

Minor pr. Illud homo non appetit propter beatitudinem, quod cum appetit non repræsentatur ei beatitudo; atqui cum homo appetit multa liberè, non repræsentatur ei beatitudo: ergo homo

non appetit propter beatitudinem quidquid libere appetit.

Respondent : Atqui, cum homo appetit multa libere, non representatur ei beatitudo vera semper, Concedo. vera vel apparens, Nego. ergo quidquid homo libere appetit, non appetit propter beatitudinem veram semper, Concedo. veram, vel apparentem. Nego.

Contrà. Beatitudo vera est Deus, & apparens diuitiæ v. g. atqui cum homo appetit multa libere non repræsentatur ei Deus, neque diuitiæ: ergo neque beatitudo vera, aut apparens.

Minor pr. Illud non repræsentatur nobis, de quo non cogitamus; atqui cum homo appetit multa libere, non cogitat neque de Deo, neque de diuitiis: ergo cum homo appetit multa libere, non repræsentatur ei Deus, neque diuitiæ.

Respondent : Atqui cum homo appetit multa libere non cogitat semper de Deo, neque de diuitiis actu, & expresse, Concedo. habitu, & non ita expresse, & cum palpabili aduertentia, Nego. ergo cum homo appetit multa libere, non representatur ei Deus, neque diuitiæ semper actu, & expresse, Concedo. habitu, & non ita expresse, ac cum palpabili aduertentia, Nego.

Contrà. Homo cum appetit multa libere non cogitat de eo habitu, de quo non cogitauit antea actu; atqui cum homo appetit multa libere, non cogitauit antea actu de Deo, neque de diuitiis: ergo cum appetit multa libere, non cogitat de Deo, neque de diuitiis habitu.

Minor pr. Prima die, in qua incipit esse usus rationis, homo appetit multa libere; atqui non co-

de Bono, Fine, & Fælicitate. 47

gitat ea die actu de Deo, aut de diuitiis, & de eis non cogitauit etiam antea: ergo cùm homo appetit multa libere, non cogitauit antea de Deo, aut de diuitiis.

Minor pr. Homo non cogitat de iis actu, quæ non patent ipsius sensibus, & per seipsa non incurrunt in eius oculos, aut de illis non instruitur; atqui Deus, & diuitiæ non patent sensibus hominis prima die, qua in eo incipit esse vsus rationis, & non patuere etiam antea; & de illis etiam nulla præcessit in eo instructio, neque tunc datur maximè in rusticis, & educatis in syluis: ergo homo prima die, qua in eo incipit esse vsus rationis non cogitat de Deo, aut de diuitiis, & de iis non cogitauit antea.

Respondent ad præcedens argumentum: Atqui non cogitat actu, nec cogitauit antea de Deo, aut de diuitiis, neque de seipso, volendo se perfectissimum, Nego. & cogitat de seipso volendo se perfectissimum, Concedo. ergo cùm homo appetit multa libere, non cogitat, nec cogitauit antea de Deo, aut de diuitiis, neque de seipso volendo se perfectissimum, Nego. & cogitat, & cogitauit de seipso volendo se perfectissimum, Concedo.

Contrà. Cogitare de seipso non est cogitare de beatitudine: ergo nulla solutio.

Respondent: Cogitare de seipso secundum se sumpto, non est cogitare de beatitudine, Concedo. cogitare de seipso ut perfectissimo, non est cogitare de beatitudine; Nego.

Contrà. Ex concessis non cogitare de seipso ut perfectissimo non est cogitare de beatitudine; atqui qui appetit multa libere prima die, qua inci-

48 TRACT. VNIC. MORAL. DISP. I.

pit esse in eo usus rationis, non cogitat de seipso
ut perfectissimo: ergo non cogitat de beatitu-
dine.

Minor pr. Cogitatio, & conceptus hominis ut
perfectissimi exprimere debet, & ipsum homi-
nem, & perfectiones omnes, quas potest habere;
atqui qui appetit multa liberè prima die, qua in
eo incipit esse usus rationis; non habet conce-
ptum exprimentem perfectiones omnes, quas po-
test habere: ergo non cogitat de seipso ut perfe-
ctissimo.

Minor pr. Perfectiones omnes, quas homo ille
potest habere, non innotescunt ei per se, neque
patent ipsius sensibus, & de iis nulla præcessit in-
structio, neque tunc datur maximè in rusticis, &
educatis in sylvis: ergo non habet cognitionem,
& conceptum exprimentem omnes perfectiones,
quas potest habere.

Respondent: Perfectiones omnes, quas ille homo
potest habere non innotescunt ei per se distinctè, Con-
cedo. confusè quatenus scilicet in ista alia continen-
tur, aut ei sunt similes, Nego.

Contrà. Aliæ non continentur in tam limitata,
ac est illa, quæ appetitur, & ex aliis multæ non
sunt ei similes: ergo perfectiones omnes, quas il-
le homo potest habere non innotescunt ei etiam
confusè, & consequenter illas non appetit, nec
per illas, & ratione illarum beatitudinem.

Pressi ratione allata contrarium sentientes re-
currunt ad aliam responsionem ad argumentum
suprà factum.

Cogitare de seipso non est cogitare de beatitu-
dine: ergo nulla solutio.

Cogitare de seipſo non eſt cogitare de beatitudine, nec excitare amorem ſui ipſius, ex quo oriatur amor perfectionis, quæ appetitur, Nego. & eſt excitare amorem illum, ex quo amor perfectionis quæ appetitur oritur, ſicut & a'ij omnes, quo ſit ut ſit ſemper aliquis amor imperans alios omnes, Concedo.

Contrà. Amor ſui ipſius in illo homine non eſt diſtinctus ab eo, per quem appetit ſibi multa illa, in quæ liberè tendit: ergo ex amore ſui ipſius, non oritur deinde amor perfectionis illius, quæ appetitur.

Antecedens pr. Amor per quem appetit ſibi illa, in quæ liberè tendit eſt amor ſui ipſius: ergo non eſt diſtinctus ab amore ſui ipſius.

Antecedens pr. Amare eſt velle ſibi bonum, vel alteri: ergo amor per quem ille homo appetit ſibi ea, in quæ liberè tendit eſt amor ſui ipſius.

Respondent ad præcedens enthymema. Amor per quem ille homo appetit ſibi illa, in quæ tendit eſt amor ſui ipſius particularis, Concedo. vniuerſalis per quem vult ſibi omne bonum, & ex quo ſequuntur alij particulares, Nego.

Contrà. Homini illi non repræſentatur omne bonum, ex impugnatione præcedentium reſponſionum, & ipſe nullum aliud cognoscit, quàm illud particulare, quod appetit: ergo non eſt in illo homine amor vllus vniuerſalis per quem velit ſibi omne bonum.

Obiicies. Appetitiones omnes humanæ liberæ ſunt propter beatitudinem: ergo quidquid homo appetit liberè, appetit propter beatitudinem.

Antecedens pr. Appetitiones omnes humanæ

liberæ sunt propter finem vltimum; atqui beatitudo est finis vltimus: ergo sunt propter beatitudinem.

Solutio: Appetitiones omnes humane liberæ sunt propter finem vltimum particularem, vel finem vltimum simpliciter, Concedo. propter finem vltimum simpliciter tantum, Nego. atqui beatitudo est finis vltimus simpliciter, Concedo. finis vltimus particularis, & secundum quid, Nego.

Contrà. Appetitio quæ proficiscitur, nascitur, & dependet à fine vltimo simpliciter, est propter illum; atqui omnis appetitio humana libera proficiscitur, nascitur, & dependet à fine vltimo simpliciter: ergo omnes appetitiones humanæ sunt propter finem vltimum simpliciter.

Minor pr. Omnis motus liber voluntatis in bonum proficiscitur, nascitur, & dependet à fine vltimo simpliciter; atqui omnis appetitio humana libera, est motus liber voluntatis in bonum: ergo proficiscitur, nascitur, & dependet à fine vltimo simpliciter.

Maior probatur. Tam omnis motus liber voluntatis in bonum proficiscitur, nascitur, & dependet à fine vltimo simpliciter, quàm motus rationis in verum à primo principio per se euidenti, & motus physicus à primo motore simpliciter; atqui motus rationis in verum dependet à primo principio per se vero, & physicus proficiscitur, & nascitur à primo motore: ergo omnis motus liber voluntatis in bonum proficiscitur, & dependet à fine vltimo simpliciter.

Solutio: Neganda est maior. Ratio est facilis, quia cum motus rationis in verum, seu conclusio

de Bono, Fine, & Fœlicitate. si

tendat non tantum in suum obiectum, sed etiam in illud præmissarium, & principiorum, ex quibus deducitur, non est mirum si dicatur dependere ab ipsis, sicut & motus physicus à primo motore, qui debet concurrere ad omne ens creatum. At motus voluntatis in bonum non habet ullam dependentiam ab ulla bonitate antecedenti, & eodem modo fertur in illam, ac si nulla esset alia, quod vel ex eo patet quòd ferri possit in bonitatem impossibilem, modò non representetur ei illius impossibilitas.

SECTIO V.

In quo consistat beatitudo hominis obiectiva.

BEATITUDO duplex est, vna obiectiva, & altera formalis : prima est res illa, quam volumus nobis habere, & secunda dicitur ea esse, per quam nobis coniungimus primam. Secunda alia est naturalis quæ exigitur, & haberi potest naturæ viribus, alia supernaturalis quæ est supra vires, & exigentiam naturæ creatæ. Explicabimus primò quid sit beatitudo obiectiva, & sequenti sectione agemus de formali.

PRIMA CONCLUSIO:

Deus est nostra beatitudo obiectiua.

ILLUD est nostra beatitudo obiectiua, quod satiari potest, & explere nostrum appetitum; atqui Deus potest satiari, & explere nostrum appetitum: ergo Deus est nostra beatitudo obiectiua.

Minor pr. Illud satiari potest, & explere nostrum appetitum, quod est summum bonum; atqui Deus est summum bonum: ergo satiari potest nostrum appetitum.

Minor pr. Illud est summum bonum, quod continet formaliter, vel eminenter omne bonum; atqui Deus continet formaliter, vel eminenter omne bonum: ergo est summum bonum.

Minor pr. Ens à se continet formaliter, vel eminenter omne bonum; atqui Deus est ens à se: ergo & summum bonum.

Maiores pr. Bonum est perfectio; atqui ens à se continet omnem perfectionem formaliter, vel eminenter: ergo & omne bonum.

Minor pr. Illud continet formaliter, vel eminenter omnem perfectionem, quod in se illam habet, vel illi dat esse; atqui ens à se vel habet in se omnem perfectionem, vel illi dat esse: ergo & illam continet.

Minor pr. Omnis perfectio vel est à se, vel ab alio; atqui illam quæ est à se habet in se, & illi quæ est ab alio dat esse: ergo ens à se, vel habet in se omnem perfectionem, vel illi dat esse.

SECUNDA CONCLUSIO:

Beatitudo nostra obiectiua non est honor, potestas, diuitia, voluptas, aut quidquam huiusmodi.

ILLUD non est beatitudo nostra obiectiua, cuius possessio non facit nos beatos; atqui possessio honoris, potestatis, voluptatis, &c. non facit nos beatos: ergo non sunt nostra beatitudo obiectiua.

Minor pr. Illius possessio non facit nos beatos, quod non satiat nostrum appetitum; atqui possessio honoris, potestatis, voluptatis, &c. non satiat nostrum appetitum: ergo non facit nos beatos.

Minor pr. Illud non satiat nostrum appetitum, quod cum habemus alia appetimus; atqui cum habemus honorem, potestatem, voluptatem, &c. alia appetimus: ergo non satiant nostrum appetitum.

Minor pr. Appetimus bona, quorum sumus capaces; atqui sumus capaces aliorum bonorum, etiam cum habemus honorem, potestatem, voluptatem, &c. ergo cum habemus honorem, potestatem, voluptatem, &c. appetimus alia bona.

Minor pr. Sumus capaces scientiæ, cognitionis Dei, &c. ergo & aliorum bonorum.

Obiicies. Diuitiæ nos reddunt beatos: ergo sunt nostra beatitudo obiectiua.

Minor pr. Illud nos reddit beatos, quod est summum bonum; atqui diuitiæ sunt summum

bonum : ergo nos reddunt beatos.

Maior pr. Illud est summum bonum, quod infinite appetitur ; atqui diuitiæ infinite appetuntur : ergo sunt summum bonum.

Solutio : Illud est summum bonum, quod infinite appetitur propter excellentiam, quam in seipso habet, Concedo. ex inordinatione affectus tendentis in illud, Nego. atqui diuitiæ infinite appetuntur propter excellentiam, quæ sit in ipsis, Nego. ex inordinatione affectus eorum, qui illas volunt habere, Concedo.

Contrà. Diuitiæ appetuntur propter excellentiam, quæ est in ipsis : ergo nulla solutio.

Antecedens pr. Diuitiæ appetuntur infinite, vel propter excellentiam, quæ sit in ipsis, vel propter defectum ; atqui non propter defectum qui sit in ipsis : ergo propter excellentiam.

Solutio : Neganda est maior, & ratio est, quia licet id, in quod tendit appetitus sit aliqua bonitas, & excellentia diuitiarum, illa tamen non est tanta, ut mereatur appeti infinite, & consequenter, quod hoc modo appetatur, licet non proveniat ex defectu, qui sit in ipsis, non est dicendum provenire ex ipsarum excellentia, sed inordinatione affectuum appetentis, qui eos sine fine multiplicat erga id, circa quod paucos habere deberet, & non multum intensos.



SECTIO VI.

*In quo consistat beatitudo hominis
formalis.*

COGNITIONES in quibus dici potest esse sita beatitudo, aliæ sunt intuitivæ, quæ scilicet repræsentent beatitudinem obiectivam, ut est in se per propriam speciem, & ut præsentem; aliæ sunt abstractivæ, illæ nimirum, quæ repræsentant Deum per species creaturarum, seu ex consideratione perfectionum, quæ sunt in creaturis, & dependentia quam habent ab ente à se, iuvantur ad formandam cognitionem de ipso tribuentem illi omnes perfectiones creaturarum, seclusis ipsarum imperfectionibus, in quo casu vocant quidam creaturas illas motuum cognitionis Dei, propterea quòd sint illius medium, & via per quam peruenitur ad ipsam.

PRIMA CONCLUSIO:

Beatitudo formalis hominis consistit primario in actibus intellectus, secundo in actibus voluntatis, ut proprietatibus.

BEATITUDO formalis primario consistit, vel in habitu, vel in operatione sensus interni, aut

voluntatis, aut intellectus; atqui primario non consistit in tribus primis: ergo consistit in ultimo.

Due prime partes minoris probantur.

In illis primario non consistit beatitudo formalis, quæ formaliter nobis non coniungunt beatitudinem obiectiuam; atqui neque habitus, neque operatio sensus interni coniungunt nobis formaliter beatitudinem obiectiuam: ergo non consistit in habitu, neque in operatione sensus interni.

Minor pr. Illud non coniungit nobis formaliter beatitudinem obiectiuam, quod nobis illam nullo modo coniungit, aut tantum per aliud; atqui operatio sensus interni nullo modo nobis coniungit beatitudinem obiectiuam, & habitus tantum per aliud: ergo habitus, & operatio sensus interni non coniungunt nobis formaliter beatitudinem obiectiuam.

Prima pars minoris probatur.

Illud nullo modo coniungit nobis beatitudinem obiectiuam, quod nullo modo illam attingit; atqui operatio sensus interni nullo modo attingit beatitudinem obiectiuam: ergo nullo modo eam nobis coniungit.

Minor pr. Operatio sensus interni nullo modo attingit illud, quod non est eius obiectum; atqui beatitudo obiectiua non est eius obiectum: ergo nullo modo attingit beatitudinem obiectiuam.

Minor pr. Beatitudo obiectiua est Deus; atqui Deus non est obiectum sensus interni: ergo neque beatitudo obiectiua.

Minor pr. Quod est spiritale, & perfectissimum omnium entium spiritualium, non est obiectum sensus interni; atqui Deus est spiritualis, & ens omnium perfectissimum: ergo non est obiectum sensus interni.

Secunda pars minoris superioris argumenti, habitum coniungere tantum nobis per aliud beatitudinem obiectivam, probatur.

Illud coniungit nobis tantum beatitudinem obiectivam per aliud, quod coniungit nobis illam tantum per suum actum; atqui habitus coniungit nobis tantum beatitudinem obiectivam per suum actum: ergo coniungit nobis illam tantum per aliud.

Minor pr. Illud coniungit nobis tantum beatitudinem per suum actum, cuius actus est representatio, aut prosecutio ipsius, ipsum vero neutrum est; atqui actus productus ab habitu est prosecutio, aut representatio beatitudinis, ipse vero neutrum est: ergo coniungit illam nobis tantum per suum actum.

Minor pr. Quod est tantum facilitas ad prosecutionem, aut representationem, non est representatio, neque prosecutio beatitudinis; atqui habitus est tantum facilitas ad representationem, aut prosecutionem beatitudinis: ergo habitus non est neque representatio, neque prosecutio beatitudinis.

Secunda pars minoris primi argumenti, scilicet beatitudinem non consistere primario in actibus voluntatis, probatur.

In illo non consistit beatitudo nostra forma'is primario, quod supponit aliud, quod potiori iur-

re dicitur possessio beatitudinis obiectiua; atqui actus voluntatis supponunt aliud, quod potiori iure dicitur possessio beatitudinis obiectiua: ergo non consistit primario in actibus voluntatis.

Minor pr. Actus voluntatis supponunt actus intellectus; sed actus intellectus dicuntur potiori iure possessio beatitudinis obiectiua: ergo actus voluntatis supponunt aliud, quod potiori iure dicitur possessio beatitudinis obiectiua.

Minor pr. Illud potiori iure dicitur possessio beatitudinis obiectiua, quod præsupponitur alteri, & illam facit nobis præsentem suo modo, quam illud, quod in illam fertur, & ab ipsa quasi trahitur; atqui actus intellectus præsupponuntur actibus voluntatis, illam faciunt nobis præsentem, hi autem in illam feruntur, & ab ea quasi trahuntur: ergo actus intellectus potiori iure dicuntur possessio beatitudinis obiectiua.

Prima pars minoris clara est, & secunda probatur.

Actus intellectus faciunt sibi præsens suum obiectum, & illi voluntatis ad illud feruntur; atqui beatitudo est utrorumque obiectum: ergo actus intellectus illam faciunt nobis præsentem, & hi voluntatis in illam feruntur.

Obicitur. In illo primario consistit beatitudo, quod est magis proprie possessio, & consecutio beatitudinis obiectiua; atqui actus voluntatis sunt magis proprie possessio, & consecutio beatitudinis obiectiua quam actus intellectus: ergo beatitudo consistit primario in actibus voluntatis.

Minor probatur. Beatitudo obiectiua est summum bonum, & finis simpliciter ultimus; atqui actus voluntatis sunt potius consecutio summi boni, & finis simpliciter ultimi, quàm actus intellectus: ergo actus voluntatis sunt magis propriè possessio, & consecutio beatitudinis obiectiue.

Minor pr. Illud est potius consecutio summi boni, & finis simpliciter ultimi, quod ipsum habet pro obiecto proprio, & ad ipsum consequendum procurat media, quàm quod illud non habet pro obiecto proprio, & ad ipsum consequendum non procurat media; atqui actus voluntatis habent pro obiecto proprio summum bonum, & ad ipsum consequendum procurant media, actus verò intellectus minimè: ergo actus voluntatis sunt potius consecutio summi boni, & finis simpliciter ultimi, quàm actus intellectus.

Maiores pr. Non potest esse alia ratio, cur quod non habet pro obiecto proprio summum bonum, neque procurat media ad ipsum consequendum sit potius illius consecutio, quàm quod id non facit, nisi quia istud facit nobis præsens summum bonum, cum illud tantum feratur in illud; atqui hæc ratio nulla est: ergo illud est potius consecutio summi boni, & finis simpliciter ultimi, quod ipsum habet pro obiecto proprio, & ad ipsum consequendum procurat media, quàm quod illud non habet pro obiecto proprio, & ad ipsum consequendum non procurat media.

Minor pr. Illud, quod coniungit nobis summum bonum, ut est in se, debet dici potius illius consecutio, quàm illud, quod tantum nos vnit il-

li prout est in nobis; atqui quod fertur in summum bonum vnit nos illi prout est in se, & quod illud facit nobis præsens vnit nos tantum illi prout est in nobis: ergo quod fertur in summum bonum debet dici potius illius consecutio, quam illud, quod facit nobis illud præsens.

Solutio: Atqui quod fertur in summum bonum vnit nos illi prout est in se, & quod illud nobis facit præsens cognitione certa, intuitiva, vel abstractiva, vnit nos tantum illi prout est in nobis, Nego. cognitione obscura, & dubia, transeat. ergo quod fertur in summum bonum debet dici potius illius consecutio, quam illud, quod facit nobis illud præsens cognitione incerta, & dubia, transeat. cognitione certa, & clara, Nego.

Contrà. Quod facit nobis præsens cognitione certa, & intuitiva summum bonum non est possessio illius: ergo nulla solutio.

Antecedens pr. Cognitio intuitiva diuitiarum facit nobis illas præsentes; atqui non est illarum possessio: ergo quod facit nobis præsens summum bonum cognitione certa, & intuitiva, non est possessio illius.

Solutio: Atqui non est illarum possessio, & illæ non habent alium modum possessionis, Nego. & habent, Concedo. ergo cognitio intuitiva faciens nobis præsens summum bonum, non est possessio illius, & summum bonum habet alium modum possessionis. Nego. & non habet, Concedo.

Contrà. Quod est possessio summi boni, etiamsi nō habeat alium modum possessionis, non debet ordinari ad aliud; atqui cognitio intuitiva faciens nobis præsens summum bonum ordinatur

ad aliud : ergo quod facit nobis præfens summum bonum cognitione intuitiva, etiamsi ipsum non sit capax alterius modi possessionis, non est vera possessio.

Solutio : Quod est possessio summi boni etiamsi ipsum non habeat alium modum possessionis, non debet ordinari ad aliud, quod non sit eius proprietas, aut quasi complementum, Concedo. quod sit eius proprietas, aut quasi complementum, Nego. Cognitio intuitiva faciens nobis præfens summum bonum ordinatur ad aliud, quod sit eius proprietas, aut quasi complementum, Concedo. quod non sit eius proprietas, aut quasi complementum, Nego.

Contrà. Cognitio intuitiva summi boni ex D. Anselmo asserente peruersum esse ordinem amare, ut cognoscas, rectum verò cognoscere ut diligas, ordinatur ad amorem; atqui amor non est proprietas illius : ergo ordinatur ad aliud, quod non est eius proprietas.

Minor pr. Illud non est proprietas beatitudinis quod maximè commendatur in Scriptura cum loquitur de beatitudine; atqui amor, & gaudium maximè commendantur in Scriptura cum loquitur de beatitudine : ergo amor non est proprietas beatitudinis.

Solutio : Illud non est proprietas beatitudinis, quod maximè commendatur in Scriptura tanquam primaria ratio, & ipsa substantia beatitudinis, Concedo. tanquam ratio secundaria, & quid consequens ipsius naturam & substantiam, Nego. atqui amor & gaudium maxime commendantur in Scriptura cum loquitur de beatitudine.

tanquam primaria ratio, & ipsa substantia beatitudinis, Nego. tanquam ratio secundaria, & quid consequens ipsius naturam, & substantiam, Concedo.

Contrà. Amor non est secundaria ratio beatitudinis: ergo nulla solutio.

Antecedens pr. Beatitudo potest esse sine eo, quod est eius secundaria ratio, & quid consequens ad illam; atqui beatitudo non potest esse sine amore, & gaudio: ergo amor non est secundaria ratio beatitudinis.

Solutio: Beatitudo potest esse sine eo, quod est eius secundaria ratio, & quid consequens ad illam, essentialiter sumpta, Concedo. completè sumpta, Nego. atqui non potest esse sine amore, & gaudio essentialiter sumpta, Nego. completè sumpta, Concedo.

Contrà. Beatitudo essentialiter sumpta non potest esse sine amore, & gaudio: ergo nulla solutio.

Antecedens probatur. Quod excludit omnem miseriam non potest esse sine amore, & gaudio; atqui beatitudo essentialiter sumpta excludit omnem defectum, & miseriam: ergo non potest esse sine amore, & gaudio.

Solutio: Quod excludit omnem miseriam conaturaliter seu in actu primo, non potest esse naturaliter sine amore, & gaudio, Concedo. non potest esse supernaturaliter sine amore, & gaudio, Nego. atqui beatitudo essentialiter sumpta excludit conaturaliter omnem defectum, & miseriam, Concedo. si Deus agat supernaturaliter, & non attendendo ipsius exigentiam, Nego. De ratione quidem beatitudinis essentialis est, ut exigit ca-

rentiam *omnis* planè miseria , eaque ei debeat , nisi fiat ipse. *vis*, non tamen d. struatur per hoc, quod huic ipsius exigentia non satisfiat , ac prinde licet non habeat amorem , quem exigit , non est censenda ideo non perseverare, sicut nec i. *nis* desisse propterea quod non habeat *ca'orem* ut octo.

Contrà. Beatitudo formalis non perseverat posita sola cognitione : ergo nulla solutio.

Antecedens probatur. Beatitudo formalis non fit à nobis ; atqui cognitio fit à nobis : ergo beatitudo formalis non perseverat posita sola cognitione.

Maior pr. Nos non facimus nos beatos : ergo beatitudo formalis non fit à nobis.

Solutio : Non nos facimus nos beatos adequatè, Concedo. inadquatè, Nego. Neque enim in hoc est *minus* inconueniens, quàm quod nos viuificemus, aut faciamus bonos, aut etiam si *pium* opus concedatur nobis in *præmii* autecedentis præstiti *præmii*emus nos ipsos.

Contrà. Nos non facimus non gratos , & sanctos sanctitate formali etiam inadquatè : ergo neque beatos beatitudine formali.

Antecedens probatur. Ille non facit se gratum & sanctum sanctitate formali etiam inadquatè qui non producit gratiam ; atqui nos non producimur gratiam : ergo non facimus nos gratos, & sanctos sanctitate formali.

Solutio : Ille non facit se gratum , & sanctum sanctitate formali etiam inadquatè , qui non producit gratiam , neque in genere cause efficiētis physica , nec moralis , Concedo. qui producit illam in genere cause efficiētis moralis , Nego. atq;

64 TRACT. VNIC. MORAL. DISP. I.

qui nos non produciunt gratiam in genere causa efficientis physica, Concedo. in genere cause efficientis moralis, Nego. intuitu enim nostri boni operis elicit ex gratia Dei obtenta nobis per merita Christi Domini Deus infundit nobis gratiam sanctificantem & per quam iustificamur.

SECUNDA CONCLUSIO :

Beatitudo formalis naturalis hominis consistit in cognitione, & amore summi boni.

BEATITUDO formalis naturalis hominis non consistit tota in cognitione summi boni : ergo consistit in eius cognitione, & amore.

Antecedens pr. Sola cognitio summi boni, non est tota essentia beatitudinis naturalis hominis : ergo beatitudo formalis naturalis hominis non consistit tota in cognitione summi boni.

Antecedens pr. Illud non est tota essentia beatitudinis, cui non debentur, aut non includit ea quæ semper illam debent comitari; atqui sola cognitio naturalis summi boni non includit, neque ei debentur ea, quæ semper debent comitari beatitudinem naturalem : ergo sola cognitio summi boni, non est tota essentia beatitudinis naturalis hominis.

Minor pr. Amor summi boni includitur, aut saltem connexus est semper cum beatitudine naturali ; atqui amor summi boni non includitur à cognitione summi boni, neque ei debetur semper : ergo cognitio summi boni non includit, neque ei debentur ea, quæ semper debent comi-

tari beatitudinem naturalem.

Prima pars minoris est clara, & secunda probatur.

Cognitio summi boni, quam habent mali Angeli est longè perfectior iis, quas homines habent; atqui ei non debetur amor summi boni: ergo cognitioni summi boni non debetur eius amor.

Minor pr. Quod manet separatum ab alio sine vlla violentia ei non debetur; atqui cognitio summi boni manet in dæmonibus separata ab eius amore sine vlla violentia: ergo ei non debetur.

Minor pr. Nihil illis inferre potest violentiam illam, quàm Deus; atqui Deus non infert illis violentiam, vt impediat amorem summi boni, seu suæ bonitatis: ergo cognitio summi boni manet in dæmonibus separata ab eius amore sine vlla violentia.

Obiicies. Amor summi boni non est de essentia beatitudinis naturalis: ergo beatitudo formalis naturalis hominis non consistit in cognitione, & amore summi boni.

Antecedens pr. Sublato amore manet beatitudo formalis naturalis hominis: ergo amor non est de eius essentia.

Antecedens pr. In pueris non baptizatis, & in hominibus in statu puræ naturæ post transactam tempus viæ perseverasset semper beatitudo naturalis; atqui non perseverasset amor; ergo sublato amore summi boni manet beatitudo naturalis.

Minor pr. Amor summi boni perseveraret in

illis liberè: ergo non semper perseveraret.

Consequentia pr. Non magis amor liber summi boni perseveraret semper in illis, quàm in statu viæ; atqui in statu viæ non perseveraret semper in illis: ergo neque post transactum tempus viæ.

Maior pr. Ratio huius maioris perseverantiæ assignatur communiter protectio Dei specialis, quam meruerunt in statu viæ; atqui nullam huiusmodi protectionem Dei specialem meruerunt in statu viæ: ergo non magis amor liber summi boni perseveraret semper in illis, quàm in statu viæ.

Minor pr. Ille in statu viæ non meretur hanc protectionem Dei specialem, qui in eo non potest servare totam legem, neque commissorum contra eam veniam impetrare; atqui illi in statu viæ non servauerunt totam legem, neque veniam impetrarunt admissorum contra eam: ergo nullam huiusmodi protectionem Dei specialem meruerunt.

Prima pars minoris probatur.

Vires illorum ad servandam totam legem non essent maiores iis, quas nos habemus; atqui nostræ seclusa gratia per Christum, quæ illi caruissent, non sufficiunt ad servandam totam legem: ergo illi in statu viæ non potuissent servare totam legem.

Solutio: Vires illorum intrinsece ad servandam totam legem non essent maiores iis, quas nos habemus iam in natura corrupta, Concedo. vires extrinsece, Nego. Neque enim fuisset illis rebellio tanta appetitus, & demoni non fuisset facta potestas eos op-

pugnandi tam acriter; atqui vires nostre intrins. & sine illis extrinsecis amissis per peccatum, non sufficiunt ad seruandam legem, Concedo. cum illis extrinsecis, Nego.

Secunda pars minoris superioris argumenti, quòd non potuissent veniam impetrare admissorum grauer contra legem, pr.

Grauer admissa contra legem expiari debent condigna satisfactione propria, vel aliena; atqui illi neutram exhibere potuissent: ergo non potuissent impetrare veniam grauer admissorum contra legem.

Solutio: Grauer admissa contra legem expiari debent condigna satisfactione propria, vel aliena, si non accedat fauor Dei specialis, Concedo. si accedat, Nego. atqui illi exhibere non potuissent condignam satisfactionem propriam, nec alienam, & non accessisset fauor Dei specialis acceptantis aliquem illorum actum naturalem bonum in expiationem delictorum ipsorum, habita ratione fragilitatis ipsorum, inconstantie, & impotentie aliud exhibendi, Nego. & accessisset huiusmodi fauor, Concedo.

TERTIA CONCLUSIO:

Datur vera amicitia inter Deum, & homines.

AMICITIA est mutua duorum beneuolentia ipsos non latens in honestate fundata; atqui datur huiusmodi beneuolentia inter Deum, & homines: ergo & vera amicitia.

68 TRACT. VNIC. MORAL. DISP. I.

Minor pr. Ad huiusmodi beneuolentiam hæc tantum requiruntur: primum, vt sit amor mutuus: secundum, vt sit beneuolentiæ, hoc est propter bonum amici: tertium, vt sit vtrique cognitum: quartum, vt sit æqualitas inter ipsos, & quintum, vt sit cum communicatione; atqui hæc omnia reperiuntur in amicitia inter Deum, & homines: ergo & huiusmodi beneuolentia.

Prima pars minoris probatur.

Inter illos est amor mutuus, qui se mutuò amant; atqui Deus amat homines, & homines Deum: ergo inter Deum, & homines est mutuus amor.

Secunda pars minoris præcedentis argumenti probatur.

Ille amor est beneuolentiæ, qui est propter commodum amici; atqui hominum amor erga Deum est sæpè propter ipsius commodum, & amor Dei erga homines est etiam propter ipsorum commodum: ergo amor Dei, & hominum est beneuolentiæ.

Tertia pars minoris superioris argumenti, amorem illum beneuolentiæ esse Deo, & hominibus cognitum, probatur.

Deus cognoscit amorem, quo ipsum prosequuntur homines, homines etiam non latet amor Dei erga ipsos: ergo amor inter Deum, & hominem est vtrique cognitus.

Prima pars antecedentis certa est, & secunda probatur.

Homines cognoscunt, quod Deus ipsis testamentum reliquit in sacris paginis; atqui Deus reliquit testamentum in sacris paginis diligentes se diligere;

gere: ergo homines non latet amor Dei erga ipsos.

Quarta pars minoris superioris argumenti, esse æqualitatem inter Deum, & homines, probatur.

Ut sit æqualitas inter Deum, & homines sufficiens ad amicitiam, satis est, ut homines sint participes naturæ divinæ; atqui homines iusti sunt participes naturæ divinæ: ergo est sufficiens æqualitas inter Deum, & homines.

Minor probatur. Filij Dei adoptivi sunt participes naturæ divinæ: atqui iusti sunt filij Dei adoptivi: ergo & participes naturæ divinæ.

Minor probatur. Qui habent gratiam sanctificantem sunt filij Dei adoptivi; atqui iusti habent gratiam sanctificantem: ergo sunt filii Dei adoptivi.

Major pr. Qui habent ius adeundi hæreditatem Dei sunt filii adoptivi Dei; atqui qui habent gratiam habent ius adeundi hæreditatem Dei: ergo sunt filii Dei adoptivi.

Minor pr. Hæreditas Dei est visio clara, & intuitiva ipsius essentiae; atqui qui habent gratiam habent ius ad visionem claram, & intuitivam essentiae divinæ: ergo & ad hæreditatem Dei.

Quinta pars minoris superioris argumenti probatur.

Communicatio requisita ad amicitiam petit communionem bonorum, communicationem secretorum; seu convictum aliquem; atqui est sufficiens communio bonorum inter Deum, & homines, communicatio quoque secretorum, seu

70 TRACT. VNIC. MORAL. DISP. I.

conuictus aliquis non deest : ergo amor inter Deum & homines est cum communicatione.

Prima pars minoris probatur.

Inter illos est bonorum communio qui vicissim sibi conferunt, quæ habent ; atqui Deus confert hominibus sua bona, & homines seipso deouent, & quæcumque habent Deo : ergo est sufficiens communio bonorum inter Deum, & homines.

Secunda pars minoris probatur.

Inter illos est communicatio secretorum, & conuictus aliquis, qui sibi mutuò colloquuntur, & quidem de rebus occultis ; atqui Deus, & homines sibi colloquuntur de rebus occultis valdè : ergo inter illos est communicatio secretorum.

Minor pr. Moses loquebatur facie ad faciem cum Deo in monte Sina de valdè occultis, & magni momenti ; ergo Deus, & homines sibi colloquuntur de rebus occultis.

Antecedens pr. Futura sunt valdè occulta, & salus ingentis multitudinis hominum res maximi momenti ; atqui Deus loquebatur cum Mose de iis que futura erant populo Hebræo numerosissimo : ergo Moses loquebatur cum Deo de rebus valde occultis & magni momenti.

Obijcies. Inter illos non est vera amicitia, qui non se multò amant amore beneuolentiæ ; atqui Deus non amat homines amore beneuolentiæ : ergo non est vera amicitia inter Deum, & homines.

Minor probatur. Ille non amat homines amore beneuolentiæ, cuius amor erga homines non nititur proprio ipsorum commodo ; atqui amor

Dei erga homines non nititur proprio ipsorum commodo : ergo non amat homines amore benevolentie.

Minor probatur. Ille amor erga homines non nititur proprio ipsorum commodo, qui non tendit in homines propter ipsos homines; atqui amor Dei erga homines non tendit in homines propter ipsos homines : ergo non nititur proprio ipsorum commodo.

Minor probatur. Ille amor non tendit in homines, propter ipsos homines, qui non sistit in ipsis, sed ipsos refert ad aliud; atqui amor Dei erga homines non sistit in ipsis hominibus, sed ipsos refert ad suam bonitatem : ergo non tendit in homines propter ipsos.

Solutio : Ille amor non tendit in homines propter ipsos homines qui non sistit in ipsis, sed ipsis refert ad aliud, si ipsis non velit bonum, quia ipsorum bonum est, Concedo. si ipsis velit bonum, quia est ipsorum bonum, Nego. atqui amor Dei erga homines non sistit in ipsis hominibus, sed ipsos refert ad suam bonitatem, & non vult ipsis bonum, quia est ipsorum bonum, Nego. & vult ipsis bonum, quia ipsorum bonum est, Concedo. Ratio est, quia si per impossibile Deus non necessitaretur amare, qui amat propter suam bonitatem, non desineret benefacere hominibus, atque ita verum est ipsos amare propter ipsos, & ipsis velle bonum, quia ipsorum bonum est, quamvis quia tenetur agere perfectissimo modo & propter finem omnium prestantissimum, referat ipsos & ipsis beneficiat propter suam bonitatem.

S E C T I O. VII.

An status puræ naturæ sit possibilis.

FR VSTRA nos disputasse de beatitudine naturali hominis tertia conclusione præcedentis sectionis, ij^a volunt, qui negant statum puræ naturæ esse possibilem, contenduntque nullum huiusmodi fuisse; nec posse esse. Per statum autem puræ naturæ intelligunt illum, in quo finis hominis ultimus, & media per quæ acquiri deberet, nihil haberent supra vires naturæ.

V N I C A C O N C L U S I O :

Status naturæ puræ est possibilis.

STATVS naturæ puræ est ille, in quo homo crearetur sine ullis donis supernaturalibus, & sine eleuatione ad finem supernaturalem; atqui homo creari posset sine ullis donis supernaturalibus, & sine eleuatione ad finem supernaturalem: ergo status naturæ puræ est possibilis.

Minor pr. Homo creari potest sine eo, quod non requiritur necessario ad eius existentiam, & conseruationem; atqui dona supernaturalia, & eleuatio ad finem supernaturalem non requiruntur necessario ad existentiam, & conseruationem hominis: ergo homo creari potest sine illis.

Minor pr. Quod est indebitum homini non re-

quiritur necessario ad eius primam existentiam, aut conseruationem; atqui dona supernaturalia, & eleuatio ad finem supernaturalem sunt indebita homini primò existenti, & conseruato: ergo non requiruntur ad eius existentiam, aut conseruationem.

Respondent primò: *Quod est indebitum homini non requiritur ad eius existentiam, aut conseruationem necessario necessitate petita ex ipso homine, Concedo. necessitate petita ex ipsius creatore, Deo scilicet, qui nihil facere potest inordinatum, quale esset partem inferiorem rebellare aduersus superiorem, & hanc non posse illam cohibere, Nego. & concessa minori: ergo non requiruntur ad eius existentiam, aut conseruationem necessario necessitate petita ex ipso homine, Concedo. ex eius causa creatiua, Deo scilicet, Nego.*

Contrà. Quod requiritur necessario ad existentiam hominis necessitate licet petita ex ipsius causa productiua non est illi indebitum; atqui dona supernaturalia, & eleuatio ad finem supernaturalem sunt indebita homini: ergo non requiruntur necessario vlla necessitate, neque ad eius existentiam, neque conseruationem.

Maior pr. Illud non est indebitum homini, quod causa eius productiua ei negare non potest; atqui quod requiritur ad eius existentiam necessario necessit. r: licet petita ex eius causa productiua, & eius conditione, hæc ei negare non potest: ergo non est illi indebitum.

Respondent: *Illud non est indebitum homini, quod causa eius productiua ei negare non potest, habita ratione ipsius hominis habentis ad hoc in-*

aliquid, Concedo. habita ratione præcisè ipsius cause, quam decet hoc ei concedere, Nego. atqui quod requiritur ad eius existentiam necessaria necessitate licet petita ex eius causa productiva, hac ei negare non potest habita ratione ipsius hominis, & si præcisè ipse homo attenderetur, Nego. habita ratione ipsius cause, quam dedeceret hoc ei negare, Concedo.

Contrà. Quando effectus aliquis ita exigit causam, ut non possit habere aliam, quod debetur isti ad illius productionem, debetur etiam ipsi effectui saltem mediatè; atqui homo ita exigit suam causam productivam, Deum scilicet, ut non possit esse ab alia: ergo quod debetur isti, & est in ipsa necessarium ad productionem hominis, debetur etiam isti saltem mediatè, & exigitur ab ipso.

Maior pr. Debetur effectui, quod exigit, & id omne, ad quod intelligi debet terminari eius exigentia; atqui quando effectus ita exigit aliquam causam, ut non possit habere aliam, exigit etiam, quod in ipsa requiritur, & est necessarium ad ei dandum esse: ergo quando effectus ita exigit causam, ut non possit habere aliam, quod debetur isti ad illius productionem, debetur etiam ipsi effectui saltem mediatè.

Minor pr. Exigit necessaria ad positionem sui esse: ergo & quod requiritur in causa ad illam ponendam.

Respondent aliqui ad secundum argumentum factum superius in probationem conclusionis, concedendo primam partem minoris, & negando secundam; volunt siquidem finem ultimum hominis non posse

non esse supernaturalem, admitiendo tamen mediā, per quā proponitur acquirendus à supremo legistatō, ut possit esse naturalis.

Contrā. Existentiā, & conseruatio hominis, siue homo primò existens, siue conseruatus non exigit finem supernaturalem: ergo eleuatiō ad huiusmodi finem non requiritur necessario ad existentiam, & conseruationem hominis.

Antecedens pr. Finis ille supernaturalis est visio Dei; atqui homo siue primò existens, siue conseruatus non exigit visionem Dei: ergo homo primò existens, & conseruatus non exigit finem supernaturalem!

Minor pr. Visio Dei est supra exigentiam, & vires totius naturæ: ergo homo siue primò existens, siue conseruatus non exigit illam.

Antecedens pr. Quod non potest esse connaturale vlli intellectui creato est supra vires, & exigentiam totius naturæ; atqui visio Dei ex vnanimi consensu PP. & Theologorum non potest esse connaturalis vlli intellectui creato: ergo visio Dei est supra exigentiam, & vires totius naturæ.

Minor pr. Ius ad hæreditatem diuinam non potest esse connaturale vlli intellectui creato; atqui illi, cui connaturalis est visio Dei connaturale est etiam ius ad diuinam hæreditatem: ergo visio Dei non potest esse connaturalis vlli intellectui creato.

Mayor probatur primò:

Ius ad hæreditatem diuinam non potest esse connaturale illi rei, quæ essentialiter, & indispensabiliter est serua, & eximi non potest à vera,

& propriissima seruitute ; atqui omnis intellectus creatus est essentialiter , & indispensabiliter seruus : ergo ius ad hæreditatem diuinam non potest esse connaturale vlli intellectui creato.

Maior pr. Ille cui ius ad diuinam hæreditatem est connaturale est connaturaliter , & naturâ suâ filius Dei adoptiuus ; atqui ille , qui essentialiter , & indispensabiliter est seruus , non potest connaturaliter , & naturâ suâ esse filius Dei adoptiuus : ergo ius etiam ad diuinam hæreditatem non potest esse ei connaturale.

Maior pr. Ille non est connaturaliter , & naturâ suâ filius Dei adoptiuus , qui ad hoc indiget fauore , & gratia speciali , atqui qui est essentialiter seruus indiget gratia , & fauore speciali , vt possit esse filius adoptiuus : ergo non potest hoc habere connaturaliter , & naturâ suâ.

Minor pr. Adoptio non tantum eius , qui est seruus , sed etiam eius , qui non est seruus , est fauor , & quidem magnus erga adoptatum : ergo qui est essentialiter seruus indiget gratia , & fauore speciali vt possit esse filius adoptiuus.

Minor superioris argumenti , illi cui connaturalis est visio connaturale etiam esse ius ad diuinam hæreditatem , probatur.

Visio Dei est diuina hæreditas : ergo cui connaturalis est visio , connaturale etiam est ius ad diuinam hæreditatem.

Respondent ad argumentum superius factum ; Atqui visio Dei non potest esse connaturalis vlli intellectui creato , vt corona iustitie , & acquirenda per merita supernaturalia , & equalis valoris , Concedo. vt obtinenda per actiones naturales.

morales, Nego. ergo visio Dei est supra exigentiam, & vires naturæ, ut corona iustitiæ, & acquirenda per media supernaturalia, & æqualis valoris, Concedo. ut obtinenda per actiones morales, & ut donum liberalitatis, Nego.

Contrà. Quocunque modo obtinenda sit visio Dei non est connaturalis ulli intellectui creato, & est supra vires, & exigentiam totius naturæ: ergo nulla solutio.

Antecedens pr. Ius ad hæreditatem diuinam est supra vires, & exigentiam naturæ quocunque modo obtineatur: ergo & visio Dei.

Antecedens pr. Adoptio Dei est supra vires, & exigentiam totius naturæ: ergo & ius ad hæreditatem diuinam.

Antecedens pr. Adoptio eius, qui est essentialiter seruus, est maximus fauor, & gratia præcipua: ergo est supra vires, & exigentiam naturæ.

Consequentia pr. Illud non est maximis fauor, & gratia præcipua quod est debitum, & exigitur à natura; atqui adoptio ex concessis est gratia præcipua, & maximus fauor: ergo non est debitum ullo modo, & non exigitur à natura.

Respondent: Atqui adoptio est gratia præcipua, & maximus fauor quoad modum, quo acquiritur iam à nobis & corona iustitiæ, cum posset acquiri præcisè ut donum liberalitatis, Concedo. secundum se, & præscindendo ab illo modo, quo acquiritur, Nego.

Contrà primò. Iuxta responsionem, adoptio secundum se non est donum liberalitatis, nec fauor, nec gratia; atqui ex sensu PP. & Theo-

78 TRACT. VNIC. MORAL. DISP. I:

logorum est maximus fauor, & gratia præcipua, sumpta etiam secundum se: ergo non est tantum gratia secundum modum, quo acquiritur, vt corona iustitiæ.

Contrà secundò. Creaturæ, cui debetur adoptio secundum se, debetur etiam modus acquirendi illam vt est corona iustitiæ: ergo nulla solutio.

Antecedens pr. Modus acquirendi adoptionem, vt est corona iustitiæ, consistit in acquisitione eius per media supernaturalia; atqui ei, cui debetur adoptio secundum se debetur etiam modus acquirendi illam per media supernaturalia: ergo creaturæ, cui debetur adoptio secundum se, debetur etiam modus acquirendi illam vt est corona iustitiæ.

Minor pr. Habenti ius ad adoptionem debetur etiam nobilissimus modus agendi, & nobilior quam ei, qui non haberet tale ius; atqui nobilissimus modus agendi, & nobilior eo, qui debet esse in eo, qui non haberet tale ius, debet obtinere adoptionem per media supernaturalia: ergo ei, cui debetur adoptio debetur etiam modus acquirendi illam per media supernaturalia.

Maior probatur primò.

Ideo ex PP. & Theologis gratiæ-sanctificantis debetur modus agendi nobilissimus, & per actiones supernaturales, quia est ius ad visionem Dei, & hæreditatem æternam: ergo etiam habenti ius ad adoptionem debetur etiam nobilissimus modus agendi, & per media supernaturalia.

Minor præcedentis argumenti probatur secundò.

Modus obtinendi adoptionem diuinam in eo, qui non haberet ius ad illam, est per actiones naturales morales; atqui modus alius nobilior illo, est ille, qui est per actiones supernaturales: ergo modus nobilissimus agendi, & nobilior eo, qui est in eo, qui non haberet tale ius, debet esse per actiones supernaturales.

Obiicies. Ille status nostræ naturæ non est possibilis, in quo impossibilis esset ei consecutio eius quod appetit; atqui in statu puræ naturæ impossibilis ei esset consecutio eius, quod appetit: ergo status puræ naturæ non est possibilis.

Minor pr. Nostra natura appetit beatitudinem & felicitatem; atqui consecutio beatitudinis, & felicitatis esset illi impossibilis in statu puræ naturæ: ergo & eius, quod appetit.

Minor pr. Beatitudo, & felicitas nostra est possessio summi boni; atqui in statu puræ naturæ impossibilis esset nobis consecutio possessionis summi boni: ergo & beatitudinis, & felicitatis.

Minor pr. Possessio summi boni consistit in optima operatione præstantissimæ facultatis circa optimum obiectum; atqui huiusmodi operatio esset impossibilis in statu puræ naturæ: ergo & consecutio possessionis summi boni.

Minor pr. Optimum obiectum est Deus, & optima operatio præstantissimæ facultatis circa ipsum est cognitio intuitiua, seu visio ipsius facie ad faciem; atqui huiusmodi visio esset impossibilis in statu naturæ puræ: ergo & optima operatio præstantissimæ facultatis nostræ circa optimum obiectum.

80. TRAC. VNIC. MORAL. DISP. I.

Solutio : Optimum obiectum est Deus , & optima operatio prestantissime facultatis circa ipsum est cognitio intuitiva , seu visio ipsius facie ad faciem in natura pura , Nego. in natura eleuata ad finem supernaturalem , Concedo. atqui huiusmodi visio esset impossibilis in statu nature pure , & est operatio propria illius status , & quid pertinens ad illum , Nego. & non est operatio propria illius status , & ad illum non pertinens , Concedo.

Contrà. Exemptio à miseria omninò necessaria est ad consecutionem possessionis summi boni , & non potest dici non esse propria status puræ naturæ , & pertinere ad illum ; atqui exemptio à miseria esset impossibilis in statu puræ naturæ : ergo & aliquid necessarium ad consecutionem summi boni , proprium tamen status puræ naturæ , & pertinens ad illum.

Minor pr. Error in intellectu , & obscuritas , rebellio appetitus contra voluntatem , perturbatio passionum , & peruersitas affectuum ipsius , mors , & morbi in corpore , cæteraque istius modi sunt veræ , & magnæ miseriæ ; atqui in statu puræ naturæ impossibilis est exemptio ab erroribus , & obscuritatibus in intellectu , rebellionem appetitus contra voluntatem , perturbationem passionum , & peruersitate affectuum , morte , morbis , & aliis incommodis corporis : ergo & exemptio à miseria.

Minor pr. Exemptio ab errore , & obscuritate in intellectu , rebellionem appetitus contra voluntatem , perturbationem passionum , & peruersitate affectuum , morte , morbis , & aliis incommodis corporis haberi tantum potest , vt in statu inno-

centiæ, per dona supernaturalia; atqui in natura pura nullum est donum supernaturale: ergo in statu naturæ puræ impossibilis est exemptio ab erroribus, & obscuritatibus in intellectu, rebellionem appetitus contra voluntatem, perturbatione passionum, peruersitate affectuum, morte, morbis, & aliis incommodis corporis.

Maior probatur. Quod haberi non potest per vires naturæ; haberi tantum potest per dona supernaturalia; atqui exemptio ab errore, & obscuritate in intellectu, rebellionem appetitus, perturbatione passionum in ipso, peruersitate affectuum voluntatis, morte, morbis corporis, & aliis istius malis haberi non potest per vires naturæ: ergo haberi tantum potest per dona supernaturalia.

Minor probatur. In natura lapsa haberi non potest huiusmodi exemptio per vires naturæ: ergo neque in statu puræ naturæ.

Consequentia pr. Vires naturales in natura lapsa non sunt imminutæ: ergo exemptio, quæ haberi non potest per ipsas in natura lapsa, non potest etiam haberi per illas naturæ puræ.

Solutio: In natura lapsa immutatae non sunt vires naturales intrinsecae, Concedo extrinsecae, Nego. Vires intrinsecae sunt facultates animæ, & corporis: extrinsecae vero protectio Dei specialis pro vitiatione errorum, compressione rebellionis appetitus, & preservatione mortis, & morborum, quæ protectio exigetur à natura pura, & exhiberetur ipsi necessarium non affert ullum damnum supernaturale: Caueri enim poterat mors in statu innocentiae auxilio ligni vite, cuius virtus erat

82. TRACT. VNIC. MORAL. DISP. I.

*naturalis. Imò ex mente D. Augustini existiman-
tis Adamum peccasse prius peccato superbia, quàm
peccato inobediencie. in esu pomi. dicendum vide-
tur, cum per illud primum peccatum amiserit do-
na supernaturalia ipsi infusa, non autem potestatem
dominandi appetitui, hanc fuisse in ipso per donum
aliquod naturalis ordinis, quo in pœnam peccati-
secundi fuit deinde spoliatus. Ex quo facile po-
test intelligi, naturam puram per donum naturale
potuisse & non experiri adeo rebellem appetitum, ac
experitur natura lapsa, & potuisse facilius cognos-
cere verum, abstinere à malo, & immunem esse à ma-
lis corporis.*

*Contrà. Vires extrinsecæ maiores in natura
pura, quàm in lapsa sunt ex concessis protectio
Dei specialis, non auferentis quidem omnem re-
bellionem appetitus sensitui, sed illam inodé-
rantis & minuents; atqui Deus non potest mo-
derari hoc modo, & minuire tantum rebellio-
nem appetitus sensitui: ergo vires extrinsecæ
naturæ puræ, non essent maiores viribus naturæ
lapsæ.*

*Minor probatur. Deus non potest non auferre
rebellionem appetitus in natura pura: ergo non
potest minuire illam tantum.*

*Antecedens pr. Deus nihil potest facere inordi-
natum; atqui non auferens rebellionem appetitus
in natura pura, facit aliquid inordinatum: ergo
non potest non auferre illam.*

*Minor probatur. Est maximè inordinatum,
quod appetitus sensitivus non subiiciatur ratio-
ni, & rebellet aduersus ipsam; atqui Deus non
auferens illam rebellionem in natura pura facit*

hanc inordinationem: ergo Deus non auferens rebellionem appetitus facit aliquid inordinatum.

Solutio: Est maximè inordinatum ut appetitus sensitivus non subiiciatur rationi, & rebellet adversus ipsam. si hæc non possit illum domare, & continere in officio, Concedo. si possit, Nego: atqui Deus non auferens omninò rebellionem appetitus facit hanc inordinationem, hoc est facit ut ratio non possit domare, & continere in officio appetitum, Nego. ut possit frænare ipsum, & moderari, Concedo. In hoc autem tantum abest. ut. sit aliqua inordinatio, ut potius mirari liceat divinam providentiam, quæ per contrarietatem illam duarum illarum partium, cum attemperazione tamen illa, ut quæ est superior possit semper redire victrix ex pugna, prabuerit ipsi amplas, & magnas occasiones reportandi insignes victorias.

Contra. Frænatio appetitus, & victoriæ de illius rebellionem non possunt haberi in natura pura: ergo nulla solutio.

Antecedens pr. Frænatio appetitus, & victoriæ de illius rebellionem merentur remunerationem, atqui ea non potest haberi, nec dari in statu nature puræ: ergo frænatio appetitus, & victoriæ de illius rebellionem non possunt haberi in natura pura.

Minor pr. Remuneratio illa est concessio beatitudinis; atqui ea non potest haberi, nec dari per concessionem beatitudinis: ergo remuneratio frænationis appetitus, & victoriæ de illius rebellionem non potest haberi, nec dari in statu nature puræ.

84. TRACT. VNIC. MORAL. DISP. I.

Minor pr. Vt illa remuneratio detur per beatitudinem debent in beatitudine esse varij gradus quorum plures dentur vni, & pauciores alteri pro quantitate remunerationis debitæ; atqui in beatitudine non possunt esse illi varij gradus: ergo remuneratio illa non potest haberi, nec dari per concessionem beatitudinis.

Minor pr. Beatitudo in naturâ pura est cognitio Dei abstractiua; atqui non sunt varij gradus in cognitione Dei abstractiua: ergo neque in beatitudine.

Minor pr. Cognitio Dei abstractiua in omnibus animabus est æqualis planè: ergo non sunt varij gradus in illa.

Antecedens probatur. Cognitiones abstractiue obiecti per idem motuum sunt omnes æquales; atqui motuum cognitionis abstractiue Dei in animabus est idem planè, aut saltem omnino æquale: ergo cognitio Dei abstractiua in omnibus animabus est planè æqualis.

Solutio: Cognitiones abstractiue obiecti per idem motuum, & æquè perfectè representatum, & penetratum, aut à principio æquè adiuto, & non perfectiori, sunt omnes æquales, Concedo. non æquè penetratum, aut à principio non æquè adiuto, aut perfectiori, Nego. atqui motuum cognitionis abstractiue Dei in animabus est idem planè, aut omnino æquale, & est æquè perfectè representatum, & penetratum, aut à principio æquè adiuto, & non fortiori, aut perfectiori, Nego. & potest non esse æquè penetratum, & à principio non æquè adiuto, & tam perfectio, Concedo.

Per motuum intelligunt auctores qui hoc vult-

de Bono, Fine, & Fœlicitate. 85

per argumentum contra nos, medium, per quod anima cognoscit Deum abstractivè, seu illud quod est obiectum formale conclusionis illius, per quam inferimus Dei existentiam, ipsius naturam, & proprietates. Cognitio enim abstractiva in hoc differt ab intuitiva; quod hæc tendat in obiectum per propriam speciem ut præsens, & ut est in se, neque adhibeat aliud ad cuius similitudinem sibi illud effermet: abstractiva verò percipit tantum suum obiectum per alienas species, & ad modum alterius rei, quam percipit immediatè, & in se, & à qua quis præscindit ab eo, quod est ipsi proprium, id quod potest transferri ad aliud, quod repræsentat, dicitur abstractiva. Illa v. g. quam format animus solutus à corpore de Deo per species sui, & aliarum substantiarum materialium, & spiritualium, quas intuetur immediatè, transfert in Deum perfectiones, quas novit esse in istis seclusis imperfectionibus, quæ istarum sunt propria, & Deo convenire non possunt.

Contrà. In animabus solutis à corpore motuum cognitionis abstractivæ Dei æquè perfectè repræsentatur, & penetratur, & representatio illius non est à principio magis adiuto, & perfectiori: ergo omnes cognitiones abstractivæ Dei sunt æquales.

Antecedens pr. Motuum & simul principium cognitionis Dei abstractivæ est entitas animæ v. g. atqui entitas animæ æquè perfectè repræsentatur & penetratur, & principium illius representationis est semper æquè adiutum, & perfectum: ergo motuum cognitionis abstractivæ Dei æquè perfectè repræsentatur, & penetratur.

& repræsentatio illius non est à principio magis adiuto, & perfectiori.

Minor pr. Motium, quod perfectè comprehenditur æquè perfectè repræsentatur, & penetratur: & principium illius repræsentationis est æquè adiutum semper, & perfectum, quod est idem planè, & non eget alio comprincipio; atqui entitas animæ perfectè comprehenditur, & principium illius comprehensionis est idem planè, & non egens alio comprincipio: ergo entitas animæ æquè perfectè repræsentatur, & penetratur, & principium illius repræsentationis est semper æquè adiutum, & perfectum.

Minor pr. Illud perfectè comprehenditur à principio cognoscente, quod habet cum ipso magnam proportionem, non est magis perfectum, & est debitè applicatum; atqui entitas animæ habet tres illas condiciones respectu sui ipsius: ergo perfectè comprehenditur, & principium illius comprehensionis non eget alio comprincipio.

Solutio: Quod habet magnam proportionem cum principio cognoscente, non est ipso magis perfectum, & est ei debitè applicatum, ab ipso perfectè comprehenditur, si ad illam comprehensionem semper æquè iuuatur, Concedo. si non semper æquè iuuatur, Nego. atqui entitas animæ habet secum magnam proportionem, & maximam applicationem, & semper non æquè iuuatur ad formandam illam comprehensionem, Concedo. & semper æquè iuuatur, Nego. Cum enim in confesso sit apud omnes animam iuari ad primas suas cognitiones ab obiectis, aut speciebus suppletibus absen-

tiam obiecti, & ad secundas ab speciebus relictis à primis suis actibus, negari non potest. animam posse iuari ad seipsam cognoscendam ab speciebus intensioribus, aut alio simili comprincipio, & ex huius auxilio formari ab ipsa perfectiorem cognitionem, quàm cum non habet huiusmodi auxilia. Quod ex eo confirmari potest primò, quòd cum minui possit virtus anima per applicationem vehementem, & attentionem ipsius ad percipienda alia obiecta, admittendum etiam sit posse augeri, & per illud augmentum suppleri quòd virtutis illius fuit imminutum. Secundo ex eo, quòd idem oculus cum equali specie luminis clariùs lumen illud videat uno tempore, quàm alio, cum nimirum in isto caret aliquo comprincipio, quòd habebat in alio, & per quòd iuabatur ad illam clariorem cognitionem. Ex quo proinde inferri debet, & animam formare posse modò non ita perfectas cognitiones de seipsa, modò perfectiores, & consequenter ad has habere etiam modò minus, modò magis perfectas de Deo, per quas saluetur inaequalitas prami in inaequalibus meritis.

Contrà. Quævis anima habens comprehensionem sui, licèt in æquali perfectione cum alia, habet cognitionem Dei abstractiuam; atqui quævis anima non habet huiusmodi cognitionem: ergo quævis anima non habet comprehensionem sui licèt in inæquali perfectione.

Minor. pr. Cognitio Dei abstractiua est beatitudo; atqui quævis anima, illa scilicet, quæ est mala, non habet beatitudinem: ergo neque cognitionem Dei abstractiuam.

Solutio: Cognitio Dei abstractiua quæcumque

88 TRACT. VNIC. MORAL. DISP. I.

est beatitudo, Nego. Dei ut remuneratoris, & nobis summè boni, transeat. & concessa minori: ergo quævis anima non habet cognitionem abstractiuam Dei ut remuneratoris, & nobis summè boni, Concedo. ut vindicis propriorum criminum, aut aliam quamcunque, Nego. Ista enim non potest dici beatitudo, cum ei non coniungatur, nec possit coniungi complementum beatitudinis, amor & voluptas, sed eis contraria, odium scilicet, & dolor.

Cæterum primò multa habet Deus, quibus iuuet animam ad formandas clariores cognitiones de seipsa, & de aliis creaturis, per quas cognoscit Deum; neque enim fugi potest non esse possibilia alia entia naturalia, quæ habeant vim conficiendi cum anima cognitionem de seipsa, & alias, quæ sequuntur ex ista.

Secundò, non desunt etiam ipsi, quibus vis quam habet ad seipsam tam perfectè cognoscendam impediatur. Huiusmodi possunt esse cum eam applicat valdè perceptioni alicuius obiecti, ut in damnatis memoriæ suorum criminum, & tormentorum. Qua ratione virtus intellectiua animæ valdè imminuta minor est ad producendas suas alias cognitiones in tanta perfectione, in quanta illas produceret si totis suis viribus vteretur: iuxta quem sensum loquuntur Theologi, cum asserunt animas damnatas non posse auertere cogitationem à criminibus suis, & pœnis, quas propter illa pariuntur, & præuentas, & semper versantes huiusmodi cognitiones erumpere in affectus prauos, & bonos non habere, neque adeo perfectè de aliis obiectis iudicare eo modo, quo qui pas-

sione aliqua vehementi agitantur difficile percipiunt, quæ ipsis prius erant facilia.

Tertiò, quemadmodum quando proposito nobis medio fuimus assensû, si deinde, quod per illud cognouimus diligentius inspiciamus, perfectius illud adhuc percipimus : ita etiam anima soluta à corpore Deum per se ipsam, & alias creaturas cognitum diligentius contemplando potest illum perfectius cognoscere. Neque enim probabile est animam nihil noui addiscere posse de obiecto quod semel nouit. Ex tribus ergo allatis capitibus peti debet inæqualitas cognitionum abstractiuarum animarum solutarum à corpore : primò, quòd principium productiuum illarum possit vno tempore habere plura auxilia ad illas producendas quàm alio : secundò quòd vis animæ ad illas producendas possit esse modò maior, modò minor, cum scilicet applicata perceptioni vehementi aliorum obiectorum minuitur, & fit minor ad alia intelligenda : tertiò, quia potest se vno tempore magis applicare, quàm alio ad penetranda ea, quæ ipsa prima perceptione obiecti ipsi non innotuerunt. Animæ autem damnatæ licet haberent eadem auxilia, ac beatæ ad percipiendum Deum, & non minueretur earum vis percipius applicationem ad representationem suorum criminum, & poenarum : eam tamen ipsæ non applicarent ad clarius penetrandas perfectiones Dei, quem oderunt, & ex illo odio cum non possint auferre illi suas perfectiones, vellent saltem ignorari & nesciri tum à se, tum ab aliis.

S E C T I O VIII.

De Appetitu beatitudinis.

P R I M A C O N C L U S I O :

Appetimus necessario quoad specificationem beatitudinem in communi.

ILLUD appetimus necessario quoad specificationem, quod odisse non possumus; atqui non possumus odisse beatitudinem in communi, & ut sic: ergo appetimus eam necessario quoad specificationem.

Minor pr. Illud odisse non possumus in quo nulla apparet ratio mali; atqui in beatitudine in communi, & ut sic nulla apparet ratio mali: ergo non possumus odisse beatitudinem in communi.

Minor pr. Beatitudo in communi, & ut sic est summa bonitas; atqui in summa bonitate ut sic nulla apparet ratio mali: ergo in beatitudine in communi, & ut sic nulla apparet ratio mali.

Minor pr. In eo non apparet ratio mali, & malitia, in quo non representatur nisi bonitas; atqui in summa bonitate ut sic non representatur nisi bonitas; ergo in ea non apparet ratio mali.



SECUNDA CONCLUSIO:

*Appetitus. necessario quoad exercitium
beatitudinem in communi.*

PER appetitionem necessariam quoad exercitium beatitudinis in communi potest intelligi appetitio, quæ non potest suspendi, & cohiberi posita repræsentatione beatitudinis in appetente; atqui posita repræsentatione beatitudinis in appetente, non potest suspendi ab isto appetitio illius: ergo appetit necessario quoad exercitium beatitudinem.

Maior probatur primò.

In intellectu per assensum conclusionis necessarium, quoad exercitium, intelligitur assensus, qui non potest suspendi positis præmissis, quæ requiruntur ut possit poni: ergo per appetitionem necessariam quoad exercitium beatitudinis in communi potest intelligi appetitio, quæ non potest cohiberi, & suspendi posita in appetente repræsentatione ipsius, quæ requiritur ut poni possit.

Minor præcedentis argumenti probatur secundò.

Appetitio non potest suspendi ab appetente circa id, quod ei repræsentatur summè amabile; atqui beatitudo posita repræsentatione ipsius, repræsentatur ei summè amabilis: ergo non potest suspendi ab ipso appetitio beatitudinis.

Maior pr. Appetitio non potest suspendi circa summè appetibile: ergo neque circa summè amabile.

ALIA.

92 TRACT. VNIC. MORAL. DISP. I.

Antecedens pr. Illud circa quod potest suspendi appetitio non est tam appetibile, ac illud circa quod non potest suspendi: ergo appetitio non potest suspendi circa summè appetibile.

Minor superioris argumenti, beatitudinem posita representatione ipsius in appetente representari summè amabilem, probatur.

Summa bonitas representatur ei, in quo est eius representatio summè amabilis; atqui beatitudo est summa bonitas: ergo beatitudo posita representatione ipsius representatur summè amabilis.

Maior pr. Summa bonitas representatur ei, in quo est eius representatio magis amabilis, quàm vlla alia bonitas: ergo representatur ei summè amabilis.

Antecedens pr. Bonitas, quæ non representatur magis amabilis, quàm vlla alia, non est summa in illa representatione, & vi illius: ergo summa bonitas representatur ei, in quo est eius representatio magis amabilis, quàm vlla alia.

Antecedens pr. Per summam bonitatem intelligitur illa, quæ est summa perfectio; atqui summa perfectio est magis amabilis, quàm vlla alia: ergo & summa bonitas.

Minor pr. Summa perfectio est magis perfecta, seu potius amabilis perfectio, quàm vlla alia: ergo est etiam magis amabilis.

Antecedens pr. Summa perfectio, seu Deus, est quævis alia perfectio formaliter, vel eminenter, & præterea infinitæ aliz maiores: ergo est magis perfecta, & perfectio, quàm quævis alia.

TERTIA

TERTIA CONCLUSIO:

Non appetimus necessariò quoad exercitium beatitudinem in communi.

PER appetitionem necessariam quoad exercitium beatitudinis in communi potest intelligi, & intelligunt nonnulli continuam, & nunquam interruptam appetitionem illius ; atqui non est in nobis continua, & non interrupta appetitio beatitudinis : ergo non appetimus necessariò quoad exercitium beatitudinem in communi.

Minor pr. Vt sit in nobis continua , & non interrupta appetitio beatitudinis debet esse etiam continua , & non interrupta repræsentatio illius ; atqui non est in nobis continua , & non interrupta repræsentatio illius : ergo neque appetitio.

Minor pr. Beatitudo est bonitas summè amabilis & magis, quàm vlla alia ; atqui non est in nobis repræsentatio continua , & non interrupta bonitatis summè amabilis, seu magis, quàm vlla alia : ergo neque beatitudinis.

Minor pr. Sæpè ne quidem venit nobis in mentem, aut saltem dubitamus teste experientia an ex iis, quæ observantur animo vnum sit magis amabile, quàm alia, quæ habemus simul in mento, & vix vnquam apparet nobis certò aliquid summè amabile: ergo non est in nobis continua, & non interrupta repræsentatio bonitatis summè amabilis, seu magis, quàm vlla alia.

Prima, & secunda pars antecedentis clare sunt, & tertia probatur.

94 TRACT. VNIC. MORAL. DISP. I.

Bonitas, quæ nobis repræsentatur est iucunda, vel honesta; atqui neutra vix vnquam repræsentatur summè amabilis: ergo vix vnquam apparet nobis quidquam summè amabile.

Minor pr. Bonitas, in cuius acquisitione repræsentatur aliqua ratio mali non apparet summè amabilis; atqui in acquisitione bonitatis tum iucundæ, tum honestæ ferè semper apparet nobis ratio mali: ergo neutra apparet nobis summè amabilis.

Minor pr. Ferè semper iucunda apparet nobis cum oppositione cum honesta, & honesta cum impossibilitate cum delectabili, aut aliqua alia difficultas occurrit in obtentione vtriusque; atqui illa oppositio, & difficultas est ratio mali: ergo ferè semper in acquisitione bonitatis tum iucundæ, tum honestæ apparet nobis ratio mali.

QUARTA CONCLUSIO:

In homine est appetitus naturalis innatus beatitudinis naturalis in particulari.

APPETITVS naturalis innatus beatitudinis naturalis est potentia actiua, & passiuæ illius; atqui in homine est potentia actiua, & passiuæ beatitudinis naturalis: ergo appetitus naturalis innatus beatitudinis naturalis in particulari est in homine.

Minor pr. Potentia actiua, & passiuæ beatitudinis naturalis est vis productiua, & receptiua ipsius; atqui in homine est vis productiua, & receptiua beatitudinis naturalis: ergo in homine est

potentia actiua, & passiua beatitudinis naturalis.

Minor pr. Beatitudo naturalis est cognitio Dei, & eiusdem amor naturalis; atqui in homine est vis productiua cognitionis naturalis Dei, & amoris eiusdem: ergo in homine est vis productiua, & receptiua beatitudinis naturalis.

QVINTA CONCLUSIO:

In homine est appetitus naturalis elicitus beatitudinis naturalis necessarius quoad specificationem.

ILLVS est in homine appetitus naturalis elicitus quoad specificationem necessarius, quod odisse non potest; atqui homo odisse non potest beatitudinem naturalem: ergo in homine est appetitus naturalis elicitus beatitudinis naturalis necessarius quoad specificationem.

Minor pr. Illud homo odisse non potest, in quo nulla apparet ratio mali; atqui in beatitudine naturali nulla apparet ratio mali: ergo homo non potest eam odisse.

Minor pr. Beatitudo naturalis est bonitas maior, quàm sit vlla alia naturalis; atqui in illa nulla apparet ratio mali: ergo in bonitate naturali nulla apparet ratio mali.

Obiicitur. Beatitudo naturalis est cognitio Dei, & eiusdem amor naturalis; sed in homine non est appetitus naturalis elicitus necessarius quoad specificationem cognitionis Dei, & amoris eius-

96 TRACT. VNIC. MORAL. DISP. I.
dem: ergo non est in homine appetitus naturalis
elicitus beatitudinis naturalis necessarius quoad
specificationem.

Minor pr. Illius non est in homine appetitus
naturalis elicitus necessarius quoad specifi-
cationem quod odisse potest, atqui homo odisse potest
cognitionem Dei, & eiusdem amorem: ergo non
est in homine appetitus naturalis elicitus beati-
tudinis naturalis necessarius quoad specifi-
cationem.

Minor pr. Homo de facto sæpè odit cogniti-
onem Dei, & eiusdem amorem: ergo homo odisse
potest cognitionem Dei, & eiusdem amorem.

Antecedens pr. Cognitio Dei, quæ est beati-
tudo est scientia de Deo; atqui ignari odio habent
illam scientiam, & improbi amorem: ergo odio
habent cognitionem Dei, & eiusdem amorem.

Solutio: Atqui ignari odio habent scientiam,
& improbi amorem secundum se considerata, Ne-
go. prout conuicta difficultate, & labore necessa-
rio ad ipsa comparanda, Concedo. ergo ignari
odio habent cognitionem Dei, & improbi eiusdem
amorem secundum se considerata, Nego. prout re-
presentata cum difficultate, & labore necessario ad
ipsa comparanda, Concedo. Ratio est, quia in il-
la cognitione, & amore secundum se non apparet
ratio mali, quamvis labor infumendus in ipsorum
comparatione non careat malitia sufficienti ad ter-
minandum odium ignarorum & improborum.

SEXTA CONCLUSIO :

*Appetitus beatitudinis qui est intentio non
est necessarius, nec quoad exercitium,
nec quoad specificationem.*

APPETITVS beatitudinis qui dicitur intentio est
actus voluntatis tendens in beatitudinem, vt
comparabilem per hæc, aut illa media; atqui ille
actus non est necessarius, nec quoad exercitium,
nec quoad specificationem: ergo neque appetitus
beatitudinis, qui est intentio illius.

Minor pr. Ille actus non est necessarius, nec
quoad exercitium, nec quoad specificationem,
qui cum adsunt omnia necessaria vt ponatur po-
test non poni, aut poni ei contrarius; atqui actus
voluntatis tendens in beatitudinem vt compara-
bilem per hæc, aut illa media potest non poni, aut
poni ei contrarius: ergo non est necessarius nec
quoad exercitium, nec quoad specificationem.

Minor pr. Media per quæ proponi potest com-
parabilis beatitudo possunt repræsentari diffici-
lia, & sæpè de facto talia repræsentantur; atqui
actus tendens in beatitudinem vt comparabilem
per media difficilia potest non poni, aut poni ei
contrarius: ergo & qui tendit in beatitudinem vt
comparabilem per hæc, aut illa media.

Maior probatur primò.

Media per quæ proponi potest comparabilis
beatitudo possunt esse oratio, eleemosinæ, & ma-
geratio corporis; atqui illa sunt, & repræsentant.

98 TRACT. VNIC. MORAL. DISP. I.

tur difficilia: ergo & media per quæ proponi potest comparabilis beatitudo.

Minor precedentis argumenti probatur secundò.

Ille actus voluntatis potest ab ipsa non poni, aut poni ei contrarius, qui fit consequenter ad cognitionem repræsentantem ei aliquam rationem mali; atqui actus tendens in beatitudinem, ut comparabilem per media difficilia, fit consequenter ad cognitionem repræsentantem ei rationem mali: ergo potest non poni, aut poni ei contrarius.

Minor pr. Cognitio consequenter ad quam fit actus tendens in beatitudinem, ut comparabilem per media difficilia, repræsentat illam difficultatem mediorum; atqui difficultas illorum mediorum est ratio mali: ergo fit consequenter ad cognitionem repræsentantem rationem mali.

Minor pr. Quod nobis parit molestiam est ratio mali; atqui difficultas illorum mediorum superanda parit nobis molestiam: ergo est ratio mali.

Obiectes. Ille actus est necessarius quoad specificationem, cuius contrarius non potest poni; atqui actus contrarius intentioni beatitudinis non potest poni: ergo appetitus qui est intentio beatitudinis est necessarius quoad specificationem.

Minor pr. Actus contrarius intentioni beatitudinis est odium ipsius; atqui odium beatitudinis non potest poni: ergo neque actus contrarius intentioni beatitudinis.

Solutio: Actus contrarius intentioni beatitudinis est odium ipsius beatitudinis secundum se sum-

pta, Nego. *sumpta* ut comparabilis per media difficilia , Concedo. atqui odium beatitudinis secundum se *sumpta* non potest poni, Concedo. *sumpta* ut comparabilis per media difficilia, Nego.

Contrà. Beatitudo quocunque modo sumatur non potest odio haberi : ergo odium beatitudinis , ut comparabilis per media difficilia non potest poni.

Antecedens pr. Beatitudo est summum bonum ; atqui summum bonum non potest odio haberi : ergo neque beatitudo.

Solutio: Atqui summum bonum absolute sumptum, & non iunctum cum aliquo quod sit malum , non potest odio haberi, Concedo. iunctum cum aliquo quod sit malum , Nego. & eadem distinctio applicanda est consequenti.

Contrà. Repugnat summo bono coniungi cum aliquo quod sit malum: ergo nulla solutio.

Antecedens pr. Repugnat summo bono non esse summum bonum : ergo & coniungi cum aliquo quod sit malum.

Consequentia pr. Summum bonum coniunctum cum aliquo quod sit malum est malum ; atqui non potest esse malum : ergo neque coniungi cum aliquo quod sit malum.

Solutio: Summum bonum coniunctum realiter cum aliquo quod sit malum est malum , Concedo. coniunctum tantum per cognitionem, & representationem , Nego. Illa enim representatio nullam potest refundere malitiam in Deum , cum sit illi plane extrinseca , & concessa minori : ergo coniungi non potest per representationem cum aliquo quod sit malum , Nego. realiter , Concedo. *Con-*

100 TRACT. VNIC. MORAL. DISP. I.

iunctio enim illa vel esset libera, vel necessaria: si primum, esset inordinata; neque enim decet coniungi summum bonum cum eo, quod est ei oppositum, & quod est ipsius destructio, & facit illud non esse summum: & si secundum, summum bonum haberi non possit sine illo malo, cui coniungeretur; atque ita non existeret, neque satiare appetitum qui appetere absentiam illius mali, & à se elongationem.

Contrà. Cognitio representans summum bonum coniunctum cum illo malo est vera: ergo coniunctio summi boni cum illo malo debet etià esse realiter.

Solutio: Cognitio representans summum bonum secundum se coniunctum cum illo malo est vera, Nego. representans summum bonum ut comparabile per hac, aut illa media, Concedo. Verùm cum media, & eorum difficultas sit quid extrinsecum summo bono, non possunt impedire quin secundum se, sub qua tantum ratione dicitur summum, sit etiam verè tale, quantumvis sub alia idem non habeat, & illi non conueniat.

SEPTIMA CONCLUSIO:

In homine non datur appetitus innatus simpliciter naturalis beatitudinis supernaturalis.

A P P E T I T U S naturalis innatus beatitudinis supernaturalis est vis productiua, & receptiua illius; atqui in homine non datur vis simpliciter

productiua, & receptiua beatitudinis supernaturalis: ergo in homine non est appetitus innatus simpliciter naturalis beatitudinis supernaturalis.

Minor pr. Beatitudo supernaturalis est visio clara, & intuitiua Dei; atqui in homine non est simpliciter vis productiua, & receptiua illius visionis: ergo in homine non est simpliciter vis productiua, & receptiua beatitudinis supernaturalis.

Minor pr. In homine non est vis simpliciter productiua, & receptiua eius, quod est supernaturale; atqui visio clara Dei, & intuitiua est supernaturalis: ergo in homine non est simpliciter vis productiua, & receptiua illius visionis.

Minor pr. In homine non est vis simpliciter productiua, & receptiua eius rei, quam non potest cum solo generali Dei concursu producere, & recipere; atqui homo non potest cum solo generali Dei concursu producere, neque recipere rem supernaturalem: ergo in homine non est vis simpliciter productiua, & receptiua eius, quod est supernaturale.

Minor pr. Agens naturale producere non potest rem supernaturalem cum solo generali Dei concursu; atqui homo est agens naturale: ergo producere non potest cum solo generali Dei concursu rem supernaturalem.

Minor pr. Illud quod agens naturale producit cum solo generali Dei concursu producit solis naturæ viribus; atqui res supernaturalis produci non potest solis naturæ viribus: ergo agens naturale producere non potest rem supernaturalem.

Minor pr. Quod est supra vires naturæ produci non potest solis naturæ viribus ; atqui res supernaturalis est supra vires naturæ : ergo produci non potest solis naturæ viribus.

Obiicitur. In homine datur appetitus innatus simpliciter naturalis ad suam omnem perfectionem ; atqui beatitudo supernaturalis est eius perfectio : ergo datur in homine appetitus innatus simpliciter naturalis beatitudinis supernaturalis.

Maiores pr. In homine datur appetitus simpliciter naturalis ad id , ad quod inclinatur ; atqui inclinatur ad omnem suam perfectionem : ergo in homine datur etiam appetitus innatus simpliciter naturalis ad illam.

Solutio : In homine datur appetitus simpliciter naturalis ad id omne , ad quod inclinatur inclinatione mere naturali , Concedo : quæ non est mere naturalis , sed ex parte obedientialis , Nego . atqui inclinatur ad omnem suam perfectionem inclinatione mere naturali , Nego : inclinatione merè naturali , vel obedientiali , Concedo . Ratio est , quia inclinatur in perfectiones naturales inclinatione merè naturali , in supernaturales verò inclinatione obedientiali . Inclinatio enim illa nihil aliud est , quàm vis productiua , aut receptiua illarum perfectionum .

Contrà. Homo inclinatur in perfectiones supernaturales inclinatione merè naturali : ergo nulla solutio.

Antecedens pr. Homo inclinatur inclinatione merè naturali in illud , respectu cuius habet potentiam tum actiuam , tum passiuam ; atqui respectu perfectionum suarum supernaturalium ha-

bet potentiam tum actiuam, tum passiuam : ergo inclinatur inclinatione merè naturali in perfectiones supernaturales.

Solutio : *Homo inclinatur inclinatione merè naturali ad id, respectu cuius habet potentiam tum actiuam, tum passiuam merè naturalem, Concedo. obedientialem tantum, Nego.* atqui respectu suarum perfectionum supernaturalium habet potentiam tum actiuam, tum passiuam obedientialem, Concedo. merè naturalem, Nego. & ratio est, quia potentia actiua, & passiuæ perfectionum merè supernaturalium est vis receptiua, & productiua illarum solis nature viribus. Obedientialis verò est vis productiua, & receptiua earundem per auxilium Dei extraordinarium. Prima, ut patet ex terminis, est impossibilis, & consequenter in homine admitti non debet, sicut nec in ullo alio ente. Secunda verò viget in ipso, quotiescumque elicit actus supernaturales fidei, spei, &c.

OCTAVA CONCLUSIO:

Dari potest in homine appetitus naturalis elicitus beatitudinis supernaturalis.

APPETITVS naturalis elicitus beatitudinis supernaturalis est desiderium naturale illius ; atqui dari potest in homine desiderium naturale beatitudinis supernaturalis : ergo dari potest in homine appetitus naturalis elicitus beatitudinis supernaturalis.

Minor pr. Cum Christianus declarat ethnico excellentiam beatitudinis supernaturalis, potest

iste habere desiderium naturale illius; atqui sæpè declarant Christiani ethnicis excellentiam beatitudinis supernaturalis: ergo homo habere potest desiderium naturale beatitudinis supernaturalis.

Maior pr. Ethnicus habere potest desiderium naturale illius, quod ei repræsentatur esse bonum; atqui cùm Christianus declarat ethnico excellentiam beatitudinis supernaturalis, hæc ei repræsentatur bona: ergo cùm Christianus declarat ethnico excellentiam beatitudinis supernaturalis, iste potest habere desiderium naturale illius.

Minor pr. Ad hoc, vt voluntas appetat aliquid, nihil aliud requiritur, quàm vt ei repræsentetur esse bonum: ergo ethnicus habere potest desiderium naturale illius, quod repræsentatur ei esse bonum.

Obiicitur. In homine non datur appetitus elicitus eius, cuius non datur innatus; atqui non datur in homine appetitus innatus simpliciter naturalis beatitudinis supernaturalis: ergo neque elicitus.

Maior pr. Ex duobus, quorum vnum supponit aliud, cùm non datur hoc, non datur etiam illud; atqui appetitus elicitus alicuius rei supponit innatum: ergo in homine non datur appetitus elicitus eius, cuius non datur innatus.

Solutio: Atqui appetitus elicitus alicuius rei supponit innatum sui ipsius, Concedo. eius rei, ad quam terminatur, Nego. ergo in homine non datur appetitus elicitus, qui non supponat innatum sui ipsius, Concedo. eius rei, ad quam terminatur,

& tendit, Nego. Obscurum enim non est multum appetere, & affici erga quamplurima, quæ non possumus facere, ut cum agrotus appetit sanitatem, quam per seipsum acquirere nunquam posset.


Contrà. In homine non est appetitus innatus appetitus elicitæ beatitudinis supernaturalis: ergo nulla solutio.

Antecedens pr. Appetitus innatus naturalis est potentia productiva naturalis; atqui in homine non est potentia productiva naturalis, & receptiva appetitus elicitæ beatitudinis supernaturalis: ergo in homine non est appetitus innatus appetitus elicitæ beatitudinis supernaturalis.

Minor probatur. In homine non est potentia productiva, & receptiva naturalis rei supernaturalis; atqui appetitus elicitus beatitudinis supernaturalis, est ipse supernaturalis: ergo in homine non est potentia naturalis productiva, & receptiva appetitus elicitæ beatitudinis supernaturalis.

Minor pr. Actus voluntatis, cuius obiectum est supernaturale est ipse supernaturalis; atqui beatitudo supernaturalis est obiectum istius appetitus: ergo ipse est etiam supernaturalis.

Solutio: Actus voluntatis, cuius obiectum est supernaturale, est ipse supernaturalis, omnis, Nego. aliquis, Concedo. Ille scilicet, qui fieri non potest solis natura viribus, non autem illi, quos agentia naturalia cum solo generali Dei concursu facere possunt. atqui beatitudo supernaturalis est obiectum istius appetitus, & ipse fieri non potest solis natura viribus; Nego. & fieri potest, Concedo.



DISPUTATIO II.

*De actibus humanis, & affectionibus
eorum.*



ACTVS humanus hic non habet tantam latitudinem, ac actus factus ab homine. Cùm enim in nobis sint actus proprii viuentis non tantùm rationalis, sed etiam sensitiui, & vegetatiui; illi soli censentur humani, qui sunt ab homine vt homo est, & rationalis. Alij enim imbui non possunt honestate, quam intendit moralis.

SECTIO PRIMA.

De actibus voluntatis in communi.

DIXIMVS in tractatu præcedenti de anima disputatione quarta sectione quarta de voluntate, obiectum voluntatis esse bonum, & item malum ei oppositum. Actus quos exercet circa primum dicuntur ideò persecutiui, quòd sint quidam quasi motus, & accessus ad suum obiectum; alij verò auersatiui, quòd per illos voluntas quasi recedat ab obiecto. Tam hi quàm illi varij sunt, & multiplices. Primus inter persecutiuos est ille

quo voluntas fertur in bonum secundum se, & præcisè cognitione per quam repræsentatur nihil explicante de eius præsentia, vel absentia, & dicitur amor. Per secundum voluntas afficitur circa bonum repræsentatum ut absens, & vocatur desiderium: & per tertium tendit in illud ut præsens, & appellatur gaudium. Cum autem bonum absens repræsentatur ut comparabile per hæc, vel illa media, affectus quem elicit circa illud voluntas dicitur intentio: & cum proponitur ei obtinendum per hoc, aut per illud medium determinatè ipsius affectus circa illud, vocatur electio: ac tandem cum ei repræsentatur obtentum afficitur erga illud actu, qui dicitur fruitio. Simili modo cum proportionem se habet actus voluntatis circa malum: primus tendit in illud præcisè, & secundum se, & vocatur fuga: secundus tendit in idem ut impendens, & imminens, & appellatur timor: & tertius denique fertur in illud ut præsens, & dicitur tristitia.

Cæterum cum cognitio proponit voluntati bonum, nihil explicando de illius præsentia, vel absentia, vel repræsentat illud sine admixtione mali, vel cum coniunctione cum aliquo disconuenienti: si primum, voluntas non potest cohibere affectum suum: si verò secundum, est in eius potestate affici circa conuenientiam repræsentatam, vel odisse disconuenientiam annexam. Quo fit ut cum nullum nobis obiectum ferè repræsentetur, in quo secundum se, & non tantum ut comparabili per hæc, aut illa media non appareat conuenientia simul cum disconuenientia, non tantum intentio circa illud non sit necessaria, ut probaui.

108 TRACT. VNIC. MORAL. DISP. I.
mus priori sectione de intentione beatitudinis;
sed nec etiam primus ipse amor, cum tamen iste
respectu beatitudinis non sit liber, propterea
quod in ea secundum se nulla appareat ratio
mali.

PRIMA CONCLUSIO:

*Actus voluntatis diuiduntur adaequatè in
elicitos, imperatos, & mixtos.*

MEMBRA istius diuisionis exhaustiunt diui-
sum: ergo est adaequata.

Antecedens pr. Actus elicited, imperatus, &
mixtus exhaustiunt actus voluntatis: ergo & di-
uisum.

Antecedens pr. Actus voluntatis, vel sunt im-
mediatè à voluntate, vel tantum mediatè, &
quidem ex imperio, vel sine imperio; atqui illi
qui sunt tantum mediatè ex imperio sunt impe-
rati, & qui sunt immediatè ex imperio sunt im-
perati, & qui sunt immediatè, sed cum imperio
sunt mixti: ergo actus imperatus, elicited, & mix-
tus exhaustiunt actus voluntatis.

SECVNDA CONCLUSIO:

*Diuisio actuum voluntatis in necessarios &
liberos non est essentialis.*

ILLA diuisio non essentialis, in qua membra
diuidentia non sunt essentialiter talia; atqui vo-
luntatis actus non sunt essentialiter necessarii,

aut liberi : ergo ista diuisio actuum voluntatis non est essentialis.

Maior pr. Actus voluntatis sunt tantum contingenter necessarij & liberi : ergo non sunt essentialiter necessarij & liberi.

Antecedens pr. Illud sunt tantum contingenter actus voluntatis , quod possunt non esse ; atqui actus voluntatis qui sunt necessarij possunt non esse necessarij, & qui sunt liberi possunt non esse liberi: ergo sunt tantum contingenter necessarij, & liberi.

Minor pr. Illi actus voluntatis possunt non esse necessarij, qui possunt esse liberi, & illi non esse liberi , qui possunt esse necessarij ; atqui actus voluntatis, qui sunt necessarij possunt esse liberi, & contrà: ergo actus voluntatis, qui sunt necessarij possunt non esse necessarij , & qui sunt liberi possunt non esse liberi.

Minor pr. Ille actus liber fit necessarius , qui iam non potest non poni à sua causa cum antea posset, & contrà ; atqui actus , qui antea poterat non poni à sua causa , iam non potest non poni: ergo actus liber fit necessarius.

Minor pr. Ille actus non potest non poni à sua causa, cum antea posset, qui nunc fit sine concursu indifferenti Dei, cum antea fieret; atqui actus potest fieri nunc sine concursu indifferenti, cum antea fieret : ergo & non potest non poni à sua causa, cum antea posset.

Minor pr. Deus liberè dat illum concursum indifferentem : ergo potest illum non dare iam, licet antea daret.

SECTIO II.

*Quid sit actus humanus, &
moralis.*

PRIMA CONCLUSIO:

Actus humani definitio. Is, qui fit ab homine liberè operante conuenit soli actui humano.

ALIA quibus dici posset conuenire hæc definitio sunt actus brutorum, actus Angelorum, aut actus ipsius hominis necessarij; atqui non conuenit neque actibus brutorum, neque actibus Angelorum, neque actibus hominis ipsius necessarijs: ergo non conuenit alijs ab actu humano.

Minor pr. Non conuenit illis quæ non fiunt liberè, aut non fiunt ab homine; atqui actus brutorum, & actus necessarij hominis non fiunt liberè, illi verò Angelorum non fiunt ab homine: ergo non conuenit neque actibus brutorum, neque actibus Angelorum, neque actibus ipsius hominis necessarijs.



SECUNDA CONCLUSIO:

Non sufficit ut actus sit moralis, quòd sit liber.

ACTVS moralis est necessariò bonus, vel malus; atqui non sufficit ut sit bonus, vel malus quòd sit liber: ergo ad hoc ut actus sit moralis non sufficit ut sit liber.

Minor pr. Actus indifferentes sunt liberi; atqui neque sunt boni, neque mali: ergo ut actus bonus sit aut malus, non sufficit ut sit liber.

Minor pr. Actus qui non sunt neque laude digni, neque vituperio non sunt boni, neque mali; atqui actus indifferentes non sunt neque laude digni, neque vituperio: ergo actus indifferentes neque sunt boni, neque mali.

Obiicitur. Ad hoc ut actus sit moralis non plus requiritur, quàm ut sit bonus, vel malus; atqui ut sit bonus, vel malus non aliud requiritur quàm ut sit liber: ergo sufficit ut actus sit moralis, ut sit liber.

Minor pr. Non aliud potest requiri præter libertatem ut actus sit bonus, vel malus, quàm cognitio bonitatis, aut malitiæ; atqui non requiritur cognitio bonitatis aut malitiæ: ergo non aliud requiritur, ut actus sit moralis, quàm ut sit liber.

Minor pr. Alia requiri non potest cognitio bonitatis, aut malitiæ, quàm ipsius actus, aut obiecti actus; atqui non requiritur cognitio, neque malitiæ, & bonitatis actus, neque ipsius obiecti:

ergo non requiritur cognitio bonitatis, aut malitiae.

Prima pars minoris est clara, & secunda de bonitate, vel malitia obiecti probatur.

Illud non requiritur ut actus sit bonus, aut malus, de quo cum bene, aut male agimus non cogitamus; atqui cum bene, aut male agimus, non cogitamus de bonitate, aut malitia obiecti propter quas dicitur bonum, aut malum: ergo non requiritur cognitio bonitatis, aut malitiae obiecti.

Minor pr. Cum quis afficitur v. g. erga voluptatem male agit, & voluptas est eius obiectum; atqui non cogitat de eius malitia: ergo cum male agimus non cogitamus de malitia obiecti.

Minor pr. Qui afficitur erga voluptatem non cogitat de eo, quod non amat; atqui qui afficitur erga voluptatem non amat ullam in ea malitiam, imò vellet nullam planè esse in ipsa: ergo non cogitat de malitia voluptatis.

Solutio: Qui afficitur erga voluptatem non cogitat de eo, quod non amat, neque formaliter, neque interpretatiuè, Concedo. quod non amat formaliter, & ut motuum, Nego. atqui qui afficitur erga voluptatem nullam amat in ea malitiam formaliter, ut motuum proprium sui amoris, Concedo. interpretatiuè, & imputatiuè, Nego. Cum enim aduertat malitiam esse annexam delectabilitati voluptatis, non potest affici circa illam delectabilitatem, quin hoc ipso censatur affici etiam circa eius inhonestatem, & malitiam, & consequenter male, & perversè agere.

Contrà. Ille non amat, & afficitur interpreta-

tiue erga malitiam, & inhonestatem voluptatis
qui vellet nullam esse in ea huiusmodi malitiam;
atqui multi cum amant, & afficiuntur erga volu-
ptatem, vellent quam possunt maximè nullam es-
se in ea malitiam, & inhonestatem: ergo qui amat,
& afficitur erga voluptatem nullam amat in ea
malitiam etiam interpretatiue.

Solutio: Ille non amat, & afficitur interpreta-
tiue erga malitiam, & inhonestatem voluptatis, qui
vellet efficaciter nullam esse huiusmodi malitiam
in ea, & in suo amore erga illam, transeat. in
ea tantum, Nego. atqui multi cum amant, &
afficiuntur erga voluptatem vellent, quam possunt
maximè nullam esse malitiam, & inhonestatem
in ea præcisè, transeat. in ipsa, & in suo amore
erga illam, Nego. Si enim horrerent efficaciter il-
lam inhonestatem, abstinerent ab amore circa illam,
tunc cum non ignorant se non posse illum ponere,
quin arguantur veri affectus interpretatiui erga il-
lam, dum ita se gerunt, ut in æstimatione pruden-
tum non possint censerì non affici erga illam, non ab-
stinendo ab eo, cum quo est coniuncta, & quod con-
iungere non possunt sibi, quin etiam illam pariter
sibi iungant.



S E C T I O III.

Quid sit voluntarium.

P R I M A C O N C L U S I O :

Voluntarij definitio. Quod est à principio intrinseco cognoscente singula, in quibus est actio, conuenit soli voluntario.

NULLI alteri conuenit quàm voluntario : ergo conuenit soli voluntario.

Antecedens pr. Alia quibus dici potest conuenire sunt violentum, non voluntarium, aut inuoluntarium ; atqui illis non conuenit : ergo nulli alteri conuenit, quàm voluntario.

Minor pr. Non conuenit illis, quæ non fiunt à principio intrinseco ex præuia cognitione, aut fiunt contra aliquam inclinationem ; atqui violentum non fit à principio intrinseco, non voluntarium non fit ex præuia cognitione, & inuoluntarium fit contra aliquem appetitum, & inclinationem : ergo non conuenit violento, voluntario, aut inuoluntario.



SECUNDA CONCLUSIO:

Vt aliquid sit voluntarium non debet esse volitum.

UT aliquid sit volitum, debet esse obiectum voluntatis; atqui ut aliquid sit voluntarium non debet esse obiectum voluntatis: ergo ut aliquid sit voluntarium non debet esse volitum.

Minor pr. Omnes actus voluntatis sunt voluntarij; atqui omnes non sunt obiectum voluntatis: ergo ut aliquid sit voluntarium non debet esse obiectum voluntatis.

Minor pr. Primus actus voluntatis non potest esse obiectum voluntatis: ergo omnes actus voluntatis non sunt illius obiectum.

Antecedens pr. Ut primus actus voluntatis sit obiectum actus voluntatis debet esse sui ipsius obiectum, aut alterius actus seipsum præcedentis; atqui non est obiectum sui ipsius, neque alterius actus seipsum præcedentis: ergo non est obiectum ullius.

Prima pars minori probatur.

Ille actus non est obiectum sui ipsius, qui non reflectit se supra se; sed actus primus voluntatis non reflectit se supra se: ergo non est obiectum sui ipsius.

Minor pr. Actus voluntatis feruntur tantum in id, quod ipsis repræsentat intellectus; atqui intellectus non repræsentat voluntati cum primò est operatura primum actum ipsius, sed tantum obiectum, in quod debet ferri: ergo primus actus

116 TRACT. VNIC. MORAL. DISP. II.

voluntatis non reflectit se supra se.

Minor pr. Intellectus repræsentat voluntati cum primò est operatura quod ei proponitur per sensus externos; atqui sensus externi nihil proponunt de eius primo actu, sed tantum de obiecto appetitus: ergo intellectus non repræsentat voluntati cum primò est operatura primum actum ipsius, sed tantum obiectum, in quod debet ferri.

Secunda pars minoris probatur.

Illud non est obiectum alterius actus ipsum præcedentis, quod non habet alium se præcedentem; sed primus actus voluntatis non habet alium se præcedentem: ergo non est obiectum alterius actus ipsum præcedentis.

Minor pr. Quod est primum non habet aliud se præcedens; atqui actus primus voluntatis est primus: ergo non habet alium se præcedentem.

SECTIO IV.

Quibus, & quomodo conveniat ratio voluntarii.

PRIMA CONCLUSIO:

Actus voluntatis elicitæ sunt immediate voluntarii.

ILLUD est immediate voluntarium, quod fit à principio intrinseco agente immediate ex cognitione; atqui actus voluntatis elicitæ sunt immediate

mediate ex cognitione prævia à principio intrinseco : ergo actus elicit voluntatis sunt immediate voluntarij.

Minor pr. Actus elicit voluntatis fiunt à voluntate ; atqui voluntas est principium illorum intrinsecum agens immediate ex cognitione : ergo actus elicit voluntatis fiunt immediate à principio intrinseco ex prævia cognitione.

SECUNDA CONCLUSIO :

Actus merè imperati non sunt immediate voluntarij.

Actus actus non sunt immediate voluntarij, qui non fiunt immediate ex prævia cognitione ; atqui actus merè imperati non fiunt immediate ex prævia cognitione : ergo non sunt immediate voluntarij.

Minor pr. Illud non fit immediate ex prævia cognitione, quod fit à principio non requirente ut agat, præviā cognitionem ; atqui actus merè imperati fiunt à principio non requirente ut agat, præviā cognitionem : ergo actus merè imperati non fiunt immediate ex prævia cognitione.

Minor pr. Quod non fit neque à voluntate, neque ab appetitu non fit à principio requirente ut agat præviā cognitionem ; atqui actus merè imperati non fiunt ab appetitu, aut voluntate : ergo non fiunt à principio requirente præviā cognitionem ut agat.

Maiores pr. Sola voluntas, aut appetitus requirunt ut agant præviā cognitionem : ergo quod

non fit neque à voluntate, neque ab appetitu non fit à principio requirente præuiam cognitionem vt agat.

TERTIA CONCLUSIO:

Vt omissio sit voluntaria non requiritur præceptum de opere omisso.

ILLUD non requiritur, vt omissio sit voluntaria, sine quo potest esse voluntaria; atqui omissio potest esse voluntaria, etiam si non sit præceptum de opere omisso: ergo vt omissio sit voluntaria non requiritur præceptum de opere omisso.

Minor pr. Sine eo omissio potest esse voluntaria, sine quo potest esse libera; atqui etiam si non sit præceptum de opere omisso potest esse libera: ergo potest esse voluntaria etiam si non sit præceptum de opere omisso.

Minor pr. Vt omissio sit libera agenti sufficit, vt eam possit ponere, aut non ponere; atqui etiam si non sit præceptum de opere, quod omittit, potest eam ponere, aut non ponere: ergo potest esse libera, etiam si non sit præceptum de opere omisso.

Minor pr. Præceptum nullam addit agenti vim ponendi illam, aut non ponendi: ergo agens etiam si non sit præceptum potest eam ponere, aut non ponere.

QUARTA CONCLUSIO :

Effectus secutus ex omissione actus interni, aut externi, est indirectè voluntarius ei, qui eum præuisum non impedit cùm potest.

EFFECTVS secutus ex omissione est indirectè voluntarius ei cui omissio est directè voluntaria; atqui omissio, ex qua sequitur effectus præuisus est directè voluntaria ei, qui eum non impedit cùm potest: ergo effectus secutus ex omissione actus interni, aut externi est indirectè voluntarius ei, qui eum præuisum non impedit cùm potest.

Maior pr. Effectus huiusmodi est indirectè voluntarius ei, qui eum tenetur impedire: ergo etiam ei, qui eum non impedit cùm potest etiam si non teneatur.

Antecedens probatur primò.

Effectus est voluntarius ei, respectu cuius dicitur culpabilis; atqui respectu eius, qui tenetur eum impedire est culpabilis: ergo est ei voluntarius.

Consequentia prioris argumenti probatur secundò.

Quòd teneatur, aut non teneatur nihil facit ad rationem voluntarij: ergo effectus etiam ei, qui eum non impedit cùm potest etiam si non teneatur, est indirectè voluntarius.

Antecedens pr. Illud facit tantum ad rationem
F ij

120 TRACT. VNIC. MORAL. DISP. II.

voluntarij, quod facit vt effectus sit liber; atqui quod teneatur non requiritur vt effectus sit liber: ergo quod teneatur nihil facit ad rationem voluntarij.

Obiicitur. Effectus non est voluntarius ei, qui non est eius causa; atqui qui cum non impedit cum potest si non teneatur non est eius causa: ergo omnis effectus secutus ex omissione actus interni, aut externi non est indirecte voluntarius ei, qui cum non impedit cum potest.

Minor probatur. Non potest esse causa eius nisi physica, vel moralis; sed non est causa eius physica, neque moralis: ergo non est eius causa.

Respondeo esse causam physicam.

Contrà. Illud non est causa physica alterius; quod non influit in illud per physicum influxum; atqui qui non impedit aliquem effectum cum potest non influit in illum per physicum influxum: ergo non est causa eius physica.

Solutio: Illud non est causa physica positivè influens, quod non influit per physicum influxum, Concedo. non est causa physica remouens prohibens, Nego. & concessa minori: ergo non est causa eius physica positivè influens, Concedo. remouens prohibens, Nego.

Contrà. Deus non est causa physica remouens prohibens peccati; atqui illud non impedit cum potest: ergo quod non impedit cum potest aliquem effectum, non est causa physica eius etiam remouens prohibens.

Solutio: Deus non est causa physica remouens prohibens peccati, & non habet auersionem illius, Nego. & habet, Concedo. & concessa minori: ergo

Quod non impedit cum potest aliquem effectum non est causa physica eius etiam remouens prohibens, si habeat auersionem illius, Concedo. si non habeat, Nego. Homo autem non habet huiusmodi auersionem. Si eam enim haberet impediret huiusmodi effectum.

Contrà. Ex concessis Deus etiam si habeat auersionem peccati non impedit illud cum potest: ergo etiam homo potest habere auersionem peccati, licet illud non impediatur cum potest.

Solutio: Deus etiam si habeat auersionem peccati non impedit illud cum potest, propterea quod non tenetur illud impedire, sed potius sit quodammodo adstrictus illud permittere, Concedo. si teneretur illud impedire, Nego. ergo etiam homo potest habere auersionem peccati licet illud non impediatur cum potest, & non tenetur illud impedire, Nego. & tenetur illud impedire, Concedo.

Contrà. Summus amor bonitatis diuinæ, & summum odium peccati non modò tenentur, sed impossibile est ipsis non impedire peccatum cum possunt illud impedire, atqui Deus habet, & summum amorem suæ bonitatis, & summum odium peccati: ergo tenetur impedire peccatum cum potest.

Solutio: Summus amor intensiue, & extensiue bonitatis diuinæ, & summum odium intensiue, & extensiue peccati tenentur, & impossibile est ipsis non impedire peccatum cum possunt, Concedo. summus huiusmodi amor, & summum huiusmodi odium tantum intensiue, Nego. atqui Deus habet summum amorem suæ bonitatis intensiue, & extensiue, & summum odium peccati intensiue,

§22 TRACT. VNIC. MORAL. DISP. II.

& *extensivè*, Nego. *intensivè tantùm*, Concedo. Per summum amorem *intensivè* Deus vult sibi omnia sua bona *intrinseca*, per eundem verò *extensivè* etiam alia bona *extrinseca*, quibus cum caret, ut caruit per aternitatem à parte ante nihilo beator est, & ex huiusmodi carentia non potest argui quòd non se vere amet, & summe, scilicet; *intensivè*, sicut nec quòd summe non oderit peccatum ex eo, quòd permittat illud committi à suis creaturis.

Contrà. Maius est odium peccati in Deo illud non permittere neque in se, neque in suis creaturis, quàm illud tantùm non permittere in se; atqui Deus licet non patiatur in se peccatum, illud permittit in suis creaturis: ergo non odit summe peccatum.

Solutio: Maius est odium peccati in Deo *intensivè* illum non permittere non tantùm in se, sed neque in suis creaturis, quàm illud in istis permittere, Nego. *extensivè*, Concedo. & concessa minori: ergo non odit summe peccatum *intensivè*, Nego. *extensivè*, Concedo. Sed in hoc nulla est imperfectio, sed potius argumentum magnæ perfectionis, beneficentia scilicet illius maxime, qua concedit creaturis intellectualibus, ut possint libere operari, & tot adhibet ut bene utantur libertate ipsis concessa, ut deinde eas possit remunerare, & donare beatitudine.

Ex eo quòd Deus permittat peccatum, & non velit sibi maiorem suam gloriam *extrinsecam*, colligunt aliqui posse non operari propter illam, confirmantque ex D. August. & ex eo probant quòd illa gloria non sit bonum infinitum, quòd solum

Deum potest necessitare ad sui amorem, non autem bonum finitum. Volunt tamen Deum operatum esse omnia propter illam, cum id asserant sacra pagina cum dicunt, omnia propter semetipsum operatus est Dominus.

SECTIO V.

An dari possit pura omissio libera.

PROBAVIMVS tertia conclusione præcedentissectionis, omissionem posse esse voluntariam, etiamsi non sit præceptum de opere omisso, quia potest esse libera: examinandum nobis est nunc num illa omissio sit pura? hoc est, sine vlllo planè actu positiuo, an non pura? seu debeat esse semper per actum positium, & non possit esse sine illo.

VNICA CONCLUSIO:

Dari potest pura omissio libera.

VT detur pura omissio libera nihil aliud requiritur, quàm vt cum voluntas habet omnia requisita ad amandum v. g. aliquod obiectum, aut illud odio habendum, neque illud amet, neque odio habeat, neque vllum alium actum cum istis impossibilem eliciat; atqui voluntas cum habet omnia requisita ad amandum aliquod obiectum, aut odio habendum, potest illud neque

amare, neque odio habere, neque vllum alium actum cum illis impossibilem elicere: ergo dari potest pura omissio libera.

Minor pr. Cum voluntas habet omnia requisita ad amandum aliquod obiectum, aut odio habendum non necessitatur ad illud amandum, aut odio habendum, aut ponendum actum impossibilem: ergo potest illud non amare, neque odio habere, neque actum impossibilem ponere.

Due primæ partes antecedentis probantur.

Requisita ut voluntas possit amare aliquod obiectum, est ut repræsentetur ei bonum, & ut possit illud odio habere, ut repræsentetur ei malum; atqui cum repræsentatur ei simul bonum, & malum, voluntas non necessitatur ad illud amandum, neque odio habendum: ergo neque cum habet omnia requisita ad illud amandum, aut odio habendum.

Minor pr. Voluntas non necessitatur amare quod apparet ei malum, neque odisse quod apparet ei bonum; atqui cum obiectum repræsentatur ei bonum simul, & malum, apparet ei bonum, & apparet etiam ei malum: ergo cum obiectum repræsentatur simul bonum, & malum, voluntas non necessitatur ad illud amandum, aut odio habendum.

Tertia pars antecedentis superioris argumenti, voluntatem non necessitari ad ponendum actum impossibilem cum amore & odio, probatur.

Actus impossibilis cum amore & odio obiecti, quod apparet simul bonum, & malum, est nolitio formalis, ut virtualis illius amoris

aut odij; atqui voluntas non necessitatur ad ponendam nolitionem formalem, aut virtualem amoris, & odij: ergo cum voluntas habet omnia requisita ad amandum aliquod obiectum, aut odio habendum non necessitatur ad ponendum actum impossibilem cum amore, aut odio illius obiecti.

Prima pars minoris probatur.

Nolitio formalis amoris, & odij est actus voluntatis, cuius obiectum est carentia amoris, & odij; atqui voluntas non necessitatur ad ponendum actum, qui sit carentia amoris & odij: ergo neque ad ponendam nolitionem formalem amoris, & odij.

Minor pr. Voluntas non necessitatur ad ponendum actum, cuius obiectum sit carentia amoris, & odij, cum ei intellectus non repræsentat huiusmodi carentiam; atqui cum intellectus proponit voluntati bonitatem, & malitiam obiecti ut plurimum non repræsentat ei carentiam amoris, & odij circa illud: ergo voluntas non necessitatur ad ponendum actum, qui sit carentia amoris, & odij.

Secunda pars minoris superioris argumenti, voluntatem non necessitari ad ponendam nolitionem virtualem alterius obiecti impossibilis, probatur.

Nolitio virtualis amoris, & odij est nolitio alterius obiecti impossibilis cum amore & odio; atqui voluntas non necessitatur ad ponendam nolitionem alterius obiecti impossibilis cum amore, & odio: ergo neque ad ponendam nolitionem virtualem amoris, & odij.

Minor pr. Voluntas non necessitatur ad ponendam nolitionem alterius obiecti impossibilis cum amore, & odio, cum nullum huiusmodi obiectum ei repræsentatur ab intellectu; atqui intellectus sæpe nullum huiusmodi obiectum ei repræsentat: ergo voluntas non necessitatur ad ponendam nolitionem alterius obiecti impossibilis cum amore, & odio.

Minor pr. Intellectus non repræsentat voluntati ullum huiusmodi aliud obiectum, cum ei vnum repræsentat tantum amandum; atqui sæpe ei vnum tantum repræsentat amandum: ergo sæpe nullum huiusmodi obiectum repræsentatur voluntati.

Minor pr. Non rarò contingit vt cogitemus de vno tantum obiecto: ergo sæpe intellectus repræsentat tantum voluntati vnum obiectum amandum.

Obicitur. Pura omissio libera est cessatio omnis actus voluntatis tunc, cum potest aliquem ponere; atqui voluntas non potest cessare ab omni actu, tunc cum potest aliquem ponere: ergo dari non potest pura omissio libera.

Maiores pr. Potentia rationalis cessare non potest ab omni actu tunc, cum potest aliquem ponere; atqui voluntas est potentia rationalis: ergo cessare non potest ab omni actu tunc, cum potest aliquem ponere.

Maiores pr. Potentia nihil faciens sine ratione cessare non potest ab omni actu tunc, cum potest aliquem ponere; atqui potentia rationalis nihil facit sine ratione: ergo potentia rationalis cessare non potest ab omni actu tunc, cum potest ali-

quem ponere.

Maïor pr. Potentia nihil faciens sine ratione facit omnia cum ratione ; atqui potentia quæ facit omnia cum ratione cessare non potest ab omni actu tunc , cum potest aliquem ponere : ergo potentia nihil faciens sine ratione cessare non potest ab omni actu tunc , cum potest aliquem ponere.

Minor pr. Potentia appetitiua faciens omnia cum ratione , facit quæ facit propter rationem , seu motiium ; atqui cessare non potest ab omni actu propter rationem , seu motiium tunc , cum potest aliquem ponere : ergo potentia , quæ facit omnia cum ratione , cessare non potest ab omni actu tunc , cum potest aliquem ponere.

Minor pr. Quod cessat ab omni actu propter rationem , seu motiium cum potest aliquem ponere , habet aliquem actum , & nullum habet ; atqui non potest habere aliquem actum , & nullum habere : ergo cessare non potest ab omni actu tunc , cum potest aliquem ponere.

Respondeo nullum habere.

Contrà. Qui cum potest ponere aliquem actum illum non ponit , nec alium propter rationem , seu motiium , retrahitur ab illa ratione , seu motiio ab illo ponendo ; atqui retrahi non potest ab illo ponendo per eam rationem , & motiium , quin habeat aliquem actum : ergo qui cessat ab omni actu propter rationem , seu motiium cum potest aliquem ponere , habet aliquem actum.

Minor pr. Tam non potest retrahi voluntas à ratione aliqua , seu motiio ne ponat aliquem actum , sine alio aliquo actu , quam trahi ab ea-

dem, vt ponat actum sine actu; atqui trahi non potest à ratione, seu motiuo, quin ponat actum: ergo retrahi etiam non potest per rationem, seu motiuum à ponendo actu, quin habeat aliquem actum.

Solutio: Tam non potest retrahi directe voluntas à ratione aliqua, seu motiuo ne ponat aliquem actum sine alio aliquo actu, quàm trahi ab eadem, vt ponat actum sine actu, Concedo. retrahi indirecte, Nego. & concessa minori: ergo non potest retrahi directe per rationem, seu motiuum à ponendo actu, quin habeat aliquem actum, Concedo. non potest retrahi indirecte, Nego. Voluntas retrahitur indirecte à motiuo, cum ex aspectu illius sine ullo erga ipsum affectu, neque etiam odio positiuo abstinet à prosecutione alicuius, cuius illud facit vt minor appareat bonitas, quod vt patet fieri potest sine actu. Bonitas enim illa per admixtionem, aut connexionem repræsentatam illius malitia, aut difficultatis fit impotens ad cogendam voluntatem ad sui amorem: malitia etiam ista propter adnexam bonitatem necessitare non valet voluntatem ad sui odium, & consequenter manet voluntas quasi in equilibrio impedita à malitia ne amet; & à bonitate ne oderit, cum potestate tamen determinandi se ad quam partem libuerit.

Contra. Duo motiua contraria repræsentata, dormitio v. g. & ludus, efficere possunt, vt minor appareat bonitas studij, cum quo sunt incompossibilia; atqui dici non potest, quod voluntas retrahatur etiam indirecte à duobus motiuis contrariis ne amet studium: ergo voluntas non retrahitur indirecte ab amore obiecti per solam re-

præsentationem eius , quod efficit ut minor ipsa appareat illius bonitas.

Minor pr. Voluntas fertur in id, à quo retrahitur ; atqui non potest ferri simul in duo motiua contraria studio: ergo neque retrahi ab illis.

Solutio : Voluntas fertur in id, à quo retrahitur directe , Concedo. indirecte , Nego. Cum enim ferri sonet conatam voluntatis, & tendentiam in motuum ; retrahi autem indirecte nihil aliud importet , quàm non tendentiam : clarum est ferri, & retrahi non esse idem. & concessa minori : ergo voluntas non potest retrahi directe ne amet studium à duobus motiuis contrariis, Concedo. retrahi indirecte ; Nego.

Contrà. Motiua contraria, à quibus voluntas retrahitur indirecte à ponendo studio, aut alio simili, sunt aut indifferentia, aut turpia, aut honesta; atqui voluntas non potest retrahi à ponendo studio, aut alio simili à motiuis indifferentibus turpibus, aut honestis sine actu aliquo : ergo neque retrahi indirecte à studio , aut alio simili à duobus motiuis contrariis.

Ut probetur minor, Supponunt illud à quo retrahitur voluntas indirecte esse malum. Motuum autem retractionis esse honestam, & sic argumentantur :

Voluntas retrahi non potest à ponendo actu malo ex motivo honesto sine actu : ergo voluntas retrahi non potest ex motivo honesto à ponendo actu, sine actu alio.

Minor probatur. Retractio voluntatis à ponendo actu malo ex motivo honesto, est bona moraliter, & honesta ; atqui non potest esse bona mo-

raliter, & honesta sine actu positiuo, & quin sit actus positiuus: ergo retrahi non potest voluntas ex motiui honesto à ponendo actu malo sine actu.

Solutio: *Retractio voluntatis indirecta à ponendo actu malo ex motiui honesto est bona moraliter, Nego. directa, Concedo. & concessa minori: ergo voluntas non potest retrahi directè ex motiui honesto à ponendo actu malo sine actu, Concedo. retrahi indirectè, Nego.*

Contrà. Illud est bonum moraliter quod est executio præcepti nobis impositi; atqui retractio quæcunque tandem à ponendo actu malo ex motiui honesto est executio præcepti nobis impositi: ergo retractio voluntatis, etiam indirecta à ponendo actu malo ex motiui honesto est bona moraliter.

Solutio: Illud est moraliter bonum bonitate formali, quod est executio per actum positiuum præcepti nobis impositi, Concedo. sine actu positiuo, Nego. atqui retractio quæcunque tandem à ponendo actu malo ex motiui honesto, est executio semper per actum positiuum præcepti nobis impositi, Nego. sine actu positiuo aliquando, Concedo.

Contrà. Quod est honestum, & laudabile est bonum moraliter bonitate formali; atqui executio præcepti nobis impositi quomodocunque se habeat est honesta, & laudabilis: ergo executio præcepti nobis impositi quomodocunque se habeat est moraliter bona bonitate formali.

Solutio: Quod est honestum, & laudabile honestate, & laudabilitate formali, est bonum: tamen moraliter bonitate formali, Concedo. quod est tantum hone-

stum, & laudabile honestate, & laudabilitate fundamentali est moraliter bonum bonitate formali, Nego. atqui executio præcepti nobis impositi quomodocunque tandem ponatur est honesta, & laudabilis honestate, & laudabilitate formali, Nego. honestate fundamentalis, Concedo. Honestas formalis est tendentia voluntatis positiva in rem bonam, quia bona est, quæ sanè tendentia, ut clarum est, haberi nequit sine actu positivo, ac proinde nec honestas formalis. Fundamentalis verò est illud, ad quod terminatur tendentia illa positiva, quod esse potest sapissimè aliquid negativum, ut verbi gratia mera omisio furti, tunc cum viget præceptum de non furando: Quæ si ametur à voluntate refundet in voluntatem honestatem formalem, qua ipsa propterea caret, quod non sit quid positivum, & ea de causa non sit capax tendendi in rem bonam, quia bona est.

Contrà. Executio præcepti nobis impositi per actum positivum est honesta, & laudabilis honestate, & laudabilitate formali ex concessis; atqui omnis planè executio præcepti nobis impositi est per actum positivum: ergo executio præcepti nobis impositi quomodocunque se habeat est honesta, & laudabilis honestate, & laudabilitate formali.

Minor pr. Omne voluntarium est positivum; atqui omnis planè executio præcepti nobis impositi est voluntaria: ergo & positiva seu per actum positivum.

Minor pr. Omne exercitium voluntatis est quid positivum; atqui omne voluntarium est exercitium voluntatis: ergo omne voluntarium est positivum.

132 TRACT. VNIC. MORAL. DISP. II.

Maiores pr. Omne exercitium potentie vitalis est quid positivum; atqui voluntas est potentia vitalis: ergo omne exercitium voluntatis est quid positivum.

Solutio: Omne exercitium potentie vitalis necessaria est quid positivum, Concedo. potentia vitalis libera, Nego. Ratio est, quia illius exercitium est tantum facere, quod est semper positivum, huius vero non tantum facere, sed etiam non facere, quod ut verba ipsa declarant est quid negativum; atqui voluntas est potentia vitalis libera, Concedo. necessaria, Nego.

Contra. Omne quod est vitale debet esse quid positivum; atqui exercitium actuale potentie vitalis etiam libera est vitale: ergo exercitium potentie vitalis etiam libera debet esse quid positivum.

Solutio: Omne quod est vitale intrinsece debet esse quid positivum, Concedo. quod est vitale tantum extrinsece, & per denominationem a principio, a quo procedit, Nego. atqui exercitium potentie vitalis etiam libera est quid vitale intrinsece, vel extrinsece, Concedo. intrinsece tantum, Nego. Huius enim exercitium aliquod cum sit, ut dictum est, non facere, quod ut clarum est, non est vitale intrinsece. De huius enim ratione est, ut petat fieri, & recipi in eo, a quo fit. Dicendum est consequenter omne exercitium potentie libera non esse vitale intrinsece, ac proinde nec positivum.

Contra. Omne exercitium potentie vitalis etiam libera est actus secundus vite; atqui actus secundus vite est quid vitale intrinsece: ergo omne exercitium potentie vitalis est quid vitale intrinsece.

Solutio : Omne exercitium potentia vitalis itiam libera est actus secundus vitæ, hoc est, est in actu secundo vitæ intrinsecè, vel extrinsecè, Concedo. hoc est vitæ tantum intrinsecè, Nego. atqui actus secundus vitæ, hoc est in actu secundo vitæ intrinsecè est quid vitale intrinsecè, Concedo. in actu secundo vitæ intrinsecè est quid vitale intrinsecè, Nego.

Contrà. Omnis actus secundus vitæ est in actu secundo vitæ intrinsecè: ergo nulla solutio.

Antecedens pr. Actus secundus vitæ, qui est quid positivum, est in actu secundo vitæ intrinsecè; atqui omnis actus secundus vitæ est quid positivum: ergo omnis actus secundus vitæ, est in actu secundo vitæ intrinsecè.

Minor pr. Omnis actus secundus vitæ debet aliquid superaddere primo; atqui actus secundus vitæ, qui non est quid positivum, nihil potest superaddere primo: ergo omnis actus secundus vitæ est quid positivum.

Minor pr. Actus secundus vitæ, qui non est positivus, est negativus; atqui negativus nihil potest superaddere primo: ergo actus secundus vitæ, qui non est quid positivum, nihil potest superaddere primo.

Minor pr. Actus secundus, qui est quid negativum, nihil potest superaddere primo, nisi quod habet supra primum; atqui nihil habet supra primum: ergo actus secundus vitæ, qui est quid negativum, nihil potest superaddere primo.

Minor pr. Actus secundus, qui est quid negativum, nihil aliud dici potest habere supra primum, quam negationem; atqui illam non habet

supra primum: ergo nihil dici potest habere supra primum.

Minor pr. Actus secundus, qui est aliquid negatiuum non habet supra primum, quod iste habet independententer ab illo; atqui iste habet independententer ab illo illam negationem: ergo actus secundus, qui est aliquid negatiuum non habet negationem supra primum.

Minor pr. Quod non habet actum independententer ab aliquo, independententer ab illo habet eius negationem; atqui actus primus independententer ab actu secundo, qui est aliquid negatiuum, non habet actum: ergo independententer ab illo habet eius negationem.

Solutio: Atqui actus primus præcisè sumptus independententer ab actu secundo, qui est aliquid negatiuum non habet actum, *Nego.* Vt coninectus cum illo actu secundo, & dependententer ab illo, *Concedo.*

Contrà. Actus primus præcisè sumptus habet negationem actus secundi, qui est aliquid positium: ergo non habet actum independententer ab actu secundo, qui est aliquid negatiuum.

Antecedens pr. Actus primus præcisè sumptus vel habet actum positium, vel negationem eius; atqui non habet ipsum: ergo habet negationem eius.

Maiores pr. Actus, & eius negatio sunt contradictoria; atqui nihil carere potest simul duobus contradictoriis: ergo actus primus præcisè sumptus habet actum positium, vel negationem eius.

Solutio: Atqui nihil carere potest simul duobus contradictoriis si spectetur secundum se, & realiter, *Concedo.* si spectetur formaliter, & præcisè, seu pro ut

obiicitur nostro intellectui ipsum representanti, non consideratis iis, cum quorum alterutro prout libuerit tamen coniungi debet, Nego. ergo actus primus præcisè sumptus habet actum positivum, vel negationem eius si spectetur secundum se, & realiter, Concedo. si spectetur formaliter, & prout est terminus representationis, vi cuius non possumus reddere rationem, neque de negatione, neque de actu positivo, Nego. Ratio est facilis, quia intellectus ex duobus, quæ necessario coniunguntur potest representare unum alio non representato, maxime si unum præsupponat aliud, ac proinde cum actus isti secundi, positivi scilicet, & negativi præsupponant primum, & suo modo ab eo dependeant: potest intellectus quantumvis cum ipso alter ex illis necessario coniungatur, ipsum representare neutro illorum representato, quo casu verum est actum primum, non quidem realiter, sed præcisè sumptum, neque habere actum, neque eius negationem.

SECTIO VI.

An violentia, & metus causent involuntarium simpliciter.

VIOLENTI definitio, Id, quod est à principio extrinseco passio, non conferente vim, includit duas condiciones: prima est, ut principium eius, quod efficitur non sit intrinsecum: & secunda, ut sit contra appetitum elicitem, vel innatum eius, in quo recipitur.

PRIMA CONCLUSIO:

Violentia causat inuoluntarium simpliciter.

INVOLUNTARIUM simpliciter est illud quod nihil habet voluntarij admixtum ; atqui quæ sunt violenta nihil habent admixtum voluntarij : ergo violentia causat inuoluntarium simpliciter.

Minor probatur. Quæ non fiunt à principio intrinseco, & fiunt contra appetitum, nihil habent voluntarij admixtum ; atqui quæ sunt violenta non fiunt à principio intrinseco, & fiunt contra appetitum : ergo nihil habent voluntarij admixtum.

Maior pr. Illa nihil habent voluntarij admixtum, quæ nihil habent eorum, ex quibus constituitur voluntarium ; atqui quæ non fiunt à principio intrinseco, & fiunt contra appetitum, nihil habent eorum, ex quibus constituitur voluntarium : ergo quæ non fiunt à principio intrinseco, & fiunt contra appetitum nihil habent voluntarij admixtum.

Minor probatur. Voluntarium constituitur per id, quod est fieri à principio intrinseco, & secundum appetitum : ergo quæ non fiunt à principio intrinseco, & fiunt contra appetitum, nihil habent eorum, ex quibus constituitur voluntarium.

SECUNDA CONCLUSIO:

Metus causat inuoluntarium secundum quid.

ILLUD causat inuoluntarium secundum quid, quod habet aliquid tantum admixtum voluntarij; atqui quæ metu fiunt habent aliquid tantum admixtum voluntarij: ergo metus causat inuoluntarium secundum quid.

Minor pr. Illud habet tantum aliquid admixtum voluntarij quod habet tantum vnum ex illis, quæ constituunt voluntarium; atqui quæ metu fiunt habent tantum vnum ex illis, quæ constituunt voluntarium: ergo quæ metu fiunt habent tantum aliquid admixtum voluntarij.

Minor pr. Quæ constituunt voluntarium, sunt fieri à principio intrinseco, & esse secundum appetitum, aut saltem non esse contra appetitum; atqui quæ metu fiunt habent tantum vnum ex illis: ergo quæ metu fiunt habent tantum vnum ex illis, quæ constituunt voluntarium.

Minor pr. Habent tantum fieri à principio intrinseco: ergo habent tantum vnum ex illis.

Antecedens probatur. Non habent esse secundum appetitum: ergo habent tantum fieri à principio intrinseco.

Antecedens pr. Sunt contra appetitum: ergo non habent esse secundum appetitum.

Antecedens probatur. Illa sunt contra appetitum, quæ fiunt cum magna repugnantia; atqui quæ metu fiunt, fiunt cum magna repugnantia.

ergo sunt contra appetitum.

Minor pr. Proiectio mercium in mare ad leuandam nauim in periculo naufragij, fit ex metu mortis; atqui fit cum magna repugnantia: ergo quæ metu fiunt, sunt cum magna repugnantia.

Minor pr. Proiectio illa mercium fit cum tanta repugnantia, quantus erat affectus eius, ad quem pertinebant erga illas; atqui magnus erat affectus eius, ad quem pertinebant erga illas: ergo proiectio illa mercium fit cum magna repugnantia.

Obiicies. Illud non causat inuoluntarium secundum quid, quod nullo modo causat inuoluntarium; atqui metus nullo modo causat inuoluntarium: ergo non causat inuoluntarium secundum quid.

Minor pr. Metus est odium mali imminentis, & impendentis; atqui odium mali impendentis nullo modo causat inuoluntarium: ergo neque metus.

Minor pr. Malum impendens vel est leue, & non formidandum viro forti, vel graue, & timendum à viro forti; atqui neutrius odium causat inuoluntarium: ergo odium mali impendentis nullo modo causat inuoluntarium.

Minor pr. Malum impendens graue, & formidandum viro forti sunt v.g. pœnæ inferni, & leue, & non formidandum viro forti iactura pomi; atqui odium pœnarum inferni, & iacturæ pomi non causant inuoluntarium: ergo odium mali impendentis tum grauis, & formidandi viro forti, tum leuis non causant inuoluntarium.

Minor pr. Quæ fiunt ex odio pœnarum infer-

ni, & iacturæ pomi non sunt vilo modo inuolutaria: ergo odium pœnarum inferni, & iacturæ pomi nullo modo causant inuolutarium.

Antecedens pr. Quæ fiunt ex odio pœnarum inferni impendentium (& par est ratio de iactura pomi) sunt prosecutio eorum, per quæ illas auertimus à nobis; atqui prosecutio eorum per quæ illas elongamus, & auertimus à nobis, nullo modo est nobis inuolutaria: ergo quæ fiunt ex odio pœnarum inferni impendentium, & iacturæ pomi nullo modo sunt inuolutaria.

Minor pr. Observatio mandatorum Dei est prosecutio eorum, per quæ illas elongamus, & auertimus à nobis; atqui observatio mandatorum Dei nullo modo est inuolutaria: ergo neque prosecutio eorum per quæ elongamus, & auertimus à nobis pœnas inferni.

Minor pr. Illud nullo modo est inuolutarium, quod est maximè laudabile, & summo præmio dignum; atqui observatio mandatorum Dei est maximè laudabilis, & summo præmio digna: ergo observatio mandatorum Dei nullo modo est inuolutaria.

Solutio: Neganda est maior. Ratio est, quia ut aliquid sit laudabile sufficit, ut libere fiat cum sufficienti cognitione boni, & mali. Illud autem, quod est inuolutarium secundum quid liberè fieri potest, & cum sufficienti cognitione mali, & boni. Ad hoc enim ut aliquid sit inuolutarium secundum quid, sufficit ut sit contra appetitum, seu fiat cum aliqua tristitia, seu difficultate, quod tantum abest ut minuat laudabilitatem operis, ut sæpè illam augeat. Arguit enim maiorem amorem

140 TRACT. VNIC. MORAL. DISP. II.

eius, cuius intuitu, & incuius gratiam superantur ille difficultates.

Contrà. Illud nullo modo est inuoluntarium quod fit ex præuia cognitione, & non est contra appetitum; atqui quod est maximè laudabile, & summo præmio dignum fit ex præuia cognitione, & non est contra appetitum: ergo nullo modo est inuoluntarium.

Prima pars minoris est clara, & secunda probatur.

Ratio & dignitas summæ laudabilitatis, & summi præmij est maximè secundum appetitum: ergo quod est maximè laudabile, & summo præmio dignum non est contra appetitum.

Solutio: Ratio, & dignitas summæ laudabilitatis, & summi præmij representata ut amanda est maxime secundum appetitum, seu amabilis, Concedo. non representata ut amanda, sed consequens tantum ex opere suscepto ex odio pœnæ infligendæ omissioni illius operis, Nego. Opus enim illud sæpè est valde difficile, & multum repugnans inclinationi, & appetitui operantis.

Contrà. Observatio diuinorum mandatorum, odii v.g. prosecutionis furti, & odij Dei non suscipitur ex odio pœnæ æternæ infligendæ: ergo nulla solutio.

Antecedens pr. Quod ex odio alterius odio habetur minus odio habetur quàm illud; atqui prosecutio furti, & odium Dei non debent minus odio haberi, quàm pœna æterna: ergo observatio mandatorum Dei, odium v. g. prosecutionis furti, & odij Dei non est, & non suscipitur ex odio pœnarum æternarum.

Solu-

Solutio: Quod ex odio alterius odio habetur, minus odio habetur quàm illud appetiatiue, vel non appetiatiue, Concedo. appetiatiue tantum, Nego. atqui prosecutio furti, & odium Dei non debent minus odio haberi appetiatiue, quàm pœna æterna incomplete sumpta, & sine multitudine illa peccatorum grauissimorum cum quibus est coniuncta, Concedo. non appetiatiue, aut si sumatur pœna æterna coniuncta multitudini illi peccatorum, in quibus occupantur damnati, Nego. Appetiatiue vnum odio minus habetur, quàm aliud, cum si ambo non possent vitari, & necessitas esset incurrendi alterum ex illis, subiremus potius illud quod minus odio habetur. Non appetiatiue verò, quando non potius vitaremus istud, quàm aliud, posita necessitate subeundi alterum ex illis. Vitamus tamen nunc istud, propter utilitatem quam habet ad vitandum aliud, quod est laudabile vitare.

Contrà. Quod est magis odibile quàm pœna æterna, non potest minus odio haberi etiam non appetiatiue, quàm illa; atqui odium Dei est magis odibile, quàm pœna æterna: ergo non potest minus odio haberi etiam non appetiatiue quàm illa.

Solutio: Quod est magis odibile, quàm pœna æterna, non potest minus odio haberi etiam non appetiatiue quàm illa, hoc est, non potest vitari, & fuga illius assumi ut medium, ut vitetur illa, Nego. Cum enim ad hoc possit conducere, & in conducibilitate illa nihil appareat inhonesti, nihil est propter quod non possis quis illa uti in eum finem. Non potest minus odio haberi etiam non appetiatiue,

hoc est amari amore formali, aut virtuali, Concedo. ergo non potest minùs odio haberi, quàm illa etiam non appetiatiuè, hoc est non potest vitari; & fuga illius assumi ut medium, & tanquam aliquid conducens ut vitetur illa, Nego. non potest minùs odio haberi etiam non appetiatiuè, hoc est amari amore formali, vel virtuali, Concedo. Clarum autem est in illo modo agendi, non esse vllum plane affectum voluntatis erga illud odium.

Contrà. Quod debet esse finis non debet assumi ut medium, & si assumatur est inordinatio; atqui quod est magis odibile debet esse finis respectu minùs odibilis: ergo non debet assumi ut medium, & si assumatur est inordinatio.

Solutio: Quod debet esse finis, & nullam habet ad aliud conducibilitatem, & si quam habeat non est licitum ea uti, non potest esse medium, Concedo. si habeat aliquam conducibilitatem, & nulla sit inhonestas ea uti, Nego. atqui quod est magis odibile debet esse finis respectu minùs odibilis, & non habet conducibilitatem ad aliud vitandum, & illicitum est ea uti, quàm habet, Nego. aliquam habet, & licitum est ea uti, Concedo. Quod aliquam habeat conducibilitatem non est dubium. Quod etiam ea uti liceat inde facile est colligere, quia vsus ille nihil est aliud, quàm odisse quod reuera odibile est non tantum propter propriam, & intrinsecam fæditatem, sed etiam alienam que vitari non posset, & necessario contrahenda esset, si ipsum non vitaretur, & odio haberetur.

Cæterum cum odio habetur peccatum ex odio pœnæ æternæ, licet ille actus factus consequenter ad cognitionem non repræsentantem aliam

foeditatem in peccato, quàm eam, quam in illud refundit pœna æterna, non magis abhorreat ab illo, quàm à gehenna, quam vult vitare: per alium tamen actum factum consequenter ad aliam cognitionem repræsentatiuam maioris ipsius foeditatis, quàm sit in pœna æterna, potest magis odio haberi, & quidem utroque illo inodo honestè: per vtrumque enim illud odium voluntas fugit à re omnino fugienda. & nec formaliter, nec interpretatiuè potest dici esse prauè affecta in vllum obiectum, vt inferitur esse in voluptatem, cum ita ab illa abstinet, vt si amor illius non esset puniendus pœna æterna, non abstineret ab illo, & nullum foeditatis illius haberet odium. Dispositio siquidem illa animi nullam arguit veram auersionem à foeditate voluptatis, & affectum sincerum erga præstantiam, & summam excellentiam supremi legislatoris infligentis illam pœnam, sed tantum infamem amorem sui ipsius, & priorum commodorum, propter quæ tantum, & quia illis contraria est pœna æterna ab ea abhorret: quod non idem euenit in aliis actibus, in quibus non est eadem dispositio animi, nec ille affectus virtualis tantum erga propria comoda, sed alius præterea erga supremum legislatorem, ex cuius amore ex parte tenemus eius iram, & effectus huius iræ, qui sunt pœna æterna. Idem enim animaduertere est in nobis tunc temporis quod in filio, qui à parète, quæ non perfectè amat, iussus abstinere ab aliquo, sine cōminatione pœnæ non obtemperat. addita verò pœna obediens est. Eius siquidem affectus erga parentem cum non esset in eo satis magnus, vt solus determinaret il-

lum ad obseruationem rei præceptæ: iunctus alteri affectui, quem habet erga se filius, & ex quo odit pœnam imponendam si non obediat, acquirit satis virium ad terminandum ipsum ad exequendum quod imperatum est. Quod autem executio illa paterni mandati oriatur non tantum à timore pœnæ præcisè, sed etiam à metu indignationis patris, & ex virtuali affectu erga ipsum, & non tantum erga propria commoda; ex eo colligi potest, quod cum amor ille vterque possit influere ad excitandum illum timorem, & neutri desit applicatio; vterque enim obuersatur menti, neutri etiam neganda videatur in illum actiuitas; licet ad eam ponendam primus erga patrem propter debilitatem non esset solus sufficiens.

Atque ex his patet primò timorem pœnarum inferni esse verè laudabilem, cum sit virtualis affectus saltem partialis erga supremum legislatorem, cuius amor, cum non est sufficiens solus ad mouendos nos ad ea, quæ iubet, iuuatur ad hoc per affectum quem habemus erga nos: ex quo volumus vitare pœnam, quam comminatur si cōtemnamus facere quod præcipit. Qui affectus conseruationis vitæ spiritualis non potest non censi honestus, & laudabilis, & consequenter timor, de quo est quæstio, & qui oritur ex duobus illis affectibus honestis, & laudabilibus, non esse ipse honestus, & laudabilis.

Secundò, quantitatem timoris mali impendentis metiendam esse ex quantitate affectus erga bonum amatum, cui illud malum opponitur, & cuius est destructiuum, aut impeditiuum, tantumque esse posse at quando metum, vt perturbet ra-

tionem, & quæ ex eo fiunt non sint libera; aut si sint absolute, non censeantur tamen habere tantum indifferentiæ quantum satis est ad contrahendam obligationem, quæ nascitur aut ex contractu civili, aut ex voto, ad quæ requiritur plena libertas, & dominium perfectum actus, ex quo nascitur talis obligatio.

Tertiò, licet metus cadens in constantem virum, seu mali grauis independentis excuset à violatione ieiunij, aut alterius præcepti Ecclesiastici, quæ Ecclesia vt pia Mater non vult seruari à nobis cum tanto incommodo, non excusare tamen à violatione præceptorum naturalium, prolatione v. g. mendacij, quia scilicet cum præceptum de non mentiendo sit necessarium, & non possit temperari per benignam interpretationem mentis iubentis, aliunde verò malum, quod per ipsum incurritur ruinæ spiritualis, sit maius, quàm quodcunque temporale imminens: esset inordinatum ad vitandum istud, incurrere aliud, & conseruatio vitæ spiritualis longè pretiosioris temporali isti postponeretur contra omne ius fæque.

SECTIO II.

An concupiscentia causet inuoluntarium.

PER concupiscentiam intelligimus inclinationem illam, & propensionem, quam habet natura sensitua in bonum delectabile, & iucundum.

G iij

Eam autem esse longè vehementiorem, quam sit inclinatio naturæ rationalis in bonum honestum, ex eo fit, quòd istud cum non percipiatur immediate per proprias species, ac ut præsens sicut illud, eius etiam appetitiones non sunt tam vehementes, difficiliùs excitantur, & faciliùs cohibentur, quàm illius appetitiones. Aliquæ enim vix impediri possunt.

PRIMA CONCLUSIO:

*Concupiscentia non causat inuoluntarium
ut plurimum.*

ILLUD non causat inuoluntarium, quod habet omnia, quæ requiruntur ad voluntarium; atqui quæ fiunt ex concupiscentia habent ut plurimum omnia, quæ requiruntur ad voluntarium ut plurimum.

Minor pr. Ea, quæ requiruntur ad voluntarium sunt, ut fiat à principio intrinseco, & non sit contra aliquem appetitum; atqui quæ fiunt ex concupiscentia fiunt à principio intrinseco, & non sunt ut plurimum contra appetitum: ergo quæ fiunt ex concupiscentia habent ut plurimum omnia quæ requiruntur ad voluntarium.

Prima pars minoris clara est, & secunda probatur.

Quæ fiunt secundùm appetitum non sunt contra appetitum; atqui quæ fiunt ex concupiscentia fiunt ut plurimum secundum appetitum: ergo

non fiunt contra appetitum.

Minor probatur. Illa fiunt secundum appetitum; quæ fiunt consequenter ad aliquem appetitum vehementem antecedentem; sed quæ fiunt ex concupiscentia, fiunt vt plurimum consequenter ad aliquem appetitum vehementem antecedentem: ergo fiunt secundum aliquem appetitum.

Minor pr. Quæ fiunt ex concupiscentia fiunt consequenter ad concupiscentiam; atqui concupiscentia vt plurimum, est appetitus vehemens, & antecedens: ergo fiunt consequenter ad aliquem appetitum vehementem antecedentem.

Minor pr. Concupiscentia est inclinatio actualis in bonum delectabile; atqui illa inclinatio vt plurimum est actus appetitus vehemens, & antecedens: ergo concupiscentia est appetitus vehemens, & antecedens.

Minor pr. Inclinatio necessaria in bonum delectabile est appetitus vehemens, & antecedens cum nihil illi resistit; atqui inclinatio in bonum delectabile est necessaria, & vt plurimum nihil ei se opponit, & resistit: ergo est vehemens, & antecedens.

Maiores pr. Inclinatio, quæ habet magnas vires, & totis illis, & quàm maximo potest conatu fertur in bonum delectabile nullo ei resistente, est quid vehemens; atqui inclinatio necessaria in bonum delectabile habet magnas vires, & totis illis fertur in illud, & quàm maximo potest conatu nullo ei vt plurimum resistente: ergo est vehemens, & antecedens.

Addidi in conclusione vt plurimum, quia non est semper verum nihil resistere concupiscentiæ,

& inclinationi in bonum delectabile. Cum enim est intensus habitus erga honestum illi contrarium, appetitiones boni illius delectabilis, non sunt sine repugnantia appetitus rationalis, & propensionis, quam habet ad bonum honestum contrarium illi delectabili.

Obiicies. Quæ sunt ex concupiscentia non habent omnia, quæ requiruntur ad voluntarium: ergo concupiscentia causat inuoluntarium.

Antecedens pr. Quæ sunt ex concupiscentia sunt contra appetitum: ergo non habent omnia, quæ requiruntur ad voluntarium.

Antecedens pr. Concupiscentia est actus vehemens appetitus sensitiui circa bonum delectabile; atqui quæ sunt ex actu vehementi appetitus sensitiui circa bonum delectabile, sunt sæpè contra appetitum: ergo quæ sunt ex concupiscentia sunt contra appetitum.

Minor probatur. Quæ sunt cum aliqua tristitia sunt contra appetitum; atqui quæ sunt ex actu vehementi appetitus sensitiui circa bonum delectabile sunt sæpè cum tristitia: ergo sunt contra appetitum.

Solutio: *Quæ sunt cum aliqua tristitia sunt contra appetitum aliquem, Concedo. omnem, Nego. & concessa minori:* ergo sunt contra appetitum aliquem, Concedo. omnem, Nego.

Contrà. Quæ sunt ex actu vehementi appetitus sensitiui circa bonum delectabile sunt contra omnem appetitum: ergo nulla solutio.

Antecedens pr. Quando bonum delectabile est turpe, quæ sunt ex actu vehementi appetitus sensitiui circa illud, sunt contra omnem appetitum;

atqui sæpè bonum delectabile est turpe : ergo quæ fiunt ex actu vehementi appetitus sensitivi circa bonum delectabile , fiunt contra omnem appetitum.

Solutio : Quando bonum delectabile est turpe , quæ fiunt ex actu vehementi appetitus sensitivi circa illud sunt contra omnem appetitum , si id , quod est delectabile consideretur præcisè ut turpe , Concedo. si non consideretur præcisè ut turpe , sed simul etiam ut delectabile, Nego. atqui sæpè bonum delectabile est turpe , & non consideratur præcisè ut turpe , sed simul ut delectabile , Concedo. & consideratur præcisè ut turpe , Nego. Circa enim illud ut tale nullus versatur actus profectivus appetitus , sed potius aversivus , & odium. Circa illud tamen ut delectabile versari potest , & de facto versatur actus appetitus sensitivi , ac proinde non est contra omnem appetitum.

SECUNDA CONCLUSIO:

Concupiscentia minuit liberum.

ILLUD minuit liberum, quod minuit ea , quæ faciunt ad perfectionem libertatis; atqui concupiscentia minuit ea, quæ faciunt ad perfectionem libertatis : ergo concupiscentia minuit liberum.

Minor probatur: Indifferentia propensionis facit ad perfectionem libertatis ; atqui concupiscentia minuit illam indifferentiam : ergo minuit etiam illa , quæ faciunt ad perfectionem libertatis.

Minor pr. Indifferentia propensionis posita est

in eo, quod agens liberum non magis propendeat in vnā partem, quā in aliam; sed concupiscentia minuit id, quod est ipsum non propendere in vnā partem magis quā in aliam: ergo concupiscentia minuit indifferentiam propensionis.

Minor pr. Illud quod facit, vt agens liberum propendeat magis in vnā partem, quā in aliam tollit, seu minuit id, quod est ipsum non propendere magis in vnā partem, quā in aliam; atqui concupiscentia facit, vt agens liberum propendeat magis in vnā partem, quā in aliam: ergo concupiscentia minuit id, quod est ipsum non propendere magis in vnā partem, quā in aliam.

Minor pr. Appetitus vehemens circa bonum facit, vt agens liberum magis propendeat ad eius amorem quā ad eius odium; atqui concupiscentia est huiusmodi appetitus vehemens: ergo concupiscentia facit vt agens liberum propendeat magis in vnā partem, quā in aliam.

SECTIO VIII.

An ignorantia causet inuoluntarium.

IGNORANTIA duplex est, vna iuris, alia facti. Prima est non aduertentia id, quod proponitur amandum, aut agendum esse prohibitum, aut imperatum, iuxta, aut contra rectam rationem, vt cū quis ignorat furtum rei sacrę pro-

hibitum esse lege naturali, ciuili, & Ecclesiastica. Secunda est non aduertentia id, quod proponitur amandum, aut agendum, esse id, quod lege naturali, ciuili, aut Ecclesiastica quas probè nouimus vetatur, vt cùm id, quod accipimus non aduertimus esse rem alienam, & sacram. Ignorantia tum iuris, tum facti triplex est, scilicet antecedens, comitans, & consequens. Prima est causa, cur quod ignoratur fiat: secunda non est causa, cur fiat, sed indifferenter se habet ad illud: tertia est quasi effectus eius, quod fit, & dicitur vincibilis, & affectata: aliæ verò duæ possunt esse inuincibiles, seu tales, vt scientia contraria haberi non possit, per quod excusantur à culpa.

Exemplum primæ est, cùm quis putans interuenandum occidere feram interficit amicum: secundæ, cùm idem putans occidere feram occidit hostem: tertiæ, cùm idem vt possit ire ad venationem vitat discere esse obligationem audiendi sacrum.

PRIMA CONCLUSIO:

Ignorantia antecedens causat inuoluntarium simpliciter.

INVOLUNTARIUM simpliciter est illud, quod nihil habet admixtum voluntarij; atqui id, quod causat ignorantia antecedens nihil habet admixtum voluntarij: ergo ignorantia antecedens causat inuoluntarium simpliciter.

Minor pr. Illud nihil habet admixtum voluntarij, quod nihil habet eorum, quæ constituunt

voluntarium; atqui id, quod causat ignorantia antecedens, nihil habet eorum, quæ constituunt voluntarium: ergo id, quod causat ignorantia antecedens nihil habet admixtum voluntarij.

Minor pr. Ea, quæ constituunt voluntarium sunt fieri à principio intrinseco ex prævia cognitione, & non esse contra appetitum; atqui id, quod causat ignorantia antecedens, non fit à principio intrinseco ex prævia cognitione, & est contra appetitum: ergo nihil habet eorum, quæ constituunt voluntarium.

Prima pars minoris probatur.

Quæ fiunt ex defectu cognitionis non fiunt ex prævia cognitione; atqui id, quod causat ignorantia antecedens fit ex defectu cognitionis: ergo non fit ex prævia cognitione.

Minor pr. Illud fit ex defectu cognitionis, quod fit ex ignorantia; atqui id, quod causat ignorantia antecedens fit ex ignorantia: ergo id, quod causat ignorantia antecedens fit ex defectu cognitionis.

Minor pr. Illud fit ex ignorantia, cuius ignorantia est causa; atqui ignorantia antecedens est causa eius, quod causat: ergo id, quod causat ignorantia antecedens fit ex ignorantia.

Secunda pars minoris superioris argumenti, id quod causat ignorantia antecedens esse contra appetitum, probatur.

Illud est contra appetitum, quod excitat tristitiam; atqui id, quod causat ignorantia antecedens excitat tristitiam: ergo est contra appetitum.

Minor pr. Illud excitat tristitiam, quod nolle-

mus, & dolemus non fecisse; atqui dolemus, & nollemus fecisse id, quod causat ignorantia antecedens: ergo id, quod causat ignorantia antecedens excirat tristitiam.

Minor pr. Illud nollemus, & dolemus fecisse, quod nunquam faceremus, si abesset ignorantia; atqui nunquam faceremus id, quod causat ignorantia antecedens si ipsa abesset: ergo dolemus, & nollemus fecisse id, quod causat ignorantia antecedens.

SECUNDA CONCLUSIO:

Ignorantia concomitans causat non voluntarium.

Non voluntarium est illud, quod non est contra appetitum, fit tamen sine prævia cognitione; atqui id, quod causat ignorantia concomitans licet non sit contra appetitum, fit tamen sine prævia cognitione: ergo ignorantia concomitans causat non voluntarium.

Prima pars minoris probatur.

Illud non est contra appetitum, quod non dolemus fecisse; atqui non dolemus fecisse id, quod causat ignorantia concomitans: ergo non est contra appetitum.

Minor pr. Illud non dolemus fecisse, quod lubenter fecissemus etiamsi abfuisset illa ignorantia; atqui fecissemus id, quod causat ignorantia concomitans licet illa abfuisset: ergo non dolemus id fecisse.

Minor pr. Fecissemus licet abfuisset ignoran-

tia concomitans illud, cuius ipsa non est causa; atqui illud quod fit ex ignorantia concomitante non habet ipsam pro causa: ergo illud fecissemus licet illa abfuisset.

Minor probatur. Quod est tantum aliud comitans non est eius causa; atqui ignorantia concomitans est tantum comitans: ergo non est eius causa.

Secunda pars minoris superioris argumenti, id, quod causat ignorantia comitans non fieri ex prævia cognitione, probatur.

Illud non fit ex prævia cognitione, cuius nulla habetur cognitio; atqui nulla habetur cognitio eius, quod causat ignorantia concomitans: ergo id, quod causat ignorantia comitans non fit ex prævia cognitione.

Minor pr. Illius nulla habetur cognitio, cuius adest ignorantia; atqui adest ignorantia eius, quod causat ignorantia concomitans: ergo nulla habetur eius cognitio.

TERTIA CONCLUSIO:

Ignorantia consequens causat voluntarium simpliciter.

VOLUNTARIUM simpliciter est illud, quod fit à principio intrinseco ex prævia cognitione, & non est contra appetitum; atqui id, quod causat ignorantia consequens fit à principio intrinseco ex prævia cognitione, & non est contra appetitum: ergo ignorantia consequens causat voluntarium simpliciter.

Minor pr. Illud fit ex prævia cognitione, & non est contra appetitum, quod est sufficienter præuisum, & est volitum; atqui id, quod causat ignorantia consequens est sufficienter præuisum, & est volitum: ergo id, quod causat ignorantia consequens fit ex prævia cognitione, & non est contra appetitum.

Minor pr. Illud est sufficienter præuisum, & volitum quod prævidetur, & appetitur in sua causa; atqui id, quod causat ignorantia consequens prævidetur, & appetitur in sua causa: ergo est sufficienter præuisum, & volitum.

Minor pr. Illud quod causat ignorantia consequens amatur, & prævidetur in ipsa: ergo id, quod causat ignorantia consequens amatur, & prævidetur in sua causa.

Antecedens probatur. Illud amatur, & prævidetur in ipsa, ratione cuius ipsa amatur; atqui ratione eius, quod ipsa causat, & ad ipsam sequitur ipsa amatur: ergo amatur etiam, & prævidetur in ipsa.

Minor pr. Ratione eius ipsa amatur, ratione cuius odio habetur, & vitatur scientia opposita; atqui ratione eius, quod ipsa causat odio habetur, & vitatur scientia opposita: ergo ratione eius quod ipsa causat, & ad ipsam sequitur ipsa amatur.



QUARTA CONCLUSIO:

Ignorantia circumstantiae substantialis facit actionem inuoluntariam.

ILLUD facit inuoluntariam aliquam actionem, quod facit, vt non fiat ex praeuia cognitione, & sit contra appetitum; atqui ignorantia circumstantiae substantialis facit, vt actio non fiat ex praeuia cognitione, & sit contra appetitum: ergo ignorantia circumstantiae substantialis facit actionem inuoluntariam.

; *Prima pars minoris probatur.*

Illud non fit ex praeuia cognitione, cuius abest cognitio; atqui cum est ignorantia circumstantiae substantialis alicuius actionis abest illius cognitio: ergo ignorantia circumstantiae substantialis facit, vt actio non fiat ex praeuia cognitione.

Minor pr. Tunc abest cognitio alicuius actionis, cum abest cognitio illius essentiae, & substantiae; atqui cum est ignorantia circumstantiae substantialis alicuius actionis, abest cognitio essentiae illius actionis: ergo & ipsiusmet actionis.

Minor pr. Circumstantia substantialis actionis est essentia illius; atqui cum est ignorantia circumstantiae substantialis, abest cognitio illius circumstantiae: ergo & essentiae.

Minor pr. Ignorantia nihil est aliud, quam absentia scientiae, seu cognitionis: ergo cum est ignorantia substantialis circumstantiae abest cognitio illius.

Secunda pars minoris superioris argumenti, ignorantiam circumstantiæ substantialis facere, ut actio sit contra appetitum, probatur.

Illud est contra appetitum, quod dolemus fecisse; atqui dolemus fecisse actionem consequenter ad ignorantiam circumstantiæ substantialis eius: ergo est contra appetitum.

Minor pr. Illud dolemus fecisse, quod non fecissemus si abfuisset ignorantia circumstantiæ substantialis; atqui non fecissemus actionem, quam facimus consequenter ad ignorantiam circumstantiæ substantialis: ergo dolemus fecisse actionem consequenter ad ignorantiam circumstantiæ substantialis.

SECTIO IX.

De Libero.

CERTUM est apud omnes primò libertatem, & liberum sonare immunitatem, & exemptionem à malo, quod afficere potest subiectum, cui tribuuntur.

Secundo, voluntatem comparatam cum triplici malo, peccato scilicet, miseria, & necessitate, quibus potest esse obnoxia, dici à D. Bernardo, habere triplicem libertatem, gratiæ videlicet, gloriæ, & naturæ. Prima est exemptio à peccato, secunda à miseria, & tertia à necessitate. Necessitas autem, quæ est determinatio ad vnum, aut potestas vnius cum impossibilitate potentiæ, & determinatio.

nationis ad oppositum, multiplex est. Primum enim alia est consequens, seu orta ex aliquo, quod non est prius eo, ad quod dicitur necessitare. Alia antecedens desumpta ex eo, quod est eius causa, aut quasi causa, quæ si sit moralis dicitur necessitas moralis, & physica, si petatur à causa physica. Necessitas absoluta, seu independens ab omni conditione habet sibi oppositam, eam quæ est tantum determinatio ad vnum cum impossibilitate oppositi dependenter ab aliqua conditione, quæ impossibilitas cum non potest tolli, etiam diuinitus, appellatur metaphysica; si verò tantum physicè, vocatur physica; & si denique auferri non possit moraliter, dicitur moralis.

Tandem necessitas alia est spontanea, alia coactionis. Spontanea in præsentī materia, est determinatio appetitus à bonitate obiecti, coactiua verò ab aliquo extrinseco efficiente, aut quasi efficiente, & contra appetitum.

Quot modis dicitur necessitas, tot appellatur etiam illi opposita indifferentia seu libertas, de cuius ratione cum hoc tertio modo sumitur, sunt duo. Primum est, ut voluntas habeat ea omnia, quibus eget, ut possit agere. Secundum, ut ea ita habeat, ut iis uti possit ad nutum, & prout libuerit. Defectu illorum, aut alterius ex illis voluntas caret hoc genere libertatis, & indifferentia, quæ dum se extendit ad opposita contrariè, ut sunt amor, & odium eiusdem rei, aut quasi contrariè, vocatur libertas contrarietatis. Dum verò versatur circa opposita contradictoriè, ut sunt amor, & negatio amoris alicuius obiecti, appellatur libertas contradictionis.

Tertiò, indifferentiam iudicij, quod manifestat voluntati, quid in obiecto bonum sit, & malum, in eo consistere quòd illud ei repræsentet, neque merè, & purè bonum, neque purè malum, sed mixtum ex utroque.

Quartò, voluntatem posse se habere diuersimodè circa bonitatem, & malitiam in obiecto repræsentatam: primò, ita ut neutram possit amare, vel odire: secundò, ita ut non possit cohibere amorem, aut odium: tertiò, ita ut possit quidem ponere amorem, vel ab eo cessare, non tamen ponere odium, vel è contrà: quartò, ita ut possit adnutum, & prout libuerit ponere amorem, vel odium, vel abstinere ab utroque. Ex variis autem illis modis agendi quinquam gaudere debeat nomine libertatis dissident auctores. Quid nos sentiendum iudicemus aperient sequentes conclusiones.

PRIMA CONCLUSIO:

Libertas non est immunitas à coactione.

Quod est immune à coactione non est liberum: ergo libertas non est immunitas à coactione.

Antecedens pr. Omne voluntarium est immune à coactione; atqui omne voluntarium non est liberum: ergo nec omne, quod est immune à coactione.

Probatur minor de voluntario humano, de quo est tota difficultas.

Quod non est à libero hominis arbitrio non est liberum; atqui omne voluntarium humanum

non est à libero hominis arbitrio : ergo non est liberum.

Minor probatur. Liberum arbitrium hominis est potentia ad vtrumlibet; atqui omne voluntarium non est à potentia ad vtrumlibet: ergo nec à libero hominis arbitrio.

Maior pr. Liberum arbitrium Adæ erat potentia ad vtrumlibet : ergo & illud aliorum hominum.

Respondent: Liberum arbitrium Adæ ante lapsum erat potentia ad vtrumlibet, Concedunt. post lapsum, Negant.

Contrà. Liberum arbitrium Adæ post lapsum mansit idem, ac erat antè: ergo etiam post lapsum erat potentia ad vtrumlibet.

Antecedens pr. Quod per peccatum Adæ non est amissum, nec extinctum, mansit idem post eius lapsum, ac erat antè; atqui ex Conc. Trid. sess. 6. can. 5. liberum hominis arbitrium per peccatum Adæ non est amissum, nec extinctum : ergo post Adæ lapsum mansit idem, ac erat antè.

Respondent: Atqui liberum hominis arbitrium per peccatum Adæ non est amissum, nec extinctum quoad immunitatem à coactione, & id, quod est fieri à principio intrinseco cum cognitione, Concedunt. quoad indifferentiam ad opposita, Negant. & simili modo distinguunt consequens.

Contrà. Liberum arbitrium nostrum habet indifferentiam ad bonum, & malum: ergo per peccatum Adæ non est amissum, nec extinctum quoad indifferentiam ad opposita.

Respondent : Liberum arbitrium nostrum habet indifferentiam ad bonum, & malum, hoc est vertibili-

tatem adharendi nunc bono, deinde malo, & vice versa, Concedunt. adharendi uni potius, quàm alteri ad libitum, Negant.

Contrà. Liberum arbitrium nostrum habet aliam indifferentiam circa bonum, & malum, quàm habeat appetitus belluarum circa cibum verbi gratia calidum, & frigidum; atqui ist: habet vertibilitatem adharendi modò cibo verbi gratia calido, modò frigido: ergo liberum arbitrium nostrum non habet indifferentiam, quæ sit tantum vertibilitas adharendi modò uni, deinde alteri.

Respondent: Liberum arbitrium nostrum habet aliam indifferentiam formaliter, quam habeat appetitus belluarum, Negant. radicaliter, Concedunt. propterea quòd scilicet oriatur, & dependeat in genere moris ab illo Ade, quod ita adharebat bono, ut potuisset ab illa adhesionem abstinere, & loco eius ponere contrariam; atqui appetitus brutorum habet vertibilitatem adharendi modò cibo v.g. calido, modò frigido, & illa vertibilitas non oritur, neque dependet in genere moris ab aliquo, in cuius potestate fuerit cum appetit cibum calidum ab eo abstinere, aut præferre frigidum, Concedunt. & oritur ab aliquo huiusmodi, Negant. Nullum enim tale fuit.

Contrà. Quod ita afficitur circa obiectum suum, ut ab eo possit abstinere, habet indifferentiam formalem ad illud; atqui arbitrium nostrum ita afficitur circa suum obiectum, ut ab eo possit abstinere: ergo habet indifferentiam non tantum radicalem, sed etiam formalem ad illud.

Minor pr. Cui præcipitur abstinere ab affectu circa aliquod obiectum, & quod peccat non ab-

tinendo ab illo affectu, potest ab eo abstinere; atqui præcipitur arbitrio nostro abstinere à multis affectibus circa varia obiecta, & peccat si non abstineat: ergo ita afficitur circa suum obiectum, ut cum illud prosequitur possit ab eo abstinere.

Maiores probatur. Ex D. Augustino libro secundo de gratia, & libero arbitrio cap. 18. & aliis SS. Patribus, Theologis, & Philosophis, *inimè præcipitur quod aliter fieri non potest*, & libro tertio de libero arbitrio c. 18. *Nemo peccat in eo, quod cauere non potest*: ergo qui peccat non abstinendo ab eo, à quo præcipitur abstinere, potest ab eo abstinere.

Respondent: *Nemo peccat peccato proprio status innocentie, & primi hominis in eo, quod cauere non potest*, Concedunt. *peccato proprio status nature lapsæ, & posteriorum Ade*, Negant.

Contra. Peccatum propter quod plectimur pœna æterna sensus debet posse caueri; atqui peccata nature lapsæ puniuntur pœna æterna sensus: ergo debent posse caueri.

Respondent: *Peccatum, propter quod plectimur pœna æterna sensus, debet posse caueri in se, vel in causa, seu cum primò incipit, aut cum deinde continuatur*, Concedunt. *in se tantum, vel duntaxat dum continuatur*, Negant. & concessa minori: ergo peccata nature lapsæ debent posse caueri in se, vel in causa, vel cum primò incipere, Concedunt. Potuere autem inquirunt sic caueri, Adamus enim, cuius peccatum fuit causa istorum, in quo incipere, & cuius sunt tantum continuatio, potuit ab eo abstinere. Debent posse caueri in se tan-

tum vel dumtaxat dum continuantur, Negant. *sufficit siquidem si sint culpabilia in causa, aut sui incœptione, quæ fuit peccatum Adæ. Sicut enim aiunt ad laudabilitatem alicuius actus, & libertatem satis esse ut cum primò ponitur, ita ponatur ut potuerit non poni, licet postea necessario perseveret (cuius natura esse volunt volitionem creationis mundi v. g. ab eterno, à qua Deus cessare non potest propter suam immutabilitatem) ita peccata nostra sunt sufficienter libera, & culpabilia per hoc, quod cum primò incœpit illud Adæ, cum quo nostra faciunt unum, & sunt tantum eius quasi continuatio potuerit non fieri, quantumvis iam ab istis nos non possimus nos præservare.*

Contrà. Peccata naturæ lapsæ sunt in se, & non tantum in sua causa, & incœptione modo iam explicato culpabilia: ergo etiam in se, & non tantum in sua causa, & incœptione debent posse caueri.

Antecedens pr. Non sunt culpabilia in causa: ergo debent esse in se culpabilia.

Antecedens pr. In eo non sunt culpabilia, in quo nulla est culpa; atqui in causa istorum peccatorum, seu peccato Adæ nulla est culpa: ergo non sunt culpabilia in causa.

Minor probatur. In eo non est culpa, cuius culpa est condonata; atqui culpa peccati Adæ per baptismum est condonata nobis: ergo in peccato Adæ nulla est culpa.

Respondent: In eo non est culpa de presenti, cuius culpa est condonata, Concedunt. non est iam, neque fuit, Negant. & concessa minori; ergo in peccato Adæ nulla est culpa de presenti, Concedunt. non fuit, Negant.

Contrà. Culpa destructa, & quæ cessauit, perinde est, & non plus facit, quàm si nunquam fuisset: ergo in eo, in quo nulla est culpa de præsentì quantumuis fuerit de præterito, non potest dici verè esse nunc, & de factò culpa.

Respondébunt fortè: *Culpa destructa, & quæ cessauit, perinde est, & non plus facit, quàm si nunquam fuisset, si non de nouo excitetur, & quasi reuiuiscat, Concedunt. si de nouo excitetur, & quasi reuiuiscat, per cessationem condonationis, expulsa eius forma, gratia scilicet sanctificante per peccatum subsequens condonationem in prioris, Negant. Cum enim velint condonationem in peccati fieri formaliter per infusionem gratiæ, cessare etiam volunt condonationem, & quasi reuiuiscere peccatum prius, cum per posterius, & subsequens expellitur gratia.*

Contrà. Ex plurimis Scripturæ locis, communi sensu Patrum, & Theologorum peccata semel condonata nunquam reuiuiscunt, & si reuiuiscerent, non possent hoc habere per peccata naturæ lapsæ, à quibus non possumus abstinere: ergo culpa destructa, & quæ cessauit non reuiuiscit, & perinde est, & non plus facit, quàm si nunquam fuisset.

Prima pars antecedentis clara est, & secunda probatur.

Peccatum primi hominis per illud non reuiuiscit, per quod non expellitur gratia sanctificans, per quam fuit condonatum; a: qui per peccata naturæ lapsæ, à quibus non possumus abstinere, gratia, per quam peccatum Adæ fuit condonatum non expellitur: ergo peccatum primi hominis non reui-

reuiuiscit per peccata naturæ lapsæ, à quibus non possumus abstinere.

Minor pr. Gratia semel infusa non expellitur per id, quod non est culpa in se, neque formaliter culpabile; atqui peccata naturæ lapsæ, à quibus non possumus abstinere, non sunt ex concessis suprâ, neque culpa in se, neque formaliter culpabilia: ergo gratia, per quam peccatum Adæ fuit condonatum, non expellitur per peccata naturæ lapsæ à quibus non possumus abstinere.

Maior pr. Gratia non expellitur per id, quod non est in se, neque formaliter demeritum: ergo neque per id, quod non est culpa in se, neque formaliter culpabile.

Antecedens pr. Quod Deus non concedit nobis extra sacramenta, nisi propter id, quod est meritum in se, & formaliter, non aufert etiam, & expellit à nobis nisi propter id, quod in se, & formaliter est demeritum; atqui non concedit nobis gratiam extra sacramenta nisi propter bona opera, quæ sunt in se, & formaliter meritum: ergo gratia non expellitur per id, quod non est in se, neque formaliter demeritum.

Minor probatur. Illud est in se, & formaliter meritum, per quod meremur gratiam, & gloriam; atqui ex Trid. sess. 6. can. 32. per bona opera meremur gratiam & gloriam: ergo bona opera, propter quæ nobis conceditur gratia sunt in se, & formaliter merita.

Respondebunt forè ad præcedens argumentū: Negando maiorem propterea quod peccata possunt intelligi continuari, & facere unum cum peccato Adæ, quod in se, & formaliter est demeritum. Bo-

na verò opera nihil habent, cum quo possint dici continuari, & facere unum cum aliquo, quod sit in se & formaliter meritum. Non enim primò resipiscentia Adami, quia illa cum non fuerit nisi post peccatum, & rebellionem concupiscentiae, non fuit à potentia ad utrumlibet (ut volunt) & deinde nec ipsa, nec alii actus boni Adami possunt censerì nostri, sicut eius peccatum. Nihil enim ab iis in nostras actiones bonas deriuatum est. Nec secundò opera Christi, quæ temerarium esset dicere esse nostra, & licet hoc nobis competeret, cum non sit à potentia ad utrumlibet ex principiis aduersariorum, non essent in se, & formaliter meritum, de quo disputamus.

Contrà Gratia collata D. Petro non est expulsa per eius negationem tempore passionis, nisi quia hæc fuit in se, & formaliter demeritoria: ergo gratia non expellitur in nobis, nisi per id, quod est in se, & formaliter demeritum.

Antecedens pr. Illa negatio erat in se, & formaliter demeritum, quam D. Petrus habebat in sua potestate, & ita posuit, ut potuerit non ponere; atqui D. Petrus ita illam posuit, ut potuerit non ponere: ergo gratia collata Diuo Petro non est expulsa per eius negationem, nisi quia fuit in se, & formaliter demeritoria.

Minor pr. Tam D. Petrus habuit in sua potestate illam negationem, quam dolorem, quem de illa deinde concepit; atqui habuit in sua potestate illum dolorem: ergo ita posuit illam negationem, ut potuerit non ponere.

Minor pr. Quod est in se, & formaliter meritum est in potestate eius, cuius est meritum; atqui dolor ille erat meritum in se, & formaliter D. Pe-

tri : ergo illum habuit in sua potestate.

Maior pr. Ille cui datur præmium habet in potestate id , propter quod ei debetur ; atqui debetur ei propter id , quod est in se , & formaliter meritum : ergo quod est in se , & formaliter meritum est in potestate eius , cuius est meritum.

Maior probatur. Debet aliquid dedisse , aut contulisse de suo tanquam pretium , ut ei fieret debitum : ergo habet in potestate id , propter quod ei debetur.

Respondent : Debet aliquid contulisse de suo , hoc est de aliquo , quod fuerit ab ipso , ut à principio intrinseco cum cognitione , Concedunt. De suo , hoc est de aliquo , cuius habeat dominium , & ad quod sit indifferens , Negant.

Contrà. Productio actuum , quibus fit nobis debitum præmium supernaturale , ad quam non sumus indifferentes , & cuius non habemus dominium , facile conciliatur cum infallibilitate præscientiæ diuinæ , & efficacitate gratiæ ; atqui ex S. Augustino epist. 1. & 2. ad Valentinum , aliis SS. PP. & Theologis difficillima est huiusmodi conciliatio : ergo productio actuum , quibus fit nobis debitum præmium est indifferens , & illius habemus dominium.

Respondent : atqui ex S. Augustino , aliis SS. PP. & Theologis difficillima est huiusmodi conciliatio in natura integra , Concedunt. in natura lapsa , Negant. ergo productio actuum , quibus fit nobis debitum præmium debet esse indifferens , & debetur nobis dominium illius in natura integra , Concedunt. in natura lapsa , Negant.

Contrà D. Augustinus intelligit illam. conci-

liationem de actibus, de quibus disputabat cum Cicerone, & Monachis Adrumetinis: atqui cum Cicerone, & Monachis Adrumetinis disputabat de actibus naturæ lapsæ: ergo ex S. Augustino difficillima est huiusmodi conciliatio in natura lapsa.

Prima pars minoris clara est: Cicero enim non noverat aliam naturam, quam ut iam illam habemus cum rebellionem appetitus, & concupiscentia non fructuata. & secunda probatur.

Actus boni naturæ lapsæ non oriuntur à gratia illos inferente necessario: ergo disputabat D. Augustinus cum Monachis Adrumetinis de actibus naturæ lapsæ.

Antecedens pr. Gratia illa non infert necessario nostros actus, quam respuere, & cui possumus resistere si velimus; atqui ex Concilio Senonensi an. 1528. Colonienfi an. 1536. & Tridentino sess. 6. cap. 4. & cap. 5. possumus respuere, & resistere gratiæ si velimus: ergo actus nostri boni non oriuntur à gratia illos inferente necessario.

Respondent: Gratia non infert necessario nostros actus, quam respuere & cui possumus resistere si velimus, si possumus hoc velle, & istud sit in nostra potestate, Concedunt. si non possumus hoc velle, Negant. Atqui ex Tridentino possumus respuere gratiam, & illi resistere si velimus, & hoc velle possumus, Negant. & non possumus hoc velle, Concedunt.

Contrà. Verba Concilij non sunt trahenda in sensum improprium; atqui allatus est huiusmodi: ergo non est verus & proprius.

Minor pr. Ille sensus est improprie secundum

quem dicimur aliquid posse, quod potius debemus dici non posse; atqui allatus est huiusmodi: ergo est improprius.

Maior pr. Quotiescumque non possumus aliquid secundum se, & impossibilis est etiam nobis conditio, sub qua dicimur id posse, debemus potius dici id non posse; atqui non possumus respuere gratiam per aduersarios, & volitio etiam, sub qua tanquam conditione volunt nos id posse est etiam nobis impossibilis: ergo debemus potius dici non posse illam respuere, quam posse.

Maior pr. Ideo hæc propositio, & similes, Deus potest peccare si velit, rejicitur à Sancto Thoma, & Theologis, quia & quod asseritur per illam, & conditio sub qua asseritur sunt Deo impossibilia: ergo quotiescumque non possumus aliquid secundum se, & impossibilis est etiam conditio, sub qua dicimur id posse, debemus potius dici id non posse.

Respondebunt fortè: *Ideo hac propositio, Deus potest peccare si velit, rejicitur, quia id, quod asseritur per illam, & conditio, sub qua asseritur, sunt Deo impossibilia nunc, & semper talia fuere, Concedo. Conditio fuit aliquando possibilis, Nego. ergo quotiescumque non possumus aliquid secundum se, & impossibilis est etiam conditio, & semper fuit, sub qua dicimur id posse, debemus potius dici id non posse, Concedo. si illa conditio fuerit nobis possibilis, Nego.*

Contrà. Quando conceditur tantum nobis posse vnum posito alio, & dependenter ab illo, in tantum duntaxat possumus primum, in quantum possumus secundum: ergo si non possumus

hoc secundum , non debemus ratione illius dici
potè primum.

Respondent fortè : Ergo si non possumus, neque
potuimus primum , non possumus secundum , Concede.
si potuimus primum licet iam illud nostra culpa
non possimas , non possumus absolute secundum , Ne-
go. Impossibilitas enim illa nostra culpa inducta non
est impossibilitas absoluta , sed potius, quandoquidem
dependet à nobis vera possibilitas.

Contrà. Posse , & possumus iuxta communem
acceptiōem (secundum quam debent sumi ver-
ba Concilij vt potè doctrinalia, & eatenus aliena
ab omni a mbiguitate) non tribui solent , nec de-
bent dependenter à conditione impossibili quan-
tumvis fuerit aliàs possibilis, & licet hoc daretur,
verba Concilij Tridentini non debent intelligi in
eo sensu : ergo nulla solutio.

*Secunda pars antecedentis probatur , prima enim
clara est.*

Sensus verborum Concilij debet dici is , primò
secundum quem , potest si velit , intelligitur cum
agitur de aliis comprincipiis actuum voluntatis :
secundò , qui sit idem cum eo verborum Con-
cilij Senonensis , & Coloniensis ad eosdem erro-
res damnandos collectorum : tertio quem Patrum
Tridentinorum præcipui , eorundem propugna-
tores primi , ipsorumque hostes , & impugnato-
res Calvinus , huius , & Lutheri discipuli quique
nominatissimi Dordrechtanæque Synodus conue-
nère fuisse : quartò , secundum quem melius sen-
timus de Dei bonitate , eius iustitia , Christi me-
ritis & nostris prouidetur certius fugæ , & odio
vitiōrum , prosecutioni virtutum , & amoris Dei :

atqui secundum sensum allatum, primò *poteſt ſi velit* non intelligitur, cum agitur de aliis comprincipiis actuum voluntatis: ſecundò ille non eſt idem cum eo verborum Concilii Senonenſis, & Colnoienſis ad eoſdem errores damnandos collectorum; nec tertio cum eo, quem Patrum Tridentinorum præcipui, eorundem primi propugnatores, ipſorumque hoſtes, & impugnatores, Caluinus ſcilicet, huius, & Lutheri diſcipuli quique nominatiſſimi, Dordrechtanæque Synodus conuenere fuiſſe: quarto, ſecundum quem melius ſentimus de Dei bonitate, & eius iuſtitia, meritis Chriſti & noſtris, & per quem prouidetur certis fugæ, & odio vitiorum, proſecutioni virtutum, & amoris Dei: ergo verba Concilij non debent intelligi in eo ſenſu.

Prima pars minoris probatur.

Habitus, & concursus Dei generalis ſunt alia comprincipia actuum voluntatis; atqui *poteſt ſi velit* iis applicatum nihil aliud ſignificat, quam voluntatem iis uti poſſe, aut non poſſe ad nutum, & arbitrium: ergo ſecundum allatum ſenſum non intelligitur *poteſt ſi velit* cum agitur de aliis comprincipijs actuum voluntatis.

Secunda & tertia pars minoris ſuperioris argumenti probatur.

Concilium Senonenſe habitum anno 1528. decreto fidei 15. definit, *Tale non eſſe Dei trahentis auxilium, cui reſiſti non poſſit*: Coloniienſe coactum anno 1536. in Enchiridio Doctrinæ Chriſtianæ, ubi de Sacramento pœnitentiæ: *Retinendum eſſe*, ait, *ſitum eſſe in hominis voluntate, ut gratiam Dei oblatam vel accipiat, vel repudiet*: Idem aſſe-

runt Stanislaus Hosius Legatus Apostolicæ Sedis in Concilio Tridentino libro de sectis, & hæresibus sui temporis : Alphonsus Salmero Pontificis summi Theologus in eodem Concilio tom. 7. pag. 58. & seq. tract. 7. Dominicus Soto lib. 1. de natura & gratia cap. 15. de libero arbitrio; Andreas Vega, libro primo de iustificatione cap. 13. Franciscus Horantius, qui sicut duo præcedentes interfuit Concilio Tridentino, idem confirmat lib. 1. de septem locis Catholicis contra Caluinum, qui in Antidoto Concilij ad sess. 6. fatetur Tridentinos Patres velle, *nostra esse electionis gratiam oblatam admittere, vel non admittere*, & impugnat illam Concilii definitionem iis S. Augustini locis, & eodem modo intellectis, & explicatis, quo explicantur à contrarium sentientibus: Caluino consentiens Dordrechtana Synodus, *Affirmamus*, ait pag. 735 *quod Deus voluntatem hominis gratia sua mouet, non ut Pontificij tradunt, ut nostra sit electionis motioni obtemperare, aut refragari, sed ut illam efficaciter ad obsequendum flectat*. Scharpius libro de libero arbitrio cap. 3. postquam proposuit an homo per præuenientem gratiam excitatus, & à Deo adiutus, ita valeat operari ut possit etiam non operari, ait, *Affirmatiuam partem tuetur Bellarminus, Concilium Tridentinum sess. 6. &c. adiungit deinde, nos verò dicimus in homine post lapsum, &c. Deum ita efficaciter voluntatem flectere, ut hominis voluntas Deum conuersionem hominis volentem & operantem non sequi non possit*: ergo sensus allatus non est idem cum eo verborum Concilij Senonensis, & Colonienfis, neque cum eo,

quem Patrum Tridentinorum præcipui, eorundem primi propugnatores, & eorum hostes Calvinus, huius, & Lutheri discipuli quoque nominatissimi, Dordrechtanæque Synodus convenire fuisse, & quidem centum circiter annis ante eas, quæ nunc agitantur quæstiones de intelligentia illorum verborum.

Respondebunt fortè? *Concilia Senonense, & Colonienſe, & præcipui Patrum Tridentinorum asserunt Dei trahentis auxilio resisti posse, & voluntatem posse accipere, vel repudiare oblatam gratiam incompletè & dimidiatè sumptam secundum alteram sui partem, eam scilicet, quæ se tenet ex parte intellectus, & dicitur illuminatio, illustratio, inspiratio, Concedo. completè sumptam, & secundum non solum illuminationem, sed etiam eam, quæ se tenet ex parte voluntatis quam tam suauster afficit, Nego.*

Contrà primò. Gratia, quæ se tenet ex parte intellectus est gratia completè sumpta: ergo nulla solutio.

Antecedens pr. Gratia quæ se tenet ex parte intellectus est inspiratio, illustratio, illuminatio; atqui inspiratio, illuminatio, & illustratio sunt gratia completè sumpta: ergo etiam ea, quæ se tenet ex parte intellectus.

Minor pr. Gratia quæ potest inferre consensum est gratia completè sumpta; atqui inspiratio, illuminatio, & illustratio possunt inferre consensum: ergo sunt gratia completè sumpta.

Minor pr. Acceptio, & admissio gratiæ est consensus; atqui ex Concilio Colonienſi, liberum est impio præveniente se divinæ illuminationis

gratia à peccato resurgendi eam accipere, vel non accipere: ergo illuminatio, inspiratio, &c. possunt inferre consensum.

Et consequenter frustra requiritur alia gratia in voluntate, præsertim si supponamus, ut est valdè probabile, actum intellectus concurrere ad illos voluntatis, & aliunde aduertamus primò dari quidem in intellectu lumen gloriæ ad videndum Deum, in voluntate verò nihil planè de nouo ad eum amandum.

Obseruemus secundò Sapiensem nihil aliud carperè in peccatore, quàm defectum scientiæ, & illuminationis, cum dicit *omnis peccans ignorans*. Tertiò experiamur in rebus naturalibus nihil aliud esse necessarium ad mouendam voluntatem ad id etiam, ad quod valdè repugnabat, quàm illustrari intellectum noua cognitione clariori, & fortiori maius bonum repræsentante, & si daretur aliquid aliud in rebus supernaturalibus ad afficiendam voluntatem erga aliquod obiectum, quàm cognitio clarior, & fortior, debilis valdè cognitio, & obscura cum intensiori motione in voluntate eam vehementer primò moueret contra experientiam, quæ constat obiecta, quæ ardentè amamus, perfectiùs etiam, & clariùs cognosci à nobis. Secundò non esset necessarium petere, ut adangeretur in nobis fides, sed tantùm illa motio in voluntate. Tertiò non assereret Sapiens: *memorate noxißima tua, & in æternum non peccabis*. Nec diceret Christus *si cognouisses & tu de Ierusalem*. Dicere enim debuisset potiùs, si excitata fuisset motio in tua voluntate, &c. & Sapiens, excita in te motionem voluntatis amantis, vel odio habentis nouißima.

Nec refert quòd possent dicere Christum , Sapientem, &c. mentionem facere tantum de cognitione , quia ex hoc sequitur voluntatis motio, & suavis illa delectatio. Hæc enim responsio probat illuminationem & inspirationem habere omnia necessaria ad inferendum consensum voluntatis, quandoquidem ex ipsa sequitur delectatio illa suavis , quam requirunt præter illuminationem hi, contra quos argumentamur , qui ut suadeant illam oriri non tantum à cognitione boni sensibilis naturalis , sed etiam bonorum spiritualium, contendunt repræsentationi boni spiritualis , respondere aliam in imaginatione boni cuiusdam sensibilis proportionati, quæ in appetitu excitat affectum materiale , & hic per sympathiam , & propter connexionem operationum appetitus sensitivi , & rationalis in isto suauem delectationem similem.

Addi tandem potest non videri, cur non satis si in natura lapsa ad excitandum in voluntate motum indeliberatum complacentiæ, & consequenter ad hunc deliberatum circa obiectum bonum, illustratio supernaturalis in intellectude eius bonitate. Cum enim hæc repræsentari possit, & sæpè repræsentetur sine difficultate, hanc siquidem non repræsentat illa cognitio supernaturalis , & non est ratio cur ponitur alia naturalis quæ sit huiusmodi repræsentatio, nihil est quod impedire possit voluntatem ne afficiatur circa obiectum, quod non apparet ei nisi bonum. A quo enim prohiberetur ne hoc faceret non primò à propensione in bonum sensibile. Nullum enim tale repræsentatur , & licet repræsentaretur posset non ha-

bere, in impossibilitatem cum eo, quod representatur per illustrationem supernaturalem; nec secundò defectu virium ad amandum utrumque. Sufficientes enim sunt in voluntate. Nec dicas per peccatum originis debilitatam esse adeo voluntatem, & ita illam frænare concupiscentiam, ut sine subsidio, & corroboratione gratiæ, & delectationis cœlestis assurgere non possit ad affectum boni spiritualis. Habet enim easdem vires intrinsecas, ac in natura pura, in qua hoc posset, & extrinsecas etiam in casu posito. Non rebellat enim actu, & de facto appetitus sensitivus, demones etiam non agunt. Imò magis illustratur intellectus, quàm in natura pura, atque adeo cum robur, quod habet voluntas proveniat à cognitione, & maius sine dubio, aut saltem æquale à supernaturali, quàm à naturali, negari non debet voluntatē amare posse bonum spiritale sine alio subsidio, & corroboratione, & consequenter præter illustrationem intellectus non esse necessariam aliam gratiam in voluntate.

Si cui tamen hic modus respondendi minùs placeat, vel quod dici soleat in rebus naturalibus cognoscendum esse, ut amemus, in rebus verò spiritualibus & divinis amandum esse ut cognoscamus, quo fit ut ardor affectus non dici debeat oriri à cognitione, sed huius intensio, & claritas ab amore vehèmenti; vel quod D. Augustinus insinuare videatur variis locis in libris de correptione, & gratia, & de dono perseverantiæ, præter illuminationem intellectus dari præterea in voluntate eam quam vocat suavem delectationem.

Vrgere potest distinctionem supra factam de gratia completè, & incompletè sumpta sequenti argumento.

Gratia de qua loquuntur Concilia Senonense, Colonienſe, atque etiam Tridentinum cap. 5. ſeſſ. 6. & Theologi, qui illi interſuere, includit totum quod dicit gratia ex parte intellectus, & voluntatis: ergo nulla ſolutio.

Antecedens pr Gratia, de qua loquuntur Concilia relata, & Theologi, eſt primò illa eadem quam intelligebant hæretici, Lutherus, Calvinus, & horum diſcipuli, cum quibus de illa erat diſſidium: ſecundò dicitur à primo ex illis Conciliis *auxilium Dei trahentis*, & ab ultimo *Deum tangere per illam cor hominis*; atqui gratia, quam intelligebant hæretici, Lutherus, Calvinus, & diſcipuli vtriuſque, cum quibus de illa erat diſſidium, & quæ vocatur *auxilium Dei trahens*, & *tangens cor hominis*, includit totum, quod dicit gratia ex parte intellectus, & voluntatis: ergo gratia de qua loquuntur Concilia relata, & Theologi includit totum, quod dicit gratia ex parte intellectus, & voluntatis.

Secunda pars minoris probatur primò.

Auxilium trahens voluntatem, & per quod Deus tangit cor, hoc eſt, ipſam voluntatem ex modo loquendi Scripturæ, includit omnia neceſſaria ad tractionem voluntatis; atqui neceſſaria per aduerſarios ſunt non tantùm ea, quæ dicit gratia ex parte intellectus, ſed etiam ex parte voluntatis: ergo auxilium Dei trahens, & per quod Deus tangit cor hominis, includit quidquid dicit gratia ex parte intellectus, & ex parte voluntatis.

Maior pr. Auxilium Dei trahens sumi potest vel in actu primo, vel in actu secundo; atqui utroque modo includit omnia necessaria ad ponendam tractionem voluntatis: ergo falsum est ea non includere.

Minor probatur. Traction voluntatis est quid constitutum trahentis in actu secundo, & nihil supponit medium inter ipsam, & trahens in actu primo: ergo trahens in actu primo, & in actu secundo, includit omnia necessaria ad ponendam tractionem voluntatis.

Prima pars minoris superioris argumenti, gratiam scilicet, quam intelligebant heretici, & de qua illis cum Tridentino, & Catholicis, quos Pontificios vocant erat dissidium includere quidquid ipsa dicit ex parte intellectus, & voluntatis, probatur secundo.

Gratia quam intelligebant heretici relati inferebat consensum; atqui quae infert consensum habet quidquid includit gratia ex parte intellectus, & voluntatis: ergo negari non debet gratiam id totum includere.

Maior pr. Nullam aliam agnoscunt præterquam inferentem consensum, ut patet ex omnibus eorum libris: ergo gratia quam intelligebant inferebat consensum.

Quarta pars minoris superioris argumenti, secundum sensum allatum nos non tam bene sentire de Dei bonitate, & iustitia, meritis Christi, & nostris, probatur.

Melius sentimus de bonitate Dei, & eius iustitia meritis Christi, & nostris cum fateamur Deum velle omnes, & singulos homines saluos facere,

subministrare omnibus, & singulis necessaria ad consequendam salutem, neminemque damnare, qui oblatam gratiam non repudiarit, neque saluare, qui eam non admiserit, tunc cum poterat eam repudiare; quam cum contendimus Deum nolle saluare quam plurimos, pro iis Christum non esse mortuum, iisque deesse necessaria ad bene viuendum; aliis verò, quos Deus vult saluos facere dare gloriam non propter vlla sua merita, & quod contulerint aliquid de suo ad obsequium Dei, & cui debeat primum; sed quia ita Deo placet; atqui qui volunt sensum allatum esse illum verborum Concilij, dicunt secundum, non verò primum: ergo sensus allatus non est is, per quem melius sentimus de bonitate Dei, & eius iustitia, meritis Christi, & nostris.

Maiores pr. Melius sentimus primò de Dei bonitate, si effectus ab ipsa prouenientes extendamus ad plures, quam ad pauciores. Secundò de eius iustitia si tueamur per eam tantum puniri peccata propria actualia, à quibus liberum est abstinere, quam si concedamus per eam puniri peccata originis, vel à quibus non est liberum abstinere. Tertiò, de meritis Christi, cum admittimus ea obtinuisse pro omnibus auxilia necessaria ad salutem, quam si dicamus ea obtinuisse tantum pro aliquibus. Quartò de meritis nostris si asseramus huiusmodi aliqua esse in nobis, quam si negemus ea esse vlla planè: atqui qui admittit Deum velle omnes, & singulos homines saluos facere, subministrare omnibus, & singulis necessaria ad salutem, neminem velle damnare, qui oblatam gratiam non respuerit, neque saluare, qui

eandem non admiserit tunc, cum poterat eam repudiare, extendit ad plures effectus bonitatem Dei: non cogitur secundò admittere Deum punire alia peccata, quam propria actualia, à quibus liberum est abstinere: nec tertio Christi merita non obtinuisse omnibus necessaria ad salutem: nec quarto contra Tridentini can. 32. sess. 6. nos nihil propriè mereri, aut facere quidquā cui debeat præmium: ergo melius sentimus de Dei bonitate, eius iustitia, meritis Christi, & nostris, cum admittimus Deum velle omnes, & singulos homines saluos facere, subministrare omnibus, & singulis necessaria ad salutem, neminem velle damnare, qui oblatam gratiam non respuerit, neque saluare, qui eandem non admiserit tunc, cum poterat eam repudiare, quàm cum contendimus Deum nolle saluare quàm plurimos, pro iis Christum non esse mortuum, iisque deesse necessaria ad benè viuendum; aliis verò, quos Deus vult saluos facere dare gloriam, non propter vlla sua merita, & quod contulerint aliquid de suo ad obsequium Dei, & cui debeat præmium, sed quia ita Deo placet.

Vltima pars minoris superioris argumenti probatur.

Per id non prouidetur certius fugæ, & odio vitiorum, & amor Dei & virtutum, per quod non ingenerantur nobis persuasiones addicentes nos sollicitius studio vitandi vitia, & procurandi virtutes; atqui per sensum allatum non ingenerantur nobis huiusmodi persuasiones; ergo sensus allatus non est is, per quem prouidetur certius fugæ, & odio vitiorum, & amor Dei, & virtutum.

Minor probatur. Per illud non ingenerantur nobis huiusmodi persuasiones, per quod suaderetur nobis inutilem esse nostram omnem sollicitudinem, & ad fugam vitiorum, & ad amorem virtutum; atqui per sensum allatum suadet nobis inutilem esse omnem nostram sollicitudinem, & ad fugam vitiorum, & ad amorem virtutum: ergo per sensum allatum nec ingenerantur in nobis persuasiones addicentes nos sollicitiùs studio fugiendi vitia, & procurandi virtutes in nobis.

Minor probatur. Per illud suadet nobis inutilem esse nostram sollicitudinem vitandi vitia, & procurandi virtutes, per quod suadet nobis impossibilem esse aliquibus mandatorum observationem, & ab aliis non posse non præstari, seu gratiam diuinam ad bene agendum multis non dari, & quibus datur ea non posse non uti; atqui per sensum allatum suadet nobis impossibilem esse aliquibus observationem mandatorum, & ab aliis non posse non præstari, seu gratiam diuinam ad bene agendum multis non dari, & eos, quibus datur ea non posse non uti: ergo per sensum allatum suadet nobis inutilem esse omnem nostram sollicitudinem, & ad fugam vitiorum, & ad amorem virtutum.

Maiores. Inutilis est nostra sollicitudo circa ea, quæ cognoscimus esse nobis impossibilia, aut non posse aliter se habere: ergo per illud suaderetur nobis inutilem esse nostram sollicitudinem, & studium vitandi vitia, & procurandi virtutes, per quod suadet nobis impossibilem esse multis observationem mandatorum, & ab aliis non posse non præstari, seu gratiam diuinam ad bene

agendum multis non dari, & ij quibus datur non posse.

Respondent primò ad secundam partem antecedentis. *Inutilis est nostra sollicitudo circa ea, quæ cognoscimus non posse aliter se habere, si ea quæ pendent à nobis non inserviant, & sint media ut eveniant, quæ non possunt aliter se habere, Concedo. si inserviant, & sint media, Nego.*

Contrà. Siue media illa ad ea, quæ aliter se habere non possunt sint ipsamet necessaria, vel non necessaria inutilis est nostra sollicitudo circa illa: ergo nulla solutio.

Antecedens pr. Circa media necessaria nihil potest nostrum studium, & cura, & media eorum, quæ non possunt aliter se habere, non possunt non esse necessaria: ergo siue media ad ea, quæ non possunt aliter se habere sint necessaria, vel non necessaria inutilis est nostra sollicitudo circa illa.

Prima pars antecedentis clara est, & secunda probatur.

Effectus, aut quasi effectus necessarius, non sequitur ex causa non necessaria; atqui media sunt causa, aut quasi causa eius, ad quod sunt media: ergo media rei necessariæ, & quæ non potest aliter se habere, debent esse necessaria.

Respondent secundò ad minorem argumenti superius facti: Atqui per sensum allatum suadetur nobis observationem mandatorum divinatorum ab aliquibus posse non prestari, & aliis esse impossibilem secundum actionem externam; atque etiam internam ex motu gehennæ, & ad ipsam vitandam, aut aliquo alio simili, Nego. ex motu proprio amoris Dei & charitatis, Concedo. & deinde ad

consequens : ergo per sensum allatum suadet nobis inutilem esse nostram omnem sollicitudinem vitandi vitia, & procurandi virtutes secundum id, quod est in illis externum, aut etiam internum ex motivo gehennæ, aut alio simili, Nego. ex motivo proprio amoris Dei, & charitatis, Conc. do. Velunt enim actiones externas virtutum, & vitiorum atque etiam internas habentes motivum gehennæ, aut aliud diversum à motivo charitatis esse nobis liberae, & in nostra potestate, ita ut ad nutum possimus eas ponere, vel non ponere, tuncque tantum fieri necessarias, & eripi nobis in illarum dominium, cum eliciuntur ex motivo charitatis, ad quod necessaria est verè gratia Christi, de cuius ratione dicunt esse, ut inferat necessariò actum, & consensum nostræ voluntatis.

Contra primò. Observatio mandatorum Dei, aut interna ex alio motivo, quàm veræ charitatis non potest haberi solis naturæ viribus : ergo nulla solutio.

Antecedens pr. Observatio mandatorum Dei ex motivo, seu intuitu æternæ beatitudinis, aut alio simili est bona : ergo non potest haberi solis naturæ viribus.

Antecedens probatur. Actio facta ex intuitu beatitudinis æternæ ex Canone 31. sess. 6. Concilij Tridentini non est peccatum, & per illam qui operatur benè operatur : ergo observatio mandatorum Dei ex motivo, seu intuitu æternæ beatitudinis, aut alio simili est bona.

Respondent : Ergo observatio mandatorum Dei ex motivo seu intuitu æternæ beatitudinis, aut alio simili est bona bonitate præcipua, Nego. boni-

184 TRACT. VNIC. MORAL. DISP. II.

tate alia qualicumque, Concedo.

Contrà. Diuina gràtia est necessaria ad obseruationem mandatorum Dei bonam bonitate qualicumque, seu alia, quàm ea, quæ desumitur ex motiuo charitatis: ergo nulla solutio.

Antecedens pr. Sententia negans obseruationem diuinorum mandatorum ex alio motiuo, quàm charitatis, egere diuina gratia, detrahit multum gratiæ; ergo diuina gratia requiritur ad obseruationem mandatorum diuinorum bonam quacumque bonitate.

Antecedens probatur. Illa sententia detrahit multum gratiæ, quæ ostentans se plurimum velle illi tribuere, minùs illi tribuit, quàm contraria; atqui sententia negans obseruationem diuinorum mandatorum ex alio motiuo, quàm charitatis egere diuinam gratia per Christum minùs tribuit gratiæ illi per Christum, quàm contraria: ergo detrahit multum gratiæ.

Minor probatur. Tribuit tantùm illi actiones ex motiuo charitatis; atqui contraria tribuit illi & has, & alias ex motiuo aliarum virtutum, quæ sunt longè plures: ergo sententia negans obseruationem diuinorum mandatorum ex alio motiuo, quàm charitatis egere diuina gratia minùs tribuit gratiæ per Christum, quàm contraria.

Contrà secundà. Ex concessis inutilis est nostra sollicitudo circa actus, qui fiunt ex vera gratia Christi; atqui obseruatio mandatorum ex motiuo gehennæ, aut alio simili est ex vera gratia Christi: ergo etiam circa illam inutilis est nostra sollicitudo.

Minor probatur. Attritio, seu dolor de peccatis ex metu gehennæ est ex vera gratia Christi: ergo & observatio mandatorum, licet sit ex eodem metu.

Antecedens pr. Actus boni, & honesti sunt ex vera gratia Christi: atqui attritio, seu dolor de peccatis ex metu gehennæ est actus bonus, & honestus: ergo est ex vera gratia Christi.

Minor probatur. Debet esse per auctores contra sentientes actus bonus, & honestus, vel peccatum; atqui non est peccatum ex Tridentino sess. 6. can. 8. *Si quis dixerit gehennæ metum, per quem ad misericordiam Dei de peccatis dolendo confugimus, vel à peccato abstinemus peccatum esse, anathema sit:* ergo est bonus, & honestus.

Respondent: Debet esse bonus, & honestus honestate necessaria ad salutem, vel peccatum, Nego. honestate alia quacunque, qua secernatur à turpitudine, Concedo. & concessa minori: ergo est bonus, & honestus honestate necessaria ad salutem, Nego. honestate alia qualicunque secernente eum à turpitudine, & macula peccati, Concedo.

Contrà. Honestas actus attritionis non potest haberi solis naturæ viribus: ergo est necessaria ad salutem.

Antecedens pr. Difficilior est obtentio honestatis actus attritionis, quàm illius, quæ est in desiderio credendi, & obtinendi iustitiam, & ipsa fide; atqui ea, quæ est in desiderio credendi, & obtinendi iustitiam, ipsaque fide, haberi non potest solis naturæ viribus: ergo neque alia.

Probatur primò minor.

Damnati sunt Semipelagiani à Synodo Arau-
ficana 2. cap. 5. *definiente sicut augmentum ita e-*
tiam initium fidei, ipsumque credulitatis affectum,
quo in eum credimus qui iustificat impium, per gra-
tiae donum fieri, quod ad desiderium credendi, &
obtinendi iustitiam, ipsamque fidem negarent
esse necessariam veram gratiam Christi: ergo
honestas desiderij credendi non potest haberi na-
turae viribus.

Probatur secundo maior praecedentis argumen-
ti.

Difficilius est auocare voluntatem à voluptate
proposita ut fit per attritionem, quam illam exci-
tare ad affectum bonitatis repraesentatae in eo,
quod est velle credere Deo, & obtinere iustitiam,
quod praestatur per desiderium credendi, & obti-
nendi iustitiam: ergo difficilius est obtentio ho-
nestatis primi actus, quam aliorum.

Antecedens pr. Auocatio voluntatis à volupta-
te proposita supponit desiderium credendi & ob-
tinendi iustitiam: ergo difficilius est illam auo-
care à voluptate proposita ut fit per attritionem,
quam illam excitare ad affectum bonitatis re-
praesentatae in eo, quod est velle credere, & ob-
tinere iustitiam.

Facilius profecto est affici erga bonum quod
denovo innotescit, quam deserere, & horrere,
quod multum placuerat propter bonitatem, quam
etiam tunc cum deseritur habet, ut fit in odio vo-
luptatis per attritionem.

Respondebunt fortè: Ergo difficilius est auoca-
re voluntatem à voluptate proposita, ut fit per attri-
tionem, quam eam afficere erga bonitatem credendi

ex motiua charitatis, Nego. ex alio motiua, Concedo.

Contrà. Desiderium credendi, & actus ipse credendi requirunt veram gratiam Christi, sicut & attritio, licet non fiant ex motiua charitatis: ergo nulla solutio.

Antecedens pr. Quod fit per illuminationem Spiritus Sancti, est dispositio ad iustificationem, & pars Sacramenti pœnitentiæ fit ex vera gratia Christi; atqui ex Tridentino attritio habet tres illas conditiones, & desiderium, & actus credendi duas primas etiamsi non fiant ex motiua charitatis: ergo etiamsi non fiant ex motiua charitatis requirunt vt fiant, veram gratiam Christi.

Minor probatur. Per peccatum mortale cessant actus in peccatore, qui fiunt ex motiua charitatis; atqui ex Concilio Tridentino non cessant desiderium, & actus credendi: ergo fiunt per illuminationem Spiritus Sancti, & sunt dispositio ad iustificationem.

Minor pr. Verba Canon. 28. sess. 61. Concilij Tridentini sunt. Si quis dixerit amissa per peccatum gratia simul, & fidem semper amitti, aut fidem, quæ remanet, non esse veram fidem, licet non sit vicia, aut eum, qui fidem sine charitate habet non esse Christianum, anathema sit; atqui ex illis clarum est desiderium, & actum credendi non cessare in peccatore & priuato gratia & charitate: ergo falsum est in eo cessare.

Obiicies. Omne quod est immune à coactione est liberum, & nihil aliud: ergo libertas est immunitas à coactione.

Antecedens pr. Omne voluntarium est liberum,

& nihil aliud ; atqui emne voluntarium est immune à coactione : ergo quod est immune à coactione est liberum , & nihil aliud.

Maior pr. Ex voluntariis illud tantum negari potest esse liberum , quod est determinatum ad vnum , & necessarium ; atqui istud est verè liberum : ergo & omne voluntarium.

Minor pr. Dæmones , & damnati sunt determinati , & necessitati ad peccandum ; atqui peccata ipsorum sunt libera : ergo quod est determinatum ad vnum , & necessarium est liberum.

Solutio : *Dæmones , & damnati sunt determinati & necessitati ad peccandum in genere , & quoad specificationem , transeat. in particulari , & quoad exercitium , Nego. & concessa minori :* ergo quod est determinatum ad vnum , & necessarium in genere , & quoad specificationem tantum est liberum , Concedo. determinatum hoc modo , & etiam quoad exercitium , & in particulari , Nego. Tunc enim nulla superest indifferentia , in qua possit constitui liberitas , seu potentia faciendi , & non faciendi.

Contrà. Beati sunt determinati ad amandum Deum non tantum quoad specificationem , sed etiam quoad exercitium ; atqui amant Deum liberè : ergo quod est determinatum , & necessarium quoad specificationem , & exercitium est liberum.

Solutio : *Beati sunt determinati , & necessitati non tantum quoad specificationem , sed etiam quoad exercitium ad amandum Deum eliciendo affectum circa eius summam bonitatem , Concedo. circa alia quæ non sunt eius infinita bonitas , Ne-*

go. Possunt enim illa velle, aut non velle, aut etiam velle diuersa ab ipsis, quæ possunt æquè conducere ad diuinam gloriam; atqui amant Deum liberè per affectum erga summam eius bonitatem, Nego. per affectum erga alia, quæ non sunt eius bonitas infinita, Concedo.

Contrà. Affectus B. Virginis erga summam Dei bonitatem est idem in cœlo, ac erat in terra dum viueret; atqui dum in terra vivebat erat liber: ergo etiam & nunc.

Solutio: Atqui dum in terra vivebat erat liber propterea, quod procedebat à potentia ad vtrumlibet, Concedo. propterea quod fieret à principio determinato ad vnum ut nunc, Nego. ergo etiam, & nunc non procedens à potentia ad vtrumlibet est liber, Nego. si procederet ab huiusmodi potentia Concedo.

Contrà. Ut affectus erga summam Dei bonitatem sit liber, non debet esse à potentia ad vtrumlibet: ergo nulla solutio.

Antecedens pr. Affectus iustitiæ, misericordiæ, & clementiæ in Deo sunt liberi; atqui non sunt à potentia ad vtrumlibet: ergo ut affectus erga summam Dei bonitatem sit liber, non debet esse à potentia ad vtrumlibet.

Minor pr. Affectus, qui non possunt non esse in Deo, non sunt à potentia ad vtrumlibet; atqui affectus iustitiæ, misericordiæ, &c. non possunt non esse in Deo: ergo non sunt à potentia ad vtrumlibet.

Minor pr. Illud non potest non esse in Deo, seu illud Deus non potest non esse, quod est natura sua; atqui ex D. Augustino Deus est natura sua

clemens, & iustus: ergo affectus iustitiæ, clementiæ, &c. non possunt non esse in Deo.

Solutio: Atqui ex D. Augustino Deus est clemens, & iustus naturâ suâ, hoc est ita, ut non possit esse iniustus, & exercere ullum actum iniustitiæ, seu affici circa iniustitiam, Concedo. ita ut non possit abstinere ab actibus iustitiæ, quos exercet, Nego. ergo affectus iustitiæ, &c. non possunt non esse in Deo necessitate intellecta, quod non possit affici circa iniustitiam, Concedo. necessitate intellecta, quod non possit abstinere ab actibus iustitiæ, quos exercet, Nego.

Contrâ. Tam non potest abstinere ab actibus iustitiæ, quos exercet, quàm ab amore suæ bonitatis, & Pater, & Filius à productione Spiritus Sancti; atqui cessare non potest ab amore suæ bonitatis, neque Pater, & Filius à productione Spiritus Sancti: ergo abstinere non potest ab actibus iustitiæ, quos exercet.

Maior pr. Quod non habet plus indifferentiæ ad vnum, quàm ad aliud, tam non potest abstinere ab vno, quàm ab alio; atqui Deus non habet plus indifferentiæ ad actus iustitiæ, quos exercet, quàm ad amorem suæ bonitatis, & productionem Spiritus Sancti: ergo tam non potest abstinere ab actibus iustitiæ, quàm ab amore suæ bonitatis, & præductione Spiritus sancti.

Minor pr. Deus est æquè determinatus, fuit, & erit ad actus iustitiæ, quos exercet, atque ad amorem suæ bonitatis, & productionem Spiritus Sancti: ergo non habet plus indifferentiæ ad primos actus, quàm ad secundos.

Solutio: Deus est æquè determinatus, fuit &

erit ad actus iustitiæ, quos exercet, quàm ad amorem suæ bonitatis, & productionem Spiritus Sancti in actu secundo, transeat. in actu primo, Nego. ergo non habet plus indifferentiæ ad primos actus, quàm ad secundos in actu primo, Nego. in actu secundo, esto.

Contrà. Quod est determinatum ab æterno ad duo, æquè est determinatum ad utrumque in actu primo; atqui Deus est determinatus ab æterno ad actus iustitiæ, quos exercet non minùs, quàm ad amorem suæ bonitatis; ergo tam est determinatus in actu primo ad primos, quàm ad secundos.

Solutio: Quod est determinatum ab æterno ad duo, ita ut in priori nature potuerit unum non ponere, & non aliud, est æquè determinatum ad utrumque in actu primo, Nego. si in priori nature potuerit utrumque non ponere, Concedo. atqui Deus est determinatus ab æterno ad actus iustitiæ non minùs, quàm ad amorem suæ bonitatis, & productionem Spiritus Sancti, & in priori nature potuit illos non ponere, Concedo. in priori nature potuit istos etiam non ponere, Nego. Determinatum in actu primo, seu actus primus determinatus ad secundum est ille, qui non potest abstinere ab isto, & ipsum non producere, ut se habet Deus respectu amoris suæ bonitatis, & productionis Spiritus Sancti. Indeterminatum verò in actu primo, seu actus primus indeterminatus dicitur ille, qui ita ponit secundum, ut possit non ponere, quomodo se habet Deus respectu actuum iustitiæ, neque enim in eo aliquid concipi potest, quod ipsum necessitet ad ipsos ponendos, sicut necessitatur ad pro-

192 TRACT. VNIC. MORAL. DISP. II.
ductionem Spiritus Sancti.

Contrà. Necessitas productionis Spiritus Sancti, & determinatio ad illam in actu primo non impedit, quominus sit libera : ergo nulla solutio.

Antecedens pr. Quæ sunt in nostra potestate sunt libera ; atqui necessitas productionis Spiritus Sancti, & determinatio ad illam non impedit, quominus sit in potestate Patris, & Filij : ergo neque quominus sit libera.

Minor pr. Quod est in voluntate nostra est in nostra potestate, ex D. Augustino passim, & sancto Thoma ; atqui necessitas productionis Spiritus Sancti non impedit, quominus sit in voluntate Patris, & Filij : ergo neque quominus sit in eorum potestate.

Solutio : Quod est in nostra voluntate ut voluntas est, seu liberum arbitrium est in nostra potestate, Concedo. ut est natura, seu agens eo modo, quo illa, que carent libero arbitrio, Nego. atqui necessitas productionis Spiritus Sancti impedit, quominus sit in Patris, & Filij voluntate, ut voluntas est, seu liberum arbitrium, Nego. ut est natura, Concedo.

Contrà. Quod non cogimur velle, quod voluntate agimus, quod simpliciter dicimur velle est in nostra voluntate, ut voluntas est ; atqui necessitas productionis Spiritus Sancti non impedit quominus Pater, & Filius dicantur non cogi, eam velle, voluntate illam agere, & simpliciter illam velle : ergo neque quominus sit in eorum potestate.

Solutio : Quod non cogimur velle, neque propria ;

necque impropria coactione, quod dicimur simpliciter velle, & voluntate agimus indifferenti, & expedita à necessitate, & cuius sumus domini, est in nostra voluntate ut voluntas est, Concedo. quod non cogimur velle propria coactione, quæ est à vi extrinseca, quod dicimur velle, & agere voluntate tantum quacunque etiam illa, cuius non habemus dominium, Nego. atqui necessitas productionis Spiritus Sancti non impedit, quominus Pater, & Filius dicantur non cogi, propria coactione eam velle, similiter eam velle, & agere voluntate quacunque etiam illa, cuius non sumus domini, Concedo. non cogi impropria coactione eam velle, aut eam velle, & agere voluntate cuius non sumus domini, Nego. Certè si Pater, & Filius essent domini productionis Spiritus Sancti, essent & domini ipsius Spiritus Sancti, quod aduersarij non auderent admittere, nec consequenter dicere debent diuinam illam productionem esse in potestate suorum principiorum, seu voluntate, ut voluntas est, per quæ verba exprimitur modus ille agendi proprius voluntatis, per quem ita ponit suos actus, ut illos possit non ponere, quod alijs agentibus non conuenit: sunt enim omnia determinata ad vnum, ut videre est percurrenti illa. Istorum modus agendi dicitur esse à natura etiam ille voluntatis, qui est illis similis, cum scilicet continere non potest suam actionem circa aliquod obiectum v. g. circa summum bonum. Ceterum coactio propria est à vi extrinseca, impropria verò potest esse intrinseca, ea scilicet, quæ tollit indifferentiam ad agendum, & non agendum, & non est alia à necessitate simplici. In eo sensu D. Augustinus dicit contra Manichæos bonam, quam admittebant animam non

posse cogi (hoc est necessitari à mala) & simul reos esse peccati. Nemo enim, ut sapius inculcat, peccat in eo, quod vitare non potest.

Contrà. Necessitas productionis actuum bonorum naturæ lapsæ, à gratia medicinali est tanta, ac necessitas productionis Spiritus Sancti; atqui illa non impedit, quominus natura lapsa non dicatur cogi, coactione etiam impropria eam velle, eandem velle simpliciter, & agere voluntate cuius est domina: ergo neque ista.

Minor pr. Gratia medicinalis infert necessario productionem actuum bonorum naturæ lapsæ: ergo necessitas productionis istorum actuum est tanta, ac illa productionis Spiritus Sancti.

Antecedens pr. Illa gratia infert necessario nostros actus, cuius natura est ut illa velimus; atqui de ratione, & natura gratiæ medicinalis, seu adiutorij quo ex D. Augustino est ut illis velimus: ergo gratia medicinalis infert necessario productionem actuum bonorum naturæ lapsæ.

Solutio: Illa gratia infert necessario nostros actus, de cuius ratione, & natura est ut illa velimus semper, & necessario, Concedo. non semper, nec necessario, Nego. atqui ex D. Augustino de ratione, & natura gratiæ medicinalis, seu adiutorij quo est ut illis velimus semper, & necessario, Nego. non semper, & non necessario, Concedo.

Contrà. Discrimen gratiæ sanitatis, seu adiutorij sine quo à gratia medicinali, & adiutorio quo ex D. Augustino est, quod illa non inferat necessario: ergo illos infert necessario.

Antecedens pr. Gratia medicinalis eo modo infert nostros actus, quo necessarium est, ut verum sit omnipotentissimæ Dei voluntati nos non posse resistere; atqui ut hoc sit verum gratia medicinalis debet inferre necessariò nostros actus: ergo illos infert necessario.

Respondeo primò: *Hoc argumentum solvendum esse iis, qui eo utuntur, si formetur contra ipsos de gratia sanitatis, & statu innocentia, in quo non magis, quam nunc omnipotentissimæ Dei voluntati non poterat resisti.* Respondeo secundò: *Gratia medicinalis eo modo infert nostros actus, quo necessarium est, ut verum sit omnipotentissimæ Dei voluntati nos non posse resistere impotentia consequente, vel antecedente, Concedo. impotentia tantum antecedente, Nego. atqui ut hoc sit verum gratia debet inferre nostros actus necessariò necessitate proportionata impotentia antecedenti, aut consequenti, Concedo. necessitate antecedente, Nego.* *Alia enim scilicet consequens sufficit, ut non resistamus gratia, per quam Deus nos efficaciter vocat, aut trahit.*

Contrà. Gratia medicinalis infert nostros actus ex D. Augustino infallibiliter, ineluctabiliter & indeclinabiliter: ergo & necessariò necessitate antecedente.

Consequentia pr. Gratia inferens nostros actus infallibiliter, ineluctabiliter, indeclinabiliter nos discernit iuxta illud Apostoli, *quis est qui te discernit?* atqui non potest nos discernere non inferendo hos nostros actus necessariò necessitate antecedente: ergo illos inferens infallibiliter infert etiam necessitate antecedente.

Respondeo primò, soluendum esse argumentum auctoribus contraria sententia : Diuus enim Augustinus intelligit illud Apostoli de ipsis Angelis, in quibus tamen per ipsos nulla fuit gratia necessitans. Respondeo secundò, negando minorem.

Contrà. Per gratiam non inferentem necessariò nostros actus necessitate antecedente benè operans nihil habet, quod non habeat non benè operans : ergo gratia illa non potest nos discernere.

Solutio : Per gratiam non inferentem necessariò nostros actus, necessitate antecedente benè operans nihil habet in ratione entitatis, quod non habeat non bene operans, Concedo. potest enim huius gratia esse equalis, aut etiam maior entitativè, quàm sit illa bene operantis : nihil habet in ratione beneficij, Nego. datur enim ex maiori benevolentia, & prævisione consensus per illam ponendi.

Contrà. Gratia tantùm maior in ratione beneficij in benè operante facit, vt Deus partiatur cum illo bonum opus, nostram salutem, & consequentem inde felicitatem; atqui Deus non partiatur cum benè operante bonum opus, nostram salutem, & consequentem inde felicitatem : ergo gratia benè operantis non est tantùm maior in ratione beneficij.

Solutio : Gratia tantùm maior in ratione beneficij in bene operante facit, vt Deus partiatur cum illo bonum opus ex defectu virtutis, & insufficiencia ponendi solam illam entitatem, Nego. sine huiusmodi defectu, & insufficiencia, sed ad manifestationem, & commendationem suæ omnipotentie, & bonitatis volentis admittere in consortium suæ

actionis creaturam rationalem, ut habeat unde illam remuneretur, & amplius ei beneficiat, Concedo. atqui Deus non partitur cum bene operante bonum opus primo modo, Concedo. secundo, Nego.

Contrà. Deus partiens modo explicato bonum opus cum benè operante relinquit in huius potestate illius positionem; atqui benè operans non habet illam in sua potestate: ergo Deus non partitur cum illo bonum opus modo explicato.

Minor pr. Non oramus pro iis, quæ possumus, & sunt in nostra potestate; atqui oramus, & debemus orare pro positione operis boni: ergo benè operantes non habemus illam in nostra potestate.

Solutio: Non oramus pro iis, quæ possumus, & sunt in nostra potestate cum non est periculum ne utamur illa potestate, Concedo. si sit periculum ne ea utamur, Nego. Certe Adamus habebat in potestate volitionem non comestionis pomi, & tamen aduersarij non auderent negare illum non potuisse orare, ut illam poneret, & utinam tam bene orasset, ut obtinisset illam ponere; atqui oramus, & debemus orare pro positione operis boni, & non est periculum ne utamur potestate illum ponendi, Nego. & est periculum, Concedo. Orationes nostræ sunt ad obtinendum, ut cesset periculum, & dubium de non usu illius potestatis, quod tandiu durat, quandiu non est posita operatio.

Atque ex dictis clarum est primò necessitatem non esse impossibilem cum libertate, huncque fuisse sensum Patrum, qui pugnauere contra Ma-

nichæos, & astrologos inferentes ex eorum placitis destrui libertatem, & statuentes, præcipue D. Augustinus neminem peccare in eo, quod non potest vitare, & non esse peccatum id, unde non est liberum abstinere, quod intellexisse de peccatis naturæ lapsæ, & non tantum de illo primi hominis inde patet primò, quòd cum illa distinctio maioris indifferentiæ primi peccati, quàm aliorum quam plurimis sit ignota, & à tot aliis negetur id, Sanctus Doctor dicat notum omnibus, & vbiq; lib. de duabus animabus cap. II. *Nonne ista cantant, inquit, & in montibus pastores, & in theatris poëta; & indocti in circulis, & docti in bibliothecis, & magistri in scholis, & antistites in sacris locis, & in orbe terrarum genus humanum.*

Secundò pugnet contra Manichæos, quantumvis admitterent ab initio in Adamo ignorantiam, & rebellionem concupiscentiæ, peccatum non esse, unde non est liberum abstinere; quod nullam haberet vim contra ipsos si concupiscentia necessitaret ad peccandum.

Inferendum est secundò, auctores contrariæ sententiæ asserentes, quæ fiunt ex concupiscentia, & ignorantia iuris naturalis esse peccata, propterea quòd illa sint pœnæ primi peccati, quod infecit & ipsa, & quæ ex iis pullulant: fateri quoque debere primò, quæ phrènesi fiunt ut pote pœna peccari, ab ægrotis cum blasphemis vocibus decedentibus esse culpabilia, & addicentia illos pœnis æternis, quantumvis antea receperint sacramenta, & totam reliquam vitam sanctissimè traduxerint. Secundò motus indeliberatos concu-

piſcentiæ eſſe peccata, quòd proſequentur à pœna peccati.

Inferri etiam debet tertio ſi requiratur, ut vult contraria ſententia, ut voluntas exerat ſuos actus delectatio victrix, & illa poſita illos non poſſit non elicere; deambulationem, & cæteros actus naturales fore neceſſarios, procedere enim debent à ſimili delectatione.

Quarto, quemadmodum admittere debent aliquam delectationem terrenam, ſeu tentationem, qua ſine effectu, ut in D. Paulo cùm dicebat ſentio aliam legem, ita non negare poſſe aliquam delectationem cœleſtem, & adiutorium quo quod non fortiatur effectu. Cùm autem S. Auguſtinus coniungit illud cum effectu, loquitur de eo, quod eſt efficax.

Quinto, quòd gratia, cuius neceſſitatem contra Pelagianos, & Semipelagianos ſœliciter adeo propugnauit D. Auguſtinus, non ſit cenſenda ea, quæ ſemper, & neceſſario inferat conſenſum, & cui reſiſti non poſſit prout Lutherus, Caluinus, & vtriuſque diſcipuli contendunt, vel ex eo patet, quod nefarium planè ſit inducere ſanctiſſimum Doctorem id palam ſentientem & dicentem, quod apertè repugnat, & contrarium eſt veritatibus à Sancto Spiritu dictatis, in Eccleſia creditis, in Conciliis definitis, & quibus oppoſitis ſummi Pontifices abolendas ſæpius ſanciuerunt. Huiusmodi autem eſſe gratiã neceſſario inferre conſenſum, & ei reſiſti non poſſe, nemini poteſt eſſe dubium, qui attendere voluerit primò Concilium Senonenſe decreto fidei 15. ſtatueret tale non eſſe *Dei trahentis auxilium, cui reſiſti non poſſit.*

200 TRACT. VNIC. MORAL. DISP. II.

Secundò Concilium Colonienſe in Enchiridio de Sacramento pœnitentiæ, docere ſitum eſſe in hominis voluntate ut gratiam Dei oblatam, vel accipiat, vel repndiet, & ibidem paulò inferiſu, Deo praueniēti, & per bonum cogitatum ad pœnitentiam excitanti dare, vel negare conſenſum, velle, vel vel nolle pœnitere.

Tandem eodem loci rationem reddens cur vnus vtatur gratia oblata, alter non vtatur, hanc eſſe fateri, quòd iſte ſecundus diuine gratiæ dexteram ſedulò oblatam, ac nunquam ſubtractam apprehendere neglexit, & ſic in peccatorum luto deſixus remanſit.

Tertiò Concilium Trident. cap. 5. ſeſſ. 6. definire gratiam receptam abiici poſſe, dum ait, *Tangente Deo cor hominis per Spiritus Sancti illuminationem inſpirationem illam recipiens, eam abiicere poteſt, & canone 4. eiſdem ſeſſionis liberum hominis arbitrium ei poſſe diſſentire ſi velit, & cap. 11. diligentes Chriſtum ſeruare poſſe eiſ ſermones, hoc eſt, mandata, cum diuino auxilio, & non d' ſerere ipſos, niſi priùs ab iis deſeratur.*

Hòrum autem Conciliorum definitiones, & ſententias latas eſſe contra gratiam neceſſariò inferentem conſenſum, & cui reſiſti non poſſit, dubitari ab eo non poterit, qui meminiffe voluerit hæc tria Concilia congregata eſſe ad dammandum hunc, & alios errores Lutheri, & Caluini, & vtriuſque diſcipulorum.

Cùm enim magnum eſſet diſſidium inter Catholicos Doctores, & Lutherum, & Galuinum, & vtriuſque diſcipulos, an gratiæ reſiſti poſſet? an non poſſet reſiſti? ſuper hac controuerſia Concil.

fium Tridentinum non debuit filere, nec potuit existimare non esse necesse illam deficiare. Tanto enim ardore de ea contendebatur, ut cogendum fuerit ad eam dirimendam tum in Gallia an. 1628. Conc. Senonense, quod in fauorem sanæ doctrinæ pronuntiavit, & statuit (ut diximus suprâ) *Non esse tale Dei trahentis auxilium, cui resisti non possit*: tum in Germania an. 1636. Colon. quod idem decreuit docens, *oblatam gratiam posse repudiari*, ac tandem, cum istorum Conciliorum Prouincialium auctoritas non esset satis ad extirpandum hunc errorem, & alios eorundem hæreticorum, congreganda fuerit aliquot annis post ipsa œcumenica Synodus, quæ agitata de gratia quæstiones definiret, & quid de iis sentiendum esset determinaret. Eam autem id præstasse nullus dubitare potest, si voluerit aduertere tribus primis canon. sess. 6. antiquas hæreses Pelagij, & Semipelagianorum de vera gratia Christi, non necessaria ad omne bonum opus, & ipsum actum credendi, & initium fidei damnasse, & quarto Lutheri, Caluini, & vtriusque discipulorum errorem de imposita voluntati per gratiam necessitate agendi id, ad quod datur, condemnasse verbis suprâ relatis, ex eo fieri manifestum primò, quia si per *posse dissentire si velit* nihil aliud intellexisset, quàm dissentire si dissentiat, & assentire si assentiatur, non pronuntiasset super eo, de quo erat lis, & tota controuersia. Secundò, quia ipsi hæretici non dubitarunt hæc decreta, has definitiones continere damnationem eius, quod ipsi asserabant de gratia necessario inferente consensum, & verborum harum definitionum alium ef-

se sensum nunquam dixere, sed conati sunt tantum illum falsitatis arguere. Tertiò, quia Patres, & Doctores qui Concilio interfuere, & præfuere libris etiam editis, ipso nondum absoluto professi sunt hunc esse verum sensum verborum sanctæ Synodi. Quartò, quia cum vera vocum significatio certiùs colligi non possit, quàm ex acceptione communi, & eo, quod per illas intelligunt tam qui loquuntur, quàm qui audiunt, & aliunde certò nobis constet Patres Concilij, per quorum os locutus est Deus, & ipsis, & nobis conuenisse cum aliis fidelibus, hæreticis etiam ipsis, & omnibus, ad quos hæ voces primò dirigebantur, per illas explicari Dei trahentis auxilio resisti posse, de facto resisti, & gratiam non inferre necessario consensum. nullo modo negari potest per ea verba id verè, & propriissimè significari, & esse intelligendum. Et verò quis ferre posset supremo iudice asserente sensum verborum, quibus usus est in pronuntiatione sententiæ super lito inter Petrum, & Paulum, esse in fauorem primi, & ad ei concedendum, & adiudicandum quod contendebat deberi sibi à secundo, Petro non tantum illud libentissimè admittente, idem præsentente, sed etiam Paulo idem fatente, alium quendam negare hanc esse eorum verborum significatione multis annis post. Certè licet antea illa verba potuissent hoc non significare, per illum tamen communem consensum iudicis loquentis, & Petri, & Pauli audientium imposita illis fuisset significatio, quam isti ex eorum prolatione percipiebant, & ille intendebat; ac proinde cum sensus verborum Concilij super dissidio inter Ca-

tholicos Doctores , & Lutherum , & Caluinum
asseratur esse à Patribus Concilij is, quem inten-
dimus , Doctores Catholici tunc viuentes non
aliū intelligant, & hæretici ipsi illum ipsum esse
fateantur, certo tenendum est ipsissimum esse, ma-
ximè cū summi Pontifices , quibus solis refer-
uatum est ius declarandi sensum verborum Con-
cilij illum eundem in tota Ecclesia prædicari vo-
luerint, & iusserint , & etiamnum iubeant, & ve-
lint, propositionesque contrarium sensum conti-
nentes, aut insinuantes decreuerint, & decernere
pergant *in perpetuum abolendas* , ut videre est in
Bullis Pij V. & Gregorij XIII. contra Michaëlem.
Baïum, & Urbani VIII. & Innocentij. X. contra
Iansenium Ipreensem.

Observandum est sextò, cū Lutherus , Calui-
nus, & vtriusque discipuli sensum eundem darent
verbis , & textibus S. Augustini, ad suum stabi-
liendum errorem, quem volunt esse ij, qui eos-
dem textus afferunt contra nostram sententiam,
Concilium damnando huiusmodi errorem, & ad
illam damnationem vtendo verbis ipsis S. Augu-
stini, ut cap. IX. sess. 6. *Deus impossibilia non in-
bet, sed iubendo monet, & facere, quod possis, &
petere; quod non possis, & adiuvat ut possis*, de-
sumptis ex cap. 43. lib. de natura, & gratia, cla-
rissimè declarare sensum intentum ab hæreticis,
& ab iis qui cum ipsis sentiunt esse falsum, & con-
tra mentem tanti Doctoris, cuius interpretes cū
voluerit esse Concilium, & declarauerit tanquam
potestatem habens quo sensu loquutus sit, & in-
telligi debeat: alius eius verbis tribui non potest,
sicut nec dici ea debere assumi ad interpretan-

dam mentem ipsius Concilij, cùm istud in eo elaborauerit, vt dubiis natis ex ipsius variis modis loquendi lucem afferret, & dubitationem omnem tolleretur de vera eorum intelligentia, definiens res illas, ad quarum explicationem iis vsus fuerat D. Augustinus.

Non omittendum est septimò verba Conciliorum suprà relatorum *respuere*, *repudiare*, *abiicere*, *resistere*, & *deserere* significare apertè voluntatem habentem gratiam, & ea præuentam in sensu composito, & non tantùm diuiso, quod non negabat Calvinus, posse eam *repudiare*, *abiicere*, & *ei resistere*. Non enim repudiatur, respuitur, & abiicitur quod non habetur, neque resistimus ei quod nos nunc non sollicitat, & excitat. Resistit autem voluntas per dissensum quando sollicitatur ad consensum, aut per consensum quando sollicitatur ad dissensum.

SECUNDA CONCLUSIO:

Libertas non benè definitur voluntas vltimi sequax iudicij.

LIBERTAS non benè definitur per illud, quod cùm est, ipsa non est, & cùm non est, ipsa est; atqui cùm voluntas est sequax vltimi iudicij, libertas sæpè non est, & sæpè etiam cùm eadem libertas est, voluntas non est sequax vltimi iudicij: ergo libertas non benè definitur voluntas vltimi sequax iudicij.

Prima pars minoris probatur.

Vltimum iudicium ex mente auctorum istius

definitionis est illud, per quod proponitur assertivè voluntati hoc obiectum esse ipsi optabilius, quàm oppositum, vacare v. g. recreationi quàm studio; atqui sæpè cum est illud iudicium, non est libertas: ergo sæpè cum voluntas est sequax ultimi iudicij, libertas non est.

Minor pr. In pueris antequam perveniant ad usum rationis est illud iudicium; atqui in illis non est libertas: ergo sæpè cum est illud iudicium non est libertas.

Maior pr. Illud iudicium est in illis, in quibus sunt actus voluntatis; atqui in pueris antequam perveniant ad usum rationis sunt actus voluntatis: ergo illud iudicium debet etiam esse in illis.

Maior pr. Illud iudicium est necessarium, ut voluntas possit elicere suos actus, & ferri in obiectum: ergo debet esse in illis, in quibus sunt actus voluntatis.

Respondent: Illud iudicium est necessarium, ut voluntas elicere possit suos actus, & ferri in obiectum liberè, Concedo. quomodo cumque, Nego.

Contrà. Illud iudicium est necessarium ex concessis ut voluntas elicere possit suos actus liberè; atqui in principiis auctorum contrariæ sententiæ omnes actus voluntatis sunt liberi: ergo illud iudicium necessarium est, ut voluntas elicere possit suos actus quoscunque, & quomodo cumque.

Respondent: Atqui omnes actus voluntatis domine sui, rationalis, consultæ, seu consequentis ad iudicium re, aut virtute consultativum sunt liberi, Concedo. omnes actus voluntatis non domine sui, non rationalis, non consultæ, seu conse-

quentis ad iudicium re, aut virtute consultatiuum. Nego. Per iudicium realiter consultatiuum intelligunt illud, quod præcessit deliberatio. Consultatiuum verò virtualiter, vocant illud, quod non præceditur quidem actu, & de facto à deliberatione, fit tamen per species relictas ab iis, quæ fuere prius, & formata non sunt nisi post deliberationem habitam de eorum obiecto.

Contra primò hanc distinctionem suppono Petrum, Paulum, & Ioannem sæpiùs habuisse iudicium realiter consultatiuum, & ex eo actum voluntatis, v. g. de præferenda recreatione studio, & in primo facto ebrio, secundo amente, & tertio dormiente, ex specie relictæ ab huiusmodi repetito sæpiùs iudicio consultatiuo de præferenda recreatione studio elici simile iudicium, & quod inde sequi volunt necessario affectum voluntatis erga recreationem, & sic argumentor :

Actus voluntatis de præferenda recreatione studio, qui sunt in suppositione facta in Petro ebrio, Paulo amente, & Ioanne dormiente sunt actus voluntatis dominæ sui, rationalis, consultæ, & consequentis ad iudicium virtute consultatiuum; atqui illi non sunt liberi: ergo actus voluntatis dominæ sui, rationalis, consultæ, & consequentis ad iudicium virtute consultatiuum non sunt liberi.

Minor pr. Actus ebriorum, amentium, & dormientium non sunt liberi; atqui illi sunt actus ebriorum, amentium, & dormientium: ergo non sunt liberi.

Respondent : Actus ebriorum, amentium, & dormientium non sunt liberi, omnes, Concedo.

aliqui, Nego. Amentes enim, inquiunt, habent lucida intervalla, & ebrij, & dormientes multa agunt in quibus videntur esse sui verè compotes; atqui illi sunt actus ebriorum, amentium, & dormientium, de numero eorum qui non sunt liberi, Nego. de numero eorum, qui sunt liberi, Concedo.

Contrà. Actus amentium qui dicuntur liberi à contraria sententia sunt maxime illi, qui sunt similes iis, quos sæpius exercebant extra amentiam, & cum erant sani; atqui illi non sunt liberi: ergo actus amentium urgente amentia non sunt liberi.

Minor pr. Illi actus non sunt dicendi liberi qui non imputantur neque ad laudem, neque ad vituperium, & quibus leges, & legislator non decernunt neque pœnam, neque præmium; atqui actus amentium similes iis, quos exercebant cum erant sani mente, non imputantur ad laudem, neque vituperium, & legislator, & leges non decernunt illis præmium, aut pœnam: ergo non sunt liberi.

Minor pr. Nulla unquam lex, aut legislator distinxit inter actus amentium similes prioribus factis ante amentiam, & non similes, sed semper omnes durante amentia excusavit à culpa, & is est omnium sapientum, & Ecclesiæ ipsius sensus: ergo actus amentium similes iis, quos exercebant ante amentiam non imputantur ad laudem, aut vituperium, & leges non decernunt illis præmium, aut pœnam.

Prima pars antecedentis dubia esse non potest scienti leges, & ut secunda probetur.

Suppono quod non raro contingit aliquem, qui sæpiùs blasphemari incidere in morbum, & cum de peccatis est ritè confessus, & vera edidit sinceræ detestationis eorum signa, incidere in phrenesim, & in phrenesi illa prolatis, vt fit, blasphemiiis similibus prioribus mori, & sic argu-
mentor.

Blasphemix prolatae ab illo homine in phrenesi sunt similes prioribus, quas proferebat sanus; atqui sapientum omnium sensus, & Ecclesiae excusat illas à culpa: ergo & actus amentium similes iis, quos habebant cum erant sani mente.

Minor pr. Blasphemix excusantur à culpa cum propter illas non censetur amitti salus æterna; atqui sapientum omnium sensus, & Ecclesiae non censet propter illas hominem illum amisisse salutem æternam, etiamsi constet ipsi non pœnituisse de illis: ergo excusat illas à culpa.

Minor pr. Sapientum sensus, & Ecclesiae non censet eum amisisse salutem æternam pro quo Ecclesia orat, & vult vt oremus; atqui Ecclesia orat, & vult vt oremus pro homine illo, qui in phrenesi prolatis blasphemiiis similibus iis, quas proferebat sanus decessit: ergo sapientum sensus, & Ecclesiae censet eum non amisisse salutem æternam.

Contra secundo distinctionem datam ad argumentum superius, quo probabatur omnes actus voluntatis esse liberos.

Omnes actus voluntatis verè voluntarij sunt etiam verè liberi; atqui omnes actus voluntatis etiam illi, qui dicuntur non rationales, & appellantur non consulti sunt verè voluntarij: ergo.

etiam sunt verè liberi.

Respondent : *Omnes actus voluntatis verè voluntarij, & perfectè sunt etiam verè liberi, Concedo. imperfectè tantum voluntarij, Nego. atqui omnes actus voluntatis sunt verè voluntarij, & perfectè, Nego. perfectè, vel imperfectè, Concedo. Per voluntarium perfectè intelligunt illud, quod fit à principio perfectè cognoscente omnes circumstantias actionis, & habente perfectam cognitionem, & iudicium perfectum. Imperfectè autem voluntarium volunt esse illud, quod non oritur à iudicio perfectò, seu formato post serium examen, & diligentem inspectionem eorum omnium, quæ facere possunt ad bene diiudicandum de obiecto.*

Contrà primò. Actus voluntatis imperfectè voluntarius modo explicato est verè liber: ergo nulla solutio.

Respondent : *Actus voluntatis imperfectè voluntarius modo explicato est verè liber perfectè, Nego. imperfectè, Concedo.*

Contrà. Actus puerorum ante vsum rationis, ebriorum, dementium, & dormientium sunt voluntarij modo explicato; atqui nullo modo sunt liberi: ergo actus modo explicato voluntarij non sunt etiam imperfectè liberi.

Minor pr. Actus, qui non sunt imputabiles villo modo ad laudem, aut vituperium ex communi omnium sensu non sunt villo modo liberi; atqui actus puerorum ante vsum rationis, ebriorum, dementium, & dormientium nullo modo sunt imputabiles ad laudem, aut vituperium, ex communi omnium sensu: ergo nullo modo sunt liberi.

210 TRACT. VNIC. MORAL. DISP. II.

Contrà secundò distinctionem ad antecedens superioris argumenti.

Actus voluntatis dominæ sui perfectè, est etiam perfectè liber ; atqui omnis actus voluntatis est ipsius vt dominæ sui perfectè: ergo est etiam perfectè liber.

Minor pr. Voluntas domina sui perfectè est voluntas volens cùm vult , & nolens cùm non vult, atqui omnis actus voluntatis est ab ipsa volente cùm vult , & nolente cùm non vult : ergo omnis actus voluntatis est ipsius vt dominæ sui perfectè.

Respondent: Voluntas domina sui perfectè, seu dominio rationali , & consulto est ipsa volens cùm vult, & nolens cùm non vult quomodocunque , Nego. volitione , aut nolitione rationali , & consulta , Concedo. atqui omnis actus voluntatis est ab ipsa , vt perfectè domina sui dominio rationali , & consulto , Nego. hoc , vel dominio non rationali , & non consulto , Concedo.

Contrà. Dominium voluntatis non consultum , seu non consequens ad perfectum iudicium consultatium est tam perfectè dominium , ac illud , quod non est consultum : ergo nulla solutio.

Antecedens pr. Perfectio domini voluntatis consistit in hoc, in sententia quam impugnamus, quòd ponat actus suos cùm vult , & non ponat cùm non vult , & ipsaliter poni non possint ; atqui hoc tam illi competit in volitionibus suis, & nolitionibus non consultis , ac consultis : ergo dominium voluntatis non consultum , seu non consequens ad perfectum iudicium consultatium est tam perfectè dominium , ac illud quod non est consultum.

Respondent: Perfectio dominij rationalis voluntatis consistit in hoc, quod ponat actus suos cum vult, & non ponat cum non vult volitione, aut nolitione non consulta, & non rationali, Nego. rationali, & consulta, Concedo. Cum enim inquirunt cognitio det voluntati per propositionem, quam illi facit bonitatis, aut malitiæ obiecti, ut possit ponere suos actus, rectè ex ipsa cognitione, quæ confert illud posse, & eius perfectione, aut imperfectione desumitur perfectio, aut imperfectio ipsius dominij, quod in illo posse positum est, & consistit; atqui posse ponere, aut non ponere suos actus cum voluntas vult, aut non vult potestate rationali, & consulta tam illi competit in volitionibus, & nolitionibus non consultis, ac consultis, Nego. potestate rationali, & consulta, aut non consulta, & non rationali. Concedo.

Contrà. Potestas rationalis, & consulta in voluntate ponendi suos actus, aut non ponendi non ponitur in ipsa à iudicio consultatiuo: ergo nulla solutio.

Antecedens pr. Potestas rationalis in voluntate ponendi suos actus, aut non ponendi potest esse sine iudicio consultatiuo, & illud præcedit: ergo non oritur ab ipso.

Prima pars antecedentis probatur primò.

Cum quis è duobus ovis v. g. omninò similibus, & ita ab ipso iudicatis sumit vnum relicto alio, est in ipso potestas rationalis ponendi suum illum actum sumptionis illius ovi, vel non ponendi, & ponendi contrarium; atqui non est in ipso iudicium consultatiuum, dictans ei melius, & optabilius esse sumere illud, quàm

aliud: ergo potestas rationalis ponendi suos actus aut non ponendi potest esse in voluntate sine iudicio consultatiuo.

Minor pr. Non iudicat vt supponimus, illud quod sumit habere plus bonitatis quàm illud quod non sumit: ergo non est in ipso iudicium dictans ei melius, & optabilius esse sumere illud, quàm aliud.

Respondent primò: *Non iudicat illud, quod sumit, habere plus bonitatis, quàm illud, quod non sumit, neque sumptionem illius vtiliorem esse ad aliquid aliud, Nego. & iudicat sumptionem illam vtiliorem esse ad aliquid aliud. Concedo.*

Contrà. Illud aliud, ad quod potest dici vtilior illa sumptio vnus ex illis ouis, est exercitium libertatis; atqui sumptio vnus non est vtilior ad exercitium libertatis, quàm sit sumptio alterius: ergo non iudicat sumptionem illius quod sumit, esse vtiliorem ad aliquid aliud, quàm sit sumptio alterius.

Minor pr. Non magis ostenditur exercitium libertatis per sumptionem vnus ex illis, quàm per sumptionem alterius: ergo sumptio vnus non est vtilior ad exercitium libertatis, quàm sit sumptio alterius.

Antecedens pr. Oua illa supponuntur in omnibus esse æqualia, & æqualia iudicari à sumente vnum ex illis: ergo non magis ostenditur exercitium libertatis per sumptionem vnus, quàm per sumptionem alterius.

Respondent secundò: *Negando maiorem superioris argumenti, posito scilicet, quod iudicentur omnino æqualia posse sumi vnum relicto alio.*

Contrà

Contrà. Tam potest sumi vnum ex illis duobus ouis iudicatis omninò æqualibus non sumpto alio, quàm ex duobus peccatis iudicatis omnino æqualibus vitari vnum non vitato alio; atqui vitari potest vnum ex illis peccatis non vitato alio: ergo & sumi vnum ex illis ouis non sumpto alio.

Vt probetur minor, Suppono aliquem perplexæ conscientiæ existimare esse æquale peccatum ipsi dum est excommunicatus audire sacrum, ac non audire in die festo, & urgente præcepto, & sic argumentor :

In suppositione facta homo ille non potest non vitare vnum ex illis peccatis non vitato alio: ergo ex duobus peccatis omninò æqualibus potest vitari vnum non vitato alio.

Antecedens pr. Non potest illa duo vitare, neque alterum ex illis non vitare: ergo non potest non vitare vnum ex illis peccatis non vitato alio.

Secunda pars antecedentis probatur secundò.

Illud præcedit iudicium consultatiuum, quod requiritur vt illud iudicium possit poni; atqui potestas rationalis in voluntate ponendi suos actus, aut non ponendi, requiritur vt possit poni iudicium consultatiuum: ergo illud præcedit.

Minor pr. Iudicium consultatiuum est conclusio syllogismi, cuius vt plurimum altera præmissa est tantum probabilis; atqui vt poni possit præmissa illa, & assensus probabilis, requiritur in voluntate potestas rationalis ponendi suos actus, aut non ponendi: ergo & vt poni possit iudicium consultatiuum.

Minor pr. Vt intellectus præbeat illum assensum probabilem requiritur vt hoc ei imperet voluntas; atqui ad imperium illud requiritur in voluntate potestas ponendi suos actus, aut non ponendi: ergo & vt poni possit præmissa illa, & assensus probabilis.

Maiores pr. Vt intellectus præbeat illum assensum requiritur vt hoc ei imperet voluntas, vel determinetur ad illum à seipso, & ex intrinseca vi, quam ad hoc habet, vel ab obiecto; atqui non determinatur ad illum assensum à seipso, & ex intrinseca vi, quam ad hoc habeat, neque ab obiecto: ergo vt intellectus præbeat illum assensum probabilem requiritur vt hoc ei imperet voluntas.

Secunda pars minoris probatur primò.

Obiectum determinat tantum intellectum cum est ei euidens; atqui obiectum assensus probabilis non est ei euidens: ergo intellectus non determinatur ad assensum illum probabilem ab obiecto.

Maiores pr. Obiectum, quod per se determinat intellectum, extorquet ab ipso assensum; atqui obiectum extorquet tantum assensum ab intellectu, cum est ei euidens: ergo obiectum determinat tantum intellectum cum est ei euidens.

Minor pr. Obiectum extorquet tantum assensum ab intellectu cum nihil est neque in ipso, neque in modo, quo ei proponitur, quod eum possit retardare ab eo præbendo; atqui verum est tantum nihil esse in obiecto, & in modo, quo proponitur quod retardare possit intellectum à præbendo assensu cum est ei euidens: ergo obiectum ex-

torquet tantum assensum ab intellectu cum est ei evidens.

Minor pr. Verum est tantum nihil esse in obiecto, neque in modo, quo proponitur intellectui, quod retardare possit intellectum ab ei præbendo assensu, cum non est in eo falsitas, neque periculum falsitatis; atqui verum est tantum non esse in obiecto falsitatem, neque periculum falsitatis cum est evidens: ergo verum est etiam tantum cum est evidens nihil esse in eo, neque in modo, quo proponitur, quod possit retardare intellectum ab ei præbendo assensu.

Minor probatur primo.

Cum obiectum non est evidens, aut non est, aut proponitur cum periculo de eius non existentia; atqui non esse eius est falsitas, & periculum de eiusdem non existentia est periculum falsitatis: ergo verum est tantum non esse in obiecto falsitatem, neque periculum falsitatis cum est evidens.

Maiores prioris argumenti probatur secundo.

Falsitas, & periculum falsitatis retardant intellectum à præbendo assensu obiecto, in quo proponuntur esse: ergo verum est tantum cum obiectum est evidens nihil esse in eo, neque in modo, quo proponitur intellectui, quod istum possit retardare ab ei præbendo assensu.

Respondent: Falsitas, & periculum falsitatis minus quam appareat veritas, aut æquale retardant intellectum à præbendo assensu obiecto, in quo proponuntur esse, Concedo. cum illud periculum est minus, Nego.

Contra primò. Periculum illud falsitatis tam ma-

gnum, ac appareat veritas non rarò contingit: ergo etiam sapè contingit vt intellectus non determinetur ad præbendum assensum obiecto ab ipfomet.

Antecedens pr. Non rarò contingit vt rationes, quæ nobis proponuntur pro vtraque parte appareant nobis æquè bonæ: ergo periculum illud falsitatis tam magnum, ac appareat veritas non rarò contingit.

Minor superioris argumenti, intellectum non determinari à seipso, & ex intrinseca vi, quam ad hoc habeat ad assensum probabilem, probatur secundo.

Intellectus seipso, & ex intrinseca vi, quam habet determinans se ad assensum probabilem, est verè, & propriissimè liber, & magis quàm voluntas; atqui intellectus non est verè, & propriè liber formaliter & æquè, ac voluntas: ergo intellectus non determinatur ad assensum probabilem à seipso, & ex intrinseca vi, quam ad hoc habeat.

Maiores probatur primò.

Facultas, quæ ita ponit suos actus vt possit eos non ponere, aut ponere illis contrarios, est verè, & propriissimè libera; atqui intellectus seipsum, & ex intrinseca vi, quam habet determinans se ad assensum probabilem, ita illum ponit vt possit non ponere, aut ponere contrarium: ergo est etiam verè, & propriè liber.

Minor prioris argumenti probatur secundo.

Illam facultatem non est propriè, & formaliter libera, quæ vt ponat actus illos suos, in quibus maxime elucere posset exercitium libertatis, indiget imperio alterius facultatis; atqui intellectus vt

ponat actus illos suos, in quibus maxime elucere posset exercitium libertatis ipsius, indiget imperio alterius facultatis: ergo intellectus non est proprie, & formaliter liber.

Minor pr. Actus intellectus, in quibus maxime elucere posset exercitium ipsius libertatis si quam haberet, sunt assensus probabiles incipientes, & obscuri; atqui ad illos assensus indiget imperio alterius facultatis, scilicet voluntatis: ergo & ad illos, in quibus elucere posset maxime exercitium libertatis.

Minor pr. Assensus fidei est obscurus; atqui ad illum requiritur pia affectio voluntatis, ex communi sensu PP. & Theologorum: ergo & ad assensus incipientes, & obscuros.

Secunda pars minoris primi argumenti in probationem conclusionis, scilicet cum voluntas non est sequax ultimi iudicii esse sæpe libertatem, probatur.

Ultimum iudicium est illud, quod repræsentat assertive voluntati aliquod obiectum esse illi optabilius, quàm oppositum, & hinc, & nunc esse amandum; atqui sæpe est libertas cum non est illud iudicium: ergo & cum voluntas non est sequax ultimi iudicii.

Minor pr. Obiectum non repræsentatur assertive voluntati esse ipsi optabilius, quàm oppositum, & hinc, & nunc esse amandum, cum est tantum simplex apprehensio de eius bonitate, & malitia, aut iudicium de æqualitate bonitatis ipsius, & malitiæ; atqui sæpe cum est huiusmodi simplex apprehensio, aut iudicium est libertas: ergo & cum non est iudicium repræsentans assertive

voluntati obiectum aliquod esse ipsi optabilius ;
quàm oppositum , & hîc , & nunc esse amandum.

Minor pr. Tunc est libertas cum voluntas potest ferri erga bonitatem obiecti, vel auersari eius malitiam ; atqui cùm est simplex apprehensio bonitatis obiecti, & simul eius malitiæ, aut iudicium de æqualitate vtriusque volûtas potest affici erga bonitatem obiecti , vel auersari eius malitiam : ergo cum est tantum simplex apprehensio bonitatis , aut malitiæ obiecti est libertas.

Minor pr. Vt voluntas affici possit erga bonitatem obiecti, vel auersari eius malitiam sufficit vt ei repræsententur ; atqui simplex apprehensio repræsentat voluntati bonitatem , & malitiam obiecti, sicut & iudicium de æqualitate vtriusque : ergo cùm est simplex apprehensio bonitatis obiecti simul & eius malitiæ voluntas potest affici erga primam , & auersari secundam.

Maïor pr. Non plus requiritur in voluntate ; vt affici possit erga bonitatem obiecti , aut auersari eius malitiam , quàm in appetitu sensitivo ; atqui vt iste afficiatur erga bonitatem obiecti, aut auersetur eius malitiam sufficit vt ei repræsententur nudè , & simpliciter sine iudicio practico : ergo etiam similis repræsentatio sufficit in voluntate.

Minor pr. Iudicium huiusmodi practicum non conceditur brutis etiam à contraria sententia ; atqui in illis est appetitus sensitivus : ergo vt iste afficiatur erga bonitatem obiecti , aut auersetur eius malitiam, sufficit vt ei nudè , & simpliciter repræsententur sine iudicio practico.

Respondent ad præcedens argumentum : *Non*

plus requiritur in voluntate, ut affici possit quocunque modo erga bonitatem obiecti, aut auersari eius malitiam, quàm in appetitu sensitivo, Concedo. ut affici possit liberè, Nego. atqui. ut iste afficiatur necessario erga bonitatem obiecti, aut auersetur eius malitiam, sufficit ut ei nudè, & simpliciter represententur sine iudicio practico, Concedo. ut afficiatur liberè, Nego.

Contrà. Ut voluntas afficiatur liberè erga bonitatem obiecti, aut auersetur eius malitiam, sufficit ut cum ponit actum prosecutivum bonitatis, v.g. ita eum ponat ut possit non ponere, aut ponere contrarium, & actum auersativum malitiæ; atqui cum ei sine iudicio practico representatur bonitas obiecti, & eius malitia, ita ponit actum prosecutivum bonitatis ut possit non ponere, aut ponere contrarium, & actum auersativum malitiæ: ergo voluntas potest sine iudicio practico affici liberè erga bonitatem obiecti.

Minor pr. Voluntas ita ponit actum prosecutivum bonitatis obiecti, ut possit non ponere, cum nihil deest ipsi ad eum ponendum, & nihil est, à quo habeat necessitatem illum ponendi, aut non ponendi contrarium; atqui cum representatur ei bonitas obiecti, & eius malitia sine iudicio practico, nihil ipsi deest ad ponendum actum prosecutivum bonitatis, & nihil est etiam, à quo habeat necessitatem illum ponendi, aut non ponendi contrarium: ergo ita eum ponit ut possit non ponere, aut ponere contrarium, & actum auersativum malitiæ.

Secunda pars minoris probatur primò.

Cum bonitas obiecti, & eius malitia repræsen-

tantur voluntati, hæc à nullo alio potest habere necessitatem ponendi actum prosecutium bonitatis ipsius, quàm vel à repræsentatione illius bonitatis, vel à bonitate, vel à seipsa; atqui non habet necessitatem ponendi actum prosecutium bonitatis, neque à seipsa, neque à repræsentatione bonitatis, neque ab ipsa bonitate: ergo nihil est, à quo habeat necessitatem illum non ponendi, aut ponendi contrarium.

Prima pars minoris probatur.

In principio habente vim productiuam variorum effectuum necessitas ponendi vnum potius, quàm alium non petitur ab ipso; atqui voluntas habet vim ponendi actum prosecutium bonitatis, aut ipsi contrarium: ergo necessitas ponendi primum potius, quàm secundum non petitur ab ipsa.

Maiores pr. Necessitas ponendi vnum effectum potius, quàm alium est impossibilitas producendi illum alium; atqui in principio habente vim productiuam variorum effectuum non est impossibilitas ponendi vllum ex illis, sed verè potestas ponendi omnes: ergo in principio habente vim productiuam variorum effectuum necessitas ponendi vnum potius, quàm alium non petitur ab ipso.

Minor pr. Vis productiua variorum effectuum, non potest dici impossibilitas ponendi vllum ex illis, sed potius vera, & propria potestas ponendi illos omnes: ergo in principio habente vim productiuam variorum effectuum non est impossibilitas ponendi vllum ex illis, sed verè potestas ponendi omnes.

Secunda & tertia pars minoris superioris argu-

menti, voluntatem non habere necessitatem ponendi actum persecutivum, neque à representatione bonitatis, neque ab ipsa bonitate, pr.

Bonitas obiecti, & representatio eius non imponunt necessitatem voluntati eliciendi actum persecutivum circa ipsam, cum representatur ei simul in eodem obiecto malitia; atqui hæc ei simul representatur, ut supponimus: ergo voluntas non habet necessitatem ponendi actum persecutivum bonitatis obiecti, neque ab ipsa bonitate, neque ab eius representatione.

Respondent: Bonitas obiecti, & representatio eius non imponunt necessitatem voluntati eliciendi actum persecutivum circa ipsam, cum representatur ei simul in eodem obiecto malitia, & hæc representatio apprehensiva non infert necessario, & non habet consequens annexum iudicium de prosecutione bonitatis, Concedo. & habet huiusmodi iudicium consequens, Nego. atqui hæc ei simul representatur, ut supponimus, & hæc representatio apprehensiva non infert necessario, & non habet consequens iudicium de prosecutione bonitatis, Nego. & habet huiusmodi consequens iudicium, per quod scilicet determinetur, & imponatur ei hæc necessitas Concedo.

Contrà. Huiusmodi representatio apprehensiva non magis infert necessario iudicium de prosecutione bonitatis obiecti, quàm de actu averfativo malitiæ eiusdem obiecti; atqui non infert necessario iudicium de actu averfativo malitiæ eiusdem obiecti: ergo neque de prosecutione bonitatis ipsius.

Minor probatur p. primò.

K V

Repræsentatio illa apprehensiuæ non potest inferre simul necessario iudicium de actu auersatiuo malitiæ illius obiecti, & de prosecutione illius bonitatis; atqui infert ex concessis necessario iudicium de prosecutione bonitatis illius obiecti: ergo non infert necessario iudicium de actu auersatiuo malitiæ eiusdem.

Maiores prioris argumenti probatur secundo.

Repræsentatio non plus proponens, & detegens voluntati bonitatis in obiecto, quàm malitiæ, non potius debet inferre necessario iudicium de prosecutione primæ, quàm de fuga, & actu auersatiuo secundæ; atqui repræsentatio, de qua est quæstio sæpè non plus proponit, & detegit voluntati bonitatis in obiecto, quàm malitiæ: ergo non magis infert necessario iudicium de prosecutione bonitatis obiecti, quàm de actu auersatiuo malitiæ eiusdem.

Maiores pr. Cum bonitas, & malitia cum æqualitate, & sine excessu vnius supra aliam proponuntur voluntati, quemadmodum vna non debet dici habere plus virium ad illam ad se trahendam, quàm alia ad eandem retrahendam, & à se repellendam, ita nec repræsentatio illarum ad inferendum potius iudicium de prosecutione primæ, quàm de fuga, & actu auersatiuo secundæ: ergo repræsentatio non plus proponens, & detegens voluntati bonitatis in obiecto, quàm malitiæ non potius debet inferre necessario prosecutionem primæ, quàm fugam, & actum auersatiuum secundæ.

Prima pars minoris argumenti supra facti, cum repræsentatur voluntati bonitas obiecti, & eius

malitia sine iudicio practico nihil ipsi deesse ad ponendum actum prosecutivum bonitatis, pr.

Cum adsunt voluntati cum debita applicatione omnes causæ actus prosecutivi bonitatis obiecti, nihil deest ipsi ad eum ponendum; atqui cum repræsentatur ei bonitas obiecti sine iudicio practico, & per simplicem apprehensionem, adsunt ei omnes causæ productivæ actus prosecutivi bonitatis illius obiecti, & sunt debitè applicatæ: ergo cum repræsentatur voluntati bonitas obiecti nihil deest ipsi ad ponendum actum prosecutivum illius.

Minor pr. Causæ productivæ actus prosecutivi bonitatis obiecti sunt efficiens, finalis, & materialis, & debita applicatio illarum est repræsentatio secundæ, ipsi primæ, & existentia huius & tertiæ; atqui illæ omnes adsunt voluntati cum ei repræsentatur bonitas obiecti: ergo & omnes causæ productivæ illius actus prosecutivi cum debita applicatione.

Minor pr. Causa finalis illius actus prosecutivi bonitatis obiecti est bonitas, quæ repræsentatur, & efficiens, & materialis ipsa voluntas, cui fit illa repræsentatio; atqui bonitas illa repræsentatur, & voluntas est expedita ad producendum, & recipiendum huiusmodi actum: ergo omnes illæ causæ adsunt voluntati cum ei repræsentatur bonitas obiecti.

Respondent: Atqui bonitas illa repræsentatur sufficienter ut moneat voluntatem, Nego. non quantum satis est ut ipsam moneat, Concedo. ergo omnes illæ causæ adsunt voluntati cum ei repræsentatur bonitas obiecti sufficienter ut ipsam

moneat, Concedo. cum non repræsentatur quantum satis est ut ipsam moueat, Nego.

Contrà. Repræsentatio bonitatis obiecti sufficiens voluntati ad ipsam mouendam ad eius amorem est ut eam non lateat, & ei detegatur; atqui cum ei repræsentatur per simplicem apprehensionem eam non latet, & ei detegitur: ergo ita repræsentatur ut sufficienter eam moueat.

Respondent primò: Repræsentatio bonitatis obiecti, sufficiens voluntati ad ipsam mouendam ad eius amorem est ut ipsam non lateat, & ei detegatur certò, & non cum incertitudine an verè sit? Concedo. cum incertitudine an verè sit? Nego. atqui cum repræsentatur per simplicem apprehensionem, eam non latet, & detegitur ei certò, Nego. cum incertitudine an verè sit? Concedo.

Contrà. Bonitas obiecti per simplicem apprehensionem repræsentatur sæpè certò sicut & per iudicium speculatiuum, & è contrario per iudicium vltimum, & practicè practicum repræsentatur sæpè cum incertitudine an verè sit, cum nimirum est tantum probabile: ergo nulla solutio.

Tertia pars antecedentis clara est, & due prima probantur.

Bonitas obiecti repræsentatur certò per simplicem apprehensionem, & per iudicium speculatiuum cum est euidens; atqui sæpè est euidens: ergo etiam sæpè repræsentatur certò per huiusmodi apprehensionem, & iudicium.

Minor pr. Sæpè repræsentatur per simplicem apprehensionem, & iudicium speculatiuum bonitas Dei; atqui illa est euidens: ergo sæpè bonitas repræsentata est euidens.

Respondent secundò ad *superius argumentum*, *representatio bonitatis obiecti sufficiens voluntati ad ipsam mouendam ad eius amorem motu rationali, & consulto, est ut eam non lateat, & ei detegatur detestione rationali, & consultata, Concedo. detestione alia quacunque, & non rationali, nec consultata, Nego. atqui cum ei representatur per simplicem apprehensionem eam non latet, & detegitur ei detestione rationali, & consultata, Nego. detestion: non rationali, Concedo.*

Contrà. Bonitas obiecti detegitur voluntati detestione rationali, cum ei aperitur causa cur proponatur esse talis, & quare sit perfectio; atqui sæpè per simplicem apprehensionem detegitur voluntati causa cur bonitas obiecti proponatur esse talis, & quare sit perfectio: ergo etiam detegitur ei detestione rationali.

Minor pr. Simplex apprehensio repræsentat quidquid iudicium; atqui iudicium repræsentat causam cur bonitas obiecti proponatur esse talis: ergo & simplex apprehensio.

Maiores pr. Non iudicamus nisi de apprehensis ex Philosopho, & cõmuni omnium sensu: ergo simplex apprehensio repræsentat quidquid iudicium.

Obiicies. Voluntas non potest amare, neque odisse liberè sine iudicio practice practico, & ultimo re, aut virtute consultatiuo: ergo libertas est ultimi sequax iudicij.

Antecedens pr. Ut voluntas amet liberè voluntatem v. g. non sufficit iudicium speculatiuum, aut simplex apprehensio de illius delectabilitate, & aliqua inhonestate: ergo voluntas non potest amare liberè sine iudicio practice practico, & ul-

timo re , aut virtute consultatio.

Antecedens probatur. Illud non sufficit, vt voluntas amet voluptatem liberè per quod non constituitur ignorans; atqui per apprehensionem, & iudicium speculatiuum de voluptatis delectabilitate, & inhonestate voluntas non constituitur ignorans: ergo vt voluntas amet voluptatem liberè non sufficit iudicium speculatiuum, aut simplex apprehensio de illius delectabilitate, & inhonestate.

Maïor pr. Illud non sufficit, vt voluntas amet voluptatem liberè, per quod non potest dici peccans; atqui ratione illius, per quod non potest dici ignorans non potest dici peccans: ergo illud non sufficit vt voluntas amet voluptatem liberè, per quod non constituitur ignorans.

Minor probatur. Vt ratione illius, per quod voluntas non potest dici ignorans, dici possit peccans, debet aliquis peccans non esse ignorans; atqui omnis peccans est ignorans: ergo ratione illius, per quod voluntas non potest dici ignorans, non potest dici peccans.

Solutio: Atqui omnis peccans est ignorans ignorantia, quæ sit error, Nego. ignorantia quæ sit carentia cognitionis, & considerationis, quæ si adisset non fieret peccatum, Concedo. ergo ratione illius, per quod non potest dici ignorans ignorantia, quæ sit error non potest dici peccans, Nego. ignorantia quæ sit carentia cognitionis, & considerationis, Concedo.

Contrà. Ignorantia, quæ est in peccante debet dici error: ergo nulla solutio.

Antecedens pr. Illa ignorantia debet dici error,

quæ facit ut peccans dicatur errare; atqui peccantes verè dicuntur errare: ergo ignorantia, quæ est in peccante debet dici error.

Minor pr. Qui operantur malum peccant; atqui ex sapiente errant: ergo peccantes verè dicuntur errare.

Solutio: Atqui ex sapiente errant, hoc est defle-
ctunt à recto virtutis tramite, Concedo. hoc est ha-
bent errorem in intellectu, Nego. Alioqui omnis pec-
cans esset hæreticus. Error enim ipsius esset in materia
fidei, & consequenter hæresis si ei coniungeretur per-
tinentia.

Contrà. Qui imprudenter agunt errant vero errore; atqui qui peccant imprudenter agunt: ergo errant vero, & proprio errore.

Maior pr. Qui imprudenter agunt habent iudi-
cium, per quod repræsentatur eorum voluntati
id, quod agunt esse ipsis melius quàm oppositum;
atqui illud iudicium est error verus, & proprius:
ergo qui imprudenter agunt errant vero errore.

Maior pr. Iudicium illorum non repræsentat
eorum voluntati id, quod agunt non esse tam bo-
num ac oppositum, neque tantum æquè bonum:
ergo repræsentat illud esse melius, quàm oppo-
situm.

Antecedens pr. Voluntas non potest ferri in id,
quod repræsentatur ipsi esse minus bonum, aut
tantum æquè bonum: ergo iudicium eorum, qui
imprudenter agunt, repræsentat eorum volun-
tati id, quod agunt non esse tam bonum, ac oppo-
situm, neque tantum æquè bonum.

Antecedens pr. Voluntas, quæ ferrur in id, quod
est minus bonum non amat se verè, & quæ affigi-

tur erga tantum æquè bonum non est rationalis; atqui voluntas non potest non se amare, neque non esse rationalis: ergo voluntas non potest ferri in id, quod repræsentatur ipsi esse minus bonum.

Maior pr. Quod amat se verè vult sibi semper, quod melius est, & quod est rationale habet semper causam suarum actionum; atqui voluntas, quæ fertur in id, quod est minus bonum non vult sibi melius, & quæ afficitur circa tantum æquè bonum non habet causam sui illius affectus: ergo voluntas, quæ fertur in id, quod est minus bonum non amat se verè, & quæ afficitur erga tantum æquè bonum non est rationalis.

Prima pars maioris probatur.

Quod non vult sibi melius non se amat: ergo quod se verè amat vult sibi semper melius.

Antecedens pr. Quod non vult sibi bonum non se amat; atqui quod non vult sibi melius, non vult sibi bonum: ergo quod non vult sibi melius non se amat.

Minor pr. Quod vult sibi malum, non vult sibi bonum; atqui quod non vult sibi melius, vult sibi malum: ergo quod non vult sibi melius, non vult sibi bonum.

Solutio: Quod vult sibi malum positivè, non vult sibi bonum, Concedo. quod vult sibi malum tantum privativè, & per negationem maioris boni, seu minus bonum, Nego. si enim amare minus bonum non esset se amare, vix ullus se amaret. Rarum siquidem est nos circa obiectum, etiamsi nobis repræsentetur melius elicere affectum erga illum in tota illa intensiōe, & perfectione, quam

possumus habere, quod tamen facere deberemus si vellemus semper, quod apparet nobis melius. Si quidem si illa melioritas obiecti traheret necessarium nostrum affectum negari etiam non posset omnis illa intensio, & perfectio, quam posset habere. Ratio autem quare quod representatur nobis hic, & nunc melius non trahat necessarium voluntatem, est quia non representatur pure bonum, & admixtio mali simul representati exercens vim, quam habet repellendi affectum facit ut illum ponere, vel non ponere maneat in potestate voluntatis, cui ideo idem inus non est in affectibus erga summum bonum clare representatum, quia cum istud nullam habeat admixtionem mali, propterea quod sit summa perfectio, & summa perfectio sit summe amabilis, & summa amabilitas trahat necessario amorem, & quoad specificationem, & quoad exercitium, voluntas non potest non ferri quam vehementi potest affectus in ipsum, neque illum suum affectum interrumpere. Etiam ad minorem; atqui quod non vult sibi melius, vult sibi malum positive, Nego. priuative, Concedo. Verum quidem est quod non habet tantum bonitatis, quantum aliud respectu illius non habere rationem boni, seu perfecti, & eius cui nihil desit: habet tamen illam sub alio respectu, & quatenus nihil illi deest ad eam rationem quam habet, & hac eius ratio potest bene afficere sibi electum, & ei representata mouere illud ad sui prosecutionem.

Contrà. Qui vult sibi malum priuative, seu minus bonum cum proponitur ei maius, non est bene affectus erga se, & beatitudinem; atqui nullus potest non esse bene affectus erga se, & erga

lam determinationem, si non proponatur ei per iudicium præiudicium: ergo ut voluntas faciat illam determinationem necessarium est iudicium præiudicium.

Minor pr. Nulla est alia cognitio, per quam ei innotescat bonum esse facere illam determinationem, quam per illud iudicium præiudicium: ergo ignotum est ei bonum esse facere illam determinationem, si non innotescat ei per iudicium præiudicium.

Solutio: Negandum est antecedens, & dicendum illam aliam cognitionem esse apprehensionem prærequisitas ad iudicium de maiori bonitate obiecti, per quas innotescit sufficienter voluntati, & bonitas obiecti, & bonitas assensus circa ipsam, quæ cum amba appareant obscure, & cum sufficienti fundamento dubitandi nam sit illa maioritas convenientiæ, penes voluntatem est suspendere suum assensum, aut non suspendere, & imperare intellectui ut ponat assensum, vel non ponat. Et certè si intellectus assentiretur necessario illi maioritati perfectionis, & voluntas eadem in illam necessitate ferretur, culpanda esset inordinationis natura, quæ perstante incertitudine veritatis, & convenientiæ dedisset illi certam, & determinatam inclinationem ad veritatem, & convenientiam dubiam, seu quod idem est in falsitatem, & disconvenientiam æquè, ac in veritatem, & veram convenientiam.

Contrà. Maioritas convenientiæ, quam appetunt bruta in suis obiectis est æquè incerta, & dubia, ac ea, quam nos appetimus; atqui certa, determinata, & necessaria inclinatione ipsis à na-

rura indita feruntur in illam : ergo licet incerta sit maioritas veritatis, & conuenientiae possumus & non ferri in illas certa, determinata, & necessaria inclinatione.

Solutio : *Mayoritas conuenientiae, quam appetunt bruta in suis obiectis est aequè incerta, ac dubia, ac ea, quam nos appetimus, & nihilominus maioritas illius conuenientiae patet ipsis euidenter, non verò nobis, Concedo. & non patet ipsis euidenter quemadmodum non patet nobis, Nego. & concessa minori : ergo licet incerta sit maioritas conuenientiae possumus, & nos ferri in illam si pateat nobis euidenter maioritas illius conuenientiae, Concedo. si non pateat euidenter, sed dubia nobis maneat, Nego.* Ratio autem, quare potius maioritas conuenientiae illius pateat brutis euidenter, quam nobis est, quia cognitiones brutorum sunt tantum per sensus, & ministerio sensuum, & horum sensationes interne, & externae sunt representationes suorum obiectorum intuitivae, & euidentes, & non habentes superiores facultates, per quas deprehendi possint errores, qui possent in illis contingere, & excitare dubium num verè sit, quod representant, quemadmodum nos facimus per intellectum, corrigentem errores sensus, & iudicantem saepe falsum, quod iste representat tanquam certissimum.

Contrà. Quantumuis maioritas conuenientiae repraesentetur nobis tantum ineuidenter non possumus illam non appetere, & praeferre minori : ergo nulla solutio.

Antecedens pr. Voluntas non appetens maiortatem conuenientiae ipsi repraesentatam constituit suum subiectum prudens, & imprudens, seu

agens prudenter, & imprudenter; atqui subiectum ipsius non potest esse prudens, & imprudens, agens prudenter, & imprudenter: ergo voluntas non potest non appetere maioritatem conuenientiae, quantumuis repræsentetur ei ineuidenter.

Respondeo *constituere imprudens, non verò prudens.*

Contrà. Illud subiectum debet dici prudens, & prudenter agere quod habet verum actum prudentiae; atqui in illo, cui repræsentatur maioritas conuenientiae, & præscribitur appetenda, est verus actus prudentiae: ergo est verè prudens.

Solutio: Illud subiectum debet dici prudens, & prudenter agere, quod habet verum actum prudentiae, si voluntas faciat, quod iste repræsentat faciendum, Concedo. si non faciat, Nego. atqui in illo, cui repræsentatur maioritas conuenientiae, & præscribitur appetenda, est verus actus prudentiae, & voluntas sequitur eius ductum, Nego. & non sequitur eius ductum, Concedo.

Contrà. Voluntas non potest non sequi eius ductum: ergo nulla solutio.

Antecedens probatur. Vt non sequatur eius ductum debet ipsi repræsentari non sequendum; atqui non repræsentatur ipsi non sequendum: ergo non potest non sequi eius ductum.

Minor probatur. Intellectus non potest simul & semel repræsentare voluntati sequendum esse ductum illius iudicii, & non esse sequendum; atqui cum habet actum, & iudicium prudentiae repræsentatur ipsi sequendum: ergo non potest re-

presentari ipsi quamdiu est non sequendum.

Solutio : Intellectus non potest simul, & semel representare voluntati assertiue aut per idem motuum ductum illius iudicii esse sequendum, & non esse sequendum, Concedo. apprehensiuæ tantum, & ratione diuersarum apprehensionum, per quas formari potest iudicium aliud, quod imperat voluntas, Nego. atqui cum habet actum, & iudicium prudentiæ representatur ipsi sequendum assertiue, aut per idem motuum, per quod ab alio actus representatur non sequendum, Nego. apprehensiuæ tantum, aut per diuersum motuum, Concedo. Nemini dubium esse potest quin quando in sacris paginis legimus, Bonum scienti, & non facienti maius peccatum est illi: intelligatur per illam scientiam boni actus prudentiæ, & per non facienti, voluntas non sequens ductum illius actus prudentiæ. Ex quo,

Colligi facile potest existente actu prudentiæ in nobis voluntatem nostram posse non sequi eius ductum, neque propterea nos esse prudentes simul & imprudentes. Siquidem ad hoc ut aliquis dicatur prudens non sufficit ut bene, & prudenter iudicet, sed præterea prudenter, & bene velit, & ita uiuat ut de illo dici non possit, quod asserit de antiquis Philosophis D. Paulus : Qui cum cognouissent Deum, non sicut Deum glorificauerunt, quod ipsis non uerteretur vitio si non indicassent, per verum actum prudentiæ Deum esse glorificandum. Si enim illum actum prudentiæ non habuissent, seu quod idem est in sententia auctorum contraria sententiæ, habere non potuissent, Intellectus siquidem quos actus non habet habere non potest, non esse inexcusabiles prout illis exprobrat Apostolus. Facile

enim illis fuisset dicere se non potuisse Deum glorificare, quia carebant actu prudentiæ, quem non poterant habere, & sine quo tamen non poterat ipsorum voluntas velle illam Dei glorificationem. Quod autem non possent habere illum actum prudentiæ patet, quia cum in ista sententia intellectus non possit non ferri in illud, quod ei quomodocunque apparet magis verum, & illud magis verum apparere ei non possit nisi per apprehensiones, neque ista in eo excitari nisi per propositionem obiectorum, quam ipsi propositionem impedire non possunt, non debet etiam dici penes ipsos esse non habere illas apprehensiones, & consequentia inde iudicia, aut posse habere alias apprehensiones, & alia iudicia. Veritatis huius vis clarior esse potest si applicatio fiat primo iudicio, quod habet Petrus verbi gratia statim post initium usus rationis. Cum enim iudicium illud fiat consequenter ad apprehensiones in ipso excitatas ab obiectis ipsi propositis, & hac propositio non fuerit in eius potestate, neque etiam dicenda est fuisse apprehensio, & ex ea consequens iudicium, quod qui admittunt non plus concedunt nobis libertatis, & potestatis in nostros actus, quam brutis.

Secunda pars minoris superioris argumenti voluntatem, que fertur tantum in æquè bonum non habere causam sui affectus probatur secundò.

Ratio, & causa propter quam voluntas dici possit ferri in tantum æquè bonum debet peti ab obiecto, à cognitione, vel ab ipsamet; atqui non petitur ab obiecto, neque à cognitione, neque ab ipsamet voluntate: ergo voluntas, quæ fertur tantum in æquè bonum non habet causam sui affectus.

Respondeo peti ab ipsamet voluntate.

Contrà. Ut ratio illa, & causa petatur à voluntate debet ipsa voluntas seipsam mouere obiectiue; atqui non mouet seipsam obiectiue: ergo non petitur ab ipsamet voluntate.

Minor probatur. Ratio, & causa mouens voluntatem, & petita ex parte ipsius debet repræsentari: ergo voluntas debet seipsam mouere obiectiue.

Antecedens probatur. Ratio illa, & causa nullam habere potest vim in voluntatem nisi ipsi repræsentetur: ergo debet ipsi repræsentari.

Solutio: Ratio illa, & causa nullam potest habere vim in voluntatem in genere cause finalis nisi ipsi repræsentetur, Concedo. in genere cause efficientis libera, Nego. Huius enim tota ratio est, quia ita placet, iuxta illud toties decantatum, sit pro ratione voluntas; siquidem in agente libero, cum nihil ipsi deest ad agendum, alia causa non est querenda eorum, que agit, cum in eius potestate sit se in quam partem voluerit fluctere, & hoc non tantum cum agitur de mediis consequendi finem intentum, sed etiam proponendi sibi finem, cum scilicet obscurum ei est, & dubium an proponere sibi debeat pro fine ultimo honores? an diuitias? an Deum? quod valde notandum est contra eos, qui non agnoscunt aliud exercitium libertatis, quam in electione mediorum ad consequendum finem intentum. Manifestum enim est etiam in pralatione vnius ex illis finibus alteri exerceri vere, & proprie libertatem, & vim addicendi se uni ex illis potius quam alteri. Cum autem Aristoteles dixit electionem
non

nō esse de finibus, sed de mediis, intelligi debet de fine ultimo clarè cognito, aut beatitudine in communi, in qua cū nihil appareat mali, sed summa amabilitas, non possumus ei quidquam aliud præferre, neque ei nostrum amorem negare, aut non inquirere ea, quæ inuant ad eius consecutionem, & inuentis uti ad eam nobis coniungendam. Quod non perinde se habet in ipsa singulariter sumpta, & contracta ad honores, diuitias, aut etiam Deum. In ea enim hoc modo sumpta non apparet statim nihil esse mali, neque quæcunque occurrunt dirigenda esse ad illius adeptionem.

Ex dictis inferes primò, essentiam libertatis in eo consistere, quod agens ita afficiatur circa obiectum, siue illud sit finis, siue medium, ut possit non affici.

Secundò, quod est medium respectu finis, ad quem conducit posse esse finem respectu alterius rei, quæ ad ipsum obtinendum utilis est, nihilque planè esse præter Deum, qui (si nulla sit inordinatio non potest ordinari ad aliud) quod non possit esse medium, & assumi tanquam utile, & inserviens ad aliquid aliud.

Tertio, non esse quid perfectius Deum se amare liberè quàm necessario, sed potius quid imperfectius. Cū enim perfectio Dei maxima sit quod eius esse sit necessarium, & de ratione ipsius esse sit se intelligere, & se amare: amare se necessario debet numerari inter primarias eius perfectiones, non verò amare se contingenter, seu liberè. Istud enim, ut sequentibus conclusionibus declarabitur, magis sonat indifferentiam, & contingentiam.

Quartò, contrariam sententiam debere fateri duo contra communem sensum. Primum est motus indeliberatos, & qui dicuntur primo primi esse liberos verè, & propriè, cùm fiunt vt sæpè contingit, per species relictas ab actibus præcedentibus, qui, vt ipsi volunt, facti sunt consequenter ad iudicium realiter consultatiuum. Secundum est eadem etiam vera, & plena libertate gaudere actus amentium, dormientium, & ebriorum, in quibus sunt species relictæ ab actibus realiter consultatiuis, cùm eliciuntur similes actus iis, à quibus sunt productæ, vt fit cùm proponitur idem obiectum quod amatum est, aut illi simile.

Quintò, amorem, quo nos amamus quantumuis magnus sit non impedire primò quominus debeamus, & consequenter possimus velle nostrum non esse, & annihilationem propter auctorem rerum omnium, & huius nostri esse, cui totum illud debemus, & quem amare plus quàm nos debemus.

Secundò, non impedire etiam quominus velimus amicis nostris varia bona, quia ipsorum bona sunt, & licèt nihil inde commodi in nos redundet. Si enim verum esset, quod volunt auctores contrariæ sententiæ asserentes nos in omnibus nostris actionibus ita nos amare, vt quidquid volumus velimus semper propter nos, nulla planè esset vera amicitia, & verus amor benevolentiae, sed omnis omnino amor esset concupiscentiae.

TERTIA CONCLUSIO:

Libertas non est indifferencia iudicij.

LIBERTAS constituit voluntatem dominam suorum actuum; atqui indifferencia iudicij non constituit voluntatem dominam suorum actuum: ergo libertas non est indifferencia iudicij.

Minor pr. Illud non constituit voluntatem dominam suorum actuum, per quod non potest disponere de illis ad nutum, & prout libuerit; atqui indifferencia iudicij non facit ut voluntas possit disponere ad nutum, & prout libuerit de suis actibus: ergo indifferencia iudicij non constituit voluntatem dominam suorum actuum.

Minor pr. Illud non facit ut voluntas possit disponere de suis actibus ad nutum, & prout libuerit quo stante carere potest concursu Dei necessario ut illos possit ponere, aut habere adiunctum aliud comprincipium impediens ne possit cessare ab illis; atqui stante indifferencia iudicij voluntas potest carere concursu Dei necessario, ut possit ponere suos actus, aut habere aliquod aliud comprincipium adiunctum, quod faciat, ut non possit cessare ab illis: ergo voluntas non potest per indifferentiam iudicij disponere de suis actibus.

Minor probatur. Stante indifferencia iudicij Deus ita præstat hunc concursum voluntati, ut possit non præstare, & potest illi adiungere comprincipium explicatum: ergo stante indifferencia iudicij voluntas potest carere cōcursu ne-

cessario vt possit ponere suos actus, & habere adiunctum comprincipium explicatum.

Antecedens pr. Ex eo, quod Deus ita præstet hunc concursum voluntati, vt possit non præstare, & possit illi adiungere comprincipium explicatum non sequitur esse, & non esse simul eiusdem rei: ergo stante indifferentia iudicij Deus ita præstat hunc concursum voluntati vt possit non præstare, & potest illi adiungere comprincipium explicatum.

Antecedens pr. Sequitur tantum esse indifferentiam iudicij in nobis, & in Deo volitionem adiungendi nostræ voluntati comprincipium explicatum, aut non præstandi concursum necessarium; atqui indifferentia iudicij in nobis, & volitiones illæ Dei non sunt vna, & eadem res: ergo ex eo, quod Deus ita præstet hunc concursum voluntati, vt possit non præstare, & possit illi adiungere comprincipium explicatum non sequitur esse, & non esse eiusdem rei.

QVARTA CONCLUSIO:

Libertas non consistit in amplitudine voluntatis, & adhesionem cum Deo.

AMPLITUDO illa voluntatis, & adhesio cum Deo nihil est aliud, quàm aut status gratiæ sanctificantis, aut actualis amor Dei; atqui libertas non consistit in statu gratiæ sanctificantis, aut actuali amore Dei: ergo libertas non consistit in amplitudine voluntatis, & adhesionem cum Deo.

Minor probatur. Libertas non consistit in his, quibus positus, non est, & quibus non positus est; atqui positus statu gratiæ sanctificantis, & actuali amore Dei, ipsa non est, & illis non positus est: ergo libertas non consistit in statu gratiæ sanctificantis, aut actuali amore Dei.

Prima pars minoris probatur.

Status gratiæ sanctificantis, & actualis amor Dei sunt in beatis; atqui in illis non est libertas circa illum amorem: ergo posito statu gratiæ sanctificantis, & actuali amore Dei non est libertas.

Minor probatur. In Beatis non est libertas circa illos actus, qui non sunt in illorum potestate; atqui amor Dei non est in potestate Beatorum: ergo in Beatis non est libertas circa illum amorem.

Minor probatur. Ex D. August. lib. de Spiritu, & litera cap. 30. hoc quisque habere in potestate dicitur, quod si vult facit, si non vult non facit, seu facit, aut non facit ad nutum, & prout placet; atqui amor Dei non fit ad nutum, & prout placet à Beatis: ergo non est in potestate Beatorum.

Maiores certæ sunt non tantum ex loco citato S. Augustini, sed etiam primò ex D. Damasceno lib. 2. de fide cap. 26. In nobis illa sita sunt quorum liberam habemus potestatem ut aut ea faciamus, aut non faciamus. Secundò ex Clemente Alexandr. lib. 4. Stromat. Id est in potestate nostra, cuius ex æquo sumus domini, & eius quod ei adversatur. terriò Arist. 3. Ethic. cap. 5. Quibus in rebus nostra in potestate situm est agere in iis,

Et non agere, Et in quibus non agere, in iis, Et agere, quem locum interpretans D. Thomas ait, si operari est in nostra potestate, oportet etiam quod non operari sit in nostra potestate, Et minor probatur.

Quod ita fit à Beatis ut non possit non fieri, non fit ab illis ad nutum; atqui amor Dei non potest non fieri à beatis: ergo non fit ab illis ad nutum, & prout placet.

Secunda pars minoris superioris argumenti, illis non positis esse libertatem, probatur.

In peccatore reo multorum criminum & actu odio habente Deum non est status gratiæ sanctificantis nec actualis amor Dei; atqui in illo est libertas: ergo non positis statu gratiæ sanctificantis & actuali amore Dei libertas est.

Minor probatur. Libertas est in eo, qui est vituperabilis, & meretur poenas æternas; atqui homo ille peccator est maximè vituperabilis, & meretur poenas æternas: ergo in eo est libertas.

Obiicies. Ratio quæ afferri potest cur amplitudo voluntatis, & adhæsiō cum Deo ut ultimo fine non sit libertas est, quia posse peccare est pars libertatis; atqui potentia peccandi non est pars libertatis: ergo libertas consistit in amplitudine voluntatis & adhæsiōne cum Deo ut ultimo fine.

Minor probatur. Non magis potentia peccandi est pars libertatis, quàm potentia errandi pars intellectus; atqui potentia errandi non est pars intellectus: ergo neque potentia peccandi pars libertatis.

Solutio : Atqui potentia errandi non est pars intellectus integrans , Concedo. subiectiua , Nego. ergo neque potentia peccandi est pars libertatis integrans , Concedo. subiectiua , Nego. Aliqua enim potest peccare sicut & aliquis intellectus errare.

Contrà. Illud non est pars libertatis etiam subiectiua, cuius exercitium non est actus libertatis ; atqui exercitium potentiae peccandi non est actus libertatis : ergo potentia peccandi non est pars subiectiua libertatis..

Minor probatur. Exercitium potentiae peccandi est peccatum; atqui peccatum non est actus libertatis : ergo exercitium potentiae peccandi non est actus libertatis.

Minor probatur. Seruitus non est actus libertatis ; atqui peccatum est seruitus : ergo peccatum non est actus libertatis.

Solutio : Seruitus non est actus libertatis prout hæc idem est , ac exemptio à miseria , & seruitute , Concedo. prout idem est ac exemptio à necessitate , Nego. & concessa minori : ergo peccatum non est actus libertatis prout hæc est exemptio à miseria & seruitute , Concedo. prout est exemptio à necessitate , Nego. Nihil enim est quod cogat , & necessitet voluntatem ad illud patrandum.

Contrà. Quod nihil est non est actus potentiae propriae , & positivæ ; atqui peccatum nihil est ex D. Augult. & SS. & libertas sumpta pro exemptione à necessitate est potentia propria , & positiva : ergo peccatum non est actus libertatis sumptæ pro exemptione à necessitate.

Solutio : Quod nihil est , hoc est non est quid pa-

sitium, non est actus potentia positiva necessaria ;
 Concedo. libera, Nego. Huius enim actus tam est
 non facere ac facere, & permissa prima parte mi-
 noris distinguenda est secunda, & libertas est po-
 tentia positiva necessaria, Nego. libera, Con-
 cedo.

QVINTA CONCLUSIO:

*Libertas voluntatis est potentia ad utrum-
 libet, indifferentia ad agendum, aut
 non agendum, seu id, per quod positis om-
 nibus ad agendum requisitis potest agere,
 aut non agere.*

Huius conclusionis veritas licet pateat satis
 ex declaratione præcedentium, & refutatione
 eorum, in quibus dici poterat sita esse liber-
 tas, confirmari tamen potest adhuc magis ra-
 tione.

Libertas voluntatis rectè constituitur in eo mo-
 do agendi agentium intellectualium, quo di-
 cuntur gaudere pleniori exemptione à necessita-
 te, & habere perfectius dominium, & magis ab-
 solutum suorum actuum, & quod intellexere no-
 mine liberi arbitrij Concilium Senonense & Tri-
 dentinum; atqui per hoc, quod eorum voluntas
 sit potentia ad utrumlibet, sit indifferens ad
 agendum, aut non agendum, positis omnibus ad
 agendum requisitis possit agere, aut non agere,
 Agentia intellectualia gaudent pleniori exem-
 ptione à necessitate, habent perfectius dominium,

& magis absolutum suorum actuum, & hoc intellexere nomine liberi arbitrij Concilium Senonense, & Tridentinum: ergo libertas voluntatis est potentia ad vtrumlibet, indifferentia ad agendum, aut non agendum, seu id, per quod positis omnibus ad agendum requisitis potest agere, aut non agere.

Ultima pars maioris non potest esse dubia, & alie duæ probantur primo.

I. Libertas rectè constituitur in eo modo agendi, in quo consultatio, deliberatio, & electio locum habent, & quod illis proprium est exercent. Atqui consultatio, deliberatio, & electio locum habent, & quod illis proprium est exercent in eo modo agendi, per quem agentia intellectualia gaudent pleniori iure exemptionis à necessitate, & habent perfectius, & magis absolutum dominium suorum actuum: ergo libertas rectè constituitur in eo modo agendi, per quem agentia intellectualia gaudent pleniori iure exemptionis à necessitate, & habent perfectius, & magis absolutum dominium suorum actuum.

Minor probatur. Consultatio, deliberatio, & electio locum habent, & quod illis proprium est exercent cum versantur circa ea, quæ possunt aliter, & aliter se habere, & ex duobus potest sumi vnum altero repudiato; atqui modus agendi, per quem agentia intellectualia gaudent pleniori iure exemptionis à necessitate, & habent perfectius, & magis absolutum dominium suorum actuum versatur circa ea, quæ possunt aliter se habere, & ex multis, aut duobus potest sumi vnum altero repudiato: ergo in eo consultatio, delibera-

tio & electio locum habent, & quod illis proprium est exercent.

Maiores pr. Non instituimus consultationem aut deliberationem de necessariis, neque eligimus in iis, quæ sunt determinata ad vnum: ergo consultatio, deliberatio, & electio versantur circa ea, quæ possunt aliter se habere.

Antecedens pr. Non instituimus consultationem, aut deliberationem nisi de iis, quæ possumus cauere, aut impedire, neque cogitamus de electione, ubi non potest esse præceptio vnius præ alio, quod repudiatur; atqui non possumus cauere, aut impedire necessaria, & non potest esse præceptio vnius præ alio quod repudiatur in iis, quæ sunt determinata ad vnum: ergo non instituimus consultationem aut deliberationem de necessariis, neque eligimus in iis, quæ sunt determinata ad vnum.

Maiores pr. Ex D. Damasceno lib. 2. de fide cap. 26. *Consilium est eorum, quæ ex equo contingunt. Contingit autem ex equo quod tam ipsum possumus quam eius oppositum.* & Nemestius lib. de natura hominis cap. 40. *ostensum est autem supra (ait) consultationem esse rerum contingentium per æquæ in utramque partem.* Aristoteles 6. Ethic. cap. 1. *Nemo de his rebus consultat, quæ aliter se habere non possunt; atqui non possumus cauere, aut impedire necessaria, & quæ aliter se habere non possunt: ergo non consultamus, aut deliberamus, de iis quæ non possumus cauere, & impedire.*

Due primæ partes minoris primi argumenti in probationem conclusionis probantur secundæ.

¶ Per illud agentia intellectualia gaudent pleniori exemptione à necessitate, & habent perfectius dominium & magis absolutum suorum actuum, per quod illos ponunt, aut non ponunt ad nutum, & prout placet; atqui per hoc, quod voluntas sit potentia ad vtrumlibet, & positis omnibus ad agendum requisitis possit agere, aut non agere, agentia intellectualia ponunt, aut non ponunt actus suos ad nutum, & prout placet: ergo per hoc etiam gaudent pleniori exemptione à necessitate, & habent perfectius dominium, & magis absolutum suorum actuum.

Tertia pars minoris primi argumenti in probationem conclusionis probatur tertio.

Concilium Senonense decreto fidei 15. *Percurrenti sacram. Scripturam passim obuium esse, ait, quod liberum utramvis in partem hominis arbitrium asseneret, & Concilium Tridentinum definit sess. 6. can. 5. liberum hominis arbitrium post Adæ peccatum non esse amissum, & extinctum: ergo Concilium Senonense, & Tridentinum intellexere nomine liberi arbitrij voluntatem esse potentiam ad vtrumlibet, esse indifferente in ad agendum, vel non agendum, & positis omnibus ad agendum requisitis posse agere, vel non agere.*

Consequentia pr. Concilium Senonense, & Tridentinum intellexere per verba allata, illud per quod definiebatur quod erat controuersum inter Lutherum, Calvinum, vtriusque discipulos, & Catholicos Doctores, & quod definitum esse intellexerunt tum ipsi hæretici, tum Catholici, qui contra ipsos pugnabant pro vera, & ortho-

doxa fide; atqui vt id definiretur, quod erat controuersum inter Lutherum, Caluinum, vtriusque discipulos, & Catholicos Doctores, & quod intellexerunt definitum fuisse, tum ipsi hæretici, tum Catholici, qui contra ipsos pugnauere pro vera, & orthodoxa fide, dicendum est Concilium Senonense, & Tridentinum intellexisse per verba allata libertatem esse potentiam ad vtrumlibet, esse indifferentem ad agendum, vel non agendum, & positis omnibus ad agendum requisitis posse agere, aut non agere: ergo Concilium Senonense, & Tridentinum intellexere nomine liberi arbitrij voluntatem esse potentiam ad vtrumlibet, esse indifferentem ad agendum, vel non agendum, & positis omnibus ad agendum requisitis posse agere, vel non agere.

Minor pr. Controuertebatur inter Lutherum, Caluinum, vtriusque discipulos, & Catholicos Doctores an liberum arbitrium necessitate vellet quæ vult, & definitum esse consensere per verba Concilij Tridentini tum Caluinus, eiusque discipuli, tum Catholici, qui contra ipsos pugnant, liberum arbitrium non necessitate velle, sed esse potentiam ad vtrumlibet, esse indifferentem ad agendum, vel non agendum, & positis omnibus ad agendum requisitis agere, aut non agere: ergo Concilium Tridentinum, & Senonense dicenda sunt intellexisse per verba allata libertatē esse potentiam ad vtrumlibet, esse indifferentem, ad agendum, vel non agendum, & positis omnibus ad agendum requisitis posse agere, aut non agere.

Prima pars antecedentis probatur prima.

Melancthon id fatetur suâ Apologiâ aduersus censuram Sorbonæ contra hæresim Lutheri de gratia, & Libero arbitrio, & Calvinus contra eosdem Doctores Sorbonicos multum irascitur quod anno 1542. die prima Martis decreuissent inesse homini lapso libertatem ad vtrumlibet: ergo controuertebatur inter Lutherum & Caluinum, & Doctores Catholicos an Liberum arbitrium necessitate vellet, quæ vult.

Secunda pars eiusdem antecedentis probatur secundò.

Calvinus in Antidoto Concilij Tridentini ad can. quintum sess. sextæ, respondet: *de verbo, inquit, ne moueamus rixam, s. d. quia per Liberum arbitrium intelligunt eligendi facultatem, quæ sit in utramque partem libera, & soluta, titulum esse sine re qui affirmat, Christum habet auctorem.* Idem fatentur in suis libris eius discipuli & multo lubentiùs, adhuc Catholici tum qui interfuerunt Concilio Tridentino, tum qui eo nondum finito scripsere, aut postquam fuit absolutum Ioannes Vigers in 1. 2. quæst. 6. artic. 2. numero sexto. *Certa fide tenendum est, ait, etiam post lapsum superesse naturalem facultatem liberam, dictam Liberum arbitrium, nec tantummodò esse eiusmodi potentiam, sed etiam liberum illius potentiæ usum, qui requirit, inquit, in potentia quandam indifferentiam ad agendum, & non agendum positis iam omnibus ad actionem prærequisitis.* Gabriel Pennotus (cæteros enim referre longum nimis esset.) palam profitetur libro primo propugnaculi humanæ libertatis capite septimo, neminem planè fuisse à Catho-

licis Theologis, qui post Concilium Tridentinum scripserunt de hac materia, qui non contrariam sententiam erroris, & hæreseos damnarit. Tam certò hoc credi voluit Ecclesia, vt Pius quintus & Gregorius decimus-tertius, propositiones Michaëlis Baij, *Quod voluntariè fit, liberè fieri, etiam si necessariò fiat, & sola violentia repugnat libertati hominis naturali*, in perpetuum abolendas sanciuerint: ergo Calvinus, & Catholici consensere definitum esse per verba Concilij Tridentini Liberum arbitrium non necessitate velle, sed esse potentiam ad vtrumlibet, esse indifferentem ad agendum, vel non agendum, & positis omnibus ad agendum prærequisitis posse agere, vel non agere.

Obiicies. Voluntas habet libertatem ad amorem aut odium voluptatis; atqui non habet indifferentiam ad huiusmodi amorem, aut odium: ergo libertas voluntatis non est indifferentia ad agendum huiusmodi amorem, aut odium.

Minor probatur. Voluntas non habet indifferentiam circa ea erga quorum vnum valdè propendet, erga aliud vero parùm admodùm; atqui voluntas propendet valdè ad amorem voluptatis, & parùm admodùm ad eius odium: ergo non habet indifferentiam ad huiusmodi amorem, aut odium.

Maior probatur. Propensio in vnum magis, quàm in aliud destruit indifferentiam ad vtrumque: ergo voluntas non habet indifferentiam ad ea, erga quorum vnum valdè propendet; erga aliud vero parùm.

Antecedens probatur. Indifferentia ad duo, &

æquilibrium circa eadem sunt idem; atqui propensio ad vnum ex illis magis, quam ad aliud destruit illud æquilibrium: ergo & indifferentiam.

Solutio: Indifferentia ad duo, & æquilibrium circa eadem sunt idem, intellecta ambo de vi productivâ illorum duorum ad nutum, & prout placuerit, Concedo. intellecta de equali propensione affectiva erga illa, Nego. Atqui propensio in vnum magis quam in aliud destruit æquilibrium circa illa intelligendo per æquilibrium vim productivam illorum ad nutum, & prout placuerit, Nego. intelligendo equalitatem propensionis, Concedo.

Contrâ. Vis productiva duorum ad nutum non potest stare sine æqualitate propensionis ad illa: ergo nulla solutio.

Antecedens pr. Voluntas non potest producere id, ad quod minus propendet: ergo vis productiva duorum non potest stare sine æqualitate propensionis ad illa.

Solutio: Voluntas non potest producere id, ad quod minus propendet ante actionem, Nego. post actionem, Concedo. Per actionem enim ipsam propensio eius maior addicitur, & applicatur ei quod producit.

Contrâ. Actio voluntatis quæ potest esse ad producendum id, ad quod ante ipsam actionem ipsa minus propendet, debet determinari ab aliquo; atqui nihil est à quo determinetur: ergo non datur actio voluntatis ad producendum id, ad quod minus propendet ante actionem.

Minor probatur. Voluntas determinatur ab

eo, ad quod est maior ipsius inclinatio, seu propensio, & impulsus concupiscentiæ: ergo nihil est, à quo determinetur ad id producendum, ad quod minus propendet.

Respondeo, *neganda antecedens, & ratio est, quia voluntas habet ex se, & sua intrinseca ratione ut possit se determinare, neque eget aliquo extrinseco aut intrinseco ad illam suam determinationem; cum ex parte obiecti non deest, quod amet, aut auersetur. Atque hæc est eius prerogativa supra bruta, quæ non habent ex se ut possint se determinare, neque alio ferri quam quo maior obiecti bonitas ipsis representata ea impellit.*

SEXTA CONCLUSIO:

Præcepta diuina non sunt impossibilia.

Addimus hanc conclusionem ad faciliorem intelligentiam eorum quæ diximus de libera, seu indifferenti electione boni, & mali, & possibilitate resistendi gratiæ, & concupiscentiæ: licet autem eius veritas non alia egeat probatione, quam ea, quæ habetur can. decimo-octauo sess. 6. Concilij Tridentini. *Si quis dixerit Dei præcepta homini etiam iustificato, & sub gratia constituto esse impossibilia, Anathema sit*: non inutile tamen forte erit sequentem addere.

Præcepta diuina possunt impleri: ergo non sunt impossibilia.

Antecedens pr. Possumus facere, & verè fieri potest à nobis, quod nobis Deus iubet: ergo præcepta diuina possunt impleri.

Antecedens pr. Quod Deus nobis iubet, & præcipit vult fieri à nobis; atqui Deus non vult fieri à nobis quod non possumus facere, & non potest verè à nobis fieri: ergo possumus facere, & verè fieri potest à nobis, quod nobis Deus iubet.

Minor pr. Deus non vult à nobis fieri; quod non iudicat posse fieri à nobis; atqui non iudicat posse fieri à nobis, quod non possumus facere, & non potest verè fieri à nobis: ergo Deus non vult fieri à nobis, quod non possumus facere, & non potest verè à nobis fieri.

Minor pr. Deus non vult, quod iudicat se non posse velle; atqui iudicat se non posse velle fieri à nobis quod iudicat non posse fieri à nobis: ergo Deus non vult à nobis fieri, quod iudicat non posse à nobis fieri.

Minor pr. Deus iudicat se non posse velle quidquam impossibile; atqui Deum velle ut fiat à nobis quod non potest fieri à nobis, est velle aliquid impossibile: ergo Deus iudicat se non posse velle ut fiat à nobis quod iudicat non posse fieri à nobis.

Minor pr. Est impossibile ut fiat à nobis, quod non potest fieri à nobis: ergo Deum velle ut fiat à nobis, quod non potest fieri à nobis, est velle aliquid impossibile.

Obiicies. Præcepta, quæ Deus imposuit naturæ humanæ lapsæ, sunt ipsi impossibilia: ergo præcepta diuina sunt impossibilia.

Antecedens pr. Ea, ad quæ Deus obligauit naturam humanam lapsam, sunt ipsi impossibilia: ergo & præcepta, quæ ipsi imposuit.

Antecedens probatur. Deus obligauit naturam humanam lapsam ad amandam se super omnia;

atqui est impossibile naturæ humanæ lapsæ amare Deum super omnia: ergo ea, ad quæ Deus obligauit naturam humanam lapsam sunt impossibilia.

Solutio : Deus obligauit naturam humanam lapsam ad amandum se super omnia, subministrando ipsi vires ad hoc, Concedo. non subministrando ipsi illas vires, Nego. Atqui non potest amare Deum super omnia. Deo non subministrante ipsi vires ad illum amorem, Concedo. Deo subministrante ipsi vires ad illum amorem, Nego.

Contrà. Deus obligauit naturam humanam lapsam quandiu perseuerat nullo ipsi alio subministrato ad tendendum in finem & in beatitudinem supernaturalem : ergo & ad amandum se super omnia, licet ei nullæ aliæ vires subministrantur.

Antecedens probatur. Eleuatio ad finem supernaturalem & obligatio tendendi in illum, sunt idem; atqui natura humana lapsa, quandiu perseuerat nullo ipsi alio superaddito, manet semper eleuata ad illum finem : ergo & obligata ad tendendum in illum.

Solutio : Eleuatio ad finem supernaturalem, seu propositio finis illius cum viribus sufficientibus ad illum obtinendum, & obligatio tendendi in illum, sunt idem, Concedo. sine huiusmodi viribus, Nego. atqui natura humana lapsa quandiu perseuerat, manet semper eleuata ad illum finem, & cum viribus sufficientibus seclusa gratia Christi ad illum obtinendum, Nego. sine huiusmodi viribus, seclusa gratia Christi, Concedo.

Contrà. Natura humana lapsa obligatur ad non peccandum, seu non recedendum à fine supernaturali sine viribus sufficientibus ad abstinendum à peccato: ergo est etiam in ea obligatio sine huiusmodi viribus ad tendendum in illum finem.

Antecedens probatur. Dæmones, & damnati non possunt abstinere à peccato; atqui obligantur ad abstinendum ab illo: ergo & natura lapsa.

Solutio: Dæmones, & damnati non possunt physicè abstinere à peccato, Nego. moraliter, Concedo. & concessa miniri: ergo natura lapsa obligatur etiam ad abstinendum à peccato sine viribus ad hoc sufficientibus moraliter, Concedo. sufficientibus physicè, Nego. Ratio est evidens, quia Deus non potest magis imponere illi hanc obligationem, quàm precipere, & velle ut abstineat si iudicet hoc non posse ab ipsa fieri ut debet (si ita se res habeat) indicare, ac proinde, & consequenter ad hoc iudicium non potest velle, ut hoc ab ipsa fiat, ut per se clarum est.

SEPTIMA CONCLUSIO:

Libertas non convenit Brutis.

LIBERTAS non convenit illis, quæ non habent dominium in suos actus: atqui bruta non habent dominium in suos actus: ergo libertas non convenit Brutis.

Minor pr. Bruta non habent dominium in ea, quæ non sunt in eorum potestate; atqui actus

Brutorum non sunt in eorum potestate: ergo non habent dominium in suis actus.

Minor pr. Illud non est in potestate Brutorum propter quod non debent donari præmio, aut puniri; atqui Bruta non debent donari præmio, aut puniri propter suos actus: ergo ipsorum actus non sunt in eorum potestate.

Minor pr. Bruta non debent magis puniri propter suos actus, quam homo propter illos sui appetitus sensitiui; atqui homo non debet puniri propter actus sui appetitus sensitiui: ergo neque Bruta propter suos.

Minor pr. Homo non debet puniri propter actus, quos non potest cohibere; atqui non potest cohibere actus sui appetitus sensitiui: ergo homo non debet puniri propter illos.

Minor pr. Actus quos exprimunt verba illa D. Pauli, *sensio aliam legem in membris meis repugnantem legi mentis meae*, erant actus appetitus sensitiui; atqui D. Paulus non poterat illos cohibere: ergo homo non potest cohibere actus appetitus sensitiui.

Minor pr. D. Paulus non poterat cohibere actus illos, per quos non demerebatur; atqui D. Paulus non demerebatur per illos actus sui appetitus sensitiui: ergo D. Paulus non poterat cohibere illos actus.

Minor pr. D. Paulus merebatur per repugnantiam illam, quam exhibebat huiusmodi actibus sui appetitus: ergo non demerebatur per illos.

Consequentia pr. D. Paulus simul, & semel, & per actus versantes circa idem obiectum non merebatur, & demerebatur; atqui actus appetitus sen-

sicuti D. Pauli, & repugnantia, quam illis exhibebat, exercebantur ab ipso simul & semel, & circa idem obiectum: ergo posito quod mereretur per illam repugnantiam non demerebatur per actus illos appetitus sensitiui.

Et quod inde consequens est primò illi actus non erant liberi in ipso. Secundò iis similes multò minus debent censeri esse in potestate Brutorum, in quibus non est ratio superior, à qua possint frænari, nec quidquam, quod altiori bono moueatur, quàm iucundo, & intuitu cuius moderari possint affectus vehementiores, quàm par sit, erga delectabilitatem terrenam, & materiale.

Obiicies. Bruta habent in sua potestate actus sui appetitus: ergo libertas conuenit Brutis.

Antecedens probatur. Bruta positis omnibus ad agendum requisitis, possunt ponere, aut non ponere actus sui appetitus: ergo habent illos in sua potestate.

Antecedens pr. Bruta ponunt actus sui appetitus sensitiui ad nutum, & prout ipsis placet: ergo positis omnibus ad agendum requisitis possunt illos ponere, aut non ponere.

Supponunt quod experientia frequens docet canem panem ante ipsius os positum ad certas voces heri suum esum illius panis prohibentis illum non comedere, & ad alias esum imperantes statim vorare, & hoc posito probant antecedens.

Canes in casu posito ponunt, aut non ponunt esum illius panis ad nutum, & prout ipsis placet: ergo & Bruta actus sui appetitus.

Antecedens pr. Ille ponit ad nutum, & prout placet, esum, aut non esum panis, qui iussus ab

eo abstinere, aut non abstinere, iussa exequitur; atqui canes in casu posito iussi abstinere, aut non abstinere ab esu panis propè os positi, iussa exequuntur: ergo ponunt illum esum panis ad nutum & prout ipsis placet.

Solutio: Ille ponit ad nutum, & prout placet esum, aut non esum panis qui iussus ab eo abstinere, aut non abstinere, iussa exequitur si possit ea non exequi, Concedo. si non possit ea non exequi, Nego. Atqui canes iussi abstinere, aut non abstinere ab esu illius panis, iussa exequuntur, & possunt ea non exequi, Nego. & non possunt ea non exequi. Concedo.

Contrà. Ille supponitur posse non exequi iussa, qui ad ea exequenda excitatur pœnis, præmiis, & hortationibus; atqui canes iussi abstinere, aut non abstinere ab esu, aut non esu panis ante os positi, excitantur ab hero ad iussa exequenda pœnis, præmiis & hortationibus: ergo ita iussa exequuntur, ut possint ea non exequi.

Solutio: Ille supponitur posse non exequi iussa, qui ad ea exequenda excitatur pœnis, præmiis, & hortationibus non constantibus simul cum obiecto eum excessum bonitatis, qui determinet eum, quæ exequitur iussa, & non auferat ipsi suam indifferentiam ad ea non exequenda, Concedo. constantibus huiusmodi bonitatis excessum, qui determinet eum, qui iussa exequitur, & non relinquat ipsi indifferentiam ad ea non exequenda, Nego. Atqui canes iussi abstinere, aut non abstinere ab esu, aut non esu panis ante os positi, excitantur ab hero ad iussa exequenda pœnis, præmiis & hortationibus non constantibus.

tibus simul cum obiecto talem excessum bonitatis, qui eos adiussa exequenda non determinet, & relinquat illis indifferentiam, ad ea non exequenda, Nego. & non relinquat illis indifferentiam, Concedo. sine autem hac indifferentia non potest esse libertas. Determinatio enim potentie agentis ut possit censerī libera non debet esse neque ab obiecto, neque ab alio quàm à sua vi intrinseca, & ipsi propria, qualem certè non habent canes & alia Bruta, quæ in iisdem circumstantiis eodem modo se habent semper, & idem planè agunt.

Contrà. Ille qui excitatur ad iussa exequenda pœnis, præmiis, & hortationibus, relinquitur ab ipsis in sua indifferentia cum in iussi exequendis convenit ei verè & propriè electio; atqui in iussis exequendis electio convenit canibus, & similibus Brutis: ergo cum canes excitantur ad iussa exequenda pœnis, præmiis, & hortationibus, relinquuntur an sua indifferentia ad ea non exequenda.

Minor probatur. Illi convenit electio, qui inquit media, & deliberat de aptioribus ad iussa exequenda; atqui canes inquirunt media, & deliberant de aptioribus ad iussa exequenda: ergo electio convenit canibus.

Supponunt ad probationem minoris experientiam sat communem canum venaticorum, qui iussi capere leporem non insistant eius vestigiis fugientis ex valle ad montem, sed via breviori, quæ experientia didicere illum iturum, præcurrunt, & sic argumentantur:

Media ad capiendum leporem ex valle fugien-

tem ad montem sunt vel insistere eius vestigiis, vel præcurrere via breuiori, & hoc vltimum est aptius; atqui canes venatici in casu posito deliberant de his duobus mediis, & sumunt quod est aptius, & magis idoneum; ergo carnes venatici inquirunt media, de iis deliberant, & sumunt magis idonea.

Solutio: Atqui canes venatici in casu posito deliberant de his duobus mediis, discernendo ea non esse amabilia propter se, sed propter aliud, & sumunt magis idoneum non determinati ab ipsius maiori aptitudine, & seruata indifferentia non utendi isto, aut sumendi aliud, Nego, non discernendo, an sint amabilia propter se, an propter aliud, & non relictis in indifferentia, sed omnino determinati ab excessu illo illius maiori aptitudinis ad sumendum magis idoneum, Concedo. & simili modo distinguendum est Consequens. Certè si canis illi venatici non determinarentur ab excessu illo maiori aptitudinis ad sumendum illud magis idoneum, aliquando illud non sumerent contra quam doceat experientia, per quam exploratum habemus nihil planè prosequi, quod non repræsentetur ipsis melius, quàm eius oppositum.

Contrà. Homines feruntur semper in id quod ipsis repræsentatur melius: ergo ex eo quod Bruta non prosequantur, nisi quod ipsis repræsentatur melius non debent dici determinari ab eo excessu bonitatis: & non relinqui ab eo in indifferentia.

Antecedens probatur. Voluntas humana non fertur in id, quod repræsentatur ipsi esse minus bonum.

bonum : ergo homines feruntur semper in id, quod ipsis repræsentatur melius.

Antecedens pr. Voluntas non præfert minus bonum maiori sine aliqua ratione ; atqui illa ratio addita illi minori bono, facit illud esse maius, & desinere esse minus : ergo voluntas humana non fertur in id, quod repræsentatur ipsi esse minus bonum.

Solutio : Voluntas non præfert minus bonum maiori sine aliqua ratione petita ex suo beneplacito, vel aliunde, Concedo. petita necessario aliunde, quam ex suo beneplacito, Nego. atqui illa ratio addita illi minori bono facit illud esse maius, & desinere esse minus, cum petitur aliunde quam ex beneplacito, transeat. cum petitur ex solo beneplacito ut sæpè fit ab iis, de quibus ait Poeta, video meliora, proboque, deteriora sequor, Nego.

Contrà. Ratio petita ex beneplacito continet maximam bonitatem, & tantam quanta est in eo, quod est esse liberum, cui vix vlla alia æquiparari potest: ergo addita minori bono facit illud esse maius, & desinere esse minus.

Solutio : Ergo addita minori bono facit illud esse maius, & desinere esse minus, si addatur ei ex parte obiecti, & actus voluntatis tendat in ipsam ameturque à voluntate in actu signato, Concedo. si non addatur ei ex parte obiecti, & actus voluntatis non tendat in ipsam, sed tantum ab ipsa oriatur, ut sæpius videre est in iis, qui probè gnari, id erga quod afficiuntur, parituum ipsis gravia incommoda, & plura quam eius oppositum, non abstinere nihilominus ab eius prosecutione, & cum queritur ab ipsis, cur ita se gerant, non afferunt

aliam rationem quàm quia ita ipsis placet, ne-
 que addunt, aut ullo modo illis venit in mentem,
 quod agere ex beneplacito, & exercere illius vim
 sit aliquid valdi magnificum, & longè præstans
 aliis bonis. Ex quo patet discrimen inter volunta-
 tem humanam, & appetitum brutorum in modo
 eligendi. Cùm enim illi, & isti proponuntur plura
 bona, illa ita erga unum afficitur, & alterum re-
 pudiat, ut possit hoc amplecti, & illud repudiare,
 penesque ipsam stet cessare ab amore eius quod a-
 mat, & transferre suum amorem in aliud. Iste
 verò, ita feratur in unum, ut non possit non ferri
 in illud; neque ferri in aliud, quippe qui careat
 vi illa intrinseca determinandi seipsum, & de-
 terminatio eius pendeat tota ab excessu illo boni-
 tatis, quem unum ex illis mediis habet supra a-
 liud, quæ si contingeret representari ei omnino æ-
 qualia in bonitate, & sine ullo planè excessu, neu-
 trum posset amare, & tandiu in illa impotentia
 eliciendi ullum planè affectum erga illa maneret,
 donec proponeretur ipsi ab imaginatione unum
 esse alio magis idoneum. Secundum discrimen est
 quod appetitus ita fertur in media ut non discer-
 nat per actum imaginationis, ad quem sequitur
 ea non esse amabilia propter se, sed propter aliud.
 Distinguat verò perfectè actus intellectus represen-
 tatiuus voluntati ipsorum, & finis, ad cuius asse-
 cutionem iuvant, unde est ut aliqui dicant appeti-
 tum amare unum propter aliud in actu exercito,
 seu ita se habere in sua prosecutione medii, & fi-
 nis, ut illud amet quia conducit ad istum, non di-
 stinguendo tamen illud esse amabile, quia conducit
 ad istum; istum verò, quia habet in se quod querit

voluntatem vero amare unum propter aliud in actu signato, hoc est, non tantum, quia unum conducit ad aliud, sed cum cognitione, & advertentia illud non debere amari propter se, bene verò istud. Quomodo autem canes venatici (& idem dicendum est de aliis brutis in quibus deprehendimus cognitiones aliquas novas, & industrias, quas non habebant ab initio) assequantur via illa breviori facilius se capturos leporem, non est ita faciliè explicare. Non improbabiler dici posse videtur species relictas in eorum imaginatione, tum plurimorum illorum actuum repetitione, quibus insistentes vestigiis leporis sequuti sunt eum ex valle, per circuitum fugientem ad montem; tum aliorum, quibus sine illo circuitu pervenire citius ad montem, ingenere ipsis imaginationem sine illo circuitu, seu via illa breviori, quæ est à loco, in quo sunt perventuros se facilius ad montem, in quo plures cæpere lepores: ita ut species leporum captorum alias in monte excitata per speciem leporis de novo surgentis è valle determinent ipsos ad cò properandum via illa breviori, quæ ipsorum oculis patet. Atque ex his inferri potest bruta non ratiocinari. Neque enim cum canis pergit ad montem via illa breviori necessarium est ut habeat in imaginatione istas præmissas, qui vult capere leporem, debet ire ad montem via breviori, sed ego volo capere leporem, & ex illis deducta hac conclusione, ergo debeo ire in montem via breviori, rectè pergat ad casum montis, sed sufficit, ut ad representationem quam ei exhibet imaginatio excitata per species relictas modo explicato in monte se capturum leporem, afficiatur, & erga illam capturam, & iter-

264 TRACT. VNIC. MORAL. DISP. II.
*illud breuius, quod quasi respersum videt bonitate il-
lius captura.*

OCTAVA CONCLUSIO:

Libertas conuenit homini.

ILLI conuenit libertas, quod positis omnibus ad agendum requisitis agere potest, aut non agere; atqui homo positis omnibus ad agendum requisitis, potest agere, aut non agere: ergo libertas conuenit homini.

Minor pr. Loqui, sedere, ambulare, &c. est agere; atqui homo positis omnibus requisitis ad loquendum, sedendum, & ad ambulandum, &c. potest loqui, vel non loqui; sedere, vel non sedere: ergo & agere, aut non agere.

Minoris veritas clarior est ipsâ experientiâ, quàm vt debeat probari: difficultas tantum est cui ex eius facultatibus conueniat ea indifferencia agendi, aut non agendi: qua de re fit

NONA CONCLUSIO:

NULLA facultas hominis præter eius voluntatem, est libera: ergo sola voluntas est libera.

Antecedens pr. De nulla alia potest esse dubium, quàm de intellectu, & appetitu sensitiuo; atqui neque intellectus est liber, neque appetitus sensituius: ergo nulla facultas hominis præter voluntatem est libera.

Prima pars de intellectu, probatur.

Nunquam potiori iure intellectus potest dici liber, quam cum obiectum apparet ei ineuidens, & obscurum; atqui tunc non est liber: ergo nunquam est liber.

Minor probatur. Illud non est liberum circa obiectum ineuidens, & obscurum, quod circa illud non potest elicere actum; atqui intellectus circa obiectum ineuidens, & obscurum, non potest elicere actum: ergo circa illud non est liber.

Minor pr. Quod astra sint paria, aut non sint paria, est obiectum nobis ineuidens, & obscurum atqui circa neutram partem quantumvis adhibeamus conatum, si non accedit imperium voluntatis, non possumus elicere actum: ergo intellectus non potest elicere actum circa obiectum obscurum, & ineuidens.

Experientia probat minorem.

Secunda pars minoris secundi argumenti, quod appetitus etiam non sit liber, pr.

Appetitus sensitivus est vel humanus, vel brutorum; atqui neuter est liber: ergo appetitus non est liber.

Prima pars minoris probatur.

Actus appetitus humani non sunt liberi: ergo neque ipse.

Antecedens pr. Actus appetitus humani vigent maximè in amentibus, ebriis, dormientibus, & fortiter resistentibus tentationi v. g. impuræ; atqui illi non sunt liberi: ergo actus appetitus humani non sunt liberi.

Minor pr. Illi actus non sunt liberi, propter

quos non meremur laudem & præmium, aut vituperium & pœnam; atqui amentes, ebrij, dormientes, & fortiter resistentes tentationi impuræ non merentur propter actus sui appetitus laudem & præmium, aut vituperium & pœnam: ergo illi actus non sunt liberi.

Priores partes minoris certæ sunt omnes, & ultima fortiter scilicet, resistentem tentationi impuræ, non mereri pœnam, probatur.

Fortiter resistentem tentationi impuræ, non meretur simul præmium, & pœnam per actus quos exercet circa illam; atqui per actum voluntatis, per quem resistit tentationi, meretur præmium: ergo per actum appetitus, quem habet circa eandem, non meretur pœnam.

DECIMA CONCLUSIO:

Libertas non impeditur per metum, per concupiscentiam, aut ignorantiam.

PER illa libertas non impeditur, per quæ non fit, vt agens positus omnibus ad agendum requisitis non possit agere, aut non agere; atqui neque per metum, neque per concupiscentiam, neque ignorantiam fit, vt agens, positus omnibus ad agendum requisitis, non possit agere, aut non agere: ergo libertas non impeditur per metum, concupiscentiam, aut ignorantiam.

Minor pr, Per illa non fit vt positus omnibus ad agendum requisitis agens non possit agere, aut non agere, quæ non imponunt necessitatem agen-

di, aut non agendi; atqui neque metus, neque concupiscentia, neque ignorantia imponunt necessitatem agendi, aut non agendi: ergo neque per metum, neque per concupiscentiam, aut ignorantiam fit ut agens possit omnibus ad agendum requisitis non possit agere, aut non agere.

Minor pr. Illud non imponit necessitatem agendi, aut non agendi, quo posito agens agit contrarium eius, quod suadet, aut potest agere, aut est æquè indifferens ad utrumque; atqui posito metu agens agit contrarium eius, in quod propendit, & posita concupiscentia agere potest contrarium eius, quod ista suadet, ac tandem posita ignorantia æquè est indifferens ad utrumque: ergo neque metus, neque concupiscentia, neque ignorantia imponunt necessitatem agendi, aut non agendi.

Prima pars minoris probatur.

Mercator proiciens merces in mare, ex metu naufragij non propendit in illam proiectionem; atqui illam exequitur: ergo posito metu fit contrarium eius, in quod agens propendit.

Secunda pars minoris precedentis argumenti, probatur.

Qui resistit graui tentationi vindictæ, auaritiæ, &c. non facit quod concupiscentia suadet; atqui multi sæpè resistent grauibz huiusmodi tentationibus: ergo non faciunt, quod illa suadet.

Tertia pars minoris superioris argumenti, probatur.

Ponitur ignorantia, cum quis explodit bombardam, aut immittit sagittam in amicum, quem

existimat esse feram; atqui cùm est huiusmodi ignorantia, indifferens est iste ad explodendum bombardam, vel non explodendum: ergo posita ignorantia indifferens est ad vtrumque.

Minor pr. Non minus indifferens est iste ad explodendum bombardam, aut non explodendum in amicum, quem existimat feram, quàm cùm non existimat; atqui cùm non existimat, est indifferens: ergo & cum est huiusmodi ignorantia.

Minor pr. Non debet non dici indifferens ad id, quod non est factururus nisi cum magna repugnantia; atqui non est explosurus bombardam in amicum, cum non existimat eum esse feram nisi cum magna repugnantia: ergo cùm non existimat amicum esse feram, est indifferens ad explodendum bombardam, vel non explodendum.



SECTIO X.

De bonitate & malitiâ actuum humanorum.

PRIMA CONCLUSIO:

Internus actus volitivus ut sit bonus tendere debet in formalem honestatem sui obiecti.

ACtus internus volitivus ut sit bonus, tendere debet in formalem honestatem sui obiecti, vel tantum in materiale; atqui non sufficit ut tendat tantum in honestatem materiale sui obiecti: ergo ut internus actus volitivus sit bonus tendere debet in formalem honestatem sui obiecti.

Minor pr. Actus qui tendit tantum in materiale honestatem sui obiecti, non amat illud; quia honestum est; atqui ut sit bonus, debet illud amare, quia honestum est: ergo non sufficit ut actus sit bonus, ut tendat tantum in honestatem materiale sui obiecti.

Minor pr. Ut actus sit bonus, debet amare suum obiectum, quia honestum est, aut quia delectabile, & iucundum; atqui non sufficit illud amare, quia iucundum est, aut delectabile: ergo debet

M v

illud amare, quia honestum est.

Minor pr. Non sufficit, vt actus sit bonus, amare obiectum propter rationem, quæ refundere non potest bonitatem, & honestatem in ipsum; atqui iucunditas, & delectabilitas refundere non possunt honestatem in actum: ergo non sufficit vt actus sit bonus quod amet obiectum, quia est iucundum, aut delectabile.

Minor pr. Iucunditas, & delectabilitas refundere non possunt in actum tendentem in ipsa, quod non habent; atqui non habent honestatem: ergo refundere non possunt honestatem.

Minor probatur. Non habent quod non sunt; atqui non sunt honestas: ergo illam non habent.

Obiicitur. Rustici habent actus internos volituios bonos; atqui illi non tendunt in honestatem formalem: ergo vt actus internus volitiuus sit bonus, non debet tendere in honestatem formalem sui obiecti.

Minor pr. Ille actus non tendit in honestatem formalem sui obiecti, qui non amat illud, quia honestum est; atqui actus rusticorum non amant suum obiectum, quia honestum est: ergo non tendunt in honestatem formalem illius.

Minor pr. Rusticorum actus non amant, quod ipsis non repræsentatur ab ipsorum intellectu; atqui non repræsentatur ipsis ratio, cur illud obiectum sit honestum: ergo non amant illud obiectum quia est honestum.

Minor pr. Non repræsentatur ipsis, quod rusticorum intellectus ignorat; atqui ignorat rationem, cur sit honestum, seu in quo posita sit hone-

itas : ergo non repræsentatur ipsis ratio , cur sit honestum.

Solutio : Atqui ignorant rationem , cur sit honestum , seu in quo posita sit honestas formaliter sumpta , Concedo. materialiter sumpta , Nego. & concessa minore , distinguendum est consequens eodem modo. Ratio est , quia ad hoc , ut actus sit bonus , sufficit , ut repræsentetur obiectum honestum , & voluntas afficiatur erga illam honestatem ; licet ille , qui habet huiusmodi representationem , distinguere non possit , in quo posita sit ratio formalis honestatis , ut contingit in rusticis. Hoc enim proprium est tantum Theologorum , aut Philosophorum moralium , quorum multi etiam in hac parte sæpè errant.

SECUNDA CONCLUSIO:

Vt actus internus sit malus , sufficit præcognosci malitiam obiecti ipsius , licet ea non ametur expressè.

ILLE actus est malus , qui est volitio implicitæ turpitudinis ; atqui ut actus sit volitio interpretatiua , & implicita turpitudinis , sufficit ut illa præcognoscatur , licet non ametur expressè : ergo ut actus internus sit malus sufficit præcognosci malitiam obiecti ipsius , licet ea non ametur expressè.

Maior pr. Actus ille est malus qui est interpretatiua volitio turpitudinis , aut expressa ; atqui non est necessarium ut sit expressa : ergo ille actus.

est malus qui est volitio implicita, & interpretatiua turpitudinis.

Maior pr. Illud non est necessarium, vt actus sit malus, quod esse non potest; atqui nullus actus esse potest expressa volitio turpitudinis: ergo non est necessarium vt actus sit malus, vt sit volitio expressa turpitudinis.

Minor pr. Turpitude obiecti est eius malitia; atqui nullus actus potest esse expressa volitio malitiæ: ergo nullus actus esse potest volitio expressa turpitudinis.

Minor pr. Malitia formaliter sumpta non potest esse obiectum prosecutionis; atqui volitio est prosecutio, & turpitude est malitia: ergo nullus actus potest esse expressa volitio turpitudinis.

Minor primi argumenti superioris vt actus sit volitio interpretatiua, & implicita turpitudinis sufficere, vt illa præcognoscatur, licet non ametur expresse, probatur.

Illud est interpretatiua, & implicita volitio malitiæ, quod est volitio expressa alicuius, cum quo ipsa cognoscitur coniuncta; atqui eum præcognoscitur malitia obiecti, est volitio alicuius, cum quo cognoscitur coniuncta esse malitia: ergo vt actus sit interpretatiua volitio, & implicita turpitudinis sufficit, vt illa præcognoscatur, licet non ametur expresse.

Minor pr. Actus ille est volitio delectabilitatis obiecti; atqui cum illa delectabilitate cognoscitur coniuncta esse malitia: ergo est volitio alicuius, cum quo cognoscitur coniuncta esse malitia.

Minor pr. Turpitude est malitia; atqui cum illa delectabilitate cognoscitur coniuncta esse

turpitude : ergo cum delectabilitate cognoscitur coniuncta esse malitia.

Minor pr. Turpitude est id , quod est prohibitum; atqui illa delectabilitas est prohibita : ergo cum illa delectabilitate cognoscitur coniuncta esse turpitude.

Obiic. tur. Non minùs requiritur, ut actus internus sit malus, quàm ut sit bonus; atqui ut sit bonus non sufficit, ut præcognoscatur bonitas obiecti ipsius: ergo neque ut sit malus, ut præcognoscatur eiusdem malitia.

Maiores pr. Non minùs requiritur, ut obiectum refundat malitiam in actum quàm honestatem; atqui cum malitiam refundit, est malus, & cum honestatem, bonus: ergo non minùs requiritur, ut actus internus sit malus, quàm ut sit bonus.

Solutio: Negatur maior. Et ratio est, quia ut ait D. Dionysius bonum est ex integra causa, malum autem ex quocumque defectu, ac proinde cum pauciora requirantur ut aliquid desit, quàm ut nihil desit, seu sit aliquid integrum, ea possunt sufficere ad dandam malitiam, quæ non sufficiunt ad communicandam honestatem.

TERCIA CONCLUSIO:

Tota bonitas formalis posita est in actu interno.

BONITAS formalis tota posita est in actu interno solo, vel simul cum externo; atqui non est posita in externo: ergo tota posita est in actu interno.

Minor pr. Bonitas formalis non est posita vlllo modo in eo, quod nullo modo est formaliter honestum; atqui actus externus nullo modo est formaliter honestus: ergo nullo modo est posita in eo.

Minor pr. Illud non est formaliter honestum, quod non est formaliter liberum; atqui actus externus non est formaliter liber: ergo neque honestus.

Minor pr. Ille actus non est formaliter liber, qui non oritur immediatè à potentia formaliter libera; atqui actus externi non oriuntur immediatè à potentia formaliter libera: ergo non sunt formaliter liberi.

Minor pr. Quod non oritur immediatè à voluntate, non oritur à potentia formaliter libera; atqui actus externi non oriuntur immediatè à voluntate: ergo neque à potentia formaliter libera.

Maior pr. Sola voluntas est formaliter libera: ergo quod non oritur immediatè ab illa, non oritur etiam immediatè à potentia formaliter libera.

Obiicitur. Actus externus nihil est interni; atqui in actu externo posita est partialiter bonitas formalis: ergo tota bonitas formalis non est posita in actu interno.

Minor pr. In eo est posita partialiter bonitas formalis, quod est verè bonum formaliter; atqui actus externus est verè bonus formaliter: ergo bonitas formalis est posita in eo partialiter.

Minor pr. Illud est verè bonum formaliter, quod simul cum alio bono etiam formaliter facit vnam maiorem bonitatem formalem; atqui actus ex-

ternus simul cum interno, qui est bonus formaliter, facit vnā maiorem bonitatem formalem: ergo est verè bonus formaliter.

Minor pr. Eleemosyna est actus externus; atqui eleemosyna simul cum actu interno bono facit vnā bonitatem maiorem formalem : ergo & actus externus.

Solutio : Atqui eleemosyna simul cum actu interno perfectè efficaci, & habenti sine ipsa æqualem durationem, & intensiōem, facit vnā maiorem bonitatem, Nego. non perfectè efficaci, & non habenti æqualem durationem, aut intensiōem, Concedo. & eodem modo consequens distinguendum est.

Contrā. Non minus eleemosyna simul cum actu interno perfectè efficaci, & habenti æqualem durationem, & intensiōem, facit maiorem bonitatem formalem, quàm maceratio corporis in honorem Dei, & collatio alicuius beneficii cum suis actibus internis; atqui maceratio corporis, & collatio beneficii cum suis actibus internis perfectè efficacibus, & habentibus æqualem durationem, & intensiōem, faciunt vnā maiorem bonitatem formalem: ergo & eleemosyna.

Solutio : Atqui maceratio corporis, & collatio beneficii cum suis actibus internis, faciunt maiorem bonitatem in genere meriti, Nego. in ratione satisfactionis, aut gratitudinis externæ, Concedo. & eodem modo distinguendum est consequens. Non est maius meritum in maceratione corporis externæ iunctæ internæ, quàm sit in sola interna, est tamen maior satisfactio; Hæc enim cum consistat in pœnalitate aliqua subeunda, ad illam multum confert externa quæ non suscipitur sine la-

bore, & difficultate. Similiter non maiorem internam gratitudinem debemus his, à quibus accepimus beneficium aliquod, quàm his à quibus non accepimus si per ipsos non stetit, quominus illud nobis conferrent; quia tamen qui contulerunt de facto, id fecerunt cum aliquo suo incommodo, & nostro commodo debemus his maiorem externam gratitudinem, gratitudo enim obligat ad par pari referendum; seu respondendum voluntati interne per aliam voluntatem internam, & interne simul cum externa per voluntatem non solum internam, sed etiam externam.

Contrà. Sola maceratio corporis interna non habet tantum bonitatis etiam in genere meriti quantum simul cum externa: ergo nulla solutio.

Antecedens pr. Non magis maceratio corporis interna sola habet tantum bonitatis, quantum simul cum illa, quàm voluntas dandi infinitas eleemosynas simul cum illis, aut etiam voluntas faciendi quidquid boni unquam fecit Beata Virgo simul cum his, quæ fecit; atqui voluntas dandi infinitas eleemosynas, & faciendi quidquid boni unquam fecit Beata Virgo, non habet tantum bonitatis sola, quantum simul cum illis eleemosynis, aut operibus præstitis à Beata Virgine: ergo maceratio corporis interna non habet tantum bonitatis, quantum simul cum externa.

Solutio: Atqui voluntas dandi infinitas eleemosynas, & faciendi quidquid boni unquam fecit Beata Virgo, non habet tantum bonitatis, quantum simul cum illis eleemosynis, aut operibus præstitis à Beata Virgine, si fuerit perfecte efficax, non fuerit perfecte efficax, Nego. si non fuerit perfecte efficax, Concedo. ergo maceratio corporis interna non

habet tantum bonitatis, quantum simul cum externa, si fuerit perfecte efficax, Nego. si non fuerit perfecte efficax, Concedo.

Contrà. Sunt multi qui habent voluntatem perfecte efficacem dandi infinitas eleemosynas, & faciendi quidquid boni fecit Beata Virgo; atqui illi non habent tantum bonitatis quantum habet Beata Virgo, aut haberet ille, qui daret infinitas eleemosynas: ergo voluntas dandi infinitas eleemosynas, & faciendi quidquid boni unquam fecit Beata Virgo, non habet tantum bonitatis sola, quantum simul cum illis eleemosynis, aut operibus præstitis à Beata Virgine, etiamsi fuerit perfecte efficax.

Solutio: Negatur maior. Ratio est, quia voluntas illa tantum dici potest perfecte efficax, ut cuius poni potest eius obiectum, & de facto ponitur, nisi impediatur; Nullus autem est, qui habeat voluntatem, ut cuius poni possint infinitæ eleemosynæ, aut fieri quidquid boni fecit unquam Beata Virgo: Ad primum enim requiruntur infinitæ diuitiæ, ad secundum verò gratiæ illæ omnes, & auxilia extraordinaria, beneficio quorum Beata Virgo bene est operata, quæ nobis non conceduntur.



S E C T I O X I.

*An dentur actus indifferentes in indi-
uiduo, & quænam sit regula huma-
norum actuum.*

P R I M A C O N C L U S I O :

*Dantur actus humani indifferentes in
individo.*

ACTVS humani indifferentes in individo sunt actus liberi, neque boni, neque mali; atqui dantur actus humani singulares liberi, neque boni, neque mali moraliter: ergo dantur actus humani indifferentes in individo.

Minor pr. Nolitio exequendi consilium aliquod Evangelicum, est actus liber singularis; atqui ille neque est bonus, neque malus: ergo dantur actus singulares liberi, neque boni, neque mali.

Prima pars minoris probatur primò.

Omissio maioris boni non est bona; atqui illa nolitio est omissio maioris boni: ergo non est bona.

Maior pr. Omissio illa non est bona, quæ non est præmio digna; atqui omissio maioris boni non est præmio digna, aut laudabilis: ergo non est bona.

Secunda pars minoris superioris argumenti, nolitioem i. lam non esse malam, probatur.

Illa nolitio non est mala, quæ non est prohibita; atqui illa nolitio non est prohibita: ergo non est mala.

Minor pr. Nolitio illius rei non est prohibita, cuius obiectum non est imperatum, seu sub præcepto; atqui obiectum istius nolitiois non est imperatum, aut sub præcepto: ergo ista nolitio non est prohibita.

Maiores pr. Illa nolitio non est prohibita, à qua non tenemur abstinere; atqui non tenemur abstinere à nolitioe eius, cuius obiectum non est imperatum seu sub præcepto: ergo nolitio illius rei non est prohibita, cuius obiectum non est imperatum, seu sub præcepto.

Minor pr. Non tenemur abstinere à nolitioe eius quod non tenemur velle; atqui non tenemur velle illud, quod non est nobis imperatum: ergo non tenemur abstinere à nolitioe eius, cuius obiectum non est imperatum.

Minor superioris argumenti, scilicet obiectum illius nolitiois non esse imperatum, probatur.

Obiectum illius nolitiois est consilium aliquod euangelicum: atqui consilia euangelica non sunt nobis imperata: ergo obiectum istius nolitiois non est sub præcepto, & imperatum.

Minor pr. Quod est merum consilium non est sub præcepto; atqui consilia euangelica sunt merè consilia: ergo non sunt sub præcepto, & imperata.

Obiicitur. Actus humani indifferentes in individuo sunt actus singulares liberi, neque boni, neque mali; atqui actus singulares liberi hominis sunt, aut boni, aut mali: ergo non dantur actus

humani indifferentes in indiuiduo.

Minor pr. Illi actus sunt boni, qui referuntur in honestum finem, & illi mali, qui non referuntur in honestum finem; atqui nulli sunt nostri actus singulares liberi, qui non referantur in honestum finem, aut referantur: ergo actus singulares nostri liberi sunt aut boni, aut mali.

Secunda pars maioris probatur; prima enim est certa.

Illi actus sunt mali, quibus non satisficit obligationi naturali, & diuinæ; atqui non satisficit obligationi naturali, & diuinæ actibus, qui non referuntur in honestum finem: ergo actus, qui non referuntur in honestum finem, sunt mali.

Minor pr. Est obligatio naturalis, & diuina referendi nostros omnes actus in honestum finem: ergo non satisficit obligationi naturali, & diuinæ, actibus qui non referuntur in honestum finem.

Antecedens pr. Est obligatio naturalis, & diuina tendendi semper in beatitudinem; atqui non tendimus semper in illam, cum non referimus omnes nostros actus in honestum finem: ergo est obligatio naturalis, & diuina referendi nostros omnes actus in honestum finem.

Maiores pr. Est obligatio naturalis, & diuina amandi semper beatitudinem; atqui non potest amari semper, quin in illam semper tendamus: ergo est obligatio naturalis tendendi semper in beatitudinem.

Maiores pr. Beatitudo est summum bonum; atqui est obligatio amandi semper summum bonum: ergo & amandi semper beatitudinem.

Minor pr. Summum bonum est summa perfectio; atqui est obligatio amandi semper summam perfectionem: ergo est obligatio amandi semper summum bonum.

Minor pr. Est obligatio amandi summam perfectionem, quantum debet amari; atqui ut ametur quantum debet amari, debet semper amari: ergo est obligatio eam semper amandi.

Solutio: Atqui *ut ametur quantum debet amari*, debet semper amari à nobis, hoc est, ei non debemus displicere, Concedo. hoc est debemus ei semper placere, Nego. ergo est obligatio eam semper amandi, hoc est, ei non displicendi, Concedo. hoc est ei semper, & in omnibus positivè placendi, Nego.

Contrà. Amor, qui debetur summæ perfectioni est ut ipsi placeamus in omnibus: ergo nulla solutio.

Antecedens pr. Summa perfectio est summè amabilis: ergo amor, qui ei debetur, est ut ipsi placeamus in omnibus.

Consequentia pr. Amor debitus summè amabili, est amor eius continuus, & non interruptus; atqui amor eius continuus, & non interruptus est placere ipsi semper, & in omnibus: ergo amor, qui ei debetur, est ut ipsi placeamus in omnibus.

Solutio: Amor debitus summè amabili est amor eius continuus, & non interruptus si ita velit, & inbeat, Concedo. si liberum nobis relinquant ut sit, vel non sit continuus, & summus, Nego. ergo amor, qui ei debetur est ut ipsi placeamus in omnibus, & quantum possumus, si ita

velit, & iubeat, Concedo. si liberum nobis relinquat ut faciamus, quidquid possumus, vel non faciamus, Nego. Tunc enim nihil fit contra eius beneplacitum, nec consequenter peccatur in illud.

Contra. Deus non potest non iubere, ut placeamus ipsi quantum possumus: ergo nulla solutio.

Antecedens pr. Deus non potest velle, quod est inhonestum, & contra rationem; atqui est inhonestum, & contra rationem Deum non iubere, ut placeamus summè amabili quantum possumus: ergo Deus non potest non iubere, ut placeamus ipsi quantum possumus.

Minor pr. Est inhonestum, & contra rationem nolle reddi summè amabili quod ei est debitum: atqui non iubere ut placeamus summè amabili quantum possumus, est nolle, ut reddatur summè amabili quod est ei debitum: ergo est inhonestum, & contra rationem Deum non iubere, ut placeamus summè amabili, quantum possumus.

Solutio: Atqui non iubere ut placeamus summè amabili quantum possumus, cum relinquit nobis liberum ut id non faciamus, est nolle, ut reddatur summè amabili, quod est ei debitum, Nego. cum non relinquit hoc nobis liberum, Concedo. Quod autem possit hoc nobis relinquere liberum inde debet colligi, quod non teneatur velle sibi necessario aliud suum bonum, quàm intrinsecum; quale non est gloria ipsius extrinseca quam ipsi confert noster amor. Hoc enim bonum cum sit finitum, & creatum non est dignum amore necessario, & infinito, qualis esset ille, quo Deus non posset relin-

querere nobis liberum cum non amare semper.

Quod autem reliquerit nobis illam libertatem ex eo clarum est primò, quod quæ fuit maioris perfectionis proposuerit nobis tantum per modum consilii, & ita proponi nobis doceat nos Ecclesia, teneat communis sensus fidelium, & declararit ipse Christus respondens iuveni querenti quid faciendo vitam æternam possideret, serua mandata, & petens deinde, cum voluit proponere ipsi quæ erant maioris perfectionis, ipsius consensum, si vis perfectus esse.

Secundò, quia si esset obligatio faciendo quicquid possumus in honorem Dei omnia, fere nostra opera essent peccata: vix enim ullum est, quod habeat omnem illam perfectionem, quam possemus ipsi dare: sit tam intensum ex tot, actam prestantibus motibus &c. ac possit esse.

Contrà. Deus præcipit nobis ut placeamus ipsi, & eum amemus quantum possumus: ergo non relinquit nobis liberum ut id non faciamus.

Antecedens probatur. Qui diligit Deum ex toto corde, ex tota anima, & ex totis viribus suis placet ipsi, & eum amat quantum potest; atqui Deus præcipit nobis primo præcepto decalogi, ut diligamus eum ex toto corde, ex tota anima, & ex totis viribus nostris: ergo & ut ipsi placeamus, & eum amemus quantum possumus.

Solutio: Qui ex toto corde, ex tota anima & ex totis viribus suis diligit Deum; hoc est non tantum vitat eius offensionem, sed etiam procurat eius beneplacitum, placet ipsi, & eum amat, quantum potest, Concedo. vitat tantam eius

offensionem, Nego. atqui Deus precipit nobis primo precepto decalogi ut ex toto corde, ex tota anima, & ex totis viribus eum diligamus, hoc est vitemus eius offensionem. Ad eam siquidem vitandam vita etiam ipsi non est parcendum nobis, Concedo. hoc est non tantum vitemus eius offensionem, sed etiam procuremus eius maius beneplacitum, seu quod magis ipsi placeat, Nego. Ut enim facilius nobis esset consequi beatitudinem, noluit à fragilitate, & imbecillitate nostra exigere quidquid poterat, & quod si exigisset, praevidebat ei reddendum esse à paucissimis. Quare cum ea, quae sunt præter illa, quae necessaria sunt ad vitandam Dei offensionem, non prestamus, neque bene, neque male agimus: non bene, quia nolumus quod esset Deo gratius: neque male, quia non est obligatio id præstandi, ac proinde ille noster actus est indifferens in individuo, seu neque bonus, neque malus: & consequenter negari non debet dari actus indifferentes in individuo.

Contrà. Non potest vitari Dei offensa cum actus aliquis noster non est bonus: ergo nulla solutio.

Antecedens probatur. Non vitatur Dei offensa, cum actus est contra rectam rationem; atqui cum actus aliquis noster non est bonus, est contra rectam rationem: ergo ut vitetur Dei offensa, actus debet esse bonus.

Maior probatur. Recta ratio præscribit ut omnes actus nostri sint boni: ergo cum aliquis non est bonus, est contra rectam rationem.

Antecedens probatur. Recta ratio non præscribit ut non sint boni: ergo præscribit ut sint boni.

Consequentia probatur. Non est medium inter præscribere ut non sint boni, vel ut sint boni: ergo cum recta ratio non præscribit, ut non sint boni, præscribit ut sint boni.

Respondeo dari medium inter præscribere ut non sint boni, & præscribere ut sint boni, scilicet, præscribere ut non sint mali.

Contrà. Actus ille, quem recta ratio præscribit non esse malum, est bonus: ergo nulla solutio.

Antecedens pr. Ille actus est bonus, qui fit ex præscripto rationis, & secundum illam; atqui actus quem recta ratio præscribit non esse malum, fit ex præscripto rationis, & secundum illam, ergo est bonus.

Solutio: Ille actus est bonus, qui fit ex præscripto rationis, hoc est ex affectu erga ipsam rectam rationem, & quia hoc præscribit recta ratio, Concedo. Tunc enim tendit in formalem honestatem, hoc est, sine ullo affectu erga præscriptum illud recte rationis & representationis quod non sit malitia in obiecto, quod appetit, Nego. atqui actus, quem recta ratio præscribit non esse malum, fit ex præscripto rationis, hoc est, ex affectu erga rectam rationem, Nego. hoc est sine affectu erga illam, sed cum sola advertentia non esse ullam malitiam in obiecto, quod appetitur, Concedo. Hoc autem non sufficit ut actus sit bonus. Ad bonitatem enim eius requiritur, ut supra probauimus, ut tendat in ipsam honestatem formalem, seu in obiectum honestum quia honestum est, v. g. in casu posito in obiectum illud quod representatur ei non esse malum, quia non est malum: In hoc siquidem reperitur honestas formalis.

Contrà. Sufficit ut actus sit bonus ut non fiat contra rationem, licet non fiat ex affectu, quia non est contra rectam rationem: ergo licet actus, qui fit ex præscripto rationis, non fiat ex affectu erga illam, non desinit esse bonus.

Respondeo negandum esse antecedens, quia ut non semel diximus, honestas formalis non refundit bonitatem in actum, nisi ab eo expressè ametur. Certè qui facit aliquid quod videt profuturum alteri, si non amet expressè, & non moveatur ab utilitate & commodo, quod iste percipiet ex eo, quod agit non meretur gratitudinem istius, neque exercet erga illum beneficentiam, quia non vult, & non afficitur erga rationem formalem beneficentia erga istum, quæ est ipsius utilitas & commodum: quod licet prævideat, non agit tamen intuitu illius, & propter illud.

SECUNDA CONCLUSIO:

Regula immediata humanorum actuum est interna cognitio, seu conscientia.

ILLUD est proxima regula, & immediata humanorum actuum, à quo proximè, & immediatè dicuntur boni, aut mali; atqui à cognitione interna, seu conscientia dicuntur boni vel mali immediatè: ergo proxima & immediata regula humanorum actuum est interna cognitio, seu conscientia.

Minor probatur. Actus humani dicuntur immediatè boni, & mali vel à præcepto, vel ab obiecto, vel à cognitione; atqui non dicuntur

immediatè boni, vel mali ab obiecto, aut à præcepto : ergo dicuntur immediatè boni, aut mali à cognitione.

Minor probatur. Non dicuntur immediatè boni & mali actus humani ab eo, inter quod, & ipsos ut sint boni & mali mediare debet aliud; atqui inter præceptum, obiectum, & actus humanos, ut sint boni, aut mali, mediare debet aliud: ergo non dicuntur immediatè boni, aut mali ab obiecto, aut præcepto.

Minor pr. Mediare debet cognitio : ergo & aliud.

Antecedens pr. Mediare debet illud, per quod voluntati innotescere debet præceptum, aut obiectum, & eius qualitas; atqui cognitio est illud, per quod innotescit præceptum, aut obiectum voluntati : ergo mediare debet cognitio.

Maior pr. Mediare debet illud, per quod voluntas tenetur vitare, aut ponere huiusmodi actum; atqui illud, per quod ei innotescit præceptum, aut obiectum, facit ut teneatur ponere, aut vitare huiusmodi actum: ergo mediare debet illud, per quod voluntas tenetur vitare, aut ponere huiusmodi actum.

Minor pr. Repræsentatio est illud, per quod innotescit obiectum, aut eius qualitas; atqui cognitio est huiusmodi repræsentatio : ergo cognitio est illud; per quod innotescit præceptum, aut obiectum voluntati.



DISPUTATIO III.

De Passionibus.

SECTIO VNICA.

Quid, & quotuplex sit passio.

PASSIONEM esse genere qualita-
tis non est dubium. Cum enim hæc
sit accidens absolutum aliud à quā-
titate, seu accidens non modale, &
non quantum, & cuius effectus
formalis non est conferre impenetrabilitatem
partium, se benè vel malè afficere suum subie-
ctum communicando ei suum esse absolutum, &
per illud iuuando ipsum, vel in suo esse, vel in
operari, vel alio quocunque modo; hoc verè &
propriè conuenit passioni; vt facile erit intelli-
gere ex declaratione conclusionis sequentis.

PRIMA CONCLUSIO:

Definitio passionis: Affectus appetitus sensitivi ex apprehensione boni aut mali, aptus inferre aliquam corporis mutationem non naturalem, illi soli convenit.

ALIA quibus posset dici convenire, sunt actus intellectus, imaginationis, aut voluntatis; atqui non convenit illis: ergo illi soli convenit.

Minor pr. Non convenit illis, quæ non excitant per se ullam alterationem in corpore; atqui actus intellectus, imaginationis, & voluntatis per se nullam excitant alterationem in corpore: ergo non convenit illis.

Minor pr. Illa nullam per se excitant alterationem in corpore, quæ nullam habent vim applicandi potentiam motivam; atqui actus imaginationis, & intellectus nullam habent huiusmodi vim: ergo nullam excitant per se alterationem in corpore.

Due primæ partes minoris probantur.

Illæ non habent vim applicandi potentiam motivam, quibus ipsa non subest; atqui potentia motiva non subest imaginationi & intellectui: ergo actus imaginationis, & intellectus nullam habent huiusmodi vim.

Tertia pars minoris præcedentis argumenti probatur.

Illud per se non excitat alterationem in corpore, quod totum esse potest, & sæpè de facto est.

sine vlla huiusmodi alteratione; atqui actus voluntatis possunt esse, & sæpè de facto sunt sine vlla huiusmodi alteratione: ergo non excitant illam per se.

Minor pr. In anima separata sunt multi actus voluntatis; atqui illi nullam excitant alterationem in corpore: ergo actus voluntatis possunt esse, & de facto sunt sine huiusmodi alteratione.

SECUNDA CONCLUSIO:

Sunt sex passiones appetitus vt est concupiscibilis.

AMOR, odium, desiderium, fuga, delectatio, & tristitia sunt passiones appetitus vt concupiscibilis: ergo sunt sex passiones appetitus, vt concupiscibilis.

Antecedens probatur. Illud est passio appetitus concupiscibilis, quod est actus appetitus tendentis in bonum, aut malum præcisè, seu non aduertendo esse arduum; atqui amor, odium, desiderium, fuga, gaudium & tristitia sunt actus appetitus tendentis in bonum, aut malum præcisè, aut non aduertendo esse arduum: ergo sunt passiones appetitus vt concupiscibilis.

Minor pr. Actus appetitus, qui fiunt ex præuia cognitione boni aut mali, nihil repræsentante de eius præsentia, aut absentia, aut si præsentiam eorum, aut absentiam repræsentet, nihil explicante de eorum arduitate, & difficili acquisitione, aut vitiatione, tendunt in bonum, aut malum præcisè, aut non aduertendo esse arduum; at-

qui amor, desiderium, delectatio, odium, fuga, & tristitia sunt actus appetitus facti ex prævia cognitione boni aut mali nihil repræsentante de eorum præsentia, aut absentia; aut si præsentiam eorum, aut absentiam repræsentet, nihil explicante de eorum arduitate, & difficili acquisitione, aut vitiatione: ergo amor, desiderium, gaudium, odium, fuga, & tristitia sunt actus appetitus tendentis in bonum, aut malum præcisè, aut non aduertendo esse arduum.

Minor pr. Amor est affectus erga bonum præcisè, desiderium tendentia in illud ut absens, & gaudium quies in ipso præsentem. Odium verò est nolitio mali præcisè, fuga nolitio ipsius absentis, & tristitia nolitio ipsius præsentis: ergo amor, desiderium, & gaudium: odium, fuga, & tristitia sunt actus appetitus facti ex prævia cognitione boni, aut mali, nihil repræsentante de eorum præsentia, aut absentia, aut si eorum præsentiam, aut absentiam repræsentat, nihil explicante de eorum arduitate, & difficili acquisitione, aut vitiatione.

TERTIA CONCLUSIO:

Quinque sunt passionibus appetitus, ut irascibilis.

Spes, desperatio, timor, audacia, & ira sunt passionibus appetitus irascibilis: ergo sunt quinque passionibus appetitus ut irascibilis.

Minor pr. Illud est passio appetitus, ut irascibilis, quod est actus appetitus tendentis in bo-

num, aut malum vt arduum; atqui spes, desperatio, timor, audacia, & ira sunt actus appetitus tendentis in bonum aut malum vt arduum: ergo sunt passioness appetitus, vt irascibilis.

Prima pars minoris probatur.

Quod est prosecutio efficax boni ardui, ac futuri cum aliqua anxietate circa euentum, tendit in bonum vt arduum; atqui spes est huiusmodi prosecutio: ergo & actus appetitus tendentis in bonum vt arduum.

Secunda pars minoris prioris argumenti probatur.

Quod est affectus diffidentiae erga bonum arduum reputatum impossibile, aut nimis difficile appetenti tendit in bonum arduum; atqui desperatio est huiusmodi affectus: ergo & actus appetitus tendentis in bonum vt arduum.

Tertia pars minoris superioris argumenti probatur.

Auerfio à malo futuro, vt difficilè vitabili, tendit in malum arduum; atqui timor est huiusmodi auerfio: ergo & actus appetitus tendentis in malum vt arduum.

Quarta pars minoris superioris argumenti, probatur.

Affectus efficax erga executionem mediocrium difficultatibus auertendis idoneorum, vt talia sunt, tendit in bonum arduum; atqui audacia est huiusmodi affectus: ergo etiam actus appetitus tendentis in bonum vt arduum.

Quinta pars minoris probatur.

Desiderium vindictae ex malo accepto tendit in malum arduum; atqui ira est huiusmodi affe-

Actus : ergo est quoque actus appetitus tenentis in malum, ut arduum.



DISPUTATIO VLTIMA.

De Virtutibus.

SECTIO VNICA.

Quid, & quotuplex sit virtus.



N explanandis virtutis causis hęc non immerabimur, tum propter rationem initio præcedentis disputationis allatam, tum quia ex iis, quæ putata sunt à nobis hoc tractatu, aut præcedenti facile colligi possunt. Cum enim eius operationes sint actus voluntatis, & intellectus, dubitari non potest primò quin illa, quæ est causa efficiens, & materialis istorum, eadem quoque sit principium productivum, & receptivum ipsius virtutis. Certum esse debet secundò huius causam finalem censendam esse solam honestatem, quam diximus disput. 2. sect. 10. non refundere suam bonitatem in actum, qui tendit in subiectum, in quo est, nisi ametur expressè. Tenendum est tertio dignitatem & excellentiam, quam vna virtus habet supra aliam, desumi debere ex perfectiori obiecto aut perfectiori modo in illud tendendi, eadem planè ratione, qua actus intellectus, & voluntatis

N v

dicuntur alij aliis superiores, aut inferiores. Afferendum est 4. quod existimant aliqui, virtutes omnes esse inter se connexas, seu vnā haberi non posse, quā alix omnes pariter habeantur, falsum esse absolute loquendo, illudque palam docere experientiam, qua constat multos, qui alicui vitio sunt dediti, iræ v. g. facilitatem habere ad exercendos actus aliarum virtutum, liberalitatis v. g. fortitudinis, &c. Quare in nullo alio sensu id potest esse verum, quā si intelligatur eum, qui habet aliquam virtutem in perfectissimo gradu, in eodem etiam debere habere alias: propterea quod cum istarum obiecta habere possint varia impedimenta, aut adiumenta ad facilius exercitium illius, tolli non possint illa perfectissime, neque hæc poni, nisi in pari gradu perfectionis possideantur virtutes illæ, quibus incumbit id præstare, & sine quibus hoc haberi non potest.

PRIMA CONCLUSIO:

Virtutis definitio, habitus operatiuus boni non conuenit aliis à virtute.

Alia quibus dici posset conuenire, sunt intellectus, voluntas, aut habitus vitiosi; atqui non conuenit illis: ergo non conuenit aliis à virtute.

Maior pr. Non conuenit illis, quæ non sunt inclinatio, aut si sint, sunt tantum huiusmodi inclinatio ad actus malos; atqui intellectus, & voluntas non sunt inclinatio, & facilitas, & ha-

bitus vitiosus est tantum inclinatio ad actus malos: ergo non conuenit intellectui, neque voluntati, neque habitibus vitiosis.

Due primæ partes minoris probantur: tertia enim clara est.

Quod est potentia, siue simpliciter necessarium ad suos actus non est facilitas, & inclinatio; atqui intellectus, & voluntas sunt potentia, & quid simpliciter necessarium ad suos actus: ergo non sunt facilitas, & inclinatio.

SECUNDA CONCLUSIO:

Benè diuiditur virtus in infusam, & acquisitam.

Virtus benè diuiditur in illa, quæ sunt verè habitus electius boni, sunt quidquid iste habitus, & distinguuntur inter se; atqui virtus infusa & acquisita sunt habitus electius boni, sunt quidquid iste habitus, & distinguuntur inter se: ergo virtus benè diuiditur in infusam, & acquisitam.

Secunda pars minoris probatur.

Illud est verè habitus electius boni, quod inclinatur ad actus honestos; atqui virtus infusa & acquisita inclinant ad actus honestos: ergo sunt verè habitus electius boni.

Antecedens probatur. Infusa inclinatur ad actus supernaturales bonos, & acquisita ad actus naturales etiam bonos; atqui actus naturales, & supernaturales boni sunt honesti: ergo inclinant ad actus honestos.

Secunda pars minoris superioris argumenti, virtutem infusam, & acquisitam esse, quidquid virtus, probatur.

Virtus infusa, & acquisita continent quidquid virtus : ergo sunt quidquid virtus.

Antecedens probatur. Virtus est inclinatio ad actus honestos ; atqui continent quidquid illa inclinatio : ergo continent quidquid virtus.

Minor probatur. Illa inclinatio, & comprincipium actuum honestorum est acquisitum, vel propriis actibus, vel infusum à Deo ; atqui acquisita continet illud, quod est acquisitum nostris actibus, & infusa quod Deus nobis infundit : ergo infusa & acquisita continent quicquid illa inclinatio.

Tertia pars minoris superioris argumenti, pr.

Virtuti infusæ & acquisitæ conveniunt prædicata contradictoria : ergo virtus infusa & acquisita distinguuntur.

Antecedens pr. Acquiri nostris actibus, & non acquiri sunt prædicata contradictoria ; atqui primum convenit virtuti infusæ & secundum acquisitæ : ergo prædicata contradictoria conveniunt illis.

Minor pr. Illi convenit acquiri nostris actibus, quod verè illis acquiritur, & illi non acquiri quod non acquiritur ; atqui virtus acquisita acquiritur nostris actibus, & infusa non acquiritur : ergo convenit virtuti acquisitæ acquiri nostris actibus, & infusæ non acquiri.

Atque ex his patet virtutem acquisitam Moralem rectè dici posse habitum voluntatis acquisitum bonis actibus, quo homo suos affectus, &

actus rectæ rationis, & prudentiæ lege moderatur: per hoc enim quod acquiratur bonis actibus, distinguitur à virtutibus infusis, & per hoc quod dirigatur à prudentia, distinguitur à virtutibus intellectualibus.

TERTIA CONCLUSIO:

Virtus moralis latius sumpta benè diuiditur in prudentiam, iustitiam, temperantiam, & fortitudinem.

VIRTUS moralis latius sumpta est illa, quæ dirigit actus honestos, aut eos exequitur ex eius directione; atqui virtus, quæ dirigit actus honestos, aut eos exequitur ex eius directione, benè diuiditur in prudentiam, iustitiam, temperantiam, & fortitudinem: ergo virtus moralis benè diuiditur in prudentiam, iustitiam, temperantiam, & fortitudinem.

Minor probatur. Prudentia, iustitia, temperantia, & fortitudo sunt verè virtus dirigens actus honestos, aut eos exequens ex eius directione, sunt præterea quidquid huiusmodi virtus, & distinguuntur inter se: ergo virtus dirigens actus honestos, aut eos exequens ex eius directione benè diuiditur in prudentiam, iustitiam, temperantiam, & fortitudinem.

Prima pars antecedentis probatur.

Prudentia præscribit modum quo faciendi sunt actus honesti, & iustitia, temperantia, & fortitudo exequuntur, quod illa præscribit: ergo sunt verè virtus dirigens actus honestos, aut eos

exequens. ex eius directione.

Secunda pars antecedentis prioris argumenti, probatur.

Prudentia, iustitia, temperantia, & fortitudo complectuntur, quidquid virtus dirigens actus honestos, aut eos exequens ex eius directione: ergo sunt verè quidquid huiusmodi virtus.

Antecedens pr. Prudentia continet hoc quod est dirigere actus honestos: & iustitia, temperantia, & fortitudo hoc, quod est, eos exequi: ergo prudentia, iustitia, temperantia, & fortitudo complectuntur quidquid virtus dirigens actus honestos, aut eos exequens ex eius directione.

Prima pars antecedentis probatur.

Illud continet hoc quod est dirigere actus honestos, cuius est præscribere, & dictare modum operandi honestè; atqui proprium est prudentiæ præscribere, & dictare modum operandi honestè: ergo prudentia continet hoc, quod est dirigere actus honestos.

Secunda pars antecedentis prioris argumenti, probatur.

Illud continet hoc, quod est exequi actus honestos, ad quod reuocantur omnia opera honesta facta ex directione prudentiæ; atqui omnia nostra opera facta ex directione prudentiæ, reuocantur ad iustitiam, temperantiam, & fortitudinem: ergo iustitia, temperantia, & fortitudo continent hoc, quod est exequi actus honestos.

Minor pr. Opera honesta facta ex directione prudentiæ, vel respiciunt bonum proximi, vel bonum operantis; atqui opera honesta respicientia bonum proximi facta ex directione pruden-

riæ reuocantur ad iustitiam; respicientia verò bonum operantis, reuocantur ad temperantiam, aut fortitudinem: ergo omnia opera honesta facta ex directione prudentiæ, reuocantur ad iustitiam, temperantiam, & fortitudinem.

Prima pars minoris probatur.

Opera honesta respicientia bonum proximi, reuocantur ad eam virtutem, cuius est vitare nocumentum proximi; & procurare eius bonum; atqui iustitiæ est vitare nocumentum proximi, & procurare eius bonum: ergo opera honesta facta ex directione prudentiæ, reuocantur ad iustitiam.

Secunda pars minoris prioris argumenti, pr.

Opera honesta respicientia bonum operantis, vel constituunt mediocritatem in appetentia necessariorum, vel confirmant hominem circa mala, quæ pati debet, aut superare in exercitio virtutis; atqui quæ constituunt mediocritatem in appetentia necessariorum, reuocantur ad temperantiam, & quæ confirmant hominem circa mala, quæ pati debet, aut superare in exercitio virtutis, spectant ad fortitudinem: ergo opera honesta respicientia bonum operantis, reuocantur ad temperantiam, aut fortitudinem.

Minor pr. Opera honesta constituentia mediocritatem in appetentia necessariorum, aut confirmantia hominem circa mala, quæ pati debet, aut superare in exercitio virtutis, pertinent ad eas virtutes, quarum est appetere cum mediocritate necessaria, aut superare difficultates occurrentes in exercitio virtutis; atqui temperantiæ est appetere cum mediocritate necessaria, & fortitudinis superare occurrentes difficultates in exercitio

300 TRACT. VNIC. MORAL. DISP. IV.

virtutis: ergo quæ constituunt mediocritatem in appetentia necessariorum, reuocantur ad temperantiam, & quæ confirmant hominem circa mala quæ pati debet, aut superare in exercitio virtutis spectant ad fortitudinem.

Tertia pars minoris superioris argumenti scilicet, virtutes illas esse distinctas, pr.

Illa sunt distincta, quorum sunt diuersi conceptus; atqui sunt diuersi conceptus prudentiæ, iustitiæ, fortitudinis, & temperantiæ: ergo prudentia, iustitia, temperantia, & fortitudo distinguuntur.

Minor pr. Conceptus prudentiæ repræsentat virtutem præscribentem, & docentem modum honestè operandi: conceptus iustitiæ repræsentat virtutem vitantem nocumentum proximi, & procurantem eius bonum: conceptus temperantiæ repræsentat virtutem præscribentem mediocritatem in appetentia necessariorum, & conceptus fortitudinis repræsentat virtutem superantem difficultates occurrentes in exercitio virtutis; atqui illi conceptus sunt diuersi: ergo diuersi sunt conceptus prudentiæ, iustitiæ, temperantiæ, & fortitudinis. Faxit Deus, cui nostram hanc explicationem philosophiæ volumus consecratam, & eius sanctissimæ Matri, vt in earum exercitio semper viuamus, & tandem promissum illis præmium consequamur.

FINIS.

INDEX RERVM,

quæ in hoc quarto Tomo disputantur.

A

ACTVS humanus est
is qui fit ab homi-
nè liberè operante. 110
Vt sit moralis non suf-
ficit vt sit liber. 111

Dantur actus indiffe-
rentes in indiuiduo.

Vt actus sit bonus de-
bet amare expressè ho-
nestatem. 269

Vt verò sit malus suffi-
cit præcognoscere ma-
litiam. 271

Internus solus habet
tantum bonitatis, quã-
tum simul cum exter-
no. 273

Amicitia inter Deum,
& homines verè datur.
63

Appetimus necessariò
quoad specificationem,
beatitudinem in com-
muni. 90

Et quoad exercitium
etiam in vno sensu. 91

In alio non. 93

Est in nobis appeti-
tus innatus ipsius. 24

Et elicitus etiam. 25

Ille qui est intentus,
est non necessarius. 27

Non est in nobis inna-
tus simpliciter natura-
lis beatitudinis super-
naturalis. 100

Potest tamen esse eli-
citus. B 103

BONVM idem est ac
conueniens. 3

Nullum est aliud quàm
honestum, iucundum,
& vrile. 4

Diuiditur etiam in sũ-
mum, & non summũ. 6

Bonum, quã bonũ non
potest odio haberi. 33

Propter beatitudinem
nõ appetit homo quid-
quid appetit. 45

Beatitudo nostra ob-
iectiua est Deus. 52

Non est honor, pote-
stas, diuitiæ, voluptas,
aut quidquam huius-

Index Rerum.

- modi. 53 lam præmittendi. 44
- Beatitudo formalis I
- hominis consistit primariò in actibus intellectus, & secundariò in actibus voluntatis, ut proprietatibus. 55
- Naturalis consistit in cognitione, & amore summi boni. 64
- Ut actus sit bonus, debet amare expressè honestatem. 269
- C
- Concupiscentia nõ causat inuoluntarium ut plurimùm. 146
- Minuit liberum. 149
- D
- Deus non est causa mali moralis. 14
- Potest causare habitus vitij, & erroris. 18
- F
- plures **F**ines simpliciter ultimi intendi non possunt. 38
- Finis simpliciter ultimi intentio non præcedit necessariò intentiones finium particularium. 41
- Nec est obligatio illam præmittendi. 44
- I
- I**gnorantia antecedens causat inuoluntarium simpliciter. 151
- Concomitans causat non voluntarium. 153
- Consequens causat voluntarium simpliciter. 154
- Ea, quæ est circumstantiæ substantialis, facit actionem inuoluntariam. 156
- L
- L**ibertas non est immunitas à coactione. 159
- Nec voluntas ultimi sequax iudicij. 204
- Nec amplitudo voluntatis, & adhæsiõ cum Deo, aut actualis amor Dei. 240
- Non est etiam posita in indifferentia iudicij. 239
- Est potentia ad vtrumlibet, indifferentia ad agendum, vel non agendum, & potentia agendi, vel non agendi positis omnibus ad agen-

Index Rerum.

dum requisitis. [244](#)

Non impeditur per metum, nec per concupiscentiam. [266](#)

Non conuenit brutis. [255](#)

Conuenit homini cuius sola voluntas est libera. [264](#)

M

Malum absolute sumptum, & in se est minus bonum, seu ens defectuosum, & imperfectum. [7](#)

Malum alteri non est necessario non ens. [13](#)

Malum, quod malum non potest amari. [24](#)

Metus causat inuoluntarium secundum quid. [137](#)

N

Naturæ puræ status est possibilis. [72](#)

O

Omissio potest esse voluntaria, etiam si non sit præceptum de opere omisso. [118](#)

Effectus ex ea secutus est indirecte volun-

tarius ei, qui cum præuisum non impedit cum potest. [119](#)

Omissio pura libera dari potest. [123](#)

P

Præcepta diuina non sunt impossibilia. [252](#)

S

Status puræ naturæ est possibilis. [72](#)

V

Volentia causat inuoluntarium simpliciter. [136](#)

Virtus quid sit in genere. [294](#)

Et moralis latius sumpta illa diuiditur in infusam, & acquisitam, & ista in prudentiam, iustitiam, temperantiam, & fortitudinem. [295](#)

Eius actus diuiduntur adæquatè in elicitos, imperatos, & mixtos. [108](#)

Eorum diuisio in necessarios, & liberos non est essentialis. [ibidem](#)

Voluntarium est illud quod est à principio in-

Index Rerum.

trinseco cognoscente	tum.	113
singula in quibus est	Eliciti sunt immedia-	
actio.	114. tē voluntarij.	116
Non debet esse voli-	Non imperati.	117

F I N I S.

EXTRACT DV PRIVILEGE DV ROT.

PAR Lettres de Priuilege en datte du 26.iour d'Avril 1660. il est permis à GASPARD METVRAS, Marchand Libraire à Paris, de r'imprimer ou faire r'imprimer vn Liure intitulé *Chabroni Philosophia*, en quatre Volumes. Et deffenses sont faites à toutes personnes d'imprimer ledit Liure pendant le temps & espace de sept années, qui commenceront du iour que lesdits Volumes seront acheuez d'imprimer, à peine de tous dommages & interests, mesmes de confiscation des Exemplaires contrefaits, ainsi que plus au long est contenu esdites Lettres. Signées par le Roy en son Conseil.

GVITTONNEAV.

Registré sur le Liure de la Communauté le 4. May 1660. IOSSE SYNDIC.

Acheué d'imprimer pour la premiere fois; sur le present Priuilege, le 24. Septembre 1663.





